

МУХАММАД  
АЛИ

ҮЛҮФ  
САЛТАНАТ



МУҲАММАД АЛИ

# УЛУФ САЛТАНАТ

*Тарихий роман*

Биринчи китоб

**ЖАҲОНГИР МИРЗО**

«ШАРҚ» НАШРИЁТ-МАТБАА  
АКЦИЯДОРЛИК КОМПАНИЯСИ  
БОШ ТАҲРИРИЯТИ  
ТОШКЕНТ — 2003

84 үз  
M-96

Сүнгсүэ муаллифи —  
Матёкуб ҚҮШЖОНОВ

**Мұхаммад Али**  
Улуг салтанат: Тарихий роман: 1-китоб: Жаҳонгир  
Мирзо. — Т.: Шарқ, 2002. — 336 б.

Үз.2

© «Шарқ» нашриёт-матбаа акциядорлик  
компанияси Баш таҳририяти, 2002 й.

№ 438112

## БИРИНЧИ БОБ

### I

Наврўзи айём арафасида ўттиз тўрт ёшли Темурбекнинг қўшини Жайхундан ўтиб, Балҳдан узоқ бўлмаган Бўйё деб аталган мавзеда чодир тиқди. Тарих ҳижрий 771 йил<sup>1</sup> кириб келмоқда эди. Ҳар Наврўз байрамини дилкаш Кеш юртида хеш-акраболар даврасида хурсандчиликлар билан ўтказишни хуш кўрадиган Темурбекнинг одатини тарк қилиб, сафарга отланишига етарли асослар бор эди...

Ўн беш кун аввал Кешида, Темурбекнинг чорборида бўлган машваратда Мовароунахрнинг ҳозирги вазияти, Самарқанд, Тошкент, Хўжанд, Бухоро шаҳарларидаги аҳвол ҳақида сўз борди. Кутимаганда ўрта бўйли, кўзлари иргиб чиққан, қирқлар чамасидаги Амир Мусо ўрнидан туриб қўл қовуштирида-да, бундай деди:

— Бир хатарли ишни сизларга айтишни маъқул кўрамен. Амир Ҳусайндан эҳтиёт бўлмоқ керак. Тушундик, у яна макру ҳийлалар йўлига кирибдур... — Амир Мусо «тушундик» сўзини бўлса-бўлмаса ишлата берар эди. — Гафлатда қолмайлик, деймен. Ул бадбахт илгидан ҳар нарса келадур....

Амир Мусонинг сўзлари қанчалик хатарли бўлмасин, даврадагиларга унчалик таъсир этмади. Табиати баҳор ҳавоси каби ўзгарувчан бу амирнинг аҳду паймони ҳам шунга муносиб, бир куни Темурбек тарафида айюҳаннос солиб от сурса, бошқа куни сидқидил Амир Ҳусайн қиличини чопар, феъл-авторини аниклаб бўлмас даражада бир одам эди. Хатти-ҳаракатларида қоимлик йўқлиги унинг ўз жонини ҳам минг азоб-уқубатга отарди, аммо у буни англаб етмасди.

Ҳамма жимиб қолди. Шу палла чорбонинг ўнг томонидан қандайдир отнинг зорланиб қишинағани эши-

<sup>1</sup> Милодий 1370 йил.

тилди. Овоз бошқа қайтарилимади. Уйнинг тўрисида ўлтирган Темурбек ҳам, даврадаги амирлару баҳодирлар ҳам сўз қотмас эдилар. Ниҳоят, Темурбекнинг рўбарўсида чўк тушган дароз бўйли, кўркам юзли, соқол-мўйлаби текис қирқилган хушбичим Амир Сайфиддин некўз одати бўйича бир томоқ қириб олди-да, Амир Мусога қаратса жиёдий тарзда:

— Хўш... Муддаонгиз не? Муддаодан сўз юритингиз, муддаодан! — деди, — Ул бадбаҳт илгидан ҳар нарса келадур, дейсиз... Бу бирлан хўш... нима демакчи бўласиз ўзи?..

— Тағин фитна тухмини сочиб, турли ғавғоларга бошламанг бизни! — бирдан сўзга аралашди қисқа мўйлабли, узун чўққи соқолли Амир Жоку барлос. — Авваллари ҳам кўрганмиз, ҳа!..

Амир Мусонинг яккам-дуккам сийрак қошлари чимирлди, бўйи тағин ҳам чўкиб, ўлтирган жойида юмалоқ бир буюмдай бўлди-қолди, фақат катта пешонаси ўзини қаёққа яширишни билмай дўнграйиб туради.

— Тушундик... — деди у аста, беўхшов қўлларини тиззаларига қўйиб, иргиб чиққан кўзларини жавдиратиб барчага бир-бир қарап экан. — Менга ишонмаётирсизлар... Аммо мен билганимдан айтамен...

— Тўғри гапнинг гадосимиз, ақлинг етадур, — босик, оҳангда сўз бошлиди Амир Довуд дувлат. Темурбек эгачиси Қутлуғ Туркон оқанинг шавҳари<sup>1</sup> ўйлаганини одамнинг бетига шартта айтадиган, ҳақиқат йўлида ўлимдан ҳам тап тортмас қирқ беш ёшлардаги паҳлавон келбат бир киши бўлиб, хўroz уриштириш жонидили эди. Унинг ўнг юзида билинар-билинмас қилич изи кўриниб туради. — Хўroz бўлиб тўғри сўзни десанг, танимиз сенга садқа! Лекин макиёнлик қилиб бизни алдасанг, додингни Оллоҳга айтасен!

Амир Мусога жон кирди. Амир Довуд дувлатнинг вазмин айтган сўzlари унга мадад бергандай бўлди.

— Куйганимдан айтамен, тақсиrlар! — ўрнидан туриб кетди у яна, — Амир Ҳусайн тузини тотиб кўрганмен... Биламен!.. Амир Ҳусайннинг Темурбекка хусумати борлиги аёндур. Ваҳший ниятлар вужудини қамраб олган. Нияти Темурбекка заҳмат етказмакдур...

— Рост айтадур, Амир Ҳусайннинг аҳдига ишонч йўқ! — деди Амир Жоку барлос. Ўтган йили ёзда

<sup>1</sup> Шаҳар — эр, маъносида.

қаронавслар<sup>1</sup> билан бўлган жангда, Қаршида отдан йиқилиб, қаттиқ лат еди, шундан узок вақт белини ололмай юрди. Ҳозир ҳам бўксаси бир саншиб қўйди. Ҳаяжонланганидан, яқингинада қилич тегиб кетиб иккига ажралиб, япасқи бўлиб қолган бурни қизғиш тусга кирди.

— Ул гараз ва макр асиридур, қизигар! — Буни Темурбекнинг синглиси Ширин бика шавҳари Амир Муайяд арлот айтди. Унинг овози бўниқ, ўзи жуссадор, шоп-мўйлов бўлиб, ёши ўттиз бешларда эди. Амир Муайяд арлот бирдан ўзининг охирги сўзидан хижолат тортиб қолди. Чунки Темурбек ўз ҳузурида ҳар хил қатлу ом ва қирғинлар ҳақида, айниқса, аёллар тўғрисида турфа чандик гаплар бўлишига йўл қўймасди. Хайрият, ҳозир Темурбек ўзини эшитмаганга олди, индамади.

— Амир Мусонинг Темурбекка содиқлиги қанчаликдур, айта олмаймен — Амир Сайфиддин некўз тинч ўлтиrolмади. — Аммо ғаддор Амир Ҳусайн тўғрисидаги сўзларининг асло ёлғони йўқ!

Қаршилик амир бу сўзларни эшитиб қувониб кетди. Хайрият, қаҳру ғазаблар оқимини Амир Ҳусайн томонга бура олди! Фурсатни бой бермай Темурбекка юзланди ва дадил деди:

— Темурбек! Тушундик... Меңдан ўттан бўлса бир қошиқ қонимдан кечасиз... Бундан буён сидқидил ихлос камари ила белимни маҳкам боғлаб, давлатингиз шарафи йўлида қолғон умримни бахшида этгумдир!

— Бир қошиқ қонимдан кечасиз, дейдир... Ажабо, унинг кечадуррон қони қолдиму эркан ўзи? — шивирлади заҳарханда аралаш Амир Довуд дуғлат Амир Сайфиддин некўзга. Шивирлаб гапирилган бўлса-да, бу ҳаммага эшитилди.

Темурбек Амир Мусонинг тутумини тушуниб турарди. Билади, Амир Мусо ҳам катта умидлар билан бош кўтариб юрибди, юрт бошқариш нияти йўқ, эмас... Темурбекнинг эсида бор, Амир Мусо Боязид жалоийрнинг ўғли Али Дарвеш ва Тармаширинхоннинг хотунларидан бири Ўрда-хотун билан тил биритишиб, фиску фасодларга тўла мактуб битдилар ва уни Амир Ҳусайнга йўлладилар. Бу гап, албатта, Амир Му-

1. Қаронавс — Туркистонга келиб ерли ҳалқ билан аралашиб кетган мўгулларни ишундай агардилар.

содан чиққан. Мактубнинг мазмуни, тахминан, мана бундай эди: «Хусайнбек, огоҳ бўл! Темурбек сенга, Қобулшоҳ хон ҳазратларига душманликни кўзлаб юрибdir. Сенинг юрт бошида эрканингдан у ниҳоятда шуръам, кўнгли кину варазларга тўлуғdir. Сен билан уруш тилида сўзлашмакка қаттиқ бел боғлагон...» Амир Хусайн бу битикни, ўзидан қўшиб-чатиб шишириб хонга етказди. Хон зудлик билан Темурбекка ёрлиғ юборди. Ёрлиғда, тегишли кишилар барчаси Самарқандда Ўрда-хотун ҳузурида жам бўлсунлар ва бор ҳақиқатни очсунлар, деб ёзилган эди. Хотира саҳифаси гуноҳу гумонлардан холи бўлган Темурбек ортиқча хаёлларга берилмай Самарқандга жўнади. Унинг келишидан хабар топган Амир Мусо ва шериклари рўбарў бўлишдан қўрқиб, шармандалиқдан Хўжанд тарафга от солдилар. Ўрда-хотун эса уялиб қолди, Темурбекнинг юзига қарай олмади. Амир Мусонинг Қарши муҳорабасида Бухоро учун бўлган саваҳдаги мунофиқлари ҳам ҳар бири бир дафтар... Энди Амир Хусайн давлатининг заволи аён бўлиб қолган бир пайтда Амир Мусо эс-хушини ўнглаб, Темурбек олдига юкуниб келди, чунки Темурбекнинг иқбол қуёши порлашга турган эди. Агар узоқ-яқиндан бирор ихлос билан келиб унинг мажлисига кирса, қайси тоифадан бўлмасун, давлати дастурхони неъматидан бенасиб этмак Темурбекнинг одатида йўқ, эди. Амир Мусога ҳам, келибсан, келганинг чин бўлсин, деб қўйди холос.

Аслини олганда, Амир Мусо жуда тўғри айтди. Темурбек даврадагиларга қулоқ солиб ўлтирди, уларнинг кўнглида ҳам ўхшаш фикрлар гужрон ўйнарди. Ҳа, Амир Хусайн ҳеч кимга дўстлик қилмайди, дўст бўлмоқчи бўлганларни ўзи кўксидан нарига итаради. Амир Хусайнга умид боғлаш бамисли Қорақум саҳроси ўртасида қаср қуришдек бир гап. Эҳ-ҳе, Темурбек бунинг неча марта гувоҳи бўлди, неча бор бошдан кечирди! Амир Хусайн мизожида нохуш аломатлар пайдо бўла бошлади. Мол-дунёга ҳирс ва баҳиллик каби иллатлар вужудини чулғаб олди. Одамни ёмон дейиш учун шуларнинг ўзи кифоя эди, энди уларга бадфөълик, писандсизлик, қўрслик, гуурланиш, ноўрин кеккайиш ва ёлғиз ўзиникини маъқуллаш сингари хислатлар ҳам қўшилди. Мана, қарийб ўн йил бўлаётir, у имкон топса, албатта, Темурбекка панд

беришга уринадир. Унинг даваллиги туфайли Туркистон амирларининг боши бир ерга қовушмади. Агар у панд бермаганда, Чинос ёнида Лой жангидәк улар Илёсхўжа қўшини устидан бешак ғолиб келган бўлардилар, ким билади, кейин юрт тақдири қандай кечарди. Афсус!.. Фиску фасодларга ўралиш, вафосизлик тўрида қолишлар-чи? Салтанат учун фидойилик кўргизмаётисан, деб Темурбекнинг йигитларига атай солинган товоnlар-чи?..

Темурбекнинг дўстлари — Амир Жоку барлос, Амир Сайфиддин некўз, Аббос баҳодир ва Давлатшоҳ баҳшилар бор-будларини йиғишириб берсалар ҳам уларга солинган товонни қоплай олмадилар. Дўстларини музтарликда қолдирмаслик учун кешлик амир олтину кумушдан иборат катта маблағ саришталади, ҳатто чорасиз қолиб завжаси Улжой Туркон оқанинг қимматбаҳо билакузук ва исирғасини ҳам қўшиб юборишга мажбур бўлди. Амир Ҳусайн уларни таниди, чунки синглисига ўзи ҳадя қилганди, аммо очкўзлик ва ҳирс кучлилигидан қайтариб беришга кўзи қиймади. Яна уч минг динор зарур эди.

Темурбек ўйлаб қўйган сўнгти чорасини кўллади: сара арғумоқларидан ўттизтасини ажратиб товонга элтишларини буюрди.

Товон муаммоси мутлақо ҳал бўлди деб ўйлаган Темурбек хотиржам суюкли ўғли Жаҳонгир Мирзо билан мана шу чорбоғда қиссаҳон Мавлоно Убайддан Искандар Зулқарнайн ҳақида ҳикоят тинглаб ўлтирас эдилар.

— ...Дунёдан кўз юмсан, тобутда қўлимни чиқариб қўйингиз! — дебди Искандар подшо. — Дунёни олган подшо у дунёга қўли қуруқ кетаётганини қўриб қўйсунлар... Искандар подшо ўттиздан ўтиб, ёш туриб олами ни тарк эттан экан...

Шу пайт шошилинч Амир Ҳусайн чопари келиб қолди:

— Мовароуннаҳр ҳукмдори сиз юборрон тулпорларни ўз уюрингиздан эканлигини билиб, қабул этмай рад қилдилар. — деди ҳансираҳ чопар. — Олампаноҳ, шундоғ дедилар: «Менга нақдина лозим... Хоразмшоҳ, Ҳусайн Сўфи қошига дурри якто қизи Хонзода хонимни сўраб совчи юбормакчимен. Катта арзигулик сармоя зарурдир...»

Шу пайт Темурбекнинг, иттифоқо, Жаҳонгир Мир-

зога кўзи тушиб қолди. Баланд бўйли, дуркун, юмшоқ кўнгил, тиник юзли, ёрқин мўйлаби эндиғина сабза урган амирзода чехрасида қандайдир ўзгариш сезилди, у нимадир демоқчи бўлди, ҳаяжонланганидан юзларига қизиллик юргурган, кўзлари чақнар эди. Темурбек бунга дикқат қилди, аммо бу тағайюр<sup>1</sup> нимадан — Искандар қиссасиданми ёки чопар сўзидан — шуни билолмади. Чопарга тез жавоб бериш керак эди. Темурбек деди:

— Амир Ҳусайн жанобларига айтингиз, мен розимен. Буюрилғон сармоя тезда мамлакат ҳукмдорига етказилур!

Темурбек ишни узоқда чўзмади, кўзда тугилган маблағни нақд қилиб Солисаройга жўнатди.

Бунга унча кўп фурсат ўттани йўқ, Хутталон<sup>2</sup> ҳокими Амир Кайхусрав билан Ҳисори шодмон<sup>3</sup> ҳокими Шайх Муҳаммад Баён судуз иккиси Темурбекка қутлуғ нома битишиди. Номада кўмак сўрашиб, душманлари Амир Ҳусайн билан курашда яқдил ва ҳамжиҳат бўлишга аҳд-паймон айлаганларини билдиришган эдилар. Тасодифан нома Амир Ҳусайн қўлига тушиб, ул сирдан огоҳ бўлди. Айни пайтда Темурбек ҳам бундан боҳбар эди. Лоп этиб ўша кунларда Темурбекнинг йўли Арҳанг шахрига тушиб қолди. Амир Ҳусайн уни шоду хуррам кутиб олди, меҳмондорчиликни ҳам ўрнига қўйди, лаҳза бўлсин иззату икром расмини тарк этмади. Улар Панж дарёси соҳилида хушҳаво бир масканда шакаргуфторлик қилмоқда эдилар. Темурбек мезбон оғзини кўп пойлади, дилидан: «Садоқатга аҳд-паймонимиз устиворлиги исботи учун Ҳусайнбек ўша нома ҳақида, шубҳасиз, нимадир дейди ва юрагидагини яширмайди, чунки кўнгил сирининг очилиши — кўнгилнинг соғлигига гаровдир», деган сўзлар кечди. Аммо Амир Ҳусайн нома ҳақида лом-мим демади! Темурбекнинг дилида адсоват туйғуси пайдо бўлди, бироқ валламатлик шиҷоати ҳам вазминлик қуввати кучли эканлигидан, ичидагини сиртига чиқармади. У кетишга ҳозирланди. Икки амир бир-бирлари билан сирбой бермай хайрлашдилар.

<sup>1</sup> Тағайюр — ўзгариш.

<sup>2</sup> Хутталон — Вахш ва Панж дарёлари оралиғидаги вилоят номи.

<sup>3</sup> Ҳисори шодмон — ҳозирги Ҳисорнинг қадимий аталиши.

Яқингинада тағин бир воқеа юз берди. Амир Ҳусайн айримлар иғвосига учиб, аҳду қасамни унугиб, ҳийла қилишга ўтибди. Ўзига ортиқча баҳо бериб юборибди. Бир одам жўнатиб, Темурбекнинг Кеш ва унинг атрофидаги эл-улусидан кимки номдор бўлса, битта ҳам кўймай барчасини Балхга кўчириб юборсунлар, деб амр этибди. Тантиликни кўрингиз! Устига устак, Амир Муайяд арлот шаробхўрлик вақтида қизишиб Жоварчининг ўғлини уриб ўлдириб қўйибди ва қочиб кетибди. Инчунин, унинг ҳарами, яъни Темурбекнинг синглиси, Ширин бикани Балхга элтсунлар, деб киши йўллади. Тағин, Темурбек Амир Мусони кўч-кўрони билан унинг ихтиёрига жўнатиши ҳам лозим эмиш. Ҳаммасидан ошиб тушгани — Амир Ҳусайннинг унинг ҳузурида қолдирилган фарзанди аржуманд, олам аҳлининг амирзодаси Жаҳонгир Мирзони андишасизларча қайтариб юборгани бўлди. Бу Темурбекка оғир ботди... Оранинг бузилгани аниқ эди. Салтанатининг елкаси Темурбекнинг шиҷоатидан қувват олиб турибди, бас! Орани бузишга Амир Ҳусайннинг ўзи интилмакда, эришган бўлса ўзи эришди. Темурбек шу пайтгача арқонни узун ташлаб келди, худонинг ўзи шоҳид. Ортиқ кўнгилчанлик, бепарволик ва мурасага бориш энди Кеш амирига ярашмайди. Андишанинг отини қўрқоқ, қўймасинлар!..

Шуларни кўнглидан бир-бир ўтказар экан, Темурбек ўзича истеҳзо аралаш жилмайиб қўйди. Даставвал Темурбек Амир Ҳусайнга ошкор қарши чиқиш хусусида сўзлапидан ўзини тийди. Чунки унинг синашта дўстлари, издошлари Амир Ҳусайн билан ўртада аҳду паймон борлитини яхши билишади, бу ҳақда оғиз очса, ўша аҳд-паймонга шикаст етади, Темурбек буни асло истамасди. Сониян, Темурбек юрт бошқараман деб, жуда ҳам етиша олмай турган экан-да, давлат таъмаси кўнгил кўзини хира этибди-да, деган ўйга боришлари мумкин. Энди эса бошқа гап. Энди барча амирларнинг ўзлари, хусусан, Амир Мусо, Амир Ҳусайн кирдикорларидан очиқ-ошкора гапириб туришибди, фурратни бой бермайлик, сўнг надоматларга қолиб юрмайлик, дейишмоқда.

— Амир Ҳусайнга қарши курашда бир тану бир жон бўлмак зарур! Уни бир ёқли қиласизу тинчиймиз! — қаътий деди Амир Жоку барлос, амирларнинг ичида улуғи, у элликларда эди. Қизғиш туста кирган

япасқи бурнини силаб қўяркан давом этди: — Ҳазрат Соҳибқирондан бир ўтиңчимиз бордур — бу сафар энди қаршилик қилмайдилар!

— Қаршилик қилмайдилар, зеро ул зот Кешдан бўладилар!.. — лутф айлади кутилмаганда Амир До-вуд дувлат. Даврада гурр этиб кулгу кўтарили, бу лутфнинг ўз ўрнига тушганидан далолат берарди. Темурбек мийигида жилмайиб қўйди.

Орага яна жимлик чўқди. Ҳамма Темурбекка кўз тиккан, валламат амирнинг нима дейишини кутарди.

Темурбек қадди-қомати расо, баланд бўйли, кенг пешонали, қошлари қуюқ, кўзлари катта-катта бир йигит эди. Кўз қараси майнин, мулоим бўлиб, қучли ўқтам овоз билан гапирар, шошилмас, овозида кишини ўзига тортувчи қандайдир жозиба, сеҳр яширганди. Қуръон туширганда, овози номдор қориларни-ки сингари ширали ва ёқимли эшитиларди. Сеистонда захмдор бўлган ўнг қўли битиб кетган, аммо вақти-вақти билан, айниқса, ёмғирли кунларда оғриб қўяр, азоб берар эди. Ўнг оёри эса букилмайдиган бўлиб қолган, юрганда оқсоқланганини билдирамаслик учун шошилмай битта-битта қадам ташлаб юарди. Шунда унинг оқсоқлангани бироз сезилиб қоларди холос. Темурбек кўпроқ отда юришни ёқтиради, ўлтирганда, табиийки, парқув ёстиқларга суюниб ёнбошлаб оларди. У, одатда супада ёки сўрида бўлсин, энг юқорида ўлти-рар, қолганлар ҳилол шаклида қўйирокда жойлашар эдилар.

— Пайғамбаримиз саллаллоҳу алайҳи васаллам айт-ронларидек, ҳар ишда кенгашга суюнамен... — сўз бошлади Темурбек. — Кенгаш не қарорга келса, шул қарорни адо этмак вазифамдур. Дунё — илон ва чаён-ларга тўла олтин сандиқнинг нақ ўзи экан. Аммо, бу сандиқда одам шаклидаги илонлар ва чаёнлар йифин-мишдир. Сиз тўғри дедингиз, эй аҳли умаро, сўзингиздан дўстимиз Ҳусайнбекнинг душманлик йўлига кирвони равшан бўлди... Шариат қонунига биноан, фит-на қилгувчини даф этмак вожиб саналур, алал оқибат савоб ҳисобланур. Бас, Амир Ҳусайнни даф этишга киришмак энг аввалги заруратдир! Аммо қўйилажак қадам асосини мустаҳкам ердан изламак лозим, йўқ эса охирда иложсизлик ва чорасизлик, афсус ва надомат исканжасида қолгоймиз. Худо у кунларни боши-мизга солмасун!

- Илоҳо, ўзи қўлласун!
- Фаним юзини тескари қилсун!
- Тангри кўмак берсун!
- Худо ёр бўлсун!

Амирлар шундай сўзлар билан ўз хоҳиш-иродаларини билдирилар, Темурбек давом этди:

— Амир Довуд ва Амир Сайфииддин жаноблари! Зудлик билан мардонавор мухолифат эълон қилинсун! Амир Жоку жаноблари! Черик тўплашга фармон берилсун! Оллоҳга таваккал қилурмиз, аммо таваккал ортини тангри кўмаги ила мустаҳкамламак ҳам жоиздур! Амир Муайяд! Сиз, тақсир, Хинду Қарқара қипчоқни топингиз, токи ул Сайхундан ўтиб Ўтрорға қочиб кетғон Шайх Мұҳаммад Баён сулдузни қидирсун, чақмоқ қадам ила қошимизга еткурсун! Олой томонларда юрғон Амир Кайхусравга бошқа чопар юборингиз, тайин қилингизким, Хутталон ҳокими ўз чериги бирлан сафимиздан ўрин олсун! Оқибати мақбул бўлажаги уқтирилсун!

Шиддатли ва кескир фармонга мувофиқ Хўжа Илғор қишлоғи ёнидаги кўм-кўк барра майсалар билан қоплана бошлаган кенг майдон лашкаргоҳ этиб белгиланди. Темурбек беадад қўшинни тартибга келтириди, манглойни аниқ қилди, бошқаришни Амир Жоку барлосга топширди. Амир Мусони қўлга<sup>1</sup> сардор этиб тайинлади, амирни ҳам синаш, ҳам айтилган сўзларнинг амалий исботини кўриш зарур эди. Темурбекнинг ўзи бир гуруҳ баҳодирлар ичида юлдузлар ўрамидаги ойдек балқиб йўлга тұщди.

Водариғо, Амир Мусони синаш муддати бир кундам ҳам нарига ўтмади! Бекарор амир ўзига хос бўлган ажабтовур саъжия, тутумга мувофиқ иш кўрди. Балх томон жўнашлари биланоқ, уни ҳар турли ваҳималар қуршаб кела бошлади. Хузорга етмай, васвасалар исканжасида қолган тойживут ўмоқидан<sup>2</sup> бўлган Амир Мусо аҳд-паймонни унугди, лашкарни пинҳона ташлаб Самарқанд томонга қочиб кетди. Ҳеч ким унинг ортидан накомиший<sup>3</sup> қилиб ҳам бормади. Воқеадан хабар топғанлар, ичида: «Э, аттанг!», «Афсус!», «Нотавонлик қилибдур!», «Тушунмадик!..» деб ачингувчи,

---

<sup>1</sup> Манглой, қўл — ҳарбий қисмларнинг номлари.

<sup>2</sup> Ўмоқ — уймоқ, аймоқ, қабила.

<sup>3</sup> Накомиший — душман лашкарини таъқиб этиш.

киноя қылгувчилар бўлди. Амирлар ушбу воқеадан Темурбек нечук аҳволга тушганини била олмай қолдилар. Темурбек ўзини ҳеч нарса юз бермагандек тутди, бирон нима демади. Тезликда нури дийдаси Жаҳонгир Мирзо, Суюргатмиш ўғлон, Амир Муайяд арлот, Амир Сорибуғ жалойирлар шижаоти ила лашкарнинг манглой расмини безади ва илғор этиб жўнатди. «Қўлни ўз қўлимга олмасам бўлмас», деб қўйди Темурбек ва сипоҳлар руҳини кўтариш учун шундай қиради.

Жаҳонгир Мирзо ҳимматидаги манглой қўшин Термизга кирав-кирмас, Амир Ҳусайннинг Ҳиндушоҳ билан Амир Халил бошчилигидаги лашкари, уларни узоқдан кўриб ҳавосати босдими, бас кела олмасликларига кўзлари етдими, ҳарқалай, тир-камонни йифиштиришга турдилар ва Балхга томон чекиндилар. Амир Ҳусайн шу куниёқ катта қўшиннинг Балхга бостириб келаётганидан хабар топди. Аммо у лашкар Темурбекка тегишили эканлигини билмасди.

## II

Темурбекнинг лашкари қўнган жой Бўйё мавзеининг хушманзара далаларидан бири эди. Кўклам ўзининг беадад яшил майсалар сипоҳини бошлаб Туркистон водийларига бостириб келди. Унинг яшартиргувчи жонбахш нафасидан тупроқ яшилланиб борар, унча олис бўлмаган хушбичим адирларда битта-яримта лолақизрадоқлар «лов» этиб кўзга ташланиб қоларди. Замин байрамга безанмоқдайди. Тоғдан эслан шабадада энди қора қишининг жунжиктургувчи совуқ саси эмас, балки ҳали олдинда турган ёруг ёзниң ёқимли олис нафаси кўпроқ сезиларди, шабада кишига хуш ёқарди. Ажабо, бу ерда тоғ томондан ҳам шабада эсади, дарё тарафдан ҳам. Темурбек мамнун бўлди, лашкар учун яхши жой танлашибди. Лашкар учун танланган манзилда, аввало, сув яхши бўлиши лозим, аскар истиқомат қиласиган ер кулай, айни пайтда тепароққа жойлашиши даркор, офтобга рўбарў келишдан қочиш зарур. Темурбекнинг чодири даланинг ўргасидаги тепалик ерда савлат тўкиб турарди.

Термиз кечувидан ўтиш хийла мушкул бўлди, сув кўпайиб қолибди. Тун оқшом келиб жойлашдилару ухламоққа тутиндилар, чунки эртага наҳор туриш ло-

зим, эргага — Наврӯзи айём. Темурбекни йўл азоби анча ҳориттан экан, қаттиқ уйқуга кетди. Шу кеча ғаройиб бир туш кўрди. Хўжанд сувида даҳшатли сел, тошқин айқириб келаётган эмиш. Темурбек дарёнинг ўртасида, селда бир синиқ тахта устида ўлтирасмиш. Бетиним саждата бош уриб, бечоралар оҳ-додини тинг-лагувчи Оллоҳдан нажот сўраётган эмиш. Шу палла маҳобатли бир тўлқиннинг қўйруги уни уриб учириб юборибди! Ҳушидан кетган Темурбек у ёгини билмайди, кўзни очиб қараса, дарёнинг Самарқанд томонидаги соҳилида эмиш. Ёнгинасида ваҳшатли улкан дарё унинг оёқларини ўпид ҳайқириб оқиб ётганмиш...

Темурбек уйғониб кетди.

Борлик сукунатга чўмганди. Лашкар уйқуда, фақат тўрт томонда олисларда қоровулларгина бедор тонгни қаршилардилар, уларнинг олдиларида гулханлар ло-вуллаб ёнарди.

Мулозим сув тайёрлади, Темурбек таҳорат олди, ювинди. Сўнг чодир ичида баҳмал жойнамозни ёзиб бомдод намозини ўқишга тутиндиган.

Кейин узоқ вақт Оллоҳ таолога муножот қилиб, мўмин-мусулмонларнинг таянчи яратганинг ёлриз ўзи эканлигига имон келтирди; ниятларига қушойиш тилаб, пайтамбарлару азиз-авлиёлар ҳакига сидқидилдан дуолар қилди. Қанча ўлтириди, чамалай олмади. Ногаҳон ярим уйқу ва ярим бедорлик орасида унга ғойибдан: «Темурбек! Фатҳу зафар сенга ёр бўлғай!» деган овоз эшитилди. Ёки эшитилгандай бўлдими? ... У овоз эгасини кўрмокчи бўлиб атрофга аланглади. Чодир ичида ўзидан бошка ҳеч ким йўқ эди. «Оллоҳ ҳар нарсага қодир!» деб қўйди Темурбек. Нечундир кўнгли ёришиб кетди, ташқарига чиқди. Осмоннинг фавқулодда тиниқ, худди артиб қўйилгандай топ-тоза, мусаффолиги унга яна рух барипшилади. Ҳар ёқда Наврӯз шодиёнаси сезиларди. Темурбек мулозимга қиссанон Мавлоно Убайдни чорлашни буюрди. Мулозимлар чодирдан қуйида катта чорпояда жой ҳозирламоқда эдилар. Узоқяқин ҳар ер-ҳар ерда тагига ўт қаланган қозонлар кўринар, қўй гўшти шўрвасининг зирали ҳиди далани тутиб кетган, димоғларни қитиқлаб очқаган қоринларга қутқу соларди. Шундагина Темурбек анча вақт тиловат билан машғул бўлганини билди.

— Наврӯзи айёмингиз муборак бўлғай, Ҳазратим! —

таъзим бажо келтирди Мавлоно Убайд чодир олдида-  
ги баланд сўрига яқинлашар экан. Темурбек шу ерда  
ўлтиарди. — Хосиятли тушлар ёр бўлдиму?

— Куллук, мавлоно. — Темурбек қиссаҳонни сўри-  
га таклиф этди. — Фаройиб бир туш кўрдим...

Темурбек кўрган тушини оҳиста тафсилотлари би-  
лан Мавлоно Убайдга сўзлаб берди. Қиссаҳон таъбир  
айтиш ҳавосини олганди.

— Таъбирини келтурсинглар-чи? Нечук туш бўлди  
бу?

Темурбекдан олти ёш катта Мавлоно Убайд Садр  
Сулаймон мадрасасининг илғор толиби илмларидан  
бўлиб, азалдан оқилу донолар сұхбатидан қолмас, му-  
толаага тўймас, овози ингичкадан келган, ўрта бўйли  
ҳаракатчан бир йигит эди. Калласи кичик эканлиги-  
дан чиройли юзидағи патак соқоли яна ҳам катта кўри-  
нар, қисик, кўзларининг ҳамиша кулиб туриши бари-  
ни босиб кетарди. Самарқанднинг Наддофлар маҳал-  
ласидан чиқдан Мавлоно Убайд, беш йил бўлди. Те-  
мурбекка қиссаҳонлик қиласди.

— Иншоолло, худо берибди-да, ҳазрат! — деди чин  
юракдан кувониб қиссаҳон. — Тошқин сел сизнинг  
қўшинингиздир, душманларингизни селдай босиб бо-  
расиз, кунфаякун этасиз. Дарёдан Самарқанд томонга  
чиққанингиз ҳам айни муддаодир. Самарқанди фир-  
давс-монанд, худо хоҳласа, салтанатингиз пойтахти  
бўлгай!

Қиссаҳоннинг таъбири Темурбек ўйлагандай бўлиб  
чиқди. Темурбек бирдан:

— Шайх Муҳаммад Баён судуз билан Амир Кай-  
хусравга кетганлардан хабар борми? — деб сўраб қол-  
ди.

— Ҳозирча дарак йўқ, ҳазрат...

Темурбек сўнг сұхбат мавзуини қутли ва бехосият  
кунларга бурди. Қайси кунларда сафарга чиқмоқ ке-  
рак, қайси кунларда саваш майдонига кирмаслик жоиз  
ва уларнинг сабаблари билан қизиқди.

— «Жума бичма, шанба кўчма», деган мақол бор, —  
жавоб қилди Мавлоно Убайд. — Эл орасида чаҳор-  
шанбани хуш кўрадилар, кўп хайрли ишларни шу куни  
адо этадилар. Экин-тикин, зироат ҳам чаҳоршанбада  
бошланади, чунки чаҳоршанба — чош куни... Мурод-  
лар ҳосил бўладиган кун эканлигидан чаҳоршанбай  
муродбахш деб ҳам ардоқлайдилар. Пайшанбай на-

жотбахш ҳам бордур... Кўнғиротлар яйловга шу куни  
кўчадилар...

Кейин мавлоно юришлар кунини белгилаш ҳақида  
сўз юритди.

— Ота-боболаримиз ойнинг маълум кунларидағина  
сафарга, юришга чиқиши одат қилганлар, чунончи...

Шу ерда тап узилиб қолди. Мулозим Жаҳонгир  
Мирзо билан Амир Сайфиддин некўзларнинг келаёт-  
ганларини маълум қилди. Эндиғина ўн беш ёшга қадам  
қўяётган дуркун амирзода одоб билан салом берди-да,  
яқинлашиб Темурбекнинг қўлини ўпди.

— Ассалому алайкум, валенеъмат! Наврўз айёмин-  
гиз қутлуғ бўлғай!

— Баалейкум ассалом! Ўзингизга ҳам муборак  
бўлғай, амирзодам! — деб алик олди Темурбек. Қу-  
чоқлашиб кўришгач, ўрининг тиник юзларига, энди-  
гини сабза уриб келаётган мўйлабига, ёрқин кўзларига  
мехр билан тикилиб турди, кейин манглайидан ўпиб  
қўйди. Иттифоқо, эрталабки офтобнинг нури тушиб,  
кўзларидаги қувонч ёшлари ялтираб кетди, буни Мав-  
лоно Убайд аниқ кўрди. Ота билан ўрилнинг Хузордан  
чикқанларича энди кўришишлари эди.

— Йилбошингиз ўзингизга муносиб бўлсун, илоҳо! —  
қутлади Темурбекни Амир Сайфиддин некўз ҳам.

— Куллук! Куллук!

Жаҳонгир Мирзо Темурбекнинг ёнига тиз чўкди,  
Амир Сайфиддин некўз қиссанхон қаторига ўлтириди.  
Фотиҳага қўл тортдилар.

— ... Демак, мавлоно, ойнинг маълум кунлари хо-  
сиятлидур, шундоғму? — сұхбатни давом эттирди Те-  
мурбек.

— Худди шундоғ, Соҳибқирон! — жавоб қилди чақ-  
қонлик билан қиссанхон. — Ота-боболаримиз ҳар ой-  
нинг биринчи куни кунчиқиши тарафга, учинчи куни  
жануб томонга, бешинчи куни кунботишга, еттинчи  
куни шимол ёққа юриш қилмаганлар... Валлоҳи аълам  
биссавоб.

— Амир Сайфиддин жаноблари бунга не дейди-  
лар? — Темурбек Амир Сайфиддин некўзнинг илми  
нужум ва фолдан хабари бор эканлигини яхши би-  
ларди.

— Хўш... — одатдагидек бир томоқ қириб олди  
амир. — Мавлоно Убайд сўzlари бағоят ўринлидур.  
Ота-боболаримиз бежиз шундай қилишмагон. Оллоҳ-

нинг ўзи ҳар ойнинг аниқ бир кунида турли ҳодисаларни аён этадур. Илми нужумда ҳам шундоғ фол бор: жадий ойнинг ўн биринчи кечаси, даљ ойнинг тўққизинчи кечаси, ҳутнинг еттинчи, ҳамалнинг бешинчи, саврнинг учинчи, жавзонинг биринчи кечалари Етти Қароқчи юлдузи ой билан баб-баравар ботар экан... Хўш... Ўша кунларда тунда ёмғир ёғади ёки шамол бўлади, дейдилар. Агар ёмғир ёғса яхшилиқдур, гармсеп эсса — ёмонлиқ... Тағин Оллоҳнинг карами кенг, ўзи биладур...

Бу орада бошқа амирлару баҳодирлар ҳам муборак даврага яқинлаша бошлидилар. Суорғатмиш ўғлон, Амир Жоку барлос, Амир Довуд дувлат, Амир Муайяд арлот, Амир Сорибуғо жалойир, Амир Оқбуто найман, Давлатшоҳ бахши уйфур, Аббос баҳодир, Элчи баҳодир ва Ҳусайн барлослар Темурбекни қутлашга келдилар.

— Улуснинг улур куни муборак бўлсун Темурбекка! — деди Амир Жоку барлос, амирларнинг улуғи. Улар қучоқлашиб кўришдилар.

— Муборак бўлсун! Муборак бўлсун! — қўшилишди амирлар.

Амир Довуд дувлат сўз олди:

— Илойим, улус куни қутли бўлсин, тўрт тулигимиз бутли бўлсин!

— Қутли бўлсин! — жарангли сас берди Темурбек.

— Қутли бўлсин! Бутли бўлсин! — қўллаб-қувватлашди амирлар.

— Омин, оллоҳу акбар! — дуога қўл очди Амир Сайфиддин некўз.

— О-о-ми-и-ин! — қўл кўтарди ҳамма баробар...

— Қани, баҳодирлар! — деди шунда Суорғатмиш ўғлон. — Аббос баҳодир! Элчи баҳодир! Бу йилимиз баракали келадирму ёки бебарака бўладурму? Билиб олайлик!..

«Билиб олайлик!», «Билиб олайлик!» деган овозлар янгари, қийқириқ тутиб кетди. Ота-боболарнинг урғодатларига кўра, қадрдан дўстлар Аббос баҳодир билан Элчи баҳодирлар ўртага чиқиб келдилар. Биринчиси «Баракали йил», иккинчиси «Бебарака йил» бўлди. Амирлару баҳодирлар ҳам иккига ажralдилар, бир томон «Баракали йил» Аббос баҳодирни қўллаб турди, ўзга томон Элчи баҳодирни. «Жанг» бошланаб кетди. Иккиси ҳам моҳир қиличбозлардан эди, Темурбек уларни

кўриб ҳамиша қувонарди. «Баракали йил» қаттиқ ҳужумга ўтди, у рақибнинг ўрнини олишга интиларди, аммо «Бебарака йил» ҳам бўш келмади. Қиличларнинг тифи офтобда ялтираб-ялтираб кетарди. Даврадагилар «Баракали йил» ролиб келишини билсалар-да, расамадини қилиб сурон солишдан чарчашмасди.

— Аббос баҳодир! Бўш келма, баҳодир!  
— Элчи баҳодир! Сусайма, ҳа!  
— Аббос! Бос! Бос!  
— Элчи! Енгмоқни бил-чи!

Узоқдан кўз ташлаган киши, икки баҳодир аёвсиз савашишмоқда-ку, нега атрофдаги одамлар чақ-чақлашиб куладилар, деган хаёлга борарди. Ниҳоят «Баракали йил»нинг қўли баланд кела бошлиди: «Бебарака йил» ролиб чиқиш иддаосидан ўзини тийди ва қиличини ерга кўйди... Яна қийқириқ тутиб кетди.

— Илимиз унумли бўладур, худо хоҳласа, баракали келадур! — қувонарди ҳамма. Амирлар тағин бир-бирларини қутладилар.

Кунботиш томондаги кенг майдонда бир тўда чавандозлар саф тортишиб, қўйворсанг учаман, деб ер тепинган отларини баъзўр тўхтатиб турадилар. Амирлару баҳодирлар суронини эшишишгач, улар ҳам наъра чекиб майдонга от солдилар. Кўпкари бошлиниб кетди.

Шу пайт байрам дастурхони тайёр бўлганлигини билдирилар. Темурбек ҳаммани лутфан таклиф этди. Офтоб икки найзага келиб қолган эди. Барча амирлару баҳодирлар бўлажак қўр-қутли зиёфат иштиёқида ўша ёқقا йўналдилар.

### III

Базмнинг қизиб турган жойида мулозимлардан бири икки тарафдан икки чопар келганлиги хабарини етказди. Темурбек ишораси билан Аббос баҳодир вазиятни билгани чопарлар томон йўл олди. Аввал чопарлар сўзини тинглаб, назардан ўtkазиб, сўнг бор гапни Темурбекка етказиш одат тусига кирган эди. Темурбек чодиридан юз қадамча нарида, шимол томонда олачуқлардан<sup>1</sup> бирида ҳориб-толган чопарлар дастурхон атрофида чўкка тушишиб тамадди қилмоқда эди-

<sup>1</sup> Олачук — чайла, каша.

лар. Аббос баҳодир чопарларнинг тўрт нафар эканлигини кўрди.

— Зиёратлари қабул, йигитлар!

— Муродингиз ҳосил, эй баҳодир жаноблари! — дейиши баб-бараварига чопарлар. Улар ўринларидан туришиб, Аббос баҳодирга таъзим бажо келтирдилар. Чопарларнинг иккитаси Амир Муайяд арлот Ўтрор ва Олой томонларга йўллаган Темурбек йигитларидан Ҳиндуда Қарқара қипчоқ билан Шодравон найманлар эди.

— Шайх Мұхаммад Баён суддуз аълоҳазратнинг Амир Ҳусайнга қарши отланғонларини тангрининг инояти деб билди, — деди Ҳиндуда Қарқара қипчоқ, бу пакана, миқти, юzlари мўндидақ қора бир одам эди. — Бошим нақ осмонга етди, бир ҳафтага қолмай ҳамжиҳатлик камари билан белимни маҳкам борлаб, шамолдан қанот ясаб, катта черик билан Термизга етиб борамен, деб юборди. Ҳамроҳим, Амир Тўқли суддуз, Шайх Мұхаммад таройисидир, вакил бўлиб келди... Шайх Мұхаммад ҳам биз билан баробар йўлга чиқкан...

— Ҳозиргина етиб келдик, — дея сўз бошлади кўринишидан чайир Шодравон найман, унинг чап юзида сўталга ўхшаш холи бор эди. Аббос баҳодир уни узоқдан танирди. — Амир Кайхусрав Олойни тарқ этиб Андижонга келиб турган экан, Оллоҳнинг кўмагида, йўлимиз қисқа бўлди. Амир Кайхусрав беҳад шодланниб кетиб, ўзини қўйгани жой топа олмай қолди! Илгарилари ҳам Темурбекка кўп айтғондим, шул маразни гумдон этайлик, гумдон этайлик, деб кўп айтғондим! Бу ишга оёғим қолиб, бошим билан етиб боряймен, дейдир. Икки кун ҳордик олдим холос, қўймай изимга қайтариб юборди. Баҳодир йигит чарчайдурми, дейдир, сен йўлданмас, йўл сендан қўрқсан, дейдир. Нуқул Темурбек Амир Ҳусайнни менинг қўлимга топширармикин, а, топширармикин, укам Кайқубоднинг хуни унинг бўйнида туриди, дегани деган... У жуда катта қўшин тўплағон... Йўлга чиқғон, тез кунда етиб келадур. Бу йигитни — Шодравон найман ёнидаги ҳамроҳига ишора қилди, — вакил деб қўшиб юборди.

Аббос баҳодир баланд бўйли, шоп мўйлов, жуссадор йигитта қаради. У жуда ҳам таниш кўринди. Қаерда кўрган эди, қаерда? Жуда белгили...

Шодравон найманнинг ҳамроҳи жилмайғанча одоб

сақлаб Аббос баҳодирга қараб турарди. Бирдан Аббос баҳодир қичқириб юборди:

— Ахий Жаббор! Наҳотки, сен бўлсанг?! Жигарим!..

— Аббос оға! — деди ҳаяжонда йигит. — Менман, мен!

Эски танишлар — Самарқанддаги Тун салтанати фуқаролари қучоқлаша кетдилар. Кутимаган бу учрашувдан атрофдагилар ҳам ҳайрон бўлиб қолган эдилар.

Аббос баҳодир Ахий Жабборни мардлиги ва тантилиги, фидойилиги учун ёқтирас, ҳурмат қиласади. Яқинда негадир ўнбоши, юзбошиларни саралаёттандада Ахий Жабборни, раҳматли Ҳасан чиноқни, ҳа, ўша Аббос баҳодир илк марта Самарқандга борганда Қаландархона кўчасида тутиб олган Тун салтанати посбонларидан бири Ҳасан чиноқни эслаб қолди. Кошки эди, шундай йигитлар сипоҳлари орасида бўлса, мингбошилиқдан амирлик даражасига ҳам лойик кўриларди, деб ўйлади.

*Таваккал ту алалони деган эр,  
На талқону на қалқоннинг ғамин ер!  
На бор бошда паноҳ ва на бир соя,  
Адолаттур мен танлагон ҳисоя! —*

деб шеър ўқиб юборди Аббос баҳодир. Бу шеърни Тун салтанатида ҳамма ёд биларди. У адолат йўлини танлаганларнинг мадҳиясига айланиб қолганди.

— Эсингиздан чиқмабудур, Аббос оға, эсингиздан чиқмабдур! — қувониб кетди Ахий Жаббор. — Худо ўзи қўллади, мени бу томон йўллади!..

— Лашкаримда сипоҳ бўласен! — Аббос баҳодир эски қадрдонининг елкасига уриб-уруб қўйди.

— Иншоолло, баҳодир, иншоолло! — таъзим этди Ахий Жаббор...

— Зудлик билан соҳибқиронга ушбу қувончли муждани етказмагим шарт! — деди Аббос баҳодир чопарларга қаратса. — Ҳазратнинг интиқ эканликларидан хабардормен. Сизлар ҳориб келгансиз... — Аббос баҳодир шу ердаги мулизимга буюрди. — Йигитларга ҳоли жой ҳозирлангиз! Улар олислардан келишган, ҳордик олсунлар...

Чопарларнинг пойи қадамидан икки карра мамнун Аббос баҳодир бу муждани Темурбекка етказиб баҳ-

тиёр бўлмакка ошиқди. Темурбек эшитиб, бугунги тушини эслади. Хўжанд сувидаги тошқин сел — ўша, Шайх Муҳаммад ва Амир Кайхусравларнинг ададсиз қўшини! Улар келиб Темурбекнинг лашкарига қўшилишлари билан Балхга жўнайдилар. Ҳиндувон қалъасини забт этадилар...

Янги қўшинлар хабари барча амирлару баҳодирларни қувонтириб юборди, ғалаба манзилини яқинлаштириб қўйгандай бўлди. Чунки майдон кўрган амирлар, дунё кезгани эрлар Балх қалъасини олишдек улкан бир муҳорабада ҳар қанча қўшин ҳам кам эканлигини фаҳмлар эдилар.

#### IV

Кутимаганда қизиқ ҳодиса рўй берди.

Барча бирдан жимиб қолди, кулгулар ўз-ўзидан тўхтади. Амирлару баҳодирлар ўзаро ишора қилишиб Темурбекни бир-бирларига кўрсатар эдилар. Улар соҳибқироннинг икки юз қадамча нарида кунчиқиш ёқдан келаёттан, ридо кийиб олган, бошдан-оёқ оқقا ўралган одамга қаттиқ тикилиб қолганини пайқашди. Ридолик одам шошилмас, оқиста қадам ташларди, унинг бир қўлида байроқ, бир қўлида мис табл<sup>1</sup> бор эди, ногора гардиши офтоб нурида гоҳ ялтираб қоларди. Темурбекнинг назари тушди-ю ажабо, нечундир бутун вужудига англаб бўлмас бир титроқ кирганини сезди. Инсми, жинсми, фариштами? Теп-текис дала майдонда бу одам бирдан қаёқдан пайдо бўлиб қолди? Ердан чиқдими, осмондан тушдими? Хўжайи Хизр деганлари ёки шулмикин? Хизр алайҳиссаломни ҳам худди шундоқ оқقا ўралиб келади, дер эдилар. Темурбек, балки, яна туш кўраётгандир? Бу базми жамшидлар, атрофдаги амирлару баҳодирлар ҳам балки рўёдир? Ҳозир уйқудан уйғонади-ю барчасининг туш эканлиги аён бўлади. Темурбек шоша-пиша кўзларини юмди! Негадир падари бузруквори Амир Тарагай кўз олдига келди. У Темурбекка ҳамиша, Оллоҳдан тилаб олган ягона ўғлимсан, дер эди ва ҳар сафар шундай деганда фахру ифтихор туйгуларидан кўнгли ийиб кетишини Темурбек сезарди. Кейин волидайи муҳтарамаси Текина хотун пайдо бўлди. Онаизор ҳар гал кўришган-

<sup>1</sup> Т а б л — ногора (араб).

ларида унинг юзларидан чўлп-чўлп ўпиб, елкасига қоқиб-қоқиб қўярди. Ўшанда волидаси нималарни хаёлидан кечирар экан?.. Темурбекни ўкинч ҳисси чулғади. Энди елкасига баҳт қуши қўниб, юрт бошига келай деб турганда, белини боғлаб ҳурмат-хизматини қиласиган қиблагоҳи отаси, бостан изи жаннат онаси йўқ... Кейин эгачиси Қутлуғ Туркон оқа кўринди. Муштипар опаси! Мунису меҳрибон, мушфиқ опаси! Иниси учун ҳатто ўз жонини гаровга қўйишга тайёр опаси! Авваллари ҳам унча билинмас экан, Амир Тарагай билан Текина хотунлар у дунёга риҳлат этишгач, опака бир-бирларига қаттиқ суюнишиб қолдилар. Темурбек эгачисини бир чандон ҳурмат этса, Қутлуғ Туркон оқа бу ҳурматни икки чандонга етказиб инисига қайтаради... Опа-ука ўртасидаги муносабатга ҳамма ҳавас қиласиди.

Бир лаҳзада шуларнинг барчаси қандай қилиб хаёлидан ўтди, Темурбек билмади. У бирдан кўзларини очди! Бас, кўрганлари туш эмас экан! Оқقا ўралган сирли одам ҳамон йўлда, аввал қандай бўлса ўшандай аста-аста тантанавор қадам ташлаб яқинлашиб келарди. Оппоқ либос офтоб нурида оқаргандан оқариб кўринар, ридонинг барлари шамолда худди бўлак-бўлак нурдай ўйнар, одамнинг ўзи нурли гардиш ичра чулғанганди. Орада юз қадамча масофа бор эди.

Темурбек сирли одамдан кўзини узмас экан, беихтиёр аста ўрнидан турганини билмай қолди. Бошқа амирлару баҳодирлар ҳам ҳайратда ўз жойларидан кўзроҳдилар. Ҳамманинг кўзи ўша сирли одамда... Темурбек оҳиста чорпоядан тушди ва ўз одатига кўра, оксоқлигини билдирамасликка ҳаракат қилиб, шошилмай, битта-битта босиб, ногора ва байроқ тутган ноғаниш одам истиқболига қараб юрди. Борар экан, ўзича: «Бу, бешак гайбдан башоратдур, бу гайб назари аломатидур...» деб пичирларди.

Орадаги масофа қисқаргани сари сирли одамнинг чехраси Темурбекка аниқроқ кўрина бошлади. Ўртача бўйли, бошидаги оқ дастор салла печи чап елкасига тушиб турибди; кўзлари катта-катта, юмалоқдан келгани юзлари қип-қизил, истараси иссиқ хушрўй бир одам... Ёши қирқларга бориб-бормаган, ҳарнечук қалин соқоли ҳали қоп-қора. Бу фариштали одам билан Темурбек муқаддам сира учрашган эмас, кимлигини ҳам айта олмайди...

Сирли одам беш қадамча масофа қолганда тұхтади:

— Бисмиллохир роҳманир роҳийм, Темурбек жа-ноблари! — деди янгрө овоз ила у. — Иншоомлох, Оллох ҳимояси сизга посбондур. Ушбу байроқни сиз-га тұхфа құлурмен, токи давлатингиз, бўй-бастингиз оламга кўринсун! Ушбу новорани ҳадя этурмен, токи довруғингизни дунёларга таратсун! Алар салтанат ва подшолик аломатлари дур. Билингизким, ҳазрати жа-лол субҳонаҳу таоло бу заиф бандани сиз соҳибқиронға пир этиб юбормиш! Камина Маккаи Мукаррама ша-рифларидан Мир Сайид Барака туурмен! Алҳамду лиллоҳи роббил оламин!

Маккаи Мукарраманинг ҳурматпеша нақиблар пеш-воси, муртазойи аъзам, саромади замона Мир Сайид Барака келишидан олдин хабар ҳам бермади, ваъда ҳам айламади. Унинг келиши қазо ҳукмидай кескин, аммо нечоғлик ҳаётбахш эканлигини Темурбек кейин кўрди. У борган жойида ҳайратларга ғарқ бўлганча тўхтаб қолган эди!

Мир Сайид Барака ним табассум ила унга қучоқ очиб келарди. Ғаройиб бир учрашув бўлаётганини кўрган амирлару баҳодирлар уларни аста-секин ўраб ола бошладилар. Темурбек таъзим бажо келтириди, сўнг оҳиста Мир Сайид Барака ридоси пешини ўпиб та-воғ қилди. Ростланди-да, саййидзода қўлларидан арслон териси қопланган мис новора билан тўқ ҳаворанг байроқни олди ва илдам юриб келган валиаҳд Жа-ҳонгир Мирзога тутқазди... Амирлар бунда рамзий маъно илғадилар. Байроқда бир-бирига ёндош тасвири-ланган учта кулранг ҳалқа яраклаб кўринарди.

Темурбек аллақандай бир меҳр ва интиқдик ила, чеҳраси фавқулодда нуронийлик касб эттан Мир Сайид Баракага юзланди:

— Пирим!..

Мир Сайид Барака билан Темурбек қучоқлашиб кўришдилар. Темурбекнинг кўзлари намланиб, юраги бўшашиди.

Темурбек падари бузрукворининг пири ва устози мўъмин-мусулмонлар қиблатоҳи ҳазрат Шайх Шам-сиддин кулол этагини тутганди. Яқинда ҳазрат — қудиса сирруҳу — фоний дунёни тарқ этиб, омонатини эгасига топшириди. Парвардигор чевар, бемисл меҳри-бондир, ҳамиша бандасининг ғамини ўзи ейди. Темурбек бунга ҳозир такрор имон келтириди. Мана, зоти

бобаракот Мир Саййид Баракани Темурбекнинг истиқболига ўзи етказиб турибди. У энди Мир Саййид Баракага иродат айлайди.

— Оллоҳнинг бемонанд ҳиммати ва инояти ила бу ҳумоюн манзилга қадам ранжида қилмакка журъат этдим... — деди Мир Саййид Барака. — Оре, рост. Оллоҳнинг кўнглим аро жойлаган жўшқин илҳомлари бу гуноҳкор тилимни сокин туришга қўймайдур. Оlam тангрисининг хоҳиши шулки, давлат ногорасини чалиб, жаҳон майдонига от солурсиз, эй соҳибқирон! Жаҳон у бошидан бу бошигача сизники бўлғай! Сиз давлатта эришурсиз, аслида давлат сизга етишгай! Сиз давлат бирлан буюклик мартабасига эришмайдурсиз, балки давлат сизнинг ташрифингиздан улуғлик топгусидур. Сиз фармон бермоқлик иқболига мұяссару мушарраф зот, саодат тожининг соҳибисиз, гардунқудрат салтанатнинг муносибу мустаҳқ соҳибихтиёрисиз, соҳибқирони зурсиз...

Темурбек ва амирлару баҳодирлар бу сўзлардан сеҳрланиб қолгандай сукутга чўмган эдилар. Мир Саййид Барака бахт-икбол сўзларини айтиб башорат қилишда давом этарди:

— Темурбек, жаноблари таваллуд топғонларида, яратган эгамнинг карами кенг, осмони фалакда Муштарий ила Зухро сайёralари бақамти келмишлар. Оре, рост, Муштарий — омаду иқбол, музafferияту шодиёналар сайёрасидур. Зухро сайёраси эса дўстлик ва меҳр-муҳаббат түғёнларини инъом айлагувчиdir. Жаноблари ана шу икки қутлуг сайёра дийдорлашувида дунёга кўз очмишсиз, илло қирон соҳиби бўлмишсиз. Инчунин, омаду иқбол, музafferияту шодиёналар, дўстлик, меҳр-муҳаббат түғёнлари қалбингизнинг сарвату безаклари, давлатингизнинг шавкату тираклари бўлғай, иншооллоҳ! Инчунин, соҳибқиронсиз!..

Мир Саййид Барака жим қолди ва хаёлларга берилганча олис-олисларга тикилди. Темурбек пир сўзларини эшитиб, чиндан ҳам Оллоҳ, унинг қалбини бебаҳо илҳом нашидалари ила тўлдирганлигини пайқади. Амirlару баҳодирлар ўзаро шивирлаша бошлидилар:

- Жуда улур инсон эканлар! Бай-бай!
- Нафаслари жуда ўткир!
- Ўзлариям сўзга бир чечан эканларки...
- Хўш... «Соҳибқирон» маъносини тушундингизми?

— Тушундим. Авваллари билмасдим, маъноси чукур экан...

— Худо берган-да... Ҳа...

— Жим! Сайиидзода гапирияптилар!

Пири муршид Темурбекка кўзларини тиқди-да, да-вом этди:

— Соҳибқирон! Жаҳон кўп подшолар кўрди... Искандар Зулқарнайну Чингизхондан сўнг жаҳон-гирилик подшоларга мерос бўлиб қолди. Ҳурросону Туркистон, Чин-Мочину Ҳинд, Форсу Миср подшолари ўз номларига «жаҳонгир» лақабини қўшиб олдилар, аммо шундан нарига ўтмадилар, балки ўта олмадилар. Темурбек, Оллоҳнинг бандалари баҳтли бўлмаклари, тинч яшамаклари лозимдур. Жумла мўъминларни, бандаларни баҳтли қилмакнинг ягона йўли жаҳонгирлиқдур! Билингизким, миллату мулку мамоликни титратиб, пароканда айлаб турғон урушжанжаллар, ҳар улуснинг аянчли аҳволи, шафқатсиз золимларнинг авом ҳалқни хор-хокисор этиши, иймонсиз қароқчилар бебомлиги барча-барчаси фақат жаҳонгирлик туфайлигина тинаදур, барҳам топадур... Темурбек, жаҳонгирликни қўлга олурсиз, Оллоҳнинг кўмагида одамларни баҳтли қилурсиз, золимлардан қўриқлаб ҳифзу ҳимоя этурсиз! Иншооллоҳ, ҳалқни гумроҳлик қоронғусидан ҳидоят офтобига чиқармак, абадий жаҳолат чангалзоридан чексиз саодат чаманзорига етказмак аниңг қутлуғ мукофоти бўлур!..

Темурбек ҳайратдан қотиб қолди! Во ажаб! Шу дам Кешда Бобо Али Шоҳ авлиёни зиёрат этгани ёдига тушди. Ўшанда Темурбек Туркистон амирларининг бошлиари бир жойга қовушмаганидан нолиганда, авлиё: «Тангри таоло буюрганки, агар кўкда икки худо бўлса жаҳоннинг иши бузилур!», деб уни юпаттанди. Иттифоқо, Темурбекнинг кўнглида ҳам шунга ўхшаш, ер юзида битта подшо бўлмоғи керак, иккитаси ортиқчамикан, деган фикр ҳукм сурарди. Кейин Бобо Али Шоҳ Қуръондан фол очди ва қуидаги оятни ўқиди: «Инна жаалнока халифатан фил арз...». Бу, сизларни ер юзида халифа қилдук, деган маънони англатарди. Ҳаллоқи безаволга салламно! Мана, ҳозир ҳам шундай бўлди. Жаҳонгирлик заҳмати, жаҳонгирлик шаън-шавкати, шухрати, Темурбекнинг кўнглида асраб юрган орзу-умиди! Жаҳонгирликка интилмак керак, бу одамларни баҳтли

этмоқликнинг бирдан-бир йўлидир. Бир қўл остида олам тинч бўлади. Олижаноб зот Мир Сайид Барака ҳам унинг кўнглидагини кўриб тургандай сўзлади. Ақл бо-вар қилмас ўхшашлик! Демак, Темурбекнинг нияти ул-кан ва одил ниятдур...

— Соҳибқирон! — мурожаат этди тағин Мир Сайид Барака Темурбекнинг хаёлларини бўлиб. — Оллоҳнинг берган мадади ила аҳду қарор қилдим. Жанобларининг пири муршидигина эмас, оре рост, балки чинакам дўсту биродарингиз бўлмакни ихтиёр этдим! Каминангиз бир умрлик дўст бўлиб қолмоқни истайдур. Қабул айлангиз! Алҳамду лиллаҳи роббил оламин!

Пайғамбар авлодининг бир вакили ташрифидан ба-фоят мутаассир бўлган Темурбек таъзим қилиб, Мир Сайид Барака қўлига лаб босди:

— Қуллуқ, пиrim! Минг бор қуллуқ! Олтинга бергисиз сўзларингиз билан ҳиммату саховатнинг етти дарвозасини очиб қўйдингиз! Фасоҳатли қаломлари кўнтилларни банд этиб ташлади... ўзимни нақ етти осмон саҳнига етищғон сезадурмен, бас, сиз зоти бо-баракот мулозаматларига эришдим. Чин нияtingиз, пок истагингиз дўстлик сингари Оллоҳнинг буюк инъоми ёркан, буни юрак-юрагимдан қабул айлармен!

— Боракалло, соҳибқирон! Бафоят хушнуд этдилар! — миннатдорчилик билдириди Мир Сайид Барака катта-катта кўзлари ёшланиб, кейин Темурбекка қуличини ёзиб кела бошлади. Темурбек пири муршид билан қучоқлашиб кўришди.

— Эй, олийқадр амирларим! Садоқатли баҳодирларим! Оллоҳ бизга омад берди!.. Бу кундан бошлаб етти иқлим саййидларининг пешвоси, камолот либоси ила ораста Мир Сайид Барака жаноблари менинг пири муршидимдур, ҳам покиза дўст-биродаримдур!

— Пири муршидингиздур! Сурон! Ур-ҳо-о!  
— Дўсту биродарингиздур! Сурон! Ур-ҳо!..  
— Худо умрларингизни зиёда қилсун! Ур-ҳо-о!  
— Ур-ҳо-о! Ур-ҳо-о!.. — ҳайқиради амирлару баҳодирлар.

— Темурбек! — қичқирди Амир Жоку барлос. — Улуснинг улуву куни улуву кишилардан дуо олган одам бешак-шубҳа ўз ниятига етадур! Ишполлоҳ, ниятимизга етурмиз!

— Етурмиз! Ниятимизга етурмиз! — наъра торти-

шарди пири муршид билан соҳибқирон ўртасидаги ғаройиб мулоқотдан рухлари баланд амирлар.

— Етурмиз, иншоолло! Ур-ҳо-о!..

Урҳо овозлари нарида кўпкари томоша қилаётган, берироқда бошқа ўйинлар кўраётган навкарларга ҳам етиб борди. Улар қўллаш керак бўлган ҳодиса рўй берганини идрок этишиб, турли жойлардан:

— Урҳо-р-о!.. — деб садоларга саслар қўшдилар.

Темурбек Мир Саййид Баракани дастурхонга таклиф этди. Жаҳонгир Мирзо пири муршид тухфа қилган ҳаворанг байроқни чодир чангарогига тикиб қўйишни буюрди, ногорани эса эшик тепасига ўрнатдилар. «Худо хоҳласа, ўша сирли ногора билан байроқ салтанатнинг тимсоллари бўлиб қолади!..» — хаёлидан кечирди Темурбек.

Амирлару баҳодирлар кутилмаган бу учрашувни ўзаро муҳокама этишар, чиндан ҳам унинг сирли кечганини тан олишар, лекин аввалдан нотаниш пири муршиднинг қандай қилиб Темурбек ҳақида шунча кўп нарса билишини тушуна олмай қийналардилар.

— Хўш... — деди Амир Сайфиддин некўз енгилига томоқ қириб қўяркан. — Йил баракали келди, а?

У Суорватмиш ўғлонга маъноли жилмайиб қараб қўйди.

— Ҳа-ҳа, баракали келди, баракали! — сўз ўйинини тушунганилигини билдириб тасдиқлади Суорватмиш ўғлон.

Амирлар йилни баракали келди, деб қувонардилар, аммо бутун умрнинг тўкин-чочин ва баракали келажгини ҳали билмас эдилар.

## И К К И Н Ч И Б О Б

### I

Қош қораймасдан аввал Балхнинг кунчикиш тарафидан икки отлик ўқдай елиб ланг очиқ ётган Хожа Укоша дарвозасидан шаҳарга кириб келди. Кўчалар кимсасиз, одам зоти кўринмас, чамаси ҳамма уй-уйига кириб кеттан, шаҳар ўликка ўхшарди. Бу ерда тирик жон борлигини меҳмонларни ахиллик билан қарши олган ва хийла жойгача «кузатиб» борган вовуллоқ итларгина билдириб туарди. Отликлар Чорсуга қараб

бурилдилар, афтидан қоронғу түшмай Ҳиндувон қалъасита кириб олишни ўйлардилар.

Ҳиндувон қалъаси шаҳарнинг шимол томонида, янги шаҳарда тепаликда жойлашган эди. Қадимдан Балх хонларига мустаҳкам қўргон бўлиб келган кўҳна қалъа Чингизхон замонидан бери вайрона ҳолда ётарди. Икки йил олдин бу ерда катта қурилиш ишлари бошланиб кетди. Амир Ҳусайн ёсоқ солиб, бутун раяният ва лашкарни девор тиклашу хандак қазиш ишларига сафарбар этди... Бу, Пўлод билан Оқбуғо ясовурийнинг итоат майдонидан четга чиқиб Кобул қўргонини ўзларига макон қилиб олишган йили юз берди. Ҳиндикуш довонидан ошиб ўтиб, икки бебош амирни асир олиб шоду хуррам қайтаётгандарида, Амир Ҳусайн гап орасида маслаҳат солгандай, Темурбекка: «Каблал билод Балхни пойтахт қилмакчимен... — деб қолди. — Ҳиндувон қалъасини тағин обод этмакчимен...»

Амир Ҳусайн жиiddий айтмоқдами ёки бу шунчаки омади бир гапми, билмоқ лозим эди. Темурбек сўради:

— Солисаройни тарқ айлайсизму?

— Нима учун экан? Солисарой ҳам ўзимизники. Аммо бобом Амир Қозоғон ҳазратлари Балхни пойтахт қилмиш эдилар. Ҳиндувон яхши замонларда жуда маҳобатли қалъа бўлган экан, хандаклари бағоят чукур, қўргонининг баландлиги эса осмонларга етар экан. Табаррук бобомизнинг арвоҳлари чирқилламасин, деб шу ишни кўнгилга тутдим!

Бу гап Темурбекка хуш келмади:

— Ҳусайнбек! Амакингиз Амир Абдуллоҳ ибн Амир Қозоғон тарихини яхши билурсиз, — деди Темурбек, — Самарқандни ватан айламакчи бўлиб, пойтахтни Солисаройдан шу ерга кўчирди, ишончли амирлари эса бошқача маслаҳат берган эдилар. Улар дедиларки, ўз юрtingни ташлаб бегона ерда ватан тутмак кони зарардур, илло бошингта бир иш тушса ёт одамлар томоша қилмақдан ўзгага ярамаслар. Оқибати сизга маълумдур. Боболарнинг хатоларини кўра-била туриб такрорламак нечун? Сўнг афсус-надоматлар фойда бермас...

Амир Ҳусайн индамади. У Темурбекнинг сўзларида яхши ният яшринганини англади, аммо ўз фикридан қайта олмади. Шу-шу, Балх Мовароуннахрнинг ҳукмдори Амир Ҳусайннинг қароргоҳи бўлиб қолди.

Узоқдаги отлиқларни кўрган қалъанинг кутволи ўрта

бўйли, гирдигумдан келган, совут кийган Амир Халил шинақдан туриб пастга қараб бақирди:

— Зоғ ҳам қиритилмайдур! Уқдингму, шихна? Ёп, дарвозангни! Шитоб эт!

— Уқдим, амирим, уқдим! — минфирилади шихна ўзича куймаланиб катта нақшинкор дарвозани ёпар экан. Унинг оти Саттор эди. — Уқмай жинни бўлмамма? Ҳозиргина очган эдим энди ёпамен... Оч, ёп... ёп, оч!.. Дунёнинг иши шу экан-да...

Эллик ёшли Саттор шихна назарида дунёнинг иши шу — унинг дарвозаси, дарвозанинг очилишу ёпилишидан иборат. Дарваза очилса ҳаёт туркирайди, ёпилса ҳаёт тўхтайди. Инчунун, ҳаммаси Саттор шихна ва унинг дарвозасига боғлиқ... Агар у дарвозани очмаса, амирлар тугул хонлар ҳам қалъага киролмайдилар. Ҳа, бари Саттор шихна қўлида...

Саттор шихна дарвозани энди ёпиб қулфлаган ҳам эдики, икки отлиқ ҳаллослаб етиб келди. отлиқларнинг бири, нуфузлиси бўлса керак, ёнидагисига шинакдагилар ҳам эшитсин учун атай балаңд овозда деди:

— Буюр! Дарвозани очсунлар! Осмон мартабали, ҳазрати воло ҳукмдорга бафоят муҳим галимиз бордур!

Иккинчи отлиқ — бу йигирма беш ёшлар чамасидаги Тармочуқ деган бир йигит — дарвазага қараб бироз дағдага аралаш:

— Ким бор? Оч, дарвозани! Тепада ҳеч ким йўқма?... — деб қичқирди. Аммо садо бўлмади. Терга нишган отлардан паға-паға бур кўтарилаарди. Аямажиз олти кун, қаҳр айласа қаттиқ кун, деганларидаи, бугун ҳутнинг охирги куни бўлиб, эртага ҳамал кирап эди.

— Тушундик... — деб кўйди биринчи отлиқ шинакдан садо бўлмаганини кўргач. Шу палла юқоридан овоз келди:

— Ёпик дарвазага келганда не деюрлар?

Отлиқлар жавоб бериб улгурмай, яна овоз жаранглади:

— Ўронингиз борму? Ўрондан сўйлангиз, ўрондан!

Биринчи отлиқ ўрон, яъни сирли шартли сўзларни билар эди, аммо шихналарни тафтиш этиб туриш ҳам фойдадан ҳоли эмас, дея аввалига индамади.

— Тушундик...

Қўққисдан эски шаҳар томондан қайдадир итлар-

нинг қаттиқ, вовуллагани эшитилиб, унинг гапини бўлиб қўйди.

— «Ҳиндувонда ҳинду борму?» деб сўра! — буюрди Тармочукқа биринчи отлик. Бу ўрон сўзлари эди.

— Ҳиндувонда ҳинду борма?.. — сўради Тармочук.

— Ким бўласизлар? Қай бир юртдансизлар?

— Иншооллоҳ, сultonлар саромади, замона омади Амир Ҳусайн ҳазрати олийларининг иншонган төгларидан Амир Мусо бўладилар! — дарҳол жавоб қайтарди Тармоччук.

— Ҳали ўлмадингму, Мусо? — деди бирдан Амир Халил шинақдан. Улар Амир Мусо билан қалин дўст бўлиб, бир-бирларига шундай қаттиқ ҳазил қилишар эди.

— Ахду паймонингни унудингму, Ҳалил? — аймоқлика ўтди Амир Мусо ҳам дўстини таниб. — Аввал сен ўласен, сени кўмишим керак, бўлмаса ким кўмади? Кейин менга навбат...

Итлар вовуллашини кўмар даражада қах-қаҳа кўтарилиди. Кутвол Саттор шиҳнага дарвозани очишга фармон қилди.

— Ҳали ёпган эдим, энди очамен... — минирлади яна ўзича Саттор шиҳна. — Оч, ёп... Ёп, оч... Дунёнинг иши шу экан-да...

У дарвозани очди. Амир Мусо дарвозадан кириши билан қалъанинг лашкарга тўлиб кеттанини кўрди. Навкарлар теварак атрофда гуррас-гуррас кезиб юришарди. «Амир Ҳусайн Темурбекнинг қўшин тортиб келишидан хабар топибди-да... Қув-да, қув. Айғоқчилари кўп...» — хаёлидан кечирди Амир Мусо.

У Тармочукқа шиҳна олдидан жилмасликни тайинлади-да, Амир Халил билан хон саройига йўл одди.

## II

Одам одамни таниб бўлмас даражада қоронгулик тушди. Сарой узоқ эмасди. Мутолишда осилган фанор йўлни ёритмасди; унинг вазифаси, аслида, йўлни ёритишишас, балки йўл борлигини билдиришга хизмат қиласиди. Дарвоза олдида ҳазиллашишиб, чақ-чақлашишган икки амир негадир йўлда бир оғиз ҳам сўз қотишишади, ҳар иккиси ўз хаёли ила банд эди. Фақат Амир Халил: «Наврўз куни етиб келибсен, Мусо!» деб қўйди холос. Амир Мусо бош иргади-ю индамади.

Улар хон саройига яқинлашганларида дарвоза олдида бир күп халойиқ йирилиб турганини кўрдилар. Фира-ширада Амир Мусо уларнинг навкарлар эмас, авом халқ эканини пайқади. Гала-ғовурда ким нима деяётганини ҳам, нима бўлаётганини ҳам билиш мушкул эди. Ҳамма бараварига нимадир демокда, бироқ ҳеч ким ҳеч нарса эшитмасди. Амир Мусо қулоқ солиб ушбу узук-юлуқ сўзларнигина англади:

- Кўйворсин бизни!
- Айбимиз нима?
- Бирорга ёмонлигимиз йўқ, нимадан қўрқамиз?
- Шафқат қилинг! Худо хайрингизни берсин!
- Узоқ йиллар яшанг!
- Кўйворингиз бизни!

Навкарлар одамларни тинчтишиб, тарқатишга уринишарди. Амир Ҳалил ҳайрон бўлиб турган Амир Мусога тушунтириди:

— Душман бостириб келганда оёқости бўлмасин, деб эски шаҳар халқини қалъага кўчириш ҳақида фамони олий эълон қилинган. Шунга қарамай, кўчмагандари кўпроқ... Ҳусайнбекнинг амри бу. Одамлар буни англамайди... Уйимизга кетамиз, деганлари деган...

Амир Мусо Балхнинг кўчалари нимага кимсасиз эканлигини тушунгандай бўлди. Амирлар бақириб-чақириб ётган одамларни ёриб ўтиб, саройнинг ҳашаматли қўш табақа дарвозасига яқинлашдилар. Сарой эшигида савлат тўкиб турган икки ясовул улар йўлини тўсди. Мехмонларнинг ҳурматли амирлар эканликларини кўрган ясовуллар дарҳол йўл бўшатдилар. Амирлар шу йўсин зинама-зина кўтарилиб тўққизта посбондан ўтиб бордилар. Посбонларининг ҳар бири кейингисига нуфузли амирлар номини айтиб боҳабар айлар эдилар.

— Онҳазрат сизларни меҳмонхонага таклиф этганлар... — маълум қилди тўққизинчи ясовул.

Амирлар мусика овози эшитилиб турган меҳмонхонага кириб бордилар. Тўрт бурчакка қўйилган шамлар каттагина хонани яхши ёритишга қурби келмаганидан лип-лип қилар эди. Меҳмонхонада тўрда ўлтирган хон Одил Султон билан Амир Ҳусайндан бошқа Амир Ҳиндушоҳ, қундузлик, арҳангасаройлик, боғлонлик, толиконлик амирларни ҳам кўриш мумкин. Амир Ҳусайн Амир Мусони кўриб қувонганидан ўрнидан туриб кетди ва унга пешвоз юрди.

— Қариндошим, оғам! — хириллаб деди Амир Ҳусайн қулочини ёзиб келаркан. — Жуда соғинтириб юбордингиз-ку!

Мамлакат ҳукмдори Амир Мусо билан ҳамоғуш бўлганча бир лаҳза жим қолди. Амир Мусо ҳукмдорнинг ширакайф эканини пайқади. Амир Ҳусайн меҳмонни қўлтиғидан олиб, ўз ёнига ўтқазди.

Унинг Амир Мусони «қариндошим» дейишида жон бор эди. Амир Ҳусайннинг завжаси Сароймулхоним билан Амир Мусо опа-сингилларнинг болалари бўлиб, бир-бирларига бўла эдилар.

Амир Мусо зимдан теваракка бокиб, даврадагилар унчалар яйраб ўлтиришмаганига амин бўлди. Амир Ҳусайн ҳаракатларида негадир қаътият йўқ, иочор аҳволга тушиб қолган одамни эслатарди. Унинг кўнгли чўккан, кўзларида нур кўринмасди. «Ҳукмдор кўнглини кўтариш керак, ҳозир шунга киришадурмен... — ичida масҳараомуз кулиб қўйди Амир Мусо. — Шундай гапларни айтайки, кўнгли бадтар хуфтон бўлсин!»

— Қандоқ хабарлар олиб келдингиз, амир? — гўштдор товоқ юзларини дастрўмоли билан артар экан, сўради Амир Ҳусайн қисиқ кўзларини Амир Мусога тикиб. Кейин меҳмоннинг тараддуудланганини кўриб, уни тинчлантириди:

— Хотиржам бўлсунлар, бу ерда ҳамма ўз кишиларимиздурлар...

— Тушундик... Ҳусайнбек, аҳвол бағоят ноҳушдир... — сўз бошлади Амир Мусо. — Темурбекнинг нияти холисликдан йироқдур. Ашаддий душман эркан. Эҳ-ҳе!.. У қўшин етаклаб сиз билан юз кўришурға отланғон... Амиrlар билан йигилиб ўлтиронда, дунё илону чаён тўла бир сандиқдур, лекин ичидағи одам шаклидаги илону чаёнлардур, деди. Шундай деганда, аниқ сизни ўйлаб айтди, чунки гап сиз ҳақингизда кетмакда эди, олампаноҳ! Ҳамма шундай тушунди, ха-а! Бошка амиrlар ёмон сўз айтмадилар, барчасини Темурбекнинг ўзи бошлади. Амиrlарни отлантироғон ҳам ўзи... Жазосини берадурғон ўзим, дейдир, чиранадир...

— Ҳим-м-м! Мени жазоламакчimu ҳали? Мени-я? Туркистон султонини-я?.. — тўлғанди Амир Ҳусайн ўлтирган жойида, ғазабдан гўштдор юзи пириллай бошлади. — Аҳа-а-а! Сўзлангиз! Сўзлангиз-чи, хўш, хўш?

Хеч ким чурқ этмасди.

— Бир қошиқ қонимдан кечасиз, онҳазрат... —  
каловланди Амир Мусо...

— Сўзлангиз! Сўзлай берингиз! Билайлук нима гап-  
лигини!

— Жанобингизни қўшинда қўлга қўйди... — давом  
этди Амир Мусо. — Аммо мен, наҳотки ўз амиригта  
қарши борсам, ҳукмдорим мени кутиб турибди-ку, деб  
ўйладим. Темурбек шундай қилмакчиди. Тезлик би-  
лан бу ғораттир қўшин ҳақида хабарни сиз ҳазратла-  
рига етказишни зарур бурч, деб билдим. Пайт пойлаб,  
Хузорда тунда ўзимни Самарқанд томонга қочгандай  
кўрсатдим, аслида эса йўлни буриб Балхга ҳузурин-  
гизга ошиқдим. Ҳамма ерда Темурбекнинг одамлари  
изғиб юрибди. Кечалари юрамен, кундузлари берки-  
ниб ётамен...

— Э, сизнинг ётиб-туришингизнинг нима қизиги  
бор? — ўшқирди Амир Ҳусайн. — Темурбекдан  
сўзлангиз! Темурбек қаерда ҳозир? Темурбек?

— Темурбек катта қўшин билан ҳозир, чамаси, Тер-  
мизда турибди, — шошилмай давом этди Амир Мусо  
онҳазратнинг ўшқирганини сезмагандай. — Ҳамма  
тўпсиндирап амирлар унинг ёнида. Баҳодирлар фар-  
монига мунтазир... Угрорга кетиб қолган Шайх Му-  
ҳаммад Баён суддузни чорлатди. Олой томонларга, ти-  
шини қайраб юрган душманингиз Амир Кайхусравга  
ҳам одам юборди. Амир Ҳусайнга қарши яқдил бўлай-  
лик, дейдир. Темурбек разаб тулпорига минон... Душ-  
манлик йўлига киррон Амир Ҳусайнни шариат қону-  
нига биноан жазолаймен, Ҳусайнбек фитначи, деди,  
уни даф этмак савобдур... Ҳазрат, сизни шу қадар  
ёмон кўришини энди билибмен... Дунёда ягона душ-  
мани сиз экансиз... Сиз...

— Оғзингни ёп! — шу ерга қелганда чидамай ба-  
қириб юборди Амир Ҳусайн. — Оғзим бор, бир қарич  
тилим бор, деб галираверасанму?..

Ҳамма қотиб қолди! Амир Ҳалил қўрқиб кетди.  
Амир Ҳиндушоҳ бирон нима демакка чоғланди-ю, аммо  
тилинни тийди. Амир Мусо иргиб чиққан кўзларини  
ерга тиқди. Синчиклаб қараган одам бу кўзларнинг  
тубида мамнунлик аломатларини илгарди. Ҳа, Амир  
Ҳусайн ҳам қаҳру разаб дуддулига минди! Шу керак  
эди. Ҳозир дунёда энг ёмон кўрган одами — Темур-  
бек! Энди у Темурбекни бартараф этмакка жон-жаҳ-  
ди билан киришади. Темурбек эса Амир Ҳусайнни

гумдон этмакчи! Мана, ҳаётнинг, Амир Мусо ҳаёти-нинг асл маъно, мақсади! Туркистонда нуфузи кучли икки амир бор — Амир Ҳусайн ва Амир Темур. Амир Мусо уларнинг иккисини ҳам ёмон кўради! Қани энди, қўлида қудрат бўлса-ю ҳар иккисини ҳам даф этиб ташласа!

Хўш, Амир Мусо юрт бошқара олмайдирму? Амир Ҳусайн билан Темурбек даъвогарлик қилиб юрибдилар-ку? Бири — Амир Қозоғон набираси, бири бар-лос қабиласи бегининг ўғли холос. Иккиси ҳам хон авлоди эмас. Амир Мусо ҳам, кимсан, тойживут қабиласи бегининг зурёди бўлади, ҳа, тегли-тахтли хона-дондан. Агар унинг онаси ҳам худди холаси Сарой-мулкхоним онаси сингари Туркистон ҳукмдори Қозон Султонхонга тушганида борми... унда у, балки, хон авлоди бўларди-қоларди, унда хон тахти — давлат баҳти аниқ уники эди-я!

Шу пайт кутилмагандага кетма-кет уч бор ер қимиради! Тўрт томонда қўйилган шамлар чайқалиб, ер силкинганини яна ҳам бўрттириброк, кўрсатарди. Амир Ҳусайн ғазабидан ер қимирагандай бўлиб кетди Амир Мусо назарида... Ҳамма ўрнидан сапчиб оёқда қалқди. Ваҳима қўпди.

— Ло илоҳо иллаллоҳу Муҳаммадун расулиллоҳ! — калима келтирди хаёл қалаваси учини йўқотган Амир Мусо ва «Ло ҳавло вало қуввато! Ло ҳавло вало қуввато!»ни тилдан қўймай барчадан олдин, ҳайратдан ланг очилиб қолган эшикка ўзини урди. Амир Ҳалил билан Амир Ҳиндушоҳ шитоб хон ва онҳазратта кўмакка ошиқдилар. Каловланиб ёттан ширакайф Амир Ҳусайннинг қўлтиғидан олишиб саройдан чиқа бошладилар. Хон ўз ғамини ўзи еб, аввалроқ ҳаракатга тушган, аллақачон эшикка етиб олганди. Уларнинг атрофида бошқалар ҳам тезроқ очиқ ҳавога чиқиш истагида куймаланаар эдилар. Қий-чувлар ичиди, айниқса, ўз бўлмаларидан қочиб чиқишаётган аҳли ҳарам фарёди барчасини босиб кетмоқдайди.

## УЧИНЧИ БОБ

### I

Урбуз қалъаси Балхдан беш фарсаҳча<sup>1</sup> масофада Балхоб дарёсининг Дарайи Гез ирмоги бўйида жойлашган. Шу ерда Темурбек синашта дўстларидан бири Суюргатмиш ўғлон ибн Донишмандчахонни Туркистон хони деб эълон қилди ва турли шаҳарларга чопарлар юборди. Амирлару баҳодирлар қувончдан сурон солдилар:

— Энди хонимиз бор! Энди хонимиз бор! Ўзимизнинг хонимиз!

— Хонимизга хизмат этамиз! Кутлуғ бўлсин!

Удум бўйича Туркистоңда хонлик мансабида Чингизхон авлодидан бир вакил ўлтириши лозим эди. Уни биринчи бўлиб Амир Қозоғон бошлиди. Бу аслида туркистоңликларнинг хонликни Чингизхон авлодидан ўз кўлларига олишнинг илк қадами эди.

Амирлар йиринидан кейин, уни хон қилиб кўтармоқчи эканини Темурбек айттанида, Суюргатмиш ўғлон қаттиқ ҳаяжонга тушди. Туркистон хони! Туронзамин ҳукмдори! Ўрта бўйли, қотмадан келган, очиқ юзли, ҳаракатчан Суюргатмиш ўғлон қирқларга бориб-бормаган синикдил бир киши эди, хон авлодиман деб зинҳор кибру ҳавога берилмасди. Темурбекнинг эсида бор, беш йил аввал улар Амир Ҳусайн билан бирга шоиртабъ Қобулшоҳни дарвишлик жандасидан чиқариб хонлик мартабасига миндиридилар, ушбу ашъор бандасининг шеърлари эл орасида машҳур эди. Кейин Амир Ҳусайн Темурбекдан бемаслаҳат Одил Султонни хон кўтарди. Ҳозир ҳам у Мовароуннаҳр хони саналади. Суюргатмиш ўғлоннинг хонлик таҳтига мениши хабарининг ўзи жуда кўп муаммоларга ечим бўлиб хизмат қиласди. Бу, аввало, ортиқ Амир Ҳусайн ҳукумати йўқ, деган маънони берарди. Кейин, қолаверса, энди Амир Ҳусайнга қарши муҳорабани Темурбек эмас, — ҳар қанча нуфузга эга бўлмасин, у амирлардан бири-да, — балки мамлакат хонининг ўзи олиб боради!

Суюргатмишхон, гарчи хон дейилган бўлса-да, таомилга кўра ўзининг номигагина хон кўтарилиганини,

<sup>1</sup> Фарсаҳ (араб.) — 7—8 километрли масофа номи.

соҳибқирон ижозатисиз бирон қадам қўя олмаслиги-и, хон эмас, балки хизматкор эканлигини яхши ид-рок этади. Шунисита ҳам шукр! Ана, қанчадан қанча чингизий амирлар тож-тахтсиз юришибди, бирор бери кел, демайди. Темурбек эса айни унга хонликни раво кўрди!.. Суюргатмишхон шунга қараб қадам босиши керак!

— Бир мен эрмас, балки авлод-авлодим бирдан хизматингизни адо этоймиз, соҳибқирон олампаноҳ! — Суюргатмиш ўлон таъзим қилиб, Темурбекнинг қўлини ўпди.

— Амир Ҳусайн деган бир фитначи мамлакатимизнинг Балх деган шаҳрини ўзига пойтахт қилиб олиб-лур, илло, юртга даъво этмақдан қутула олмайдур эрмиш... — деди Темурбек Суюргатмиш ўлон хурматини ўз ўрнида сақлаб, — Фитначининг таъзирини бериб қўймак лозим, хон ҳазратлари!

— Шубҳасиз, олампаноҳ, баюят рост сўзладилар! — тасдиқлади хон.

Воқеалар йўсенидан маминун амирлару баҳодирлар, Наврўз кунги зилзила Амир Ҳусайнга кутилмаган ҳодиса бўлғанлиги аёндир, аммо Суюргатмиш ўлоннинг хон қилиб кўтарилиши унга зилзиладан ҳам кучлироқ таъсир қиласа керак, деб гапиришарди. Амир Сайфиддин некўз Суюргатмишхонни қутлар экан, аввал ораларида бўлиб ўтган лутфга ишора қилди:

— Хон ҳазратлари! Хўш... муборак бўлсун! Йил баракали келди... А?.. Баракали...

— Ростдан ҳам баракали келди, амир жаноблари! Оллоҳга шукр! — дер эди миннатдор бўлиб Суюргатмишхон. — Барчаси соҳибқирон шарофатларидан-лур...

Беш кун аввал ўжар, нуфузли амирлардан Амир Улжойту Темурбекнинг чақириғига қулоқ солиб ўз лашкари билан Қундуздан етиб келди ҳамда нияти бир щаклигини, батамом соҳибқирон тарафига ўтганини онкор этди. Шибирғон ҳокими Зиндачааш опардий ҳам шу йўлни тутди, лашкари билан Темурбек қўшинини тўлдирди. Булар яхши янгиликлар эди. Шайх Муҳаммад Баён судуз ва Амир Кайхусрав чериклари, бинча амирлару баҳодирлар тўплари фармони олийга мунтазир бўлиб кутиб турадилар. Темурбек саф тортгани қўшинни бирма-бир юриб кўздан кечирди, бўлуклар ўрнини белгилаб чиқди. Ҳировул, чоповул, кўл,

қалб, чаноҳ, баронғору жавонғор<sup>1</sup> фавжларини<sup>2</sup> назоратдан ўтказди. Сипоҳларнинг руҳи тетик эди. Соҳиб-қирон дилида қониқиши хиссини түйди.

— Алҳамду лиллаҳи роббил оламин! Зафар сизга ёр бўлғай! Оллоҳу акбар! — дуо қилди пири муршид Мир Сайид Барака.

— Оллоҳу ак-бар! — садолари еру осмонни тутди.

Истиқболда Балх шаҳри турарди.

Темурбекнинг ададсиз навкарлари ҳеч бир қаршиликсиз Балхга кириб келдилар ва Ҳиндувон қалъасини ўраб ола бошладилар. Бирдан пири муршид Мир Сайид Барака тухфа этган арслон терили новора садолари янгради. Кўрагалар ишга тушди, баҳодиру аскарларнинг ҳайқириқлари, лашкар сурони-ю бедовларнинг кишинаши бари бир бўлиб қулоқларни қоматга келтирди. Бу жангга чорлов эди.

Шу палла Ҳиндувон қалъасидан ҳам сурон кўтарилиди. Амир Ҳусайннинг шай турган аскарлари майдон ҳавасида ҳайқирап эдилар. Амир Халил Саттор шихнага қараб қичқирди:

— Анграйма! Дарвозани оч!

— Кеча ёпган эдим, энди очамен... — ўз-ўзича минфирилади Саттор шихна ивирсиниб дарвозани очаркан. — Оч, ёп... Ёп, оч...

Дарвоза очилиши ҳамоно Амир Ҳиндушоҳ билан Амир Халил бошчилигидағи отлиқлару пиёдалар яна ҳам қаттикроқ бурғу-карнай чалиб ташқарига ёприлиб чиқдилар ва хандак ортидаги майдонни тутиб кетган лашкарга рўбарў бўлдилар. Улар ортидан яна тўрт фавж қўшин қўпидиб ўлар-тириларига қарамай жанг майдонига отилди. Муҳораба бошланиб кетди.

Темурбек қалъадан йироқроқда эски шаҳар томонда баланд жойга чодир тикириди. Ҳумоюн ўрдудан<sup>3</sup> то Ҳиндувонгача жанг майдони кафтдагидек кўриниб турарди.

Жанг русумига кўра, даставвал икки томон узоқдан ўқ отишиб, гўё бир-бирларини қитиқлаб синашгандай бўлдилар. Қўшиллар манглай уриштирганларида наиза жангига навбат етди. Амир Жоку

<sup>1</sup> Ҳировул, чоповул, қўл, қалб, чаноҳ, баронғор, жавонғор — лашкар қанотлари номлари.

<sup>2</sup> Фавж — ҳарбий бўлинма.

<sup>3</sup> Ҳумоюн ўрду — подшо қароргоҳи.

барлос Жаҳонгир Мирзодан йироқроқда саваш қуради. Амирларнинг улуғи соҳибқироннинг суюқли жигарпораси Жаҳонгир Мирзонинг савашдаги чаққону чопсонлигидан бениҳоя қувонар эди, чунки Жаҳонгир Мирзо Амир Жоку барлосга набира бўларди, қизи Турмиш оқанинг ўғли эди-да. Амирзода ҳам амирни бобом, деб иззатини жойига кўярди. Амир ҳамиша набирасининг ўзига сездирмай, орқаваратдан унга кўз-қулоқ бўлиб юради. Мана, ҳозир ҳам Жаҳонгир Мирзо ёшлик шижоатининг бекиёс кучлилигидан наъра тортиб шервачча каби ўзини ҳарб майдонига урди! Ҳолбуки, Темурбек лашкарбошининг дабурустдан майдонга от солишини қўлламайди, чунки лашкарбошининг худо кўрсатмасин, ҳалок бўлиши ўрдуга бадномлик келтиради ва душман муваффақиятига йўл очади. Ақлли лашкарбоши аввал черигини ишга солсун. Борди-ю ўзи жангта кирса, имкони топилгунча ўзини фалокатдан саклашга ҳаракат қиласун. Шошма-шошарликка йўл қўймасун.

Жаҳонгир Мирзо қатъий низомдан яхши хабардор бўлса-да, жант қизигида уларни унугди, навкарлирини майдонга олиб киаркан, душман билан юзмани келиб қолди. Найза жангига имкон йўқ, — амирзода бу борада моҳирлиги билан ном чиқарганди — олттасир издиҳомда фақат қиличбозлик қилиш мумкин, ёв эса аралашиб кетмоқда. Жаҳонгир Мирзо ўнгга ҳам, сўлга ҳам тинмай қилич сермар эди.

Амир Жоку барлос набирасинг ёв ичида ёлғизланиб бораётганидан ташвишга туша бошлади. У сурон ичида ёнидаги Амир Сорибуғо жалойирга қараб қичкирди:

— Жаҳонгир Мирзога кўмакқа кетдим! Ёшлик гурури уни тинч қўймади! Бу ёвига ҳазир бўл!

— Мен ҳам бирга борамен! Бир ўзингизга қийин, Амир жаноблари, ёлғиз қўйиб юборолмаймен, икки тарафдан қўриқлаймиз! Бу ерда Амир Муайяд арлот ўзи қолса бас! — жавоб берди ингичка овозли, шартаки феъл Амир Сорибуғо жалойир.

— Борингиз! Қизигарнинг бирон ўқ-мўқи тегиб котмасин яна! — қўллаб қолди Амир Муайяд арлот ҳам.

Икки амир Жаҳонгир Мирзо саваш қураётган тарафга от солдилар.

Амирзодага кимдир кумакка етиб келибди, кимли- гини аник, айтиш үйин, дардалай бир навкар чапдаст- лик билан амризодани мудофаза этар, қдлич утталган- ларнинг йулига ғов булар, жонини жабборга берар эди. Жадонгир Мирзо бундан яна дам данотланган, бир райратига икки райрат кушилиб савашарди. У рубару- сидаги бир аскарнинг елкасида оснфанд, садодни куриб долди ва мулжаллаб қдлич солган эди, дамма уллар дирдилиб кетди. Амирзодани пайдаб долган Амир Халил чидамай унга томон от дүйди! Амирзода буни сезиз турган экан, пойлаб Амир Халил отининг боши- га айлантириб дилич урди! От мункиб кетди, яёв долган Амир Халил аскарлар ичига дошиб жон сақдади.

Темурбек думоюн урдудан туриб жанг манзараси- ни кузатар экан, у дам Жадонгир Мирзони куздан дочирмас эди. Амирзоданинг жанг қ,айнаб турган жойга кириб кетгани, низомни бузгани кечирилмаса-да, аммо мардлик ва шижаот намунасини курсатгани, х,али ёш туриб сурону савашлардан ҳдийдмай, узини майдон таниган эрлардек тутиши Темурбек қ,албини ич-ичи- дан шульалантириди.

— Жах,онгир Мирзо х,ам жанг гирдобида!.. — эшиттириброк, деди мэррур, аммо юрагининг бир чети увишган ота, пири муршид Мир Сайид Барака ва Термиз саййидларидан Абу Маолий Термизийларга. — Ёнида бир навдирон жон олиб, жон бериб узини х,алокат гирдобига отмакда! Қ,айси амирим булди бу?..

— Ло ҳдво вало қ,уввато! Амирзодадин узга жанг- чилар йудму эркан, жаноб сох,ибдирон? — койинган- дай суради Абул Маолий Термизий. — Ё Ах,ад!

— Оре, рост. Ёшлиги жупиб узини маъракайи майдонга ургандур... — ичиди Жах,онгир Мирзо х,арака- тини окдаб, деди Мир Сайид Барака. — Тинч турол- майдур. Сердунар устоздан бехунар шогирд чидма- гай!

Амирзодани кузатар экан, Темурбекни бир ладза хаёл ыйирокдарга олиб қ,очди.

Темурбек Жадонгир Мирзо тутилганда ададсиз дувончдан узини қ,уйгани жой тополмай, энг учдур тулпорини миниб Шадрисабздан чик,иб кетди. Қ,аёқда кетаётганини дам билмайди, Ихтиёрни отнинг узига дүйди ва дамчи босди. Тулпор эркинликни сезиз, худди данот чидаргандай, елиб борарди. У бийдай чулга ке- либ долди ва чулнинг у четидан бу четига, бу четидан

у четига от чоптира бошлади. Қирдаги лолалар ортда қолмай дея, унинг билан бирга чопардилар. Темурбекнинг қувончини ёлриз шу чўл ўзига сидира олди. Бир пайт отнинг юришга мажоли қолмади, у терга гарқ бўлганди. Темурбек ҳам чарчади шекилли, охиста ғардан сирвалиб ерга тушди. Кўмкўк майсалар тўлғаниб тиззага уради. Отни ўтлашга қўйди, ўзи бахмадек тўшалган майсалар узра чўзиади. Чўзиади-ю қўл-оёқларини ёзиб юборди, ўзини она ер кифтида гардан ҳам енгил ҳис этди. Шундагина қаттиқ чарчаганини сезди. Осмонга тикилди. Осмон, ажабо, шу қадар тиник эдик, тирноқдек ҳам булат кўринмасди. Бироз томоша қилиб ётди, кейин кўзлари юмилаганини билмай қолди. Қаттиқ ухлабди. Уйғонгандан ўзини руҳан қушдай енгил сезди. Ўрнидан турди-да, отини миниб Шаҳрисабзга етиб келди, отаси билан Шайх Шамсиддин Кулол зиёратига бордилар. Шайх Амир Тарагайни набира, Темурбекни ўғил билан муборакбод этди. Іақалоққа «Жаҳонгир» деб исм қўйди: «Темурбек, жаҳонгирлигининг боши бўлсун, Оллоҳу акбар!» — дуотга қўл очди пири комил. Ўшанда Темурбек йигирма ёнида эди...

Мир саййид Барака бирдан Темурбекнинг чехраси унгариб кетганини пайқади. Соҳибқирон лом-мим демай, юраги гурс-турс урганча жанг майдонига қаттиқ тикилиб қолди. Мир Сайид Барака ҳам ўша ёққа қаради...

Жаҳонгир Мирзо орқа-олдига боқмай савашар эди. Кутиматгандан дайди бир ўқ, келиб амирзода оёқига санчилди! Амирзода эгарга энгалиб қолди. Ёнидаги нақирон йигит тезлик билан амирзода отининг жиловини қўлга олди. Майдондан чиқа бошлаган эдиларки, Амир Жоку барлос билан Амир Сорибуғо жалойир етиб келишди.

— Нима бўлди, амирзодам? — ичи увишиб сўради Амир Жоку барлос Жаҳонгир Мирзодан. — Қаттиқ тегдими?

— Йўқ... бобожон! — жилмайишга уринди Жаҳонгир Мирзо. — Салгина...

— Тез олиб ташлайлик! — ҳаприқди Амир Сорибуғо жалойир амирзода оёғига санчилиб турган найзага қараб...

— Аммо найза оёғимнинг тагидан тешиб чиқғон... — тушунтириди амирзода

— Йўқ, амир! Олиб ташлаш бизнинг қўлимиздан келмайди! — деди Амир Жоку барлос ва ёнидаги навқирон йигитта юзланди:

— Ким бўласен, баҳодир?

Йигит ўнгайсизланди:

— Мен... баҳодир эмасмен... Ахий Жаббормен! Аббос баҳодир фавжидан. Мени амирзодаға кўмак бер деб юборғон...

— Опчиқ майдондан! Тез жарроҳга олиб бор! Ҳована бу чодир олдига! Жарроҳлар ўқни оғритмай олиб ташлашади! — Амир Жоку барлос кейин Жаҳонгир Мирзога деди. — Сабр қилингиз, амирзодам!

— Сизлар бирга борингиз, амирим! — ўтинди Амир Сорибуо жалойир. — Мен даъюсларнинг таъзирини бериб турамен! Ана, Аббос баҳодир ҳам келиб қолди! Баҳодир! Майдонга! Майдонга-а!

Улар қиличларини яланғочланганча майдонга отқўйдилар.

Амир Жоку барлос Жаҳонгир Мирзо отининг эгари қошига қўл ташлади ва отни авайлаб ўзига тортди. Ахий Жаббор эса отни йўрттириб юормасликка, шунингдек фурсатни ҳам қўлдан бермасликка ҳаракат қилди, чунки ўқ амирзода оёғига санчилганча келарди.

Номозхўжа Шоший Темурбекнинг хос табиби бўлиб, ўз касбига моҳир эди. Хушфеъл табибни ҳеч қачон ранжиган, бирор нарсадан норози ҳолда кўрмаганларини айтишарди. У шошилмас, беморга бўлар-бўлмас гапни гапирмас, босиқ одам эди. Номозхўжа Шоший тезликда Жаҳонгир Мирзо этигини кесиб оёқдан ажратиб олди. Этикнинг ичи қонга тўлган, жароҳатдан ҳали қон тўхтамасди. Оёқни тешиб ўтган найзани олиш қийин бўлди. Ўқни суғуриб олиш мумкин эмас, унда унинг қалпоқчали учини этни ўпириб чиқади... Номозхўжа Шоший бир сихни ўтда қиздиришларини буюорди ва обдор шамшир олиб келишларини сўради. Буни эшигган Ахий Жаббор, наҳотки амирзода оёғини кессалар, деган таҳликага тушди, кўз узмай дикқат билан кузата бошлади. Амир Жоку барлос аста ўз шамширини узатди. Жарроҳ найзанинг оёқ тагидан чиқиб турган қалпоқчали учини усталик билан кесиб ташлади. Сўнг қизиган сихни тайёр қилиб қўйди ва найзани суғуриб олди-да, ўрнини шундай куйдирдики, сих оёқнинг у томонидан чиқди! Оқаётган қон тўхтагач, Номозхўжа Шоший жароҳатта малҳам босиб боғлаб қўйди...

Жасоратли амирзода барчасини кўриб турарди. Ўн тўрт ёшда эканлигига қарамай жони қийналаёттанини, ҳолсизланаёттанини бировга билдирамади, тишини тишинга қўйиб, ўзини ҳеч нарса бўлмагандай тутишга уринди, «иҳ» деган овоз чиқармади. Шу палла у, падари бузруквори Темурбекнинг қаердандир унга қараб турганини, амирзода аҳволидан огоҳ эканлигини сенарди ва бу нарса ҳам қувват бағишлар, ҳам хижолатга соларди.

Амир Жоку барлос ичида: «Валламатларнинг фарзандлари эрта вояга етади-да. Жаҳонгир Мирзо, йигит бўлибди, умрини берсин. У Темурбекнинг суюнган тори, чексиз қувончи, белининг мадори, тўлатўкис давлати!» — деб қўйди. Бирдан шодлиқданми, ғурурланганиданми, «пик» этиб йиглаб юборди, бир томчи ёш, қилич тегиб кетиб иккига ажралиб япаски бўлиб қолган бурни устига тушди... Амир тезда ўзини кўлга олди, юз-кўзларини артиб, Жаҳонгир Мирзонинг елкасига беозоргина қўлини қўйиб сўзланди:

— Тан бердик, амирзодам, паҳлавон экансиз! Мард йигит-да бу, бу мард йигит!

— Амирзодам хўп паҳлавон эканлар, душманлар ер, алар осмон эканлар! — сўзга қўшилди Ахий Жаббор ҳам.

— Ҳа, мен ҳам ўз жарроҳлик тажрибамда бундай ҳолни кам кўрганмен... — деди Номозхўжа Шоший, обекнинг қандай боғланганини яна бир бор назардан ўтказар экан. — Шундоғ муолажа пайтида bemор, одатда, оғриқча чидамай, овозига зўр беради. Аммо Жаҳонгир Мирзодан ҳеч садо эшитмадик. Айтмоқчи, бир марта эсимда бор... Қарангки, бу воқеа амирзоданинг ғилинеъматлари Темурбек номлари билан боғлик. Бундан саккиз йил аввал Сеистонда Темурбекнинг ўнг обғига ҳам ўқ текканди. Ўшандада ҳам иш сихга қолган ёди! Ўшандада ҳам bemордан бирон марта «Иҳ!» деган сасни эшитмагандим!..

— Жасорат ҳам ота мерос-да! — тасдиқлади Амир Жоку барлос.

Бу мақтovлардан Жаҳонгир Мирзонинг қонсиз юзларига қизиллик югурди.

— Сен қофияли гапга уста экансен-ку! — Ахий Жабборга қараб деди энди Амир Жоку барлос. — Савашишда ҳам моҳирлик қилдинг. Мана бу сипоҳлар

кузатувида амирзодани чодирга олиб бор. Ҳолидан огоҳ бўл! Уқдингму? Мен жангдан хабар саламен!

— Уқдим, эй амирларнинг улуғи! — таъзим бажо келтириди Ахий Жаббор.

Жаҳонгир Мирзо ни эҳтиётлик билан маофага солдилар-да, амирзода чодири томон йўлга тушдилар. Тўрт синоҳ маофанинг тўрт томонида, Ахий Жаббор орқароқда амирзоданинг гижинглаган салман отини жиловидан тутиб етаклаб бораради. Ўттиз қадамча юришган эдики, Ахий Жаббор кўк саллали, қора чўққи соқолли, қотма бир одам унинг изидан келаёттанини кўрди. Келишидан қандайдир идаоси борлиги сезиларди.

— Галинг борми, бор бўлса сўйла, сўйлашингдан олдин хўп ўйла! — Ахий Жаббор сўз қотди кўк саллали одамга.

— Отимни беринг, барака топгур! Менинг отим! — деди бирдан «хе» йўқ, «бе» йўқ, кўк саллали одам Ахий Жаббор етаклаб олган отни кўрсатиб. — Уч кундирки, уни йўқотиб қўйиб, тополмай юрибман. Кўпкарига минишм керак, эртага кўпкари... Худога шукр, топилди. Энди топдим...

Ахий Жаббор бу гапни эшлитиб анграйиб қолди:

— Ие! Хўп, гапирсанг ўйнаб гапир, ўйнасанг ҳам ўйлаб гапир! Нима деяёттганингни биласенму ўзинг?

— Биламен... — хотиржам жавоб қилди кўк саллали одам. — Уч кун олдин йўқотиб қўйгандим. Тушови ечилиб кетибди. Ўзим ёш-да, эси йўқ, тушовини яхши боғламабди... Қидирмаган ерим қолмади. Сиз топиб олибсиз. Тағин эгар ҳам урибсиз... Улоқчи отим-да бу... — Кўк саллали одам яқинлашиб отнинг бўйнига шапатилаб уриб-уриб қўяркан, давом этди. — худди ўзи, саман-да, думи ҳам ўша, гажакдор... Ҳа, жонивор, бетайин эгангни йўқотиб қўйиб, кўп озор егандурсан? Эгангнинг ўзиям бўлганича бўлди...

Ахий Жаббор шовқин кўтарилиб амирзодани бевозта этмасин, деган ташвишда, овозини пасайтириб деди:

— Э, эсини еган эсвос! Ўпкангни бос! Бу кимнинг оти эканлигини билармусен?..

Кўк саллали одам, Ахий Жаббор сирни яширишга уриняпти, деб ўйлади шекилли, паст келмади:

— Менинг отим-да, кимники бўларди! Ана пешонасига тушиб турган бир тутам ёли ҳам ўша... Доим

ўзим тараб қўядим... Ярашиб турганини кўринг! Сизга ҳам юк бўлиди... Бир бечорага жабр қилиш керакмас...

— Бу соҳибқирон ўғиллари Жаҳонгир Мирзонинг самани! Билмасанг билиб қўй! — бўғилганча тушунтиromoқчи бўлди Ахий Жаббор.— Лакалов! Пандавақи! Овсар!..

— Менинг отим, деяпман, менинг отим! Агар... қозига борамен! — таҳдид қилишга ўтди энди овозини кўтариб кўк салла...

Маофа анча йироқлашиб кетганди. Ахий Жаббор отидан шартта сакраб тушди-да, кўк саллали одамни бир уриб ерга юмалатди, арқон топиб ҳаш-паш дегунча қўлларини орқасига қилиб борлади, бошқа арқонда оёқларини чандиди. Ёнидан дастрўмол чиқариб кўк салланинг оғзига тикиди. Сўнг тепаликка ўтқазиб қўйди-да, лўмбоздай муштини ўқталганча тиш орасидан деди:

— Ўтган-кеттани томоша қилиб ўтир, бетайин! Туҳмат қилганинг учун жазонгни оласен ҳали! Тушундингму? Бундан кейин чолни кўриб, буво деявермайдиган бўласен, галварс!

Кўк саллали одамнинг жон-пони чиқиб кетди! Кўрқувдан ола-кула бўлиб кеттан кўзлари йироқлашиб бораётган, саманин етаклаб олган Ахий Жаббордан узилмас эди.

## II

Амир Жоку барлоснинг Жаҳонгир Мирзо олдига стиб келганини кўргач, Темурбек кўнгли бироз таскин тоғди. Ташишланганини ёнидагиларга сездирмасликка тиришди. «Ўтган ишга ўқинмаймен, ютуқлардан шодланмаймен», деб қўйди ичиди Темурбек. Бу унинг яхши кўрган сўзлари бўлиб, доим шунга амал қиласли. Темурбек бир куни Куръони каримнинг «Ҳадид сураси»да шундай оятни ўқиб қолди. Оят маъноси бундай эди: «... Токи қўлларингиздан кетган нарсага қай-курмайсизлар ва Оллоҳ ато этган нарса билан шодлашиб кетмагайсизлар...» Бу улуғ ҳикмат уни шунчалар мағфутун қилиб қўйдики, вақти-вақти билан унинг маъносини юқоридаги содда шаклда такрорлаб юрадиган бўлди. Жаҳонгир Мирзонинг оёғига, — у аниқ кўрди, — ўқ тегди. Ўқ теккан бўлса, худо хоҳласа, соғайиб кета-

ди. Жангда нималар бўлмайди, шунисига ҳам шукр. Ўтган ишга ўкиниб ўтириш — вақтни бой бериш демакдир. Ўкиниш керак эмас, балки эртага нима қилмоқ керак, ана шунинг ташвишини чекмоқ зарурдир...

Бугун Темурбекнинг қўшини зўр жанг қилди. Мана, қош қорая бошлаганда катта талофат кўрган Амир Ҳусайн аскарлари бирин-кетин қалъага чекиниб жон сақладилар. Яхшики, кеч кириб, жанг тўхтади. Темурбек қўшини музafferияти равshan бўлиб қолди. Аммо Темурбек бундан шодланиб ўлтирганий ўқ, жиллақурса, Соҳибқирон кайфиятида бу нарса сезилмади. Темурбек бундан нечун шодлансин? Шундок бўлиши табиий. Ахир Темурбек, жаҳонгирилик йўлида улур ниятлар этагини тутган зотдур, зафарлар, ютуклар, ғалabalар эса кутилмаган, йўқдан бино бўлган нарсалар эмас, улар Оллоҳнинг инъомлари, Темурбекнинг саъи ҳаракатлари эвазига олинган мукофотлар, умр йўлида учраган, қўл узатса етадиган насибалари, ҳаётдан теккан улушлари дур... Наҳотки, инсон ўз насибасига, улушкига ҳам шодланиб, ҳаволаниб юрса? Шодланмасин, бу гуурга йўл бериш бўлади, аммо яраттанга шукр қилсин, шукроналар келтиришни зинҳор унутмасин.

Эрта тонгдан яна Саттор шихна ўзининг одатий сўзларини айтиб, дарвозасини очди. Бугун кечагидан ҳам кўпроқ сипоҳлар мардлик намойиш этиб қалъадан ташқарига чиқдилар. Яна аёвсиз савашиш бошлианди. Зиндачашиб опардий, Амир Кайхусрав, Шайх Мухаммад Баён сулдуз, Амир Улжайту тўплари, айниқса ўлим билан юзма-юз келиб, қалъа дарвозаси рўбарўсида жанг қилардилар. Суюргатмишхон ҳам жонбозликда ўз мартабасига муносиб бўлишга тиришарди. Зафар яқинлиги сезиларди. Қалъа атрофидаги хандақ бўйлари жангчиларнинг жасадига тўлиб кетди. Темурбек ғалаба учун яна бир зарба лозимлигини англади. У туманбоши Амир Жоку барлосга: «Нафтандозу раъдандозлар ишга тушсун!» деб чопар юборди.

Амир Ҳусайн қалъа дарвозаси тепасида, шинакдан туриб жангни кузатарди. Кеча ҳам уззу кун шу ердан жилмади, майдоннинг заиф жойларига черик юбориб турди. Афсуски, унинг қўшини чўти Темурбекникидан паст эди. Амир Мусо Наврўз куни зилзилада ғойиб бўлганча, қайтиб келмади. Одам юбортриб қидиртириди, ерда ҳам йўқ, осмонда ҳам! Ёки ер ютиб кет-

дими? Ишонган амирлари Амир Ҳиндушоҳ билан Амир Ҳалиларнинг ҳам негадир шахтлари паст бўлди. Уларнинг ёнига, сусайманглар, деб чопар йўллайвериб чарчади. Бир пайт қараса, Амир Ҳалил, оти йўқ, пиёда жанг қилиб юрибди. Амирга, тағин кимсан, Амир Ҳусайн лашкарбошисига ярашадурғон ишми шу?.. Зудлик билан от етказиб беришларини буюрди.

Бугунги вазият ҳам кечагидан қарийб фарқ қилмайди. Темурбек қўшинида рух бор, Амир Ҳусайн лашкарида эса — синиклик, журъатсизлик... Жанг майдонини кузатар экан, аянчли манзарага боқиб, биринчи марта уни қўрқув ҳисси қамраб олди. Майдонда кимнингдир жасади қўлсиз, оёқсиз ётарди, кимнингдир боши мажакланган, кимдир юзтубан ётган ҳолда ўлиб қолган, елқасида санчилган ўқ дикрайиб туради. Хандақ суви қондан қизариб кетган... Мовароуннаҳр ҳукмдорининг юраги сиқилди. Наҳотки, энди унинг салтанати инқирозга юз тутса, ҳалокатта учраса? Давлат ҳам тўлин ойдир, емирилади, дер эдилар, наҳотки емрилиш бошланса?.. У Темурбекни яхши билади, Амир Ҳусайнни тутиб олди, энди қўйиб юбормайди. Энди унинг билан ҳисоб-китоб қиласди... Аммо айб, Амир Ҳусайн, сенинг ўзингда, ўзингдан кўр! Бир одамнинг жазоси битта ўқ-да! Ўша битта ўқингни аядинг, бўлмаса Чакчакдами!<sup>1</sup> Сейстондами ё Моҳонда Темурбекнинг суяклари аллақачон ерлар остида чириб ётган бўларди. Мана, парвосизлик оқибати! Афсус, афсус! Э, хом сут эмган банда!..

Амир Ҳусайннинг қисиқ кўзлари бадтар қисилди, кўзига дунё тор эди. Атрофдагиларга қарап экан, гўштдор ўнг юзи пириллаб уча бошлади. Бу унинг ниҳоятда дарқазаб эканлигидан далолат берарди. Ёнида турган паст бўйли хон Одил Султон билан катта ўғли дароз бўйли Наврўз Султонлар ҳам вазиятнинг тобора начорлашиб бораётганидан бошлари қотган, лом-мим дейишмасди.

Шундай танг бир пайтда Темурбекдан чопар келганлигини, у пастда турганлигини маълум қилдилар. Кутимаган янгиликдан ҳайратта тушган Амир Ҳусайн шинақдан кўзини олди-да, мулоzимга қичқирди:

— Айт, чиқсан!

<sup>1</sup> Чакчак — хозирги Дехқонобод тумани ҳудудидаги Чакдара мавзеси.

Салом-алиқдан сўнг чопар дона-дона қилиб, Темурбекнинг ушбу сўзларини тақрорлади:

— «Агар жонингиздан умидингиз бўлса, ягона йўл бор, Ҳусайнбек! Бу таслим бўлиб, қалъадан ташқарига чиқмоқдур».

Темурбекнинг чопари Амир Ҳусайннинг кўзига худди нажот элчиси бўлиб кўринди. Шошиб қолганидан, ўйлаб ҳам ўлтирумай тақлифга розилик билдириди, чунки бошқа чоранинг ўзи йўқ эди:

— Темурбекка айтингиз, таслим бўлдим, қалъадан чиқишига тайёрмен!

У сўзларининг кафолати сифатида хон Одил Султон билан Наврўз Султонларни чопарга қўшиб Темурбекнинг қошига жўнатди ва ушбу омонат сўзларни ҳам илова қабилида қўшиб қўйди: «Итоат камари ила белимни маҳкам боялагонимни маълум қиласмен. Эски дўстлигимиз юзидан, бир қошиқ қонимдан кечсалар, деб ўтина дурмен...»

Хон Одил Султон ва унинг шериклари чиқиб кетишлари биланоқ кўнгли тинчимаган Амир Ҳусайн дабирни чақиртириди ва Темурбекка бир мактуб ёзиши буюрди: «Оллоҳнинг иродаси шундор экан, омаду иқбол қуши мени тарқ айлади ва жаноблари қошига парвоз этди. Бас, энди мол-дунё, мулку мамлакат, салтанату саодат иддаоларидан батамом илик уздум... Машаққату балоларга юзма-юз бўлон умримни Оллоҳ йўлига баҳшида этмак ниятидурмен. Жанобингизга изну ижозат раво кўрилса, Маккаи Мукаррама зиёрати сори йўл тутсам...»

Хон Одил Султон ва Наврўз Султон Темурбекнинг чопари етагида ҳумоюн ўрдуга қадам қўйганларидан кўп ўтмай, Амир Ҳусайннинг пайғоми ҳам етиб келди. Мавлоно Убайд мактубни ўқиб берди. Темурбек шу ондаёқ муносабат билдириди:

— Оллоҳ йўлида азият чекмакчи эркан, розимен. Ҳеч кимса унга қаршилик қиласун! Қаерга хоҳласа, шу ерга кетсун!..

Бироздан сўнг Амир Ҳусайннинг тағин бир илтижоси ҳумоюн ўрду остонасига бош урди. «Тонг отиши билан, иншооллоҳ, йўлга чиқурмен, омонат жонимга қасд қиласалар, қасд қиласликка мустаҳкам кафолат берсалар...» деган сўзлар бор эди пайвомда. Темурбек кетма-кет келган пайғомлардан Амир Ҳусайннинг оёғи куйган товуқдек шошиб қолганини билди. У

Мовароуннахр ҳукмдорининг бу илтижосини ҳам ўринлатди, Амир Ҳусайн тонг отиши билан Ҳиндувондан омон-эсон чиқиб ўз йўлига кетаверсин, дея фармон қилди.

## ТЎРТИНЧИ БОБ

### I

Бундан бир ҳафта аввал Амир Мусонинг Ҳиндувон қалъасида хон саройида ўлтирганида ногаҳон зилзила юз берганидан хабардормиз. Амир Мусо ўшанда кўркиб ташқарига югуриб чиқди. Қалъани ваҳима чулғаганди. У бир лаҳза нима қиласини билмай гарангсиб турган жойида туриб қолди. Хаёлига турли фикрлар чарх уриб кела бошлиди. Ҳиндувонда қолиш керакми, кетиши керакми? Қолса, эрта-индин Темурбек бу ерга етиб келади, Амир Ҳусайн билан ўртада саваш бўлади. Қайси бири енгиги чиқса ҳам, унга мақбул эмас. Унга, ҳар иккиси ҳам жангда асфаласофилинга кетса тузук эди. Ҳар иккиси ҳам унинг ашаддий душмани, Амир Мусо ўлганининг кунидан улар билан муроса қиласи. Икки амирнинг танишганларига, мана, ўн йил бўлмоқда, Амир Мусо кузатиб келади, икки қўчқорнинг боши бир қозонда қайнамади, бундан кейин ҳам қайнамаслиги аниқ ва равшан. Уларни бирбирига гиж-гиждаш керак, токи ўзларининг гўштини ўзлари есунлар.

Чакчак дарасидаги учрашув ҳам Амир Мусо қутқуси билан рўй бериши керак эди. У Амир Ҳусайнни, орадан Темурбекни кўтариб ташламасангиз бўлмайди, бунинг чораси уни Чакчак дарасига чорлаш ва ўша тор жойда қўл-оёгини боғлаб қўйдек бўғизлашдир, деб ҳол-жонига қўймади. Бу фикр Амир Ҳусайнга ҳам маъқул келди, у дарага қўшин юборди-ю аммо ўзи қадам босмади. Қўрқдими... Темурбек кўп зийрак-да, баттол, дарага борди, чунки ваъда қилса адo этадиган одати бор. Бироқ, борищдан аввал дарага тингчи жўнатиб, пусур қўйди, ўзи ҳам тузуккина лашкар ияртиб борди. Дарага қадам қўйиши билан атрофни Амир Ҳусайннинг катта қўшини тутиб кетганини кўрди. Вазият дўстлар дийдорлашувига ўхшамайроқ турарди. Шу пайт қоро-

вуллар унга, дарада Амир Ҳусайннинг ўзи йўқ эмиш, деган хабарни етказдилар. Дарғазаб бўлган Темурбек дарҳол пусугдаги лашкарни Амир Ҳусайн қўшини ортидан тўсатдан ҳужум қилишга фармон берди, ўзи душманга юзма-юз чиқди. Амир Ҳусайннинг чорасиз қолган қўшини асир тушди. Ўшанда Амир Мусо она шахри Қаршида вилоят ҳокими эди.

Тўрт йил аввал Темурбекнинг завжаси, Амир Ҳусайн синглиси Улжой Туркон оқа бетобликдан бандаликни бажо келтирди. Улжой Туркон оқа Амир Ҳусайн билан Темурбек орасида узилай-узилай деб турган алоқа иплари вазифасини бажарап эди. Икки амир орасидаги алоқалар энди дўст, қариндошлар эмас, балки бегоналар даражасига кўчди, муносабатлар таранглашиб вазият нозиклашиб борди. Амир Мусо дилдаги муддаолардан бири шу эди. Дизақ<sup>1</sup> мавзеида икки ўргада жанг содир бўлди, Амир Ҳусайн лашкари енгилди... Сўнг Хўжанд ва Тошкент фозилу фузалоси орага тушиб, икки амирни яраштириб қўйдилар. Амилар биргаллашиб, исён кўтарган Бадахшон ҳокимига қарши саваш қурдилар, Кобулистонга юриш қилдилар... Амир Мусо икки амир дўстлигига пинҳона дарз кеттанини барибир сезарди, шунинг учун ўз ниятларидан қайтмади, энди Темурбекни авраб Амир Ҳусайнга қайради. Шахрисабзда Темурбек чорбоғида бўлган издиҳомда шу ҳакда сўз бошлаб, оқибатда мақсадига эришди. Мана, Темурбек катта қўшин билан Ҳиндувон қамалита келмоқда...

Амир Мусо ваҳима ичида беихтиёр қалъа дарвозаси томон бурилди. Демак, кетади. Ҳа, кетади! Қалъада қололмайди! Бирдан: «Яна зилзила бўлмоқдаму?..» деди-ю тўхтади ва муюлишда осигуриқ фанорга қаради. Фанор биринчи силкинишда қаттиқ чайқалганча ҳамон лопиллаб турарди. Коронфуда одамлар тўс-тўполон қилишиб у ёқдан — бу ёққа изриб юришарди.

— Ҳа, Мусо? Қаёққа?.. — сўради бирдан кимдир орқадан қоронфуда. — Қаёққа қочаяпсен? Тушундик!..

Амир Мусо дўсти Амир Ҳалилни овозидан таниди. «Оббо, қитмир, кўнглимдагини билиб олибди-я!.. — ташвишга тушди у. — Ёки пойлаб чиқдими? Энди бу ҳўл балодан қандай қутуламен?..»

— Қочаётоним йўқ... Қаёққа қочамен, Ҳалилбек,

<sup>1</sup>Дизақ — Жиззахнинг қадимий аталиши.

нега қочамен? Узи эндиғина келиб турибмен-ку... Бу нима деганинг булди энди?..

— Хазил килдим, Мусо... Мунча зирилламасанг...— Амир Халил кронруда дүстүринг юзини курмаса-да, овозидан хаяжонланытганини пайқади.

— Хазил эмиш... Шундай пайтада күнглиңгә ҳдзил сик, қаныга ҳдиронмен. Зилзила булиб турибди-ю! — Узини босиб олди Амир Мусо. — Ҳдрамни Эски шахарда қарандышникада қолдирғандым. Юралари ёрилип ултиришгандир. Бориб хабар олмакчимен холос...

— Шундор демайсему? Гаплар бор... — деди Амир Халил маңноли. — Тезрок, қдитишни уйла! Гаплаша- миз, хупми?

— Хуп!

Амир Мусо шошилганча дарвозага келди. Тармочук, Саттор шихна билан дарвоазадан берирокда очик, хавода юришар, гох-гох, ташвишланиб осмонга қараб- қараб күйишарди.

— Тармочук,! — чакирди Амир Мусо...

— Лаббай, амирим!

— Отлар қдни? Тез тулпорларни олиб кел! Тез қимирла!

Кейин хайрон қдраб турған Саттор шихдага ушкруди:

— Нега аммамнинг бузогидай лалаясен? Оч дарвоздангни! Шитоб кетиш керак!

Саттор шихна одатдагидек минирлаб дарвозага йуналди:

— Хали ёпган эдим, энди очамен...

Эски шахрда итларнинг бетиним вовуллаши, зилзиладан кейинги нохуш бесаранжомлик киши дилига рашлик соларди. Амир Мусо билан Тармочук, Жоха Укоша дарвазасидан чиқдилар-да, Термиз кечуви та- раф от сурдилар. Кечувгача беш тош масофа чиқдиди.

Хийлагина йул юрганларидан сунг, Балх узокда қолиб кетганиданми, Амир Мусо бироз узини хотир- жам сезди. Шундагина қатты, чарчаганини билди. Ило- жи булса-ю шу ерда таппа ташласа, қотиб ухласа!.. Амир Мусо кдердадир нафас ростлаб, хордик, олишни уйларди. Атроф қишлоқдардан бирида тухтаб, ухлаб, тонгсах, арда йулни бемайли хотир давом этдириш фикри унга тинчлик бермай қайди. Бирон қишлоқ, қораси куринармикин, деган умида, а теваракка күз югуртира бошлади. Тусиндан, олдинда                    узокдарда                    хар                    жой-хар

жойда ловуллаб ёнаётган гулханларни кўриб қолди. Кўрди юраги шув этиб кетди!

— Ҳув анови Дарайи Гез томонда кўринганлар ни-  
мадир, Тармочук? — сўради у от жиловини тортиб. —  
Бирон... уй-пуйлар ёнаётирму? Қара-чи, кўзинг ўткир...

— Уйлар эмас, амирим, ёнаётган гулханлар! — жа-  
воб берди Тармочук. — Биронта қўшин қўнган ше-  
кили... Лашкар гулханига ўхшайди...

Амир Мусо ана шундан ҳадиксирар эди.

— Қўшин, дегин?.. Тушундик!.. Бу — Темурбекнинг  
қўшини! — деди Амир Мусо ва кечаси маза қилиб ҳор-  
дик олиб тонгсаҳар йўлга чиқиши орзузи энди орзулиги-  
ча қолишини фахмлади. Тез тўхтамай бу ерлардан ке-  
тиш керак! Кечани кеча, кундузни кундуз, демай юриш  
керак! Чаққон ҳаракат қилинмаса, Темурбек одамлари-  
нинг қўлига тушиб қолиш ҳеч гапмас! Шошилиш керак!

— Тармочук! Сўлга кетишимиз керак! Бидингму?  
Рост юрсак, ўша гулханларга йўлиқамиз! Чапга бури-  
либ, дала, ўр-қир орқали кечувга чиқиб олишни ўйлай-  
лик!

— Бош устига, амирим! — жавоб берди Тармочук.

Ой ботиб кетганлигидан теварак-атроф қоп-қоронғу  
эди, ўн қадам наридаги нарсани илғаб бўлмасди. Тар-  
мочук тимирскланиб юриб-юриб, чапда қандайдир  
йўлга ўхшаш бир жой топди. Улар шу ердан шартта  
чапга бурилдилар, зулумот кечани безаб турган гул-  
ханлар ўнг ёқда қола бошлиди...

Амир Мусо бу жойларни яхши биларди. Улар ши-  
тоблик билан ҳаракат қилсалар-да, айланма йўллардан  
юришга тўғри келганидан, кечувга боргунларича тонг  
отиб қолди. Кечув Жайхуннинг энг тор жойи бўлиб,  
минг қадамча келарди. Хайрият, бу ерда ҳеч ким йўқ  
экан. Темурбек қўшини Балх томонга ўтгач, кечувни  
қўриқлаш зарурати ҳам қолмаган шекили. Амир Мусо  
шундок бўлганига шукрлар қилди. Улар кемалар  
кўпригидан ўтишгач, йўлларда тўхтамай беш кун де-  
ганда Қаршига етиб келдилар. Амир Мусонинг мақса-  
ди Қаршидан ҳарамини олиб, замон бир ёқли бўлгун-  
ча Йангкент<sup>1</sup> томонларга кетиш эди.

Қарши муҳофазаси Тамуқа қавчинига қолдирилган  
экан. Тамуқа қавчин билан Амир Мусонинг илгаридан

<sup>1</sup> Йангкент — Авлиёота (Жамбул)нинг ўрта асрлардаги номи.

яқинлиги бор, умуман, қавчинлару тойживут ўмоқи ўртасидаги иноклиқдан күп сўйлардилар. Тамуқа қавчиннинг «Йўл бўлсин?» деган саволига Амир Мусо: «Темурбекнинг зарур топшириқлари билан бандурмен!» қабилида мужмалроқ жавоб берди.

— Амир Ҳусайн билан ҳали саваш бўлмадиму?

— Йўқ, саваш бўлмади. — Шундай дегач, Амир Мусо чалғитиш учун Тамуқа қавчиндан сўради: — Зилзиладан зарар етмадиму?

— Худога шукр, тинчмиз. — Тамуқа қавчин кейин қўшиб қўйди: — Ҳа, битта ҷаҳон қулаб тушди холос...

Амир Мусо Тамуқа қавчин билан хайрлашиб, шаҳар марказидаги ҳовлисига ошиқди. Ҳовлида ҳам тўхтамади, жадал йигишириниб, завжаси Орзумулк оқа ва тўрт яшар қизи Туман оқа ҳамда бир суйган канизагини олиб, Тармочуқ бошлиқ хизматкорлар билан Йангкент томонларга от сурди.

## БЕШИНЧИ БОБ

### I

Чопар Темурбекдан кўнгилдагидек жавоб олиб келгач, Амир Ҳусайн бироз тингланди. У Темурбекнинг сўзида турадиган одам эканлигини, ҳамиша ваъдага вафо қилишини яхши биларди. Бу кеча эртага Балҳдан қандоқ чиқиб кетиш режасини тузади, зарур нарсаларини олади. Албатта, энг аввал дуру марварид тиллоларни яхшилаб ғамлаб олиш керак, ҳар қанча бойлик бўлса ҳалал бермайди. Маккаи Мукаррама йўли узок... Асли ҳажта бориш нияти ҳам йўқ... Нафас ростлаб олиш керак холос. Тонг отиши билан ёлғиз ўзи икки ишонган ясовулини олиб чиқиб кетади, ҳарами ҳозирча бу ерда қолади. Бироз фурсат ўтиб осойишта кунлар келиши биланоқ, ҳаммасини олиб кетади. Нега олиб кетар экан? Ҳали Оллоҳдан умиди бор, яна Балхни қайтариб олади, яна даврон отига минади, Ҳиндувонни обод қилади!.. Жўжани кузда санайдилар, ҳали ҳозир энди баҳор кирди, масхараомуз илжайиб қўйди ўзича Амир Ҳусайн, сизлар Ҳусайнбекни билмайсизлар, вақт келади, кимлигини яхши билиб оласиз!..

Мовароуннахр ҳукмдорининг кўнгли фақат бир нарсадан ғаш. Гал шундаки, Хоразмга кетган совчилардан ҳали ҳануз дарак йўқ. Хоразмшоҳ Ҳусайн Сўфи авлодида бир қиз бор эмишки, таърифлашларича, бундай маҳдиқони ҳали олам-жаҳон кўрмаган эмиш. Исми ҳам ўзига муносиб экан — Хонзода хоним! Хонлар авлодидан, ўзбеклар мамлакатининг подшоси Ўзбекхон набираси бўлар экан...

Хуллас, бир қошиқ сув билан ютиб юборса бўладиган, оппоқ томоқ, сиймин бадан гўзал мақтовини эшишиб Амир Ҳусайн ухломай қолди. У бетимсол маҳбуба соҳиби бўлишдан кўра ҳам, кўпроқ Ўзбекхон набирасини олибди, деган овозага, хон куёви шухратига қизиқар эди. Бобоси Амир Қозогон хижрий 747 иили Туркистон ҳукмдори Қозон Султонхонни енгиб қатла этди ва ҳукуматни қўлга олди. Отаси ўлдирилганда олти ёшда бўлган хон қизи Сароймулхонимни вояга етгач, Амир Ҳусайнга узатдилар. Бу ўз набираси келажагини ўйлаган Амир Қозогоннинг раъи билан бўлди, Амир Ҳусайнни хон куёви — кўрагон қилди. Аммо Қозон Султонхон куёви дейиш қаёқда-ю Ўзбекхон куёви дейиш қаёқда!.. Шундай ниятда Амир Ҳусайн катта ҳадя-ю тансуқот жамлаб, Хоразмга совчи жўнатганига хийла вақт бўлди. Энди бу қутлуғ иш ҳам кеъинроққа қолади шекилли. На чора...

... Амир Ҳусайн ярим кечада бирдан чўчиб уйғониб кетди. Босинқираб қолибди. Ётган жойида секин атрофга назар солди, сарой тинч, ҳамма уйкуда... «Бироздан сўнг тонг отади... — ўйлай бошлади у саройнинг қоронғу шифтига тикилиб. — Балхдан хотиржам чиқиб кетамен. Балхдан чиқиб олсам, бас. Қалъадан чиқиб олай...» Шу пайт қандайдир бошқа ички бир овоз унга эътиroz билдири:

«Хотиржам чиқиб кетамен, деяпсенму? Қаёнга чиқасен? Чиқасен, аммо...»

«Нима, аммо?..» — ошиқиб сўради биринчи овоз.

«Чиқасен, аммо қалъа дарвозасидан чиқишинг биланок, фиппа тутадилар ва...»

«Йўқ! Йўқ! — яна сўзни бўлди биринчи овоз. — Менга Темурбекнинг ўзи ваъда берди... Темурбекнинг сўзи ҳечқачон икки бўлғон эмас...»

«Сенинг сўзинг-чи? — бирдан кулиб юборди иккинчи овоз. — Сенинг ваъданг-чи? Аҳд-паймонинг-чи?.. Ўзингникини ҳам ҳеч ўйлайсенму?..»

«Ахд-паймонимга нима қилибди?..»

«Сен бекарорсен! — деди кескин иккинчи овоз. — Темурбекни Чакчак дарасига чорладинг. Аммо ўзинг аҳдингни унутиб, бормадинг. Аслида уни ўлдирмоқчи эдинг. Лекин у ақдлилик қилди...»

«Нега жуда Темурбекни мактаб қолдинг?..» — кесатди энди биринчи овоз.

«Мақтаган сен, мен эмас! Мен азалдан Темурбекни дўст деб билмаймен, у менга ашаддий ғанимдур!..»

«Аммо у ваъда берди, Ҳусайнбек қалъадан эсономон чиқиб кетсун, қаерга хоҳласа шу ерга кетсун, деб...»

«Хўт, Темурбек шундай деди... Бошқалар-чи? Ёдингдан чиқдиму? Шайх Мұхаммад Баён судуз, Зиндачашм опардий, Амир Кайхусравлар? Ҳар бири қиличини қайраб, сени ейман, деб туришибди...»

— Бас! — деб бақириб юборди Амир Ҳусайн шу ерга келганда...

Саросимага тушган ҳукмдор атрофга аланглади. У энди Темурбекка ҳам ишонмас эди. Ўрнидан туриб эшик томон юрганди, кимдир рўбарўдан унга қараб кела бошлади. Шамнинг гира-шарасида худди у пойлаб турган, пистирмадан чиқиб келган одамга ўхшаб кетди. Амир Ҳусайнни хавотир босди, беихтиёр қилич дастасини қаттиқ қисди...

— Онҳазрат, не бўлди? Овозингизни эшилдим. Кўрқманг, мен. Мулозиммен... — деди рўбарўдаги одам.

— Ҳа, овоз чиқариб келади-да одам деган! — сал тинчланди Амир Ҳусайн. — Сен ухлаб қолмадингму йўқму, билмакчи эдим... Ҳалиги икки ясовулни уйғот! Шай бўлиб келишсун!

— Бош устиға! — Мулозим тезда ортига қайтди.

Амир Ҳусайн фурсатни бой бермасликка қарор қилди. Ярим кечаси, ҳамма ширин уйқуга гарқ вақтида, у қалъадан чиқиб олади ва тонг отганда шаҳардан анча узоқда бўлади! Бу фикрдан унинг кўнгли ёришди.

Қалъа дарвазасига яқинлашар эканлар, Амир Ҳусайн ясовуллардан бирини, шитоб боргил, дарвозани очсунлар, деб юборди.

— Хуфтонда ёпган эдим, энди очамен... — деди мингирилаб Саттор шиқна; у чиқиб кетаётган уч отлиқдан бири онҳазратнинг ўзлари эканликларини қоронғуда илғамай қолди. Амир Ҳусайн қалин қора тўн кийиб олган эди.

## II

Қалъадан эсон-омон чиқиб олган Амир Ҳусайн күнгли така-пука эканлигидан қоронғуда қаёққа кетаёттанини ҳам билмасди. Қоронғулукнинг ёт кўзлардан яширгани яхши, аммо шошилиб турганда йўлни кўздан нихон эттани ёмон эди. Нажот йўли қалъадан чиққач, Эски шаҳар орқали ўтарди, бошқа тарафларда ҳамма жойда Темурбек одамлари кезиб юради. Бирор ерда қоровулларга дуч келиши турган гап. Қўрқсанга қўша кўринар, деганлари дай, Амир Ҳусайн ҳар нарсага шубҳа билан қарай бошлади. Саросима-ю вассваса ичиди у ҳатто ёнидаги икки ясовулидан ҳам ҳадиксираб қолди. «Уларни Темурбек менга қарши ёллаган бўлса-чи? — гумонсиради бирдан. — Ким билади... Ҳозир бир овлоқ жойга борганда, шартта мени ўлдиришиб, бутун бойлигимни тортиб олиб кетишса-чи?.. Аниқ олиб кетишади, булар тап тортмайди! Улардан кутилишим керак!..»

Хандакдан ўтиб олишлари билан у ясовулларга деди:

— Бу ерларда душман кўп... Тўпланиб юриш хатарли. Биринг ўнг томонимда, биринг чап ёнимда юз қадам-юз қадам нарида қўриқлаб борингиз! Кўз-кулоқ бўлингиз! Агар бирортаси ташланиб қолса, сас берамен, дарров етиб келасиз. Йўқ эса, Эски шаҳардан чиқаверишда қари чинор тагида кўришамиз. Андхой йўли бошида... Уқдингизму? Кечикмангиз!

Хукмдорнинг кўнглида нималар кечәётганидан буткул бехабар ясовуллар «Хўп!» дедилар-да, икки ёққа кетдилар. Енгил торттан Амир Ҳусайн қоронғуда тимирскиланганча йўлга тушди. Йўлни кўриш мушкуллигидан тез юриб бўлмасди. Бир жойда оттўхтаб қолди, ҳар қанча нуқиса ҳам, юришга тайсаллар эди. Синчиклаб қараса, катта зовурга кўндаланг келиб қолибди. Кўприк топиб айланиб ўтгунча анча фурсат кетди.

Шаҳарнинг катта чорраҳасига келганда Амир Ҳусайн қаёққа юришни билмай, бир лаҳза ўйга толди. Чапга кетса— Чорсу, у ердан тўғри Кобул йўлига чиқиб оларди. Ўнг томонга бурилса, шаҳарнинг чиқаверишидаги катта қари чинорга боради, у ерда икки ясовул билан учрашади, Андхой йўли худди шу жойдан бошланарди.

Амир Ҳусайн шартта чапга бурилди ва отини никтога олди. Шу пайт ўнг томондаги дарвозадан катта бир ит отилиб чиқиб Амир Ҳусайнга даф қилди. Иттинг ўқтин-ўқтин кучли вонуллаши сокин тун-кеча бағрини пора қилиб юборди. Мамлакат ҳукмдори ит билан пайчакилашиб ўлтиришни истамади, фақат: «Кет! Кет!» деганча, аста узоклашди.

Тонг оқариб, тун ҳарир қора пардасини ер юзидан охиста йигиштириб ола бошлади. Йигирма, ўттис қадам наридаги нарсаларни кўриш мумкин бўлиб қолди. Чорсу майдонига етай деганде тонг отди. Бирон одам мени кўриб қолмасмикин, деб ҳадиксираган Амир Ҳусайн, бутун шаҳардан чиқиб кетишдан умидини узди. Панароқ жой топиб, ўша ерда кунни ўтказишга, қоронгу тушиши билан йўлга отланишга қарор қилди. Афсуски, яширгани қулай жой топилмасди. У олазарак бўлиб майдон атрофини кузатиб чиқди. Биронта дуруст ер учрамади. Ўнг томондаги Жомеъ масжиди бўлмайди, ҳали замон кишилар номозга келадилар. Бозор ичи ҳам ярамайди, мадраса ҳам бундоқ қарагандада тор жой, яшириниб бўлмайди. Амир Ҳусайн асли илгаридан ҳам мадрасани хуш кўрмасди, ҳужраларига кирганда юраги сиқиларди.

Бирдан Амир Ҳусайн нигоҳи Жомеъ масжиди ўтасидаги бўй чўзган алп қомат минорага тушди! Минора! Худои таоло бу минорани Амир Ҳусайн учун бино қилган экан-да! У ана шу минора тепасига чиқиб яшириниб ётади, бирор сезмайди, кўрмайди, чунки ердан узокда! Кош қорайганда билдиrmай ерга тушиб, ўз йўлига кетаверади...

Кувониб кеттан Амир Ҳусайн дарҳол отини ҳайдаб юборди, чунки у сирни очиб қўйиши мумкин, жон ҳовучлаб апил-тапил минорага чиқа бошлади.

Орадан ҳеч қанча фурсат ўтмади, масжиднинг кенгтина ҳовлиси бирин-кетин оқ саллали, кўк саллали номозхонлар билан тўлди. Амир Ҳусайн пастга қаратган эди, кўрқувдан аъзои бадани зириллаб кетди. Ҳовлида кимdir таҳоратхонага ошиқар, кимdir ҳовли четтида маҳсисига сув тортар, бошқа бирори эса жойнамоз бошига йўл олар эди. Гангир-гунгирлар ҳам сийрак тортди, бомдод номози бошланди. Ҳовлига жимлик чўқди.

Ҳали Амир Ҳусайннинг ҳаяжони босилемаганди. Ўзини чалвитиц ниятида олис-олисларга тикилди. Ажа-

бо, умри бино бўлиб минорага биринчи бор чиқиши. Эсида, ўн икки ёшдалигида Бухородаги Арслонхон минорасига кўрқиб чиқмаган эди. Тенгқурлари минорадан, атрофга боқиб, зўр экан деб, роса мақтанишганди. Мақтанишганларича бор экан, теварак худди кафтдек кўриниб туаркан. Ана, маҳобатли Ҳиндувон, тонг туманининг хира оқиш пардаси ичра, эгасиз қолганини билдиргандай мунғайиб боқади. Кўрмайин ҳам, куймайин ҳам деди-да, шартта у ёқдан кўзини олди. Жанубда Кобул йўли кўринди, битта отлик оппоқ чанг тўзритиб ўқдек елиб бормоқда... Ўша отлик Амир Ҳусайн бўлиши керак эди, афсус... Кейин кунботища шаҳардан чиқаверишдаги катта қари чинорга кўзи тушди. Унинг тагида икки одамнинг қорасини илғагандай ҳам бўлди. Ҳа, икки ясовули ҳукмдорнинг келишини пойлаб туришибди. Андхой йўли ҳам Амир Ҳусайн қадамларига мунтазир...

Масжид ҳовлисидан эшитилаёттан гангир-гунгир овозлар Амир Ҳусайн ҳаёlinи бўлди. Номоз тугабди. Ҳамма тарқала бошлади.

Ҳамма тарқалиб кетди-ю, бироқ бир кўк саллали одам ҳовли ўртасида ўйга ботганча туриб қолди. Амир Ҳусайн уни диққат билан кузата бошлади. У, кеча Ахий Жабборга «Саман отимни бер!» деб даъво қилган, оқибат қўл-оёри боғланиб, оғзига латта тиқилиб, тепаликка ўтқазиб қўйилган бечора эди. Жаҳонгир Мирзо ўз чодирида бироз ором оғушига берилгач, Ахий Жаббор от чоптириб, гира-ширада кўк саллалининг олдига келди. Ахий Жабборни таниган бечоранинг кўзлари қинидан чиқиб кетай деди! Энди жазомни беради, деб ўйлади у. Чиндан ҳам, Ахий Жаббор шарт ёнидан обдор шамширини сутурди!.. Буни кўрган кўк саллали одам, тамом бўлдим, куним битибди, мени кўйдек бўғизлаб ташлар экан-да, деб жонидан умидини узди, безовталаниб нимадир демоқчи бўлиб гувранди, бироқ оғзида даструмол борлигидан гапиролмади. Фақат илтижога тўла кўзлари жовдир-жовдир қиласарди. Ахий Жаббор шамширини... кўк саллали одамнинг оёғидаги арқонга солди, кейин қўлларидағи чилвирни кесиб ташлади.

— Оғзингдагин ўзинг ол, одам бўлсанг бўл ҳалол! — деди Ахий Жаббор ва қарамай отига миниб қамчи босди. Жилови тутуқ от жойида гир айланди-да, елиб кетди.

Кўк саллали одам омон қолганига ҳали ишонмас эди, битта от йўқолса йўқолибди, нима қилар эдинг бироннинг молига кўз олайтириб, энди пешонангдан кўр, деб уззукун ўзини ўзи койиб ўтириди. Худо саклади, хайрият... Тонг билан албатта жомеъ масжидига бориб, бундай марҳамати учун тангри таолога шукронга келтириб, илтижолар айлашни кўнглига тутди.

У мусулмонлик бурчини адо этди, бомдодни ўқиб бўлиб, номоздан кейин ҳам қолиб қайта-қайта тиловат туширди. Ҳовлига чиққач, бир лаҳза ўйга чўмди. Балхнинг кирмаган жойи қолмади, аммо бирон ерда унинг самани кўринмади. Ҳатто, кўрдим, деганлар ҳам бўлмади. Оти узокларга кетиб қолдимикин? Учкур, улоқчи от эди, ҳарқалай кенг далаларни яхши кўради, бийла жойларда учеб-елсам, деб ўлиб турари... Олисларда юрганимкин? Қандай у ёқларга борамену қаёқдан излаймен? У куни қўшним йўқотган сигирини шу минорага чиқиб топиб олибди. Яхиси, шу минорга чиқайин-да, узок-яқинга бир кўз ташлайин. Зора саманимни учратиб қолсам. Кўринса, дарров бориб олиб кела қоламен.

Кўк саллали одам шундан кейин дадил минорага қараб юрди. «Бу одам нима қилмакчи? — деди кўриб кўнглига ғулғула туша бошлаган Амир Ҳусайн ўзига ўзи. — Ёки у ҳам яширинмоқчими?..» Бас, унинг бу ердалигини билиб қолишибди, тутиб олгани келишмакда! Нима қилиш керак? Дабдурустдан каллага жўяли бир фикр ҳам кела қолмасди. «Хўш... минора тепасига чиқсан, пайт пойлаб, бошига мана бу тош билан бир уриб ўлдирамен кўямен!» — қарор қилди Амир Ҳусайн ва ёнига бир тош фамлаб қўйди. Бироқ, шу ондаёқ: «Э, Оллоҳ, гуноҳкор баңдангни бад ният қилгани учун кечир!» — деди-да, тошни нарига итқитди. Йўқ, Амир Ҳусайн кўк саллали билан яхшиликласига сўзлашади. Унга истаганча марварид, тилло беради, алдайди-аврайди, керак бўлса ялиниб-ёлворади, хуллса, тил топишади. Бойлик олдида бош этмайдиган бирон куч бормикин ўзи?..

Жимлик чўқди. Амир Ҳусайн кўк саллали одамнинг чиқишини кута бошлади. Негадир шу пайт ўзининг ёлғиз эканлигига хўрлиги келиб кетди. У ҳозир дунёда ёлғиз! Оллоҳдан бошқа ҳеч ким унга кўмак бера олмайди. Эҳ, унинг бирон қайишадиган, куядиган дўсти ҳам йўқ... Худо унга шундай дўстлардан

бермади Мана, Темурбекда ўзгача, доим оғайнилари унинг атрофида парвона, жон фидо қилишлариға ёқа ушлайди киши. Амир Сайфиддин некўз, Амир Жоку барлос, Амир Довуд дувлат, Амир Муайяд арлот, Аббос баҳодир қипчок, Давлатшоҳ, баҳши уйғур... Сайнайверсанг саноқ етмайди. Барчасида садоқат, ихлос кучли. Афсус, шу нарса Амир Ҳусайн одамларини четлаб ўтди! Мана, бир одами Амир Мусоми? Шундай кунларда ташлади кетди. Қолганлари-чи?..

Гапдан гап чиқиб, садоқат, ихлос ҳақида бир марта у Темурбек билан баҳслашиб ҳам қолган. Темурбек: «Садоқатли инсонлар доим ёнимизда бўлсунлар, сипоҳлар ичида валламатлик, фидойилик, жувонмардлик русумини қаътий қилмоғимиз жойиз. Буни ўзимиздан бошлашимиз керак!» деди. «Ўзимиздан бошлашимиз керак» деган сўзлардан бироз ранжиган бўлса ҳам, сездирмаган Амир Ҳусайн эътиroz билдириди:

— Аввал пул, бойлик орттирайлик, тахтта эга бўлайлик... Садоқат, фидойилик, валламатлик, жувонмардлик... — Амир Ҳусайн бу сўзларни атайин чертиб-чертиб, кесаттандай қилиб айтди. — Хо-хо-хо!.. Қандай сўзлар-а! Булар қочмас, кейин бўлаверади. Ҳа...

Темурбек босиқ жавоб берди:

— Пул, бойлик ўткинчи нарсалар... Садоқат, ихлос, валламатлик, фидойилик, жувонмардлик русуми эса мангуликдир. Пул билан буларни топмоқ мушкул юмушдир.

— Темурбек, дунё кўрган амирдурсиз... — такаббурона давом этди Амир Ҳусайн. — Худди билмагандай сўз дейсиз... Дунёнинг қизиги пул билан бойлик, сарват-ку ахир! Пул билан бойлик бўлса, ҳамма нарсага эришмак мумкин бўлар. Бойлик бўлса, бас...

— Рост айтдингиз, пулу бойлик ҳамма нарсага қодирдир, дунёнинг бир қизиги шу... — сўз оҳангини ўзгартирмай хотиржам деди Темурбек. — Шак йўқ, бу нарсалар жуда керак, бойлигу сарвату пул... Аммо дўстликка фақат дўстлик билан, садоқатта садоқат билан жавоб қилмак зарур, мардликка мардлик ила... Бойлик, сарват, пул ила дўст орттираман, деганлар янгишадилар. Улар кўмагида фақат сипоҳ ёллаш мумкин, маддоҳларни кўпайтириш мумкин. Ҳусайнбек! Жанобингиз йигитлари ичида жувонмардлик русуми баланд мақомдадур...

«Бойлик, сарват, пул билан дўст ортираман, деганлар янглишадилар» — сўзлари Амир Ҳусайнга қаттиқ, ботиб кетди. У Темурбекни қандай қилиб бўлса ҳам мот эттиси, оғзини очирмай қўйгиси келиб кетди. Темурбекнинг охирги сўзларига ишора қилиб киноя аралаш сўради:

— Шундорму?.. Йигитларингиз ичида жувонмардлик русуми баланд мақомдаму? — Айёона жилмайди Амир Ҳусайн. — Билмаган эканмиз... Менинг йигитларим ҳам тоидан тушишган эмас... Менинг йигитларим ҳам жувонмардлик русуми нима эканлигин яхши биладилар. Ё... синашиб кўрамизму?

— Кўрсак кўрайлик... — пинагини бузмай жавоб қилди Темурбек.

Ҳар икки амир ўз сипоҳдарига иш буюриб, мардлик ва садоқатларини имтиҳон этмоқчи бўлдилар. Воеа далв ойида Бухорода юз бермоқда эди. Тупукни музлатадиган даражадаги қаҳратонда Амир Ҳусайн қоқ яrim тунда бир сипоҳни кутилмаганда қизиқ уйқудан уйғотдирди ва шу чирсиллаган совукда дарёга бориб, қалин музни ёриб сувга шўнгигиб келишни буюрди. Фароғати бузилган йигит оиринганини билдирамади, ўрнидан туриб, қунушганча дарёга борди, музни ёрди, сувга бир шўнгигиб, совукдан қалтираганча қайтиб келди.

— Мана, фидойилик тимсоли! — деди кибр ила Амир Ҳусайн мақтаниб. — Шундай нохуш паллада ҳам бу йигит «ғинг» демади...

Навбат Темурбекка етди. У Давлатшоҳ бахшини хуфия чақиртирди ва унга бундай тайинлади: «Бу гапни маҳфий тутунгиз. Қалин пишиқ босилган икки кийгиз топингиз, жуда қалин бўлсун. Йигирма беш киши тайёр бўлиб турингиз. Эртага бомдод намози пайтида Арслонхон минорасидан бир йигит ўзини ерга ташлайди. Ташлагани ҳамоно кийгизларни таранг қилиб тутасизлар ва йигитни илиб оласизлар...» Темурбек шундай деди-ю, ким сакрашини сир сақлади.

Эрталаб ҳамма одамлар Арслонхон минораси тагита йигилдилар. Темурбек йигитларидан бирига буюрди:

— Минорага чик!

— Бош устига! — таъзим қилди йигит.

У, нимага, деб сўраб ўлтирмади, минорага югуриб чиқиб кетди ва бирпастдан кейин тепадаги дарча олдида пайдо бўлди. Пастда тумонот одам унга қараб турар эди. Ҳеч ким нима бўлишини билмасди. Амир

Ҳусайн Темурбекнинг қәндай қарорга келганини тахмин этмоқча уринди, лекин зинҳор йигитга, ўзингни ерга от, деб буюради, қабилидаги хаёлдан йироқ эди.

Темурбек минора тепасига қараб қичқирди:

— Сакра, валламат!

Йигит... шартта минорадан ўзини ерга отди!

Ҳамма оҳ уриб юборди! Кўплар кўрмайин деб юзларини четта ўғириб олдилар. Амир Ҳусайннинг товонигача зириллаб кетди. Шу лаҳзада Давлатшоҳ бахши шай қилиб қўйган йигирма беш паҳлавон сурон солиб кийгизларни чарх уриб ерга тушиб келаёттан бечора йигит йўлига тутиб улгурдилар! Йигит кийгизларга тушди ва залвори билан бироз ерга ҳам тегди...

Теваракни қий-чув босди!

Темурбек чехрасида ўзгариш сезилмади. Фақат ранги оппоқ, оқариб кетган йигитнинг олдига бориб елкасига қоқиб қўйди-да:

— Жувонмардлик русумини ўхшатиб қўйдинг, баҳодир! — деди секингина.

Жонидан умидини узуб қўйган йигит, омон қолганини кўриб, Темурбекнинг ақлу фаросати, раҳм-шафқатига тан берди, боз садоқати ортди... Одамлар ҳам фидойиликнинг шунчалар бўлиши мумкинлигига қойил қолдилар, Темурбек йигитларига таҳсинлар айтдилар. Ўша йигитга Темурбек кейин баҳодирлик унвонини берди, ўзининг яқин йигитларидан бири қилиб олди. Бу йигит Аббос баҳодир қипчоқ эди.

Амир Ҳусайн ўшанда Темурбекка ҳеч нарса демади...

Ҳозир шуларни эслар экан, Амир Ҳусайн Темурбекнинг сўзлари тўғрилигини билди, ўшанда ҳам у шундай фикрда эди, аммо тан олгиси келмади, устига устак бемаъни қайсарлиги тутди. Бирдан у ўз-ўзига савол берди: «Хўш, дўстлар учун сен ўзинг нима қилдинг? Сен қандай жувонмардлик русумини ўринлатдингки, дўстлар атрофингда парвона бўлсунлар? Аксинча, сен дўстлар йўлига ғов бўлдинг, уларнинг сенга ишончи йўқола борди. Темурбек билан дўст тутиндинг, Қуръони мажидни ўртага қўйдинг, айт-чи, шундан кейин ҳам нега кўнглингдан бад ниятларга жой бердинг? Темурбекни, дўстингни ўлдирмакчи бўлдинг? Пусувлар қўйдинг, алладинг, тилёғламалик қилдинг, хиёнатлардан тортинмадинг, йигитларига товоң солдинг, сарбадорларни дорга осдинг, қитмириклардан

тўхтамадинг? Темурбек жувонмардлик русумини тутган бўлса, сен номардлик тутумини хуш кўрдинг? Экканингни ўрасен! Мана энди, Мовароуннахр ҳукмдори, кечагина улкан мамлақатнинг соҳибқарори бугун торгина кунжакда ёлиз, танҳо, сичқоннинг ини минг дирҳам бўлиб, пусиб ўлтирибди!.. Тақдирнинг ўйини кўринг! Бир пайт Алибек Жониқурбоний зинданда ер тагида асир бўлиб ётганди, энди осмони фалакда, минора деган зинданда маҳбус... Водаре!..»

Шу памма зинадан эшитилган оёқ товушлари Амир Ҳусайн хаёlinи бўлди. Кўк саллали одам, миноранинг тепасида уни Мовароуннахр ҳукмдори таҳлика ва қўрқув ичида кутиб турганидан мутлоқ бехабар, аллақандай қўшиқни янгшиганча хиргойи қилиб келарди. Оёғида боди борлигидан вақти-вақти билан дам олишга, тўхтаб нафас ростлашга мажбур бўлди. У минора тепасига чикқандা, аллакимнинг унга ҳурпайиб қараб турганини кўрди. «Ё ажабо, — деб ўйлади кўк саллали одам, — Отини йўқотганлар ҳам кўп-да бу замонда. Бу бечора ҳам шундайлардан шекилли... Менга ўхшаб минорадан туриб излашга келибди. Топдимикан, йўқмикан?.. Топган бўлса, қаердан топганлигини билиб, ўша ёққа борамен, менинг саманим ҳам топилиб қолади... Сўраб кўрамен...»

У яхшилаб разм солди. Рўбарўдаги одам одмироқ қора тўн кийиб олган бўлса ҳам, унинг оқсуяк зотлардан эканлиги маҳобатидан сезилиб турарди. Бироз танигандай ҳам бўлди... Наҳотки? Наҳотки, ўша бўлса?.. Ҳа, ўша! Оҳ, ундан қанчалар озор кўрган эди-я!

— Ассалому алейкум! — чўчиброқ салом берди кўк саллали одам. Унинг кўлида қурол-пурол йўқ, эди. Бу Амир Ҳусайн назаридан қочмади.

Меҳмоннинг ўзини қимтинироқ тутиши, кўрқаписа гапиргани, айниқса, уни танимагани Амир Ҳусайнни дадиллантириб юборди. У ўзини қувфинда, nochor аҳволда эмас, балки Мовароуннахр ҳукмдори эканлигини эслади. Бироз писандасизлик билан алик олди:

— Ва алейкум... Нима қилиб юрибсен бу ерларда?

Амир Ҳусайн бўғиқ йўғон овози оҳангидан отини йўқотиб минорага излашга келган одамга сира ўхшамасди. Кўк саллали одам энди аниқ ишонди: рўбарўсида Мовароуннахр ҳукмдори Амир Ҳусайн турарди! Авваллари уни кўп кўрган, албатта, шоҳона лиbosлар-

да, ўзга бир ҳолатларда... Кейин, отини қидириб юрар экан, қулогига ҳар хил гаплар ҳам чалинди. Эмиш, Амир Ҳусайн Темурбек билан саваш қуриб, мағлублик жандасини эгнига илибдур, тахтдан мосуво бўлибдур... Темурбек ижозат берганмиш, Амир Ҳусайн ҳажга йўл олганмиш, бирорлар, қочганмиш ҳам дейишади... Ҳажга йўл олган одам минорада нима қилиб юрибди — кўк саллали одам ана шунисига ҳайрон эди.

— Отимни излаб юрибмен, онҳазрат! — қўққисдан жавоб қилди кўк саллали одам. — Улоқчи саман отимни йўқотдим... Минорадан қарай-чи, кўриниб қолармикан, деган ниятда келдим... Бу ердалигинги зни билмабмен, эй ҳукмдор!..

Амир Ҳусайн турган жойида қотиб қолди! Кўк саллали одам уни танибди! Мовароуннахр ҳукмдорининг энг қўрқкан жойи шу эди! Нима қиларини билмай, жон хавфида ёнидан бир сиқим жилоланиб турган марварид олди ва ҳаяжондан қалтираган қўли билан кўк саллали одамга тутди:

— Мана буни ол! Ол! Олавер! Сендан илтимос, менинг бу ердалигимни ҳеч кимга айтма! — ялиниб ёлвора бошлади Амир Ҳусайн, унда аввалги кибру ҳаводан асар ҳам қолмаганди. — Бу хавф-хатарлардан эсон-омон кутилиб олсан, хизматингни юз чандон баҳолаймен! Ҳа! Мана шу марвариднинг ўзи ўнта отингниг қийматига тенг, билиб кўй! Ол, ол! Фақат менинг бу ердалигимни билдирма! Билдирма! Ҳўпми? Ол!

Кўк саллали одам ҳайратланганча ортига тисарилди. Умри бино бўлиб бўнча бойликин кўрмаганди, марваридларга қўл узатишдан қўрқди:

— Йў-ў-ўқ... Йў-ў-ўқ!.. Олмаймен, керак эмас... Нима қиласмен уни? Керак эмас... — рад этарди у.

— Ол! Нега қўрқасен? Марвариддан ҳам қўрқар эканми? Қўрқма, ол!

— Керак эмас! Керак эмас!.. Йў-ў-ўқ!..

— Нега керак эмас экан? Ие! Марварид ҳам керак бўлмас эканму?.. — ясама хохолади Амир Ҳусайн ва деворга қапишиб турган кўк саллали одамнинг ёнига бориб, марваридни зўрлаб қўйнига тиқди. — Қўрқма, ол! Ўзингники! Фақат менинг бу ердалигимни, беркинган жойимни бирорвга айтиб қўйма!.. Кечгача шу ерда бўламан холос. Кеч кириши билан шаҳардан чиқиб кетамен... Фақат бирорвга билдирма, сендан илтимосим шу!.. Бирорвга билдирма!

Күк саллали одам бироз ўзини босиб оди. Рўбарўсида биргина номининг ўзи кишилар кўнглига даҳшат соладиган Мовароуннаҳр ҳукмдори Амир Ҳусайн эмас, балки қўркувдан дағ-дағ титраган, соқол-мўйлаби ўсиб кетган ожиз ва нотавон бир киши турарди. Унинг ахволи ҳам аянчли, ҳам ҳайратланарли эди.

— Бало-қазолардан эсон-омон ўтиб олай, ўзим сенинг қадрингта етамен, ҳа! — ваъдалар беришда давом этарди Амир Ҳусайн. — Сенга бирон юрт жиловини топширамен. Айшингни суриб ётасен, ҳа! Буёидан кўнглинг тўқ бўлсун! Фақат менга ҳозир кўмак бер, бу ердалигимни ҳеч кимга айтмаймен, де! Айтмаймен, де! Ваъда бер! Айтмаймен, деб ваъда бер!

— Хўп, айтмаймен, деб ваъда берамен! — деди охир ўйлана-ўйлана кўк саллали одам...

— Йўқ, ваъда берма! Қасам ич! Менинг қаердалигимни ҳеч кимга, айниқса, Темурбекларга айтмаймен, деган аҳд-паймонингни ташлаб кет! — ялиниб-ёлворишга ўтди Амир Ҳусайн...

Кўп қистовлардан кейин кўк саллали одам Амир Ҳусайнга, сизнинг бу ерда эканлигинизни ҳеч кимга айтмаймен, деб қасам ичди ва қутулганига шукрлар қилди. Боёқиши отини ҳам эсдан чиқариб, шошилганча зиналардан пастга тушиб кетди. Кунгли таскин топган Амир Ҳусайн йироқлашиб бораётган оёқ товушларини эшитиб турарди. Бироздан кейин ҳеч нарса эшитилмай қолди.

## ОЛТИНЧИ БОБ

### I

Ҳумоюн ўрдудан чопар қутлув хабар етказди. Темурбек Жаҳонгир Мирзо чодирига ташриф буюрмоқда эканлар... Мулозимлар тараддуудга тушдилар.

Ногаён келиб теккан ўқнинг захми Жаҳонгир Мирзони хийлагина ҳоритди. Намозхўжа Шоший муолажа қилган пайтда тишини тишига қўйиб сир бой бермаган бўлса ҳам, чодирга келганларидан кейин дард кучайди, иситма чиқиб жони қийналаётганини ошкор қилиб қўйди. Айниқса, саккиз қават кўрпачали ўринга чўзилганида ўқ теккан жой лўқиллаб оғрий бошлади.

— Азоб бермақдаму?..

Ахий Жаббор амирзоданинг чехрасига қараб унинг изтироби ортиб бораёттанини кўриб турарди. Тиник юзлари бўғриқиб кетган, намланган ёрқин кўзларига хира парда тортилгандек... Аҳволини кўриб, билиб туриб, ҳол сўраганига ўзи хижолат чекди:

— Иложи бўлсайди, амирзодам, дардингизни ўзимга олардим...

Жаҳонгир Мирзо индамади. Ахий Жаббор амирзодани тинчлантириб, ухлатиб қўйиб ўз олачугига қайтмоқчи эди. У ерда йигитлари Учқора, Йаналтекин, Йўлқутлуғлар кутиб туришибди. Улар бу кеча посbonлик қилишлари керак. Ахий Жаббор амирзоданинг салқи оёрини оҳиста кўтариб болдири тагидан икки ёстиқ қўйиб қўйди. Дард бироз чекингандай бўлди, амирзода ўзини енгилоқ сезди.

Чопар билан изма-из қўлида тасбех, пири муршид Мир Сайид Барака кириб келди. У амирзода ёнига тиз чўқди ва шичирлаб дуо ўқий бошлади. Ора-орада «Суф!», «Суф!» деб амирзодага нафас қилар, яна кўзларини юмганча тиловатда давом этарди. Барча мулоғимлар, улар ортидан Ахий Жаббор ҳам ташқарига Темурбекларни кутиб олишга чиқдилар. Чодирда ёлгиз пири муршид Мир Сайид Барака қолди. Темурбекнинг ёнида Суюргатмишон, Амир Жоку барлос, Амир Сайфиддин некўз, Амир Довуд дуғлат, Аббос баҳодир қипчоқ, Амир Сорибуто жалойирлар ҳамроҳлик қилиб юрадилар. Аббос баҳодир ва Амир Сорибуто жалойир ҳаммадан олдин чаңдастлик билан отдан сакраб тушдилар-да, рикобдорларни ҳам донда қолдириб, Темурбек бедовининг узангисини тутишга ошиқдилар, Ахий Жаббор отнинг жиловидан ушлади...

Темурбекларнинг чодирга кирганларини сезган пири муршид сўнгти марта «Суф!», «Суф!», «Суф!» дедида, қўлидаги садаф тасбеҳи билан Жаҳонгир Мирзонинг боши, елкаси ва кўкракларига енгил-енгил уриб қўйди.

— Иншооллоҳ, отдай бўлиб кетгойлар, бўтам! Олдоҳу акбар! Алҳамду лилаҳи роббил оламин!

Ҳамма дуога қўл кўтарди.

Жаҳонгир Мирзо падари бузруквори ташрифини кўриб, шундай ётганидан хижолат, ўрнидан турмокқа тараддусланди, устидаги қирмизи шоҳи кўрпа сирвалиб пастга тушиб кета бошлади.

— Қимиrlамангиз, амирзодам! — аллақандай туй-

ғудан юраги бўшашиб деди Темурбек ва кўрпачани ўғлиниң устига тортиб қўйди. — Ёта берингиз, сизга ижозат...

Темурбекнинг — Жаҳонгир Мирзо, Умаршайх Мирзо, Мироншоҳ Мирзо деган уч ўғли ҳамда Оқа Беги хоним билан Султон Баҳт бегим исмли икки қизи бор. Оллоҳга шукр! Аммо булар ичида Жаҳонгир Мирзонинг ўрни бошқа, бошқа! Тўнгич ўғил, энг аввал суюнчиқ бўлиб, падари бузрукворига кўмакка келадиган ўғил... Аяган кўзга чўп тушар, деганларидаи, Жаҳонгир Мирзо дамба-дам касалга чалиниб турарди. Айниқса, волидайи мухтарамаси Турмиш оқа вафотидан сўнг бу ҳол тез-тез такрорланиб турадиган бўлиб қолди. Турмиш оқа йигирма етти ёшида бевақт оламдан кўз юмганди. Амирзоданинг ўзи ҳам кўзга яқинда, кўзчил, сук одамлар кўп... Кўз тегмасин деб ҳатто Ҳиротнинг Тойбод қишлоғига одам юбориб, пири шайх Зайниддин Абубакр Тойбодийдан уч бурчак қора баҳмал тумор қилдириб келди ва ўрлига, бу туморни ҳамиша юрагингизга яқин ерга тақиб юрингиз, деб буорди. Икки йил аввал қаттиқ оғриб қолди. Безгак тутиб дар-дар қалтирайди. Устига қанча кўрпа ташламасинлар, совқотяпман, дейди, ҳеч исимайди... Кейин иситма чиқиб, ёмон энтиқтиради, ҳароратдан нақ ёниб кетаман, дейди. Темурбек кўрқиб кетди, ҳамма кечаси ухлади, у жойнамоз бошида Оллоҳга илтижо қилиб чиқади, ўғлимнинг жонини басаломат айлагин, дейди. Табиблар ҳам чорасиз эдилар, барча давони қилдилар, аммо ҳарорат сира пасаймасди. Шунда қай бир табиб тажрибасидан фойдаланиб, ёмғир янги ёқдан пайтда чиқдан чувалчангларни эзиб сувини докадан ўтказиб ичирдилар. Сабаб-да, ўшандан кейин амирзода ўзига кела бошлади. Бир ҳафта ичида бечора ўғли озиб, сўррайибгина қола қолди. Энди бўлса, дайди ўқдан заҳмдор бўлиб ўлтирибди. Лак-лак қўшин ичидан ўқ келиб-келиб шу Жаҳонгир Мирзони топибди!..

Темурбек шуни англаб етдики, фарзандларни ҳам ҳадеб пўпалайвериш керак эмас экан. Фарзандларнинг бирини ортиқ, бирини кам кўриш, асли, Оллоҳга ҳам ёқмайди. Барини тенг кўрмак керак, уларнинг муҳофазасини ёлғиз Оллоҳнинг ўзи қилсун, ўзи сақласун!..

— Оллоҳ кечирсун, тура олмадим, валинеъмат... — узр билдириди Жаҳонгир Мирзо бирдан Темурбекнинг

хаёлларини бўлиб. Уриниб қўйганидан оёғида тағин санчиқ пайдо бўлди.

Бошқа амирлар ҳам амирзодани турмаслика ундан тинчлантирилар. Темурбек аста кўрпачани кўтариб, боғлаб қўйилган оёқни кўздан кечирди. Ажабо, амирзода ҳам Темурбек сингари ўнг оёғидан ярадор бўлибди. Отасига тортибди...

— Жаҳонгир Мирзо хўб паҳдавонлик намоён этдилар! — ғуур ила деди Амир Жоку барлос набирасини мақтар экан. — Шер боласи шер бўлур!

— Хўш... — бир томоқ қириб қўйди Амир Сайфиддин некўз. — Қуш уясида кўрганини қилур...

Темурбек ўнгайсизланди ва гап мавзусини ўзгартирмақчи бўлди, бу қанча тез қилинса, шунча яхши, деган қарорга келди. Жаҳонгир Мирзони чалғитиш зарур, тики жантни ҳам, захмни ҳам ёддан чиқарсун. Жони ором олсун.

— Баҳодир! — Темурбек Аббос баҳодирга юзланди. — Майдони ҳарбда амирзода ёнларида саваш қурган навқирон сенинг фавжингдан эрмиш...

— Ҳа! Менинг фавжимдан эрди, Амир соҳибқирон! — тасдиқлади Аббос баҳодир.

— Мард ўғлон эркан. Кимdir ул! — сўради Темурбек.

Амирлар бир-бирларига қарадилар.

— Жасоратли йигит экан, ҳа! — фикр билдириди Амир Жоку барлос ҳам.

Ҳамма қизиқиб қолди. Чунки Темурбекнинг назарига тушиш катта мартабаларга йўл очилиши дегани эди. Жувонмардлик русумини, валламатликни ўринлаттан сипоҳу амирларнинг биронтаси ҳам эътибордан четда қолмас, муносиб тақдирланарди. Айни пайтда бу валламатнинг қайси фавждан эканлиги, қайси амир сипоҳи мақомидалиги ҳам унтилмасди.

— Исми Ахий Жаббор... — таништириди Аббос баҳодир. — Амир соҳибқирон, ўзингиз ҳам балки уни эсларсиз... Самарқанд сарбадорларидан, Тун салтана-ти фуқароси. Кўпдан биламен, ҳалол, жўмард ва садоқатли йигит... Самарқанддалигимда ошно бўлган эдим.

— Қаердан келган ул? — тағин сўради Темурбек.

— Амир Кайхусрав элчисининг ҳамроҳи бўлиб келди.

Шу пайт Жаҳонгир Мирзо сўзга қўшилди, у чиндан чалғиб, оёғидаги санчиқни ҳам эсдан чиқарди.

— Ўшал сипоҳ шу ерда, валинеъмат соҳибқирон...

— Қани ул?

Аббос баҳодир худди шуни кутиб турарди. У чодирдан чиқди-да, Ахий Жабборни етаклаб кирди. Ахий Жаббор остоңада тўхтаганча таъзим қилиб, салом берди, кейин тиз чўкиб Темурбек тўнининг пешини ўпди. Темурбек шамнинг гира-шира ёруғида баланд бўйли, шопмўйлов, жуссадор бир йигитни кўрди. Албатта, танийди... Бу йигит, эсида, сарбадорларни Шоҳизинда мозорида дафн этаёттанларида бевақт кеттан дўстлари учун кўз ёши тўккан, фарёд чеккан. Айниқса, Мавлонозодани қабрга қўяётганларида «Жигарим-ов, жигарим!» деб ўқраб юборган содда йигит... Кейин бошқа кўрмади. «Юртга мана шундай фидойи ўғлонлар керак... — хаёлидан кечирди Темурбек. — Қатордаги норлар...»

— Довюрак экансен, кам бўлма, йигит! — Темурбек босиқ деди. — Жувонмардлик ҳам Оллоҳнинг илтифотидур! Оллоҳ бу илтифотта ҳаммани ҳам сазовор тавермайди.

— Оре, рост. Хўп айтдилар, Амир соҳибқирон! — тасдиқлади Мир Сайийд Барака.

Ахий Жаббор таъзим қилганча бош эгиб турарди.

Темурбек биринчи кунги жангнинг ғалаба сари қўйилган қадам эканлигини уқтириш ҳамда сипоҳий ва амирлар рухиятини билиш учун бутун ўрдугоҳни айланиб чиқиш ниятида эди. Шу сабабдан кетишига ҳозирланди. Ҳамма унинг изидан ташқари чиқди.

\* \* \*

Темурбекнинг назарига тушганидан ўзини осмон-фалақда сезган Ахий Жаббор хуфтон бўлганча у-бу иш қилиб ивирсиниб юрди. Хурсандлигидан нима иш қилаётганини ҳам билмасди. Кейин Жаҳонгир Мирчони ҳоли қолдиришни ўйлаб тараддуудлана бошлади, ризм солса, бу ерда амирзодага қараб тургувчи мулонимлар етарли экан. Қолаверса, посбонлик ҳам кутиб турибди. Бирдан амирзода унга: «Ёнимдан кетмангиз!» ишорасини қилди, гапиришга ҳоли йўқдай эди. Бу кўрқмас, валламат йигит амирзодага маъқул келиб қолди. Жанг майдонида жасорат кўргизиб амирзода жонига оро кирди. Айниқса, бир савашиш амирзода эсиди. Чап томондан душман навкари қараб найза

ўқталиб кела бошлади, Ахий Жабборнинг ўқи қолмаган, фақат қиличга суянар эди холос. Ахий Жаббор уни масхара қилгандаи: «Кел!», «Ҳа, келақол, қўрқоқ бачча!» деб қичқирап, аммо ўзи ҳушёр эди. Бу навкарнинг қитиқ патига тегиб, жаҳлини чиқариб юборди ва бетавфиқ масхарабозни жойида тинчтиши учун ўқдай отилди! Шу пайт ўнг тарафда ҳам бир сипоҳ Ахий Жабборни мўлжалга олиб турарди. Ахий Жаббор усталик билан чап бериб қолди, ўқ нишонсиз шувиллаб ўтиб кетди. Алам қилган сипоҳ энди найзасини олди, отини қизиқ устида Ахий Жаббор сари бурди ва қамчи босди. Икки ёқдан келаёттан отликлар бир-бирларини кўрмас эдилар. Ахий Жаббор буни пайқади, кутиб турди-да, охирги дақиқада чапдастлик билан ўзини четта олишга улгурди, навкар билан сипоҳ бир-бирига дуч келиб тўқнашиб кетди, иккиси ҳам нобуд бўлди. Воқеа бир лаҳзада юз берди. Ҳали падари бузруквори билан бобоси Амир Жоку барлослар ҳам унинг жувонмардлик русумини туттанини таъкидлашди. Бундан амирзоданинг Ахий Жабборга қизиқиши, ҳурмати яна ортди. Асли Жаҳонгир Мирзо жанг чоғидаёқ уни ўзининг хос йигитлари қаторига киритишни кўнглига туккан эди. Ният қилиб адашмабди. «Аббос баҳодир фавжидан экан, бас, баҳодирдан сўраб оламен», деганди ўшанда у.

Шундай хаёлларга берилган Жаҳонгир Мирзонинг уйқуси келиб кўзи илинди. «Хайрият, — деди ўзича Ахий Жаббор. — Амирзода кўп ҳориб толди, энди андак ором олади». У чодир остонасида чордона қурди ва ташқарига қоронгуликка тикилди, унинг уйқуси келмасди. Ташқаридан бедор мулоғимлар нимадир ишлар билан машғул эдилар. Олисларда қоровулларнинг гулханлари ёнарди.

Кечаси алламаҳалда Жаҳонгир Мирзо уйвониб кетди, кейин ухлай олмади. Оёғи бироз сирқираб турарди. Унда қандайдир сұхбатлашишга мойиллик сезилди. Энди тун яримдан оққанди. У ёқ-бу ёқдан сўзлашиб ўтирдилар, аввалига гап қовушмади. Сўнг Жаҳонгир Мирзо Ахий Жабборнинг истиҳола этиб, кам-суқумлик қилаётганини англади.

— Кўрган-кечирғанларингиздан сўйлаб берингиз... Тортинмангиз! — деди оҳиста амирзода, ҳали ҳолсизлигидан ўзининг гапиргиси келмас, кўпроқ тинглашни истарди.

— Кўрган-кечирганларимдан сўйлаб берайми...

Ахий Жаббор ўйланиб қолди. Нималардан гапирсин? Унинг сода одми ҳаёти амирзодани қизиқти-рармикин? Кўрган-кечирганлари тинглашга арзирми-кин? Сўйлайдиган ҳикояси ғаройиб бўлиши, Жаҳон-гир Мирзони овунтира олиши лозим. Хўш, ҳаётидаги энг қизиқ нарса нима ўзи? Энг қизиқ ва арзирли нарса... Саргардонлик, Марғилонда ахийлар жамоаси, Самарқандда Тун салтанати, сарбадорлар, тавин сар-гардонлик, сарсонлик... Хотираларини титкилай бошлаган Ахий Жаббор, бирдан юраги зирқираб кетди, кўзлари намланди. Жаҳон унинг эсига тушган эди! Жаҳон!.. Унинг Жаҳонга бўлган муҳаббати йиллар ўтиб, ажабо, сўниш ўрнига тобора аланга оларди... Бу муҳаббат Ахий Жаббор қалбининг, умрининг энг буюк сарвати, бойлиги... Жаҳонгир Мирзога шу ҳақда сўйлаб берса-чи?.. Ахир муҳаббат, унинг қиссаси ҳар кўнгилга ошнодир, даводир, малҳамдир... Амирзодамга маъқул бўлармикин?..

— Ҳеч кимга кўнгил қўйганмисиз?... — сўраб қолса бўладими бирдан Жаҳонгир Мирзо шу палла!..

Ахий Жабборнинг вужуди титраб кетди. Аллақандай мажхул туйғулар уни қамраб олди:

— Бир ожизага кўнгил қўйганмен, пинҳона ёниб куйганмен, амирзодам... Айбга қўшмайдилар... — ийманганча сўз бошлиди Ахий Жаббор. — Сўйласам майлимум?

— Сўйлангиз! Сўйлангиз! — қувватлади Жаҳонгир Мирзо.

— ... Ул ожиза Самарқандда яшарди, оппоқ юзли, шаддод, қоматидан ғайрат ёғилиб турадиган, жуссаси бикир қиз... Мен унга ҳамиша жонимни фидо қилишга тайёрмен, ёди бирла бу оламда устивормен!..

Ахий Жабборнинг ҳисоби тўғри чиқди. Жаҳонгир Мирзо чиндан ҳам қизиқиб қолди, уйқусираб турган кўзлари каттароқ очилди, қулоқлари динг бўлди. Ўн беш ёшли йигитни муҳаббат қиссасига тортиш, ба-лиқни сувга отиб юборишдек бир гап, аслида.

— ...Фақат йироқлардан томоша қиласдим, кўриб қолган кунимни омад деб билардим... — давом этди Ахий Жаббор. — Ёлғиз орзуси билан кун кўрадим, кўрдингми, деб ҳар субҳи содик кундан сўрадим. «Бугун ул боққа бир зумгина чиқди, бир зум, сени лебон йўллади нозик табассум...» дер эди қуёш ва

менга кулиб боқарди: «Ол!» Шундօғ дилгинамни айларди хушҳол... Шамол келар, унинг соchlарини сийпалаб ўтдим, дер, ғашимга тегар, раşкимни қўзвар... Ойга боқсам маъюс чехраси суюклиминг маҳзун тимсолини ёдга солар... Боққа кирсам, гуллар ёр исини ўзларига яшириб олганларини ошкор айлар, ошуфта дилимни баттар ёр латофатига бойлар...

Ахий Жаббор илҳоми жўшиб сўйларди... Бирдан кутилмаган ҳол юз берди. Ингранган Ахий Жаббор сассиз йиглаб юборди! Ўзини тўхтатай деса, ҳеч удалай олмас, уятдан ер ёрилмас, ерга кириб кетмас... «Ие! Ие! Менга нима бўлди? Менга нима бўлди?...» — деди ўзи яна хижолат. Ахир у амирзодани овунтириш учун сўзламакда, изтиробига изтироб қўшиш учун эмас! Тентак!.. Лекин, начора, Жаҳонни ўйлаганда Ахий Жаббор ҳар сафар шундай ҳолга тушади, ёруғ жаҳондан чиқиб кетай, дейди! Кўнгли бўш, шунаقا...

Жаҳонгир Мирзо унга ҳайратланиб боқар эди.

— ... У ҳақда эсласам, шундай дурри яқдонага меҳрим тушиб қолганидан беҳад қувониб йиглаймен, амирзодам... Гуноҳимдан ўтингиз, — апил-тапил кўз ёшларини артаркан узр сўради Ахий Жаббор. Шам ёруғида унинг жилмайишга уринаётгани кўриниб турарди. — Укаси бор эди, ҳамма гапни ундан сўраб билиб олар эдим. Эгачим бугун пешонамдан ўпиб қўйдилар, деб мақтанарди. Мен: «Ростданми? Қаeringдан ўпиб қўйдилар? Кўрсат-чи!» дердим ва худди ўша гўзал эгачиси ўпган жойга лабимни теккизардим... Аммо ул қиз менинг севишимни ҳеч қачон билган эмас...

— Исми недур? — сўради амирзода.

— Исми... Жаҳон. Ҳа, жаҳонга бергисиз қиз...

— Ҳозир қаерда?

— О, ҳозир... — Ахий Жаббор нима дейишини билмай қолди. — Ҳозир, ҳозир... Жуда ҳам олисда... Ул қиз бир дўстимнинг маҳбубаси... Ҳозир улар қовушганлар, улар...

Ахий Жаббор, улар оламдан ўтганлар, дея олмади...

— А... — деб қўйди амирзода. У муҳаббат қиссасини бундоқ тугашини кутмаган эди, лозим бўлса кўмак беришни ўйлаб турганди.

Ахий Жаббор ҳам хижолат бўлди, ҳикоясидан ўзи-

нинг ҳам ичи чиқмади. Кейин худди ўзини оқлагандай деди:

— Ҳеч нарса Оллоҳнинг иродасидан четда юз бермайди. Оллоҳнинг буюргани шу, амирзодам... Айбга қўшмайдилар, дедим, бошида...

## II

Орага жимлик чўқди. Ташқарида мулозимларнинг овозлари ҳам эшитилмасди. Шу пайт қайдадир шаҳарнинг катта чорраҳаси томондан бир итнинг ўқтин-ўқтин кучли вовуллаши сокин тун-кеча бағрини пора-пора қилиб юборди. Кейин овоз пасая-пасая тиниб қолди.

Ахий Жаббор сұхбат мавзусини ўзгартиришга, амирзодани, амирзодани эмас, балки кўпроқ ўзини чалғитиши учун олис афсоналардан бирига ўтишга қарор қилди. Тонг отишитача ҳали вақт бор эди.

— Андижон томонларда юрганимда бир афсона ёшигдим, амирзодам... Бўритепа деган жойда...

— Қандай афсона экан у? Сўйланг-чи? — деди Жаҳонгир Мирзо.

— Мана бундай нақл қиласидар. Ота-боболаримиз Мағриб денизининг ўнг қирғорида яшар эканлар, — ҳикоясини бошлади Ахий Жаббор. — Кунлардан бир кун кунчиқиши томондан, дашт ила ёбондан жанжалкаш душман бостириб келиби. Қаттиқ жанг бўлиби. Қирғинда ҳеч ким жон сақлай олмабди, тирик одам зоти қолмабди. Ўлганларнинг жасадлари майдонда қалашиб ётармиш... Фақат ўн икки ёшли Турўлон деган бир ўсмир бола жасадлар тагида ўлмай қолиби. лекин у ҳам қаттиқ ярадору юра олмас даражада ҳолдан тойган экан. Шунда қаердандир бир бўри пайдо бўлиби...

— Бўри? — сўради Жаҳонгир Мирзо ҳикояни бўлиб. У болаликдан бўри ҳақида кўп эртаклар эшитган, бу мард ва танти маҳлукқа ихлоси баланд эди.

— Шундоғ, амирзодам, қаердандир бир бўри пайдо бўлиби. Турўлон бўридан кўрқиби, аммо қочишга ва ўзини ҳимоя қилишга мажоли йўқ экан. Бўри ер исказиб юриб-юриб Турўлонни топиб келиби. Турўлон нима қиласини билмай турар экан. Бирдан бўри тилга кириби:

«Сени қутқаришга келдим, эй Инсон! Мен Онабў-

римен. Қўрқма, сенга бирон зиён-захмат етказмаймен, душманлардан ҳам ўзим асраймен.. Қўрқма!»

Турўғлон ҳайрон қолибди, чунки Онабўри одамга ўхшаб муомала қиласа экан-да, овози ҳам ингичка, аёл кишиникига ўхшармиш.

«Хўп, қўрқмайман!» — жавоб қилибди Турўғлон.

Онабўри Турўғлонни жанг майдонидан олиб чиқиб кетибди. Улар бир жойга етибдилар. Ям-яшил ўрмонзор экан. Шу ерда зилол сувли тип-тиник кўл бор экан. Кўл бўйидаги улкан дараҳт тагида дам олмоқчи бўлишибди.

Онабўри «ҳе йўқ, бе йўқ», бирдан Турўғлонга бундай дебди:

«Рўзи азалда шундай ёзилган: энди сен менга уйла-нишинг керак. Мен сенга тегаман. Бизнинг фарзандларимиз туғилиши лозим...»

«Уйланишим керак?» — ҳайрон сўрабди Турўғлон.

«Ҳа!»

Турўғлон, пешонада бор экан-да, начора, энди бўрини хотин қилиб яшар эканман-да, деб ичиди ўксинибди. Йўқ, деса, Онабўрининг қилган яхшиликларига нон-кўрлик бўлади, деб ўйлабди, боши қотибди. Бу пайт Турўғлон жароҳатлари битиб, ранг-рўйи ҳам яхшиланаб, бақувват ҳолга келган экан.

«Майли, розимен...» — жавоб қилибди охири Турўғлон...

Шу ерда қизиқ ҳодиса рўй берибди...

Ҳориб-толган Турўғлон кўлнинг салқин шабадасида эриб уйқута кетибди. Онабўри уни елпиб ўлтирибди.

Турўғлон бир пайт уйқудан уйғониб қараса, бошида маликалардай шаҳона либосга ўралган моҳипайкар, ҳурлиқо қиз уни елпиб ўлтирганмиш! Бўриси эса кўринмасмиш, қайгадир кетган, йўқ эмиш...

«Сиз бу ерда бир бўрини кўрмадингизму?» — сўрабди Турўғлон салом-алиқдан сўнг нотаниш қиздан, атрофга назар ташлар экан.

«Қанақа бўри? Ҳеч қанақа бўрини кўрганим йўқ!» — жавоб берибди қиз.

Тўрўғлон ҳайрон бўлиб қолибди. Ҳа, майли, бўри келиб қолар, деб ўйлабди.

«Сиз кимсиз? Қаерлик бўласиз, эй ҳурилиқо?»

«Мен шу мамлакат подшосининг қизимен.»

«Исмингиз недур, эй моҳичехра?» — сўрабди яна

Турўлон.

«Менинг отим Онабўри» — хотиржам жавоб берибди қиз...

Турўлоннинг ҳайрати чексиз экан:

«Онабўри?.. Ажабо!..»

«Ҳа, Онабўри. Онам шундай от қўйган эканлар...»

Нималар бўляпти ўзи, ўнгимми, тушимми, деб уйлади Турўлон. Бўри билан қизнинг оти бир хил эканлигидан лол йигит нима дейишини ҳам билмай қолибди. Бу ерда қандайдир сир борлигини англабди-ю, аммо тагига етишга ақли қосирлик қилибди.

Қиз «ҳе йўқ, бе йўқ», бирдан Турўлонга бундай дебди:

«Рўзи азалда шундай ёзилган: энди сиз менга уйланишингиз керак. Мен сизга тегамен. Бизнинг фарзандларимиз туғилиши лозим...»

«Уйланишим керак?» — тобора ҳайрати ошиб бораркан сўрабди афтода йигит.

«Ҳа, уйланишингиз керак. Мен сизга тегамен...»

Шундан кейингина Турўлон қизга яхшироқ тикилибди. Боқса, кетиворган бир соҳибжамол экан, кўзлари шаҳло, юзлари сутга чайилгандай оқ, оппоқ томону юнқа дудоқ, нозик даҳану мўрча миён; йигитлар бундай гўзал учун бошини кундага қўяди... Турўлонга эса ўз оёғи билан келиб турибди. Агар бу қизга уйланса, умри фароғатда ўтади, маҳбубанг борму, деса дегудек... Подшонинг куёви, деган мартабага эришади...

«Агар рози бўлсангиз, падари бузрукворим бутун мамлакатта кирқ кечада қирқ кундуз тўй қилиб беради...» — дебди қиз.

Турўлон қизиқиб қолибди. Аммо шу пайт юйиб бўлган бўриси эсига тушибди. Бўри қаерга юйиб бўлди экан? Турўлон бўрига ҳам уйланаман, деб ваъда берган эди-ку? Бўри уни ўлим оғзидан қутқариб қолди, бу жойларга олиб келди, кўп яхшиликлар кўргизди... Наҳотки, ундан юз ўтириб кетса?..

Турўлон икки ўт ўртасида қолибди. Бир томонда парипайқар, маҳлиқо, гўзал қиз, бир томонда — ўзининг Онабўриси... Нима қилсин? Уйлаб-ўйлаб охири қизга бундай жавоб қилибди:

«Эй, моҳичехра! Эй шавкатли мамлакат подшосининг қизи! Сизнинг бениҳоя меҳрибончилигингиз, ҳимматингиз олдида ҳар қандай соҳиби саховат ҳам тан бермай иложи йўқ! Кўрку малоҳатингиз таърифини

келтирмак ҳам мушкул. Сиз тегли-тахтли хонадон-нинг гулираъносисиз... Мен эсам бир бечорамен, ҳеч кимим йўқ, бугун қавму қариндошларим жангда ҳалок бўлдилар. Ёлиз мен қолдим холос. Мени бир бўри, ажабо, унинг исми ҳам Онабўри, қутқарди, ўлимлардан сақлаб, шу ерга олиб келди... Мен сизнинг тентингиз эмасмен, ўзингиз айтингиз, қачон боғда яшнаган гулга даштда ўсган тикон тенг бўлибди? Сизни ранжитишни истамасмен, аммо мен Онабўрига уйланамен, деб ваъда берганимен».

«Мендай гўзал қиз қолиб, бўрига уйланасизму?» — ҳайратда сўрабди подшонинг қизи.

«Начора!..» — жавоб берибди Турўлон.

Подшонинг қизи қаҳ-қаҳ отиб кулиб юборибди! Турўлон шунда қизнинг янгроқ овозидан, уни ўзининг Онабўриси эканлигини билиб қолибди! Зилол сувли тип-тиник, кўл сирли экан. Турўлон ухлаб ёттанди бўри кўлга бир шўнғиб ҳурилиқ қизга айланиб олган эди. Онабўри йигитни синаб кўрибди-да.

Хурсанд бўлиб кетган Турўлон подшонинг ҳурилиқ қизига уйланибди. Турўлон билан Онабўри тўйида, сирли кўлнинг бўйида бўри баковуллик қилибди, тулки ясовуллик, қарғага қақимчилик қолибди, чумчукقا чақимчилик... Тўйда шер шериги билан, йўлбарс йўртоғи билан, айиқ аймори, сиртлон сирдоши, қоплон қурдоши, қўён қўноғи, ўрдак ўртоғи, қўй қўзиси, эчки улоги билан ҳозир бўлишибди! Келин-куёвларга Ер тўшак, Осмон кўрпа бўлиб хизмат қилибди. Турўлон билан Онабўри ёшликнинг гаштини суриб, баҳтиёр умр кечира бошлабдилар...

Орадан икки йил ўтибди. Жанжалкаш қаттол ёв бу ерга ҳам бостириб келибди. Жангда йигит қаҳрамонлик кўргизиб, душманлар додини берибди. Чапдан келгани чалибди, ўнгдан келгани урибди. Узоқ савашибди. Аммо ёлизлик қилиб, ҳалок бўлибди...

— Ҳалок бўлибди?.. Нега ҳалок бўлади? — инграб юборди Жаҳонгир Мирзо шу ерга келганда. — Ёш туриб ҳалок бўлди-я!

Жаҳонгир Мирзо Турўлоннинг йигирмага ҳам бормай дунёдан кўз юмганига юрак-юрагидан ачинди. У ҳали Турўлоннинг узоқ йиллар давру даврон сургани ҳақида қиссалар эшитиш умидида эди.

— Ҳа, Турўлон ҳалок бўлибди... — давом этди Ахий Жаббор. — Мунгга боттан Онабўри кўлга бир

шўнгигиб тағин бўрига айланибди ва Турфон томонларга, дашту ёбонларга қочиб қолибди: Ўша ерда хилват бир ғорга яширинибди. Турўғлондан Онабўрининг бўйида бўлган экан. Тўққиз ойу тўққиз кун ўтиб, вақти соати етиб сухсурдай-сухсурдай еттита ўғил туғибди. Онабўри ёлғиз, болалари борлигини ҳеч кимга билдирамай, асраб-авайлаб машаққатлар билан катта қилибди. Турўғлоннинг ўріллари мард, пахлавон бўлиб вояга етибдилар. Уларнинг довруғи етти иқлимга ёйи-либди. Ўғлонлар Турфон аёлларига уйланибдилар, болачақали, ували-жували бўлиб, ўзларидан кўпайибдилар. Турўғлон билан Онабўрининг болалари ўзларини «турк» деб атай бошлабдилар. Юртнинг номи эса Турон бўлибди...

— Онабўри кейин нима бўлди? — сўради юраги увишиб Жаҳонгир Мирзо, унинг афсонадан қаттиқ таъсирангани кўриниб турарди.

— Онабўри йиллар ўтиб, Турўғлон ҳалок бўлган жойга келибди ва худди ўша ерда оламдан ўтибди. Шунинг учун бу ерии Бўритепа дейдилар экан... Барчамиз Турўғлон билан Онабўри болаларимиз, амирзодам...

— Турўғлон нега ҳалок бўлди-я! Афсус! — деди Жаҳонгир Мирзо ўйланиб. — Афсус, ҳалок бўлди...

— Ҳа... — тасдиқлади Ахий Жаббор. — Умри шундоқ экан-да...

Турўғлоннинг ёш туриб бевакт ҳалок бўлганига юрак-юрагидан ачинган амирзодани қандайдир армон туйғуси чулғаб олди. Оҳ, агар сирли кўл бўйида, қаттол ёв бостириб келганда Турўғлоннинг ёнида Жаҳонгир Мирзо бўлганда, балки Турўғлон ўлмасмиди?.. Амирзодани айниқса, Онабўрининг, сирли қудратга эга бўлган бу моҳичеҳра қизнинг садоқати, жасорати, ақли қойил қолдирди... Оҳ, Онабўри!.. Оҳ, Турўғлон!..

Афсонани эшитиб, амирзоданинг Ахий Жабборга эътибори ортди. Юмшоқ феъл, хаёлпараст, орзулар оғушида юрадиган йигит экан Ахий Жаббор. Саргузаштини гапириб бераётисб, ҳатто, йиғлаб юборди! Йиги-туйғулар самимиyllигининг исботидир. Юракда кирнинг йўқлигидан далолатдир. Амирзодага шундай кишилар ёқарди, чунки унинг ўзи ҳам шундайлар тоифасига киради. Худди шу нарса кейинчалик уларни бир-бирига яна ҳам яқин қилиб қўйди.

## Е Т Т И Н Ч И Б О Б

### I

Тонг бўзариб улгурмай, таомилга кўра, амирлар Темурбек ўрдусига йифилдилар. Бугун Ҳиндувон қалъасига қилинадиган ҳужум, жангнинг шаклу шамойили, кўшунот<sup>1</sup> тартиби ва ҳоказолар хусусида Амир соҳибқироннинг йўриқлари бор. Қалъа бугун ишрол этилмори керак.

Тун оқшом Тошкентдан Баҳром жалойир ўз лашкари билан етиб келиб ҳумоюн остоная бош уришга мушарраф бўлди. Темурбек Баҳром жалойирни қучоқ очиб кутиб олди, аввалги гапларни зинҳор эслатмади. Эслатса, арзийдиган гаплар бор эдику-я... Баҳром жалойир ҳар доим Темурбекни кўргандга садоқат ва аҳиллик бобида овоз кўпиртириб гапириб юарди. Соҳибқироннинг кўмагида ўз қавми, туманига ҳоким бўлди, мана, Тошкент вилояти эли унинг ихтиёрига тоширилди, Баҳром жалойир давру даврон суриб яшай бошлиди. Иттифоқо, Темурбек Тошкентта боргандада Баҳром жалойир ўзининг, Амир Ҳусайнга қарши курашда иноқ бўйлиқ, деган сўзларини эслаб ҳам қўймади. Аввалги аҳд-паймонлардан нишона ҳам кўринмади. Темурбек кутди, кутди, аммо Баҳром жалойирдан садо чиқмади, нуқул ёлғиз ўғли Одилшоҳни мақтаб гапиради, мақсаддан дарак йўқ... Бу ҳам етмагандек, соҳибқироннинг хоссай шарифасига тегишли жойларга эгалик қилиб, хазинаи омира учун мол йирадурмен, деб раиятга зутум ҳам ўтказар эмиш...

— Сени ўзимга яқин билиб, хасдан ҳам хор бўлиб юрган вақтингда ҳокимлик мартабасига миндурдум... — таъна қилиб деганди ўшанда Темурбек Баҳром жалойирдан дили ранжиб. — Бироз кўкрагинг кўтарилиб қолди-да, энди мадад истаб келсан, оғзингта толқон солиб олгандай лом-мим демайсан... Одамгарчилик ҳам шу бўлтими? Иноклик, кўмак ҳақида гап опқочишларинг қаёққа кетди? Кўрамен, парвардигор эгамдан умидвормен, ёлвориб остонаяга бош уриб келасен ҳали!...

Мана, Баҳром жалойирнинг ўзи келиб ўлтирибди. Ёнида ўғли Одилшоҳ ҳам бор. Темурбек хурсанд бўлди.

<sup>1</sup> Кўшунот — лашкар.

Пири муршид Мир Сайид Барака билан Абул Маолий Термизий қулай шароитдан фойдаланиб қолиш ниятида бомдоддан сүнг Мұхаммад алайхиссалом ас-хобларидан ҳазрати Хожа Укоша қабрини тавоф қилмакка йұналдилар.

Амирларнинг барчаси түпланған, фақат кечаси муҳорабада жароқатланған Жаҳонгир Мирзо билан Ҳусайн барлосларгина кела олмадилар. Ҳамма машварта шай бўлиб чордона қурди.

Шу пайт мулозимлардан бири ҳумоюн ўрду эшигіда соқчилик қилиб турган Ҳиндуда Қарқара қипчоққа мурожаат этди:

— Тақсир, бир киши Термурбекка муҳим гапим бор, дейдир...

— Машварат бошланди... — деди хотиржам Ҳиндуда Қарқара қипчоқ.

— Тез хабар беришим лозим, сүнг кеч бўладир, дейдир...

— Машварат!... — Соқчининг овози қаттиқроқ эшитилди.

Бироздан кейин мулозим яна қайтиб келди-да, сеқин шивирлади:

— Амир Ҳусайн элчисимен, дейдир... Жуда зарур гапни айтишим даркор, дейдир. Соқибқиронга хабар бермак лозим!

Ҳиндуда Қарқара қипчоқ энди чорасиз қолди мулозимга киришга ижозат берди. Ҳали машварат бошланмаган эди.

— Чорла! Кирсун! — буюрди Темурбек, ичида, Амир Ҳусайн тағин нималарни ўйлаб чиқарди экан, кўрайлик-чи, деб қўйди. Кўп ўтмай бир кўк саллали қора чўққи соқолли қотма одам ҳумоюн ўрду остонасида пайдо бўлди. У салом бериб чодирга кирди, кирди-ю шоҳона чодир ҳавосати, соқибқирон маҳобати, жамулжам аркони давлат салобати босиб, довдираб, нима дейишини билмай қолди. Атрофга жовдираб қаради, сүнг икки букилиб эгилганча юриб бориб, Темурбек олдида тиз чўқди:

— Бир қошиқ қонимдан кечингиз, сохибқирон! Мен Амир Ҳусайн элчиси эмасмен... Қўймадилар... Ўтриқ гапирдим. Аммо сўзим ниҳоятда муҳим... — узук-юлук гапирди ҳали ҳаяжони босилмаган кўк саллали одам.

Барча ҳайрон қараб турарди.

— Сўйла, нечук мұхим сўзунг бор? — сўради Темурбек хотиржам.

— Амир Ҳусайн элчиси эмасмен... аммо унинг одидан келган одаммен... — Ўзини бироз босиб олган күк саллали одам қўйнидан бир сиқим марваридни олиб Темурбек рўбарўсига тўқди. — Бу каминанини эрмас... Менга Амир Ҳусайн берди. Қаердалигимни ҳеч кимга айтма, деди, қасам ичирди... Аммо бу нарсани сир саклай олмаймен! Шуни билдиргани келдим, соҳибқирон!

Ҳамма ҳайратда бир-бирига қаради. Жимлик чўқди.

— Амир Ҳусайн қаерда экан? — сўради яна Темурбек.

— У Жомеъ масжиди минораси устида... Мен бир бечорамен... Отимни қидириб, минорадан қарайин деб, чиққандим. Ўша ерда кўриб қолдим... Миноранинг устида...

— Миноранинг устида?! .. — Амирлар ҳайрат барморини тишладилар.

Кутилмаган янгилик машваратта бевосита алоқадор эди, кўриладиган муаммоларнинг кўпи унга бориб тақаларди. Ҳозир машваратни кейинга қолдириб, Амир Ҳусайнни тутмоқ керак. У ижозатга кўра, шаҳардан хотиржам чиқиб кетмай, қочиб-писиб юрган экан, бунда бир сир бор... Бас, бу ниятнинг холис эмаслигидан далолат... Амирлар ҳозир Амир Ҳусайнни тутайлик, деб ошиқиб туришибди. Барчасининг фикри-зикри ўша билан банд... Темурбек шуларни хаёлидан кечириб турганда, Амир Жоку барлос:

— Амир соҳибқирон! — дея мурожаат қилди. — Гуноҳимиз ҳамиша бўйнимизда... Аммо ҳозир ижозат қилсангиз Жомеъ масжидига бориб Амир Ҳусайнни туғиб олсак, девдим...

Темурбек одамларга бир-бир қараб чиқди. Ҳаммасининг кўзларида юқоридаги фикр чақнаб турарди. У амирлар раъйини қайтаргиси келмади. Амирлару сипоҳлар отлиқ-пиёда ҳумоюн ўрдудан Жомеъ масжиди томон жўнадилар.

## II

Бир сиқим марварид албатта ўз қудратини кўрсатади, деб ишонган Амир Ҳусайн кеч кириб, қоронгу тушиши билан шаҳардан омон-эсон чиқиб кетишига асло шубҳа қилмасди. Кечаси билан таҳдика ичида

йўл юргани, кўк саллали одамни учратиб қолгани, қаттиқ ҳадиксирашлар, ортиқча ҳаяжонланишлар уни ҳоритган эди. Бироз мизғиб олмоги керак, ҳали йўл узоқ, ким билсин, балки тунлар ухламай юришга тўғри келар. Амир Ҳусайн иккита увалиб тушган пишти топиб, бошига қўйди-да, минора шифтига тикилди. Унинг руҳи ажабтовур енгил эди, ҳечқачон ўзини бунчалар хотиржам сезмаганди. У бамайлхотир жойлашиб олди-да, уйқуга кетди.

Бир пайт уйқу ичида қандайдир сурон, отларнинг кишинаши, яна аллақандай овозлар унинг қулогига чалинди. Уйғониб кетган Амир Ҳусайн жон ҳолатда ўрнидан туриб, туйнукдан қаради. Кўчада катта лашкар отлиқ-пиёда бўлиб минора томон келмоқда эди! Гоҳгоҳ «Ана шу ерда!», «Минорада!», «Минорага юр, минорага!» деган хитоблар ҳам эшитиларди. Шошиб қолган Амир Ҳусайн, бирдан бутун даҳшатни англаб етди-ю аъзи бадани зириллаб кетди! Ах-а, кўк саллали одам, қасамхўр, бир сиқим марваридни олганига қарамай, сўзидан тониб, бориб Темурбекка унинг қаердагини айтибди-да! Энди тутиб олишга келишмақда! Бевафо дунё! Кимга ишонишингни ҳам билмайсан! Қаноти бўлганда-ю минорадан учиб кета қолар эди-я! Нима қилиш керак?.. Амир Ҳусайннинг боши қотди. Уни тутиб олишлари аниқ. Тамом, ҳаммаси тамом бўлди! Чора ўйлаб топиш керак, чора...

Лашкар сурони тобора яқинлашиб келарди.

Жомеъ масжидининг эллик ёшлардаги пакана бўй имоми одатдагидек бомдод номозидан кейин нақшинкор лавҳ устидаги «Қуръони карим»ни қироат айлаб ўлтирасди. Бирдан шовқин-суронни эшитиб: «Нима гап экан?», деди-да ҳовлига чиқди ва дарвоза томон юрди. Ё фалак, шунча лашкар, тумонот одам масжидга тиловату ибодатта келмақдаму, бунга бирдан нечук зарурат пайдо бўлиб қолди, дея ҳайрон эди.

Лашкар бошида келаётган Амир Жоку барлос салом-алик ўрнига чўрткесарлик билан имомни шундай чандиб олди:

— Тақсир, минорада кимни асраб ўлтирибдилар?

Писандасизлик билан қилинган бундай муомаладан нокулай аҳволга тушган имом нима дейишини билмай қолди:

— Мошоолло! Бу нима деганлари? Кимни асраб ўлтирибмен экан?..

— Кимни, дейсизми? Амир Ҳусайн шу минорада экан-ку?

Имом ҳайратдан ёқасини ушлади:

— Ло ҳавла вало қуввата! Ўлимдан хабарим бор, бу гапдан хабарим йўқ, амир жаноблари!

— Амир Муайяд! Амир Кайхусрав! Минорага чи-қингиз! — Имом сўзларига қулоқ ҳам солмай буйруқ қилди Амир Жоку барлос. — Бирон жойи чақа қилин-масун! Ҳушёр турингиз!

Икки амир шитоб минорага чиқиб кетишиди. Мас-жид дарвозаси олдини аскар тутиб ётарди. Имом лашкару амирларга иш буюраёттган Амир Жоку бар-лос изидан қолмас, пилдираб унга ниманидир тушун-тирмоқчи бўлар, аммо амир қулоқ солмас, парво ҳам қилмасди.

Кўп фурсат ўтмади, Амир Муайян арлот билан Амир Кайхусрав минорадан қуруқ тушиб келдилар.

— Амир Ҳусайн қани? — сўради Амир Жоку бар-лос. Бошқа амирлар ҳам, мана энди, ниҳоят ҳамма-нинг жонига теккан, зуғум қилавериб қийнаган Мова-роунинар ҳукмдорини қўли боғлиқ ҳолда кўрамиз, де-ган умидда эдилар.

— Амир Ҳусайнни топа олмадик... Миноранинг тепасида Амир Ҳусайн тугул, шимилдириқ ҳам йўқ, қизи-вар қочиб кетибди! — деди алам билан Амир муайяд арлот. — Қизигар, қандай қилиб қочдийкин?

Амир Кайхусравнинг фигони фалакда эди:

— Амир Ҳусайн минорада деб, бизни алдабди ҳали-ги одам, бизни алдабди ҳалиги одам! — ҳаприқди Амир Кайхусрав. Баланд бўйли, шокосакўз бу амир шоши-либ, тупук сачратиб гапирав, бир гапни икки марта такрорлашни яхши кўрарди. Оғзидан келиб турадиган кўланса ҳид ёнидаги одамга сезилар, шу сабабдан дав-раларда четроқдан жой танлар, гапирганда одамга эмас, ён томонга қараб гапиравди. — Қани ўша одам? Қани ўша одам?

Бирдан Амир Кайхусрав ўзини одамлар ичига ураёт-ган кўк саллали одамни таниб қолди.

— Ҳой, кўк салла! — қичқирди у. — Қаёққа қоча-сен? Бу ёққа кел!

Кўк саллали одам қўрқа-писа Амир Кайхусравга яқинлашди. Амир Кайхусрав унинг ёқасидан тутди-да, қаттиқ силкилай бошлади:

— Қани, сен айтган Амир Ҳусайн? Қани, сен айт-

ган Амир Ҳусайн? Ёрон гапирган тилингни сугуриб оламен, сугуриб оламен, битлиқи!..

— Ўлиб қолмасин, қизигар, тағин... — гапга қўшилди Амир Муайяд арлот.

— Қани деяпмен? Қани деяпмен?

— Алдаганим йўқ, худо шоҳид! Ўз кўзим билан кўрдим, Амир Ҳусайн минора устида эди! — деди кўк саллали одам. — Худо ҳаққи, рост гапирдим! Алдаб нима қиласен? Менга чикора...

Бироз ғазаби босилган Амир Кайхусрав кўк саллали одам ёқасини қўйиб юборди. Сиқувдан бўшаган томоргини силар экан: «Э, худо, ўзинг асра! Нималар бўляпти? — дер эди ўзича кўк саллали одам. — Отими ни йўқотдим, қандай тухматларга учрадим!..»

Гапларга жим қулок солиб турган Амир Жоку барлос ўйланиб қолди. У кўк саллали одамнинг рост гапираётганига ишониб туради. Аммо Амир Ҳусайн қаерда?.. Амир Муайяд арлот айтгандай, қочиб кетдими? Агар қочиб кеттан бўлса, узоққа боргани йўқ, дарров изидан тушиш керак! Балки масжиднинг ичидадир? Йўғ-е, у ерда нима қиласди? Бир лаҳза ҳам бу ерда тўхтамайди: Ҳа, у қочиб қолган. Бас, уни тез қувламоқ лозим!..

Ином Жомеъ масжидаидай табаррук бир масканнинг ноҳуш воқеага аралашиб қолганидан қаттиқ изтиробга тушди. Амир Ҳусайннинг минорага яшириниши, масжид шаънига яхши бўлмади, албатта. Хайриятки, йўқ экан. У Жомеъ масжидининг шарафли ноғмини тавқу лаънатлардан бутунлай фориғ этиш мақсадида, Амир Жоку барлосга юзланди:

— Амир жаноблари! Амир Ҳусайн, мана кўрдингиз, минорада йўқ экан. Бироқ масжидимиз ҳақида турилајак миш-миш гапларнинг олдини олиш заруратидан сипоҳларингизга буюрингиз, масжид ичини ҳам хонама-хона кўриб чиқсунлар, токи Темурбек кўнгилларида ғуборга ўрин қолмасун!

— Гапингизни англашим, тақсир... — деди Амир Жоку барлос. — Масжид шаънига доғ тушмайдир, кўнглингиз тўқ бўлсан. Аммо биз ҳозир Амир Ҳусайннинг изидан қолмаслигимиз керак, вақтни бой бермайлик...

— Йўқ, амир жаноблари, бизнинг илтимосимиз ерда қолмасун: эринмай сипоҳлар масжидни ҳам бир кўздан кечириб чиқсунлар! Ўз кирилизни зўрга кўтариб юр-

ган одаммиз... Нам тортган ерга сув ҳам оғирлик қилар экан, дейдилар...

Имомнинг босиқ гаплари Амир Жоку барлосга маъқул келди. Рост, Амир Ҳусайнни минорадан топа олмай қайтавериш ҳам номақбул иш. У пастга тушган бўлиши мумкин, балки бирон жойга яшриниб олгандир ҳам... Тафтиш лозим, қарашиберак...

Амир Жоку барлос масжид имомига индамади-да, баҳодирларга буюрди:

— Аббос баҳодир! Сен сипоҳларинг билан Кобул йўлини қўриқла! Элчи баҳодир! Йигитларингни олиб Анҷхой йўлини кузат! Амир Ҳусайнга кўз-кулоқ бўлингизлар! Чибин ҳам ўта олмасун!

Имом яна нимадир демоқчи эди, Амир Жоку барлос жеркиб ташлади:

— Кўп шошқалоқ эканлар-да, тақсир! Шу... онала-ри шошилиб туғиб кўйганмилар, дейман...

Кейин Амир Муайяд арлотта ўтирилди:

— Масжидни ҳам бир қараб чиқингизлар! Фақат тезроқ уринингиз! Амир Кайхусрав, сизлар ҳам қиди-рингизлар!

Амирлару сипоҳлар энди масжид ичига йўналдилар. Мамнун имом уларга йўл кўрсатгани қўшилди. Кетаркан, шундай илтифоти учун Амир Жоку барлосга «Қуллук!» дея таъзим бажо келтириди. Жомеъ масжиди хийла маҳобатли бўлиб, бўйига олтмиш газ, энига қирқ газ келадиган бир иморат эди. Ҳовлиси ҳам шунга яраша кенг ва шинам, кирган одамнинг баҳри-диidi очиларди. Амир Жоку барлос ҳовлида юрар экан, гоҳ-гоҳ тўхтаб, қилич тегиб иккига ажралиб қолган япаски бурнини силаганча минорага тикилар, сўнг яна юришда давом этарди.

Орадан кўп вақт ўтмай, масжид ичидан сипоҳлар қайтиб чиқа бошладилар. Айвонда назорат қилиб турган Амир Муайяд арлот, ҳар бир сипоҳдан: «Йўқму?», «Йўқму?» — деб сўрар, манфий жавоб олгач, «Қаерда экан-а, қизигар!...» сўзларини такрорларди.

Иттифоқо, хоналарни айланиб чиқиб келишаётган икки сипоҳ меҳробнинг олдига келиб тўхтаб қолишиди. Меҳроб олдида янги қурилаётган минбар улар диққатини ўзига тортди.

— Анови нима? — сўради бири иккинчисидан туртиб.

— Қайси?

— Ҳов қорани күрятсему? У тешикму? Ё бирон буюмму?

— Билмадим... — деди иккинчи сипоҳ. — Кўрайлик-чи. Қизиқ...

Қарашса, минбар ортидаги ҳали ёпилмаган тандир оғзидай тешикдан бир қора тўннинг пеши чиқиб турибди...

— Тўнми?.. Ажабо! — ҳайратланди биринчи сипоҳ. Текширмоқчи бўлиб, найзаси билан қора нарсани туртганди, инграган овоз эшитилди. Шериги шу заҳотиёқ қилич яланючлади.

— Ие! Бирор инградими?..

Қайдандир чақиндай пайдо бўлган қулоғи динг Амир Кайхусрав минбарга ёндошли:

— Ҳа, йигитлар! Бирор инградиму? Бирор инградиму?.. А?.. — сўради у ҳаяжонланиб сипоҳлардан. — Бирорнинг овози чиқди, а? Чиқди, а?..

— Амирим! Мана бу ерда бирор бор шекилли... — тешикка ишора қилди биринчи сипоҳ. — Найза тегизсам, инграворди-ку...

Амир Кайхусравнинг шокоса кўзлари қинидан чиққундай бўлиб кетди:

— Шундайму?.. Ҳм... Қани! Қани! Ушла! Ушла! Ҳа!..

... Нима қилишини билмаган Амир Ҳусайн минорадан шоша-пиша тушиб, атрофни кузатди, ҳовлида ҳеч ким йўқлигига ишонч ҳосил қилгач, ўзини масжид ичига урди. Бошқа илож ҳам йўқ, эди. Олазарак тўрт томонга қаарар экан, яширинса бўладиган бирон жой изларди. Шундай боши қотиб турганда, имом ҳовлига чиқди ва унинг Амир Жоку барлос билан бизга маълум сұхбати бўлиб ўтди. Шошиб қолган Амир Ҳусайн меҳробдан берироқдаги минбар олдига борди... Борди-ю, ҳалиги тешикка ўзини урди! .. Аммо шошилишда тўннинг пешини йиғиштиришни ёдан чиқарди...

Амир Кайхусравнинг буйруғига кўра икки сипоҳ тўннинг пешидан ушлаб тортишган эди, тўннинг ўзи сирялиб чиқди.

— Э, чиқ бу ёққа, даъюс! — ўкирди Амир Кайхусрав оғзидан тупук сочиб. — Ҳозир найза тиқиб оламен! .. Найза тиқиб оламен!..

Хутталон ҳокими минбар ичидаги одам унинг ашаддий душмани Амир Ҳусайн эканлигига энди шубҳа қилмасди. У Мовароуннаҳр ҳукмдоридай душмани юзи-

га истаган сўзини айта оладиган дамлар келганидан баҳтиёр эди. Ҳали унинг бошқача ҳисоб-китоблари бор. Бу дунё ҳисобли дунё! Айтган сўзинг ўзингга қайтиб келади, бирорга қилган ёмонлигингни бирорга қилдим, деб ўйлама, у шаксиз ўзингга ўзинг қилганингдур.

Амир Ҳусайн минбар ичиға маҳкам ёпишиб олган, чиқмаслик учун бор кучи билан минбар деворига тиранар, умуман, бор ҳаракатларининг энди фойдасиз эканлигини билса-да, ўзга чора тополмасди. Унинг устига, шундай минбар ёнида, ўша ўзи ҳадиксираган, бир пайт инисини қата қилдирган баттол Амир Кайхусрав турибди! Бидир-бидир қилади, бирор гапига тушунмайди. Нега буларнинг ҳаммасини ўша пайтлар қўшиб ўлдиртириб юбормади?.. Нега?.. Афсус!..

Олишув давом этарди. Сипоҳлар учун тутиб тортиш нокулай эди, ортиқ уринишлар нафсизлиги кўриниб қолди. Амир Кайхусравнинг жаҳди чиқди. Оғизга олиб бўлмайдиган бир сўзни айтиб сўкинди-да, сипоҳларга буюрди:

— Буз! Минбарни буз! Минбарни буз! Қулат! Амир Ҳусайннинг минбари қуласун! Яксон бўлсун!

— Ҳой-ҳой, нима қиляпсизлар? Ҳой, мусулмонлар! — деб қичқирди шу пайт воқеадан бехабар келиб қолган имом. — Минбарни нега бузасиз? Зўра тикляяпмиз ўзи! Тўхтангиз!

— Қулоқ солма! Қулоқ солма! — ўдағайлари Амир Кайхусрав сипоҳларга. — Бузиб ташла, деяпмен! Бузиб ташла!

И момнинг ҳай-ҳайлаганига қарамай, сипоҳлар елкатираб бир силташда гувалак минбарни қулатиб ташладилар. Гувалаклар ичиди кимдир бужмайиб ётарди. У турибоқ қочмоққа уринди, аммо сипоҳлар маҳкам тутиб олдилар ва икки қўлинни орқасига қилиб боғладилар. Улар ҳовлига чиққанларида ҳеч ким ҳеч нарса демади... Ҳамма ҳайронликда лол бўлиб қолди. Абгор бўлган Амир Ҳусайннинг қисиқ кўзлари баттароқ қисилган, соқол бостган гўштдор ўнг юзи эса пириллаб учар эди.

Қулаган минбар ёнида факат ўзи билан ўзи бўлиб масжид имомигина қолди.

## САККИЗИНЧИ БОБ

### I

Юз берган воқеадан ҳамма амирлар бағоят хурсанд әдилар. Чунки душман сардорининг, лашкарбoshисининг ёки хоннинг асир тушиши ҳамиша музafferият сўнгига қўйилган нуқта янглиғ англашиларди. Энди, бас, муҳорабалар ҳам тугайди, ур-ийқитлар тинади. Энди сипоҳлару амирлар кўнглида ўлжалар санаш, сийликларга сазовор бўлиш, оиласа қайтиш ва бола-чақалар билан дийдорлашиш хаёллари ружрон уради.

Қўли боғлиқ Амир Ҳусайнни олиб ҳумоюн ўрдуга яқинлашиб қолганларида, ичкарида Темурбек, Суюргатмишон, пири муршид Мир Сайид Барака ва Абул Маолий Термизий суҳбатлашиб ўлтирас әдилар. Шайхлар Хожа Укоша қабрини зиёрат қилганларини айтиб бердилар. Хожа Укоша пайғамбаримизнинг саҳобаларидан, дини ислом нурини зулмат босган масканларга таратаман, деб шу Балх мавзеида муҳорабада шаҳид бўлганлар. Кунчиқицдаги, шаҳардан ташқаридағи қабристон ўшал зот қўйилганларидан кейин, Хожа Укоша қабристони, деб атала бошлаган. Темурбек ҳам зиёрат этмакни кўнглига туккан, ғалабадан сўнг барча амирлару сипоҳларни олиб келишади.

Кейин суҳбат мавзуи салтанату давлатни бошқариш масалаларига бурилди, давлатни дину ойин заминида бунёд этмак зарурати борасида сўз кетди.

— Соҳибқирон! Салтанатингизнинг бошукуҳ иморатини адолату муборак дини ислом пойдеворига ўрнатурсиз! — деди пири муршид Мир Сайид Барака. — Сарвари олам расуллиллоҳнинг одил йўлларидан юриб, салтанатни шариат ила безантириб, ҳақиқат нурларига буркагайсиз! Оре, рост, бунинг учун тузук даркор бўлур, тузукот... Унда дини исломга юксак ўрин берингиз! Уламо бирлан мусоҳабада бўлингиз, оқ кўнгил кишиларга талпинингиз! Шиҷоатли кишиларни дўсту ошно қилингиз, бас, оллоҳ жасоратли бандаларини ардоқлайдир. Алҳамду лиллаҳи роббил оламин!

Шу ерда қўлидаги олачипор тасбеҳини ўтириб «Бале!», «Бале!» деб бош тебратиб ўлтирган Абул Маолий Термизий гапга аралаши:

— Дарвешу фақир, мискину бечоралар бошини си-лангиз, соҳибқирон! — деди у. — Аларнинг нозик кўнгилларини авайлаганни худонинг ўзи сийлайдир...

— Алалхусус, кўп бузғунчи ҳамда оғзи шалоқ фий-батчиларни зинҳор-базинҳор мажлисга, салтанат ишларига аралашларига йўл қўймаслик жойиздур... — кўшимча қилди Суюргатмишкон.

Айтилган сўзларнинг барчасидан эзгулик туйрула-ри гупириб туради. Гўё гапирганлар Темурбек кўнглини кўриб тургандай, унинг тафаккур саҳифасида битилган сўзларни ўқиб бергандай бўлдилар. Темурбек мамнунлик ҳиссини туйди.

— Сўзларингиз баоят кўнглимга мақбулдир, эй азизлар! — даврадагиларга қарата деди Темурбек. — Одам Атодин то Хотам ул-анбиёгача, Хотам ул-анбиёдан то ушбу дамгача даврон сурғон подшоларнинг ни-зомлари, ҳовли-ҳаётлари жуда ҳам қизиқ ва эътиборликдур. Барчасининг йўл-йўриқлари, қонун-қоидали, фозил сифатлари, хуш ахлоқлари дафтарларини варақлашни аъло кўраман. «Сулук ал-мулк», «Сиёсанома» рисолалари... Ал-Форобийнинг фозил шаҳар ҳақидаги китоби кишига кўп ақл бағишлийдур. Барча-си жанобингиз учун турмуш китоблариidur. Кечмиш салтанатларнинг таназзулга учраш сабабларини кўп су-риштирамен. Қаердаки, салтанат корхонаси қоим ту-зукка боғланмас эркан, ўшал ерда таназзул, бухрон офати нақд бўлиб қолади. Бундай салтанат либоси йўқ, урён кимсага қиёсдур, унга кимнинг кўзи тушса, бетинг курсун, дейдир-да, нигоҳини олиб қочадур... Ва истаган қаланғи-қасанғи оёқости қилиб кириб чи-қаверадиган томсиз, эшиксиз, қаровсиз уйга менгзайдир. Бас, тузук асосида курилмас эркан, ул салтанатда шукуҳ бўлмас, қудрати тартибот йўқолур...

Даврадагилар Темурбек сўзларини тинглаб, маъ-қуллашар, уларда катта ҳаётий ҳақиқат борлигини се-зар эдилар. Айниқса, дўстлашганларига ҳали кўп бўлма-ган пири муршид Мир Сайид Барака Темурбекнинг ақлу идрокига тобора тан бериб борар, чиндан ҳам тангри таоло бу суюкли бандаси манглайига саодат саҳифалари битганлигига имон келтиради.

Мулозим кириб, Амир Жоқу барлос бошлиқ лаш-карнинг шаҳардаги Жоме масжиидидан қайтаёттани ҳақида хабар берди. Лашкар минорага яшириниб ол-ган Амир Ҳусайнни тутиб келмоқда экан. Кўп фурсат

ўтмай остонада Амир Жоку барлоснинг қораси кўринди. Кобул ва Андхой йўлларини назорат қилишга кетган Аббос баҳодир ҳамда Элчи баҳодирлардан бошқа барча амирлар ҳумоюн ўрдуга тўпланмоқда эдилар. Машварат ҳам давом этиши керак. Амир Муайяд арлот, Амир Кайхусрав, Амир Улжайту, Зиндачашм опардий, Шайх Муҳаммад Баён суддузлар қўли орқасига боғланган Амир Ҳусайнни ҳумоюн ўрдуга олиб кирдилар-да, остонада тўхтадилар. Амир Кайхусрав туткуннинг елкасига андишасизларча нуқиди:

— Тиз чўк! Тиз чўк! Ҳумоюн ўрдуга келдинг! Билиш керак, галварс!

Амир Ҳусайн елка оша катта-катта кўзлари қинидан чиқиб кетай деб турган Амир Кайхусравга ўқрайиб қараб қўйди. У бошини экканча тиз чўқди. Амирлар чехраларида ички бир голиблик кайфияти, ҳисси сезилиб туради... Ўртада пайдо бўлган сукунатни бузишга ҳеч ким журъят этмас, ҳамма ўз хаёли билан банд... Темурбек рўбарўсида Амир Ҳусайннинг тиз чўкканини кўриб, кўнгли ҳаприқди, бироз маҳобати ҳам босди. Шундок, сенга ёмонлик қилганни тақдирга топшир, дейдилар, тақдир ўчингни олиб бергувчи хизматкорингта айланади. Мана, тақдир унинг амридан қочган кишини ўзи судраб Темурбек остонасига олиб келди!

Аммо, одатдагидек, Темурбек чехрасида ҳеч қандай ўзгариш сезилмади. Амирлар соҳибқирон маккор ва ёвуз душманига қандай жазо берар экан, деган ўйда эдилар. Пири муршид Мир Сайид Барака бир жойда тиниб қолган сукунатни жойидан силжитишга ўзида хоҳиш ва ҳуқук сезди:

— Машойихлар айтмишдурларки: «Сендан бош торттан бош зулф янглиғ қирқилгувси, сендан юз ўтирган дил хол мисоли қорайгувси...» деб... Оре, рост...

Ҳеч ким сўз қўшмади. Яна жимлик чўқди.

Кутимаганда Амир Ҳусайн сўз бошлаб юборди:

— Оллоҳнинг йўлида азият чекмакчи эрдим... Маккани Мукаррама зиёратига йўл тутсам, девдим... Омонат жонимга қасд қиласалар, деб сўрағондим. Темурбек, жанобингизга, Ҳиндувондан омон-эсон чиқиб ўз йўлига кетаверсун, деб фармон қилағон эрдилар. Бас, жанобингизни бундок саг ҳолига солиб тутиб келишларига, фармонингизни инобатта олмасликларига боис не эркан?..

Амир Ҳусайннинг бўғиқ овози одатдагидек салобатли жаранглади. Амир Жоку барлос: «Баттол Ҳусайн Темурбекнинг жон жойидан тутди, берган ваъдасини эслатди ва ночор аҳволга солиб қўйди...» деди ичида дили увушиб. Амирлар ҳам саросимага тушиб қолган бир ҳолатда эдилар.

Темурбек Амир Ҳусайн сўзларидағи писандасизлик ва заҳарханда оҳангларини сезди, аммо ўзини билмаганга олди. Кўрқсан олдин мушт кўтарар қабилида айтилган гапга хотиржам жавоб қилди:

— Агарчи жанобларига жазо бермакка ҳаққим ва асосим бор эса-да, қонингиздан кечиб юборғонмен. Сиздан қасос олмак тарихига чизик тортғонмен. Амир Жоку жаноблари! — мурожаат қилди у. — Ҳусайнбекнинг тўрт томонлари қибла! Қўйиб берингиз! Хоҳлаган томонларига йўл тутсунлар!

Амирлар қотиб қолдилар. Ёши улуг амирлардан Улжайту Амир Ҳусайннинг омон қолаёттанига ачинди, чунки ундан ҳечқачон яхшилик келмаслигига имони комил эди. Айниқса, Амир Кайхусравга бу маъкул келмади. У питирлаб нима қилишини билмас, ҳайронликда шокоса кўзлари яна ҳам катта очилиб кетган, ашаддий раними шундоқ ёнида бўла туриб осонликча кўлдан чиқиб кетиши мумкинлиги унинг юрагини ўйнатди. Амир Муайяд арлотнинг ҳам Амир Ҳусайнга хусумати бор эди. Амир Ҳусайн уни қувғин қилди, ортидан одам қўйди, ҳатто манкуҳа ҳарами Ширинбикани Балхга элтсунлар, деб киши юборибди... Бу нима дегани экан? Қандай нияти бор ўзи?.. Албатта, Темурбек бунга йўл қўйгани йўқ, Ширинбика Балхга юборилмади. Буларнинг бари Амир Муайяд арлот кўнглида тош бўлиб чўкиб ётарди.

Амир Довуд дутлат билан Зиндачашм опардий фармонга кўра Амир Ҳусайнни олиб чиқа бошладилар. Амирлар уларга маюс йўл бўшатдилар. Амир Кайхусрав шокоса кўзларини лўқ қилиб беихтиёр улар ортидан эргашди, аммо дарров қайтиб кирди:

— Узрим бор, қабул этгайсиз, Амир соҳибқирон... — деди у ниҳоят Темурбекка ёрилиб. — Адолатни талаб қиласмен! Адолатни талаб қиласмен! Амир Ҳусайнда қасосим бор, қасосим бор! У бир қориндан талашиб тушган иним, жигарим Қайқубоднинг умрига зомин бўлғон... Умрига зомин бўлғон... Бу эсимдан чиқмайдур, эсимдан чиқмайдур! Фармон қилингиз, уни их-

тиёrimга тобшурсунлар! Инимнинг хунини олишим керак, хунини олишим керак! Фармон айлангиз, Амир соҳибқирон, уни шариат ҳукмига кўра жазосини берайин! Бегуноҳ укамнинг қатли ҳали ҳануз кўнглимни ўртайдур, кўнглимни ўртайдур!

— Эй муҳтарам амир! — таскин берди Темурбек ёлвориб турган Амир Кайхусравга. — Ўзингни босги! Бу феълингдан қайтгил! Яхши билгил ва амин бўлгилки, ҳалиям укангнинг қони Амир Ҳусайнни тинч қўймайди... Худонинг ўзи уни уриб қўйибди-ку!..

Темурбек шундай дер экан, бир пайтлар кечган хушнуд дамлар эсига тушди... Амир Темур ва Амир Ҳусайн қандай яқин, сирдош дўст эдилар! Улжой Туркон оқа билан бир ёстиққа бош қўйиш, умргузаронлик йиллари, ташвишли ва ширин дамлар... Не-не ардоқли йиллар ортда қолиб кетди-я! Эҳ!.. Ўтган йилларнинг вафо қилмаганиданми, ёки дўст деб ишонган кишиси, охир-оқибат, мардум қошида мана бундай хору зор, абгор бўлиб қолганиданми, қандайдир ала-му ўкинч Темурбек вужудини чулғаб олди. Ўтган ишга ўкинишни одат қилмаган эса-да, ҳозир бунинг уддасидан чиқа олмади. Юрак-бағрим ёнгандаги кўзларим йиглар деганларидаи, бирдан Темурбекнинг кўзлари ёшга тўлиб ерга тома бошлади...

Амир соҳибқирон ҳолатини кузатиб турган пири муршид Мир Сайийд Барака кўнгли бузилиб ёнидаги лолу ҳайрон Абул Маолий Термизийга қаради. Суюргатмишхон ва Амир Сайфиддин некўзлар ҳам бир-бирлари билан кўз уриштириб олдилар. Амир Жоку барлос Амир Улжайтуга ташвишли нигоҳ ташлади. Оқкорани кўрган, ҳаётнинг аччик-чучугини тотган Амир Улжайтуни амирларнинг барчаси қаттиқ ҳурмат қилар эдилар. Олтмишларга борган эса-да, оқсоқол майдонни тарк этмас, ўзини навқиронлардай сезарди. Амир Улжайту ташвишли нигоҳни англаб етди. «Биз айтар сўзимизни айтдик, сиз ҳам бир нарса денг, кадхудо! Тек туриб бўлмайди», — демоқчи эди Амир Жоку барлос. «Соҳибқироннинг ҳозир юраги бўшашибди, — ўйлади ўзича Амир Улжайту. — Фурсатни бой бериш керакмас. Бу ҳолда бадкор Амир Ҳусайн жонини омон сақлаб қолиши мумкин... Кўлингда тош турса-ю яна тошда илон бўлса, уни эзив янчиб ташланади! Йўқ эса, у ўзингга заҳар сочади... Кейинги афсус-надоматлар асло наф келтирмагай...».

Амир Улжайту дадил ҳаракат қилиш лозимлигини сезди. Ҳа, дам бу дамдур. У кўзлари билан Амир Кайхусрав ва Амир Муайяд арлотни қидириб қолди. Икки амир нима қилишларини билмай, иложсизликдан ичларини ит кемирганча, игна устида ўлтиргандай безовта эдилар. Амир Улжайту Амир Кайхусравга маъноли кўз қисди ва Амир Муайяд арлотни кўрсатиб, икковингиз тез бориб Амир Ҳусайн жазосини берингиз, дегандай ишора қилди. Ишорани англаган амирларнинг кўзлари чакнаб кетди! Улар худди шунга интиқ эдилар; ҳумоюн ўрдудан аста чиқдилар-да, отларга миндилар. Отларга бир қамчи уриб, иккинчисига улгурмай рўбарўда Амир Довуд дуғлат бошлиқ бир неча амирлару сипоҳларга дуч келдилар.

— Амир Ҳусайн қаерда қолди? — ҳаллослаганча сўради Амир Кайхусрав.

— Ҳумоюн фармонга кўра, Амир Ҳусайн ўз йўлига кетди... — жавоб қилди Амир Довуд дуғлат беларво оҳангда.

— Қайси йўлига... кетди?.. — божасининг хотиржамлигидан ичида бироз ранжиб сўради Амир Муайяд арлот.

— Кобул томонларга кетамен, деди... Тинчликми?.. — ҳайрон бўлиб сўради энди Амир Довуд дуғлат.

— Тинчлик... Тинчлик...

Амир Кайхусрав билан Амир Муайяд арлот бошқа ҳеч нарса дейишмади. Фурсат кетмоқда эди. Ёnlаридаги бир тўп сипоҳ билан Кобул йўлига қараб откўйдилар.

## II

Амир Кайхусравнинг қўлидан омон чиқишига умид қилмаган Амир Ҳусайн тирик қолганига ҳали ишонмас эди. У Оллоҳга шукрлар айтиб, отига минди-да, жадаллаб чорраҳага келди. Кеча кечаси худди шу ерда қаёққа юришни билмай ўйга ботганди. Бугун ҳам унинг олдида ўша чорраҳа турибди. Бу ерда киши шундай йўлни танлаши керакки, кейин пушаймон бўлмасин. Ҳар инсонда бўлганидек, унинг ҳаётида ҳам чорраҳалар кўп учради. Аммо у тўғри йўлни топа билдими? Майдонларда от чопди, савашлар қурди, душманларни зириллатди, болиблик наъшасини сурди, улкан Чига-

той улусини бошқарди... Аммо! — ўзи шуни сезиб турибди, — бугунга келиб, ҳаёт чорраҳаларида ҳамиша ҳам оқилона йўл танлай билмагани кўриниб қолди. Мана, икки дўст салтанат чорраҳасида бир-биридан ажраб кетдилар: Темурбек ўнг томондаги йўлни танлади, Амир Ҳусайн чап томондаги йўлга бурилди... Оқибат, шундай қора кунлар бошига тушди. Кечанинг ўзида тагин адашди: агар у шу чорраҳада ўнг томонга юрганда шаҳарнинг чиқаверишидаги катта қари чинорга етиб оларди, у ерда икки хос ясовули билан учрашарди ва, ким билсин, ҳозир Андхойда базми жамшид қуриб ўлтирган бўлармиди. У эса чапга кетди. Бу ёғи — масжид, минора... Энди адашмаслиги керак!

Амир Ҳусайн шуларни ўйлаб, ўнг томонга юришга аҳд қилди. Аммо шу пайт бирдан кўк саллали одам ёдига тушди. У кўк саллали одамнинг қасамини бузиб, хиёнат қилганидан бағоят разабда эди. Фазаб бора-бора ўчга айланди. Умрида кўп инсофсизликларни кўрди, аммо бунақасини учраттан эмас... Балхдан чиқиб кетишдан олдин, албатта, ўша кўк саллали одамни топиб ҳисоб-китоб қилиб қўйиши керак, бўлмаса кўнгли ўрнига тушмайди. Аммо уни қандай топади? Яна чапга юриш керакми? Балки, йўлда учратар, йўқ эса Жоме масжиди атрофларидан, шубҳасиз, топади, топиб олади. Лекин, топади-ю...

Мовароуннаҳр ҳукмдорининг қисиқ кўзларида разаб ўти чақнади, гўштдор ўнг юзи пириллаб уча бошлади. Беихтиёр чапга бурилиб, отини жадаллаттан Амир Ҳусайн шу алпозда Чорсуга етиб борди. Чорсуда бирлаҳза тўхтаб тўрт кўчага қаради. Аммо ҳеч қайси кўчада кўк саллали одамнинг қораси кўринмади. «Қочиб бўпсан! Топмасдан қўймаймен!» — муштумини қисди у, айни пайтда тезроқ шаҳардан чиқиб кетиш лозимлиги ҳам эсида турагди. Шу ерда кўк саллали одамнинг номини сўраб олмагани аlam қилди. Қандай чора бор? Бир хаёли, ҳозир тезроқ шаҳардан чиқиб кет, кўк саллали одам билан ҳисоб-китобни кейинга қолдир, дерди. Бир хаёли эса, йўқ, албатта, ўшани топ, орани очиқ қил, кейин хотиржам бўлиб жўна, дея қасос олишга ундарди... Кек, ўч ҳисси устун келди. У Чорсу бозорига кириб, бир мардумга назар солиб ўтмоқчи бўлди. Шундай ўйда от бошини бозор томонга бурган ҳам эдики, ўзи келган йўлда, юз эллик қадамлар нарида бир неча отликларнинг ҳай-ҳайлаб от чоп-

тириб келаётганлари кўринди. «Наҳотки, мени излаб келишаёттан бўлса?..» — деган даҳшатли фикр мияси-га чақмокдай урилди. Аммо шу заҳотиёқ, менинг тўрт томоним қибла-ку, деб хотиржам бўлди ва парвосиз ўз йўлида давом этди.

— Ҳой, даъюс! Тўхта! Тўхта, деймен! — қичқирди кимдир орқадан.

— Тўхта, далла! Ҳусайн, жонингдан умидинг бўлса, тўхта!

Амир Ҳусайн қараса, бир тўп аскар олдида ўзининг душманлари Амир Кайхусрав билан Амир Муайяд арлотлар отига қамчи босиб келишмоқда! Унинг аъзои бадани музлаб кетди! Ҳаш-паш дегунча амирлару сипоҳдар Чорсунинг ўртасида Амир Ҳусайнни қуршаб олдилар.

— Менга Темурбек, тўрт томонинг қибла, дедилар. Конимдан кечиб юборронлар... Сизларга нима керак? Оллоҳ йўлида азият чекмакчи бўлган одамни тинч қўйингиз! Гуноҳга ботишни истамассизлар ахир? — писандасизлик билан дағдағалади сир бой бермасликка тиришиб Амир Ҳусайн. У, мени тағин қайтариб ҳумоюн ўрдуга олиб кетишмоқчи, деган хаёлда эди. — Бас, энди бормаймен! Нечун довлашасиз?..

Амир Муайяд арлот билан Амир Кайхусрав бир-бирларига сирли қараб қўйдилар.

— Хотиржам бўл, бормайсен... Шу ерда қоласен!.. — тищ орасидан деди Амир Кайхусрав ғазабини босиб, айни пайтда ниҳоят Амир Ҳусайнни туттанини, энди ундан хун талаб қилишга ҳеч ким халал беролмаслигини англаб ич-ичидан қувониб кетди. Амир Ҳусайн Амир Кайхусрав оғзидан келаёттан қўланса ҳиддан кўнгли ағдарилгандай бўларди. — Сен даъюсни шарият амри билан жазолаймен! Хун довлаймен, хун довлаймен! Жигарим Кайқубоднинг хуни бўйнингда турибди. Хунини бер! Бер!

— Бироннинг ҳарамига кўз тикиш қандай бўлишини сен, қизигарга кўрсатиб қўямен! — қаҳр билан интилди иккинчи томондан Амир Муайяд арлот қўлидаги қиличини ўйнатиб.

Амир Кайхусрав ҳам шартта қиличини қинидан сувурди!

— Кайхусрав! Жигарингни хунини тўлаймен! — ёлворди Амир Ҳусайн. — Қанча бойлик бўлса берамен! Ўлдирма! Ўлдирма!.. Ўл...

Амир Ҳусайннинг сўзи оғзида қолди... Икки амир биринма-кетин қилич сермадилар: Амир Кайхусравнинг ярақлаган қиличи бир силташда Мовароуннахр ҳукмдори бошини салчадай узиб кетди. Бош Амир Муайяд арлот отининг оёқлари остига юмалаб тушди. «Қизиғар!!!» деб сўқинган Амир Муайяд арлотнинг кескир қиличи бошсиз танани елкасидан айириб қўйди, Амир Ҳусайннинг танаси шилқ этиб отдан ерга қулади... Ер қизил қонга бўялди. Ҳамиша чорраҳаларда йўл танлашда адашган Амир Ҳусайннинг умри ҳам, ажабо, Чорсу майдонининг ўртасида — чорраҳада ниҳоя топди...

### III

Ушбу паллалар Темурбек Ҳиндувон қалъасига бостириб киришга фармон берди. Қалъа берк эди. Амир Жоку барлос дарвозани очишларини буюрди. Овоз қилдилар, дарвоза ҳа деганда очилавермади. Дарвоза олдидағи майдон ва хандак атрофларини сипоҳ тутиб кетган, карнай ва бурғу садолари қулоқларни қоматга келтиради. Навкарлар тездан манжаниқни судраб келиб дарвозага қараб ота бошладилар. Саттор шихна шинақдан туриб: «Отманглар! Ҳозир очамен!» деб бақирди, чунки шундай қилмаса, шихнанинг қадрдан дарвозаси бузилиб кетиши ҳам ҳеч гап эмасди. Саттор шихна шошилиб дарвозани очди. Лашкар ёприлиб қалъага кирди. Кўзлари қўркувдан катта-катта очилиб кетган Саттор шихна деворга жон-жаҳди билан ёпшиб омон қолди, йўқ эса отларнинг тагига тушиши аниқ эди. Темурбек навкарлари билан тўлиб-тошган қалъа нақ жаҳаннамнинг ўзи бўлди қолди.

Амир Ҳусайннинг ғойиб бўлгани қалъада эрталаб билинди. Наврўз Султон, ҳукмдорнинг катта ўғли, тун бўйи қалъани қандай ҳимоя қилиш ҳақида режалар тузиб чиқди ва бу ҳақда падари бузруквори билан кенгашмоқча хон саройига шошилди. Амир Ҳусайн саройда йўқ эди, унинг қаердалигини ҳеч ким айтиб беролмади. Ҳатто хон Одил Султон ҳам бундан бехабар экан. Ажабо, Амир Ҳиндушоҳ билан қалъа кутволи Амир Халиллар ҳам қайгадир ғойиб бўлгандилар. Улар балки ҳукмдор билан биргадирлар, аммо қалъани шундай долзарб шайтда ташлаб кетиш мутлақо тушуниб бўлмайдиган ҳол эди. Наврўз Султон хон Одил

Султонга ошигич чоралар кўриш лозимлигини уқтириди ва инилари Хон Саид, Жаҳонмулк, Халил Султонлар билан бир бўлишиб, қалъа ҳимоясига киришдилар. Аммо улар Амир Ҳусайнсизсиз, бошсиз тана от устидан қулаб тушганидек, мудофаани сақлаб туролмадилар. Базият чок-чокидан кетган эди. Сипоҳлар буйруққа бўйсунмай, ҳар ёққа қоча бошладилар. Ҳар ким ўз билгича иш тутарди. Кимдир вахима ичида, кимдир ўлжа илинжида рақиб тарафга ўтиб кетди... Ана шундай парокандалик юз бериб турганда Амир Ҳусайннинг ҳалокати хабари ўлганнинг устига тепгандай бўлди, қалъани сақлаб қолиш умидини саробга айлантириди. Устига устак, жангда жон олиб жон беряётган Наврӯз Султон билан Хон Саидлар bemavrid ажал ўқига учрадилар. Буни кўрган Амир Ҳусайннинг бошқа ўғиллари Жаҳонмулк ва Халил Султонлар яширинча қалъадан чиқиб, Ҳиндистон томонларга қочиб қолишли. Хон Одил Султон бўлса қатл қилинди...

Ҳиндувон қалъаси бутунлай ғолиблар қўлига ўттан эди.

## ТЎҚҚИЗИНЧИ БОБ

### I

Жаҳонгир Мирзонинг ўтовсимон чодири хийла кенг бўлиб, эллик одам бемалол давра қуриб чақ-чақлашиб мумкин эди. Аммо ҳозир чодирга жимлик чўккан... Ташқарида, амирзоданинг мулоғимлари олачуқларида, улардан нари Балх шаҳри кўчаларида, ундан нари дашту далаларда, төгларда, Жайхун бўйларида ҳам жимлик ҳукм сурар эди. Бутун олам сукунатта ғарқ...

Жаҳонгир Мирзо шифтга бир нуқтага қараб ётар, куйироқда чордона курган Ахий Жаббордан ортиқ саргузашт ёки афсона сўйлаб беришни сўрамас, балки унинг борлигини сезмас эди ҳам. Турўғлон билан Онабўри афсонаси Жаҳонгир Мирзо хаёллари уфқини очиб юборди. Энди ўзининг хаёллари жунбушга келди, хотира пучмоқларида ётган ҳодисалар эсга туша бошлади. Барчаси қалқиб, ёруғликка чиқайлик, деб навбат талашишарди. Ҳар юракнинг ўз афсоналари бўлади. Жаҳонгир Мирзонинг ҳам эртаклари, афсоналари, саргузаштлари йўқ эмас...

У чодир чанғарогига тикилди. Чанғароқдан чодирга

сездирмай тонг тушиб келарди. Бурчакдаги шамнинг ҳам нури кесилиб қолди. Жаҳонгир Мирзонинг хаёллари чангароқقا бориб уринди, ундан ўтиб эркин қушлардек бепоён осмон қаърларига отилди. Амирзода кўзларини юмганча хаёлларга эрк берди...

Жаҳонгир Мирзо табиатан юмшоқ, кўнгил ва хаёлпараст бўлиб ўсади. Ширин хаёлларни яхши кўрар, бир хаёлга берилса, дунёнинг бу бошидан кириб у бошидан чиқарди. Энди ўн беш ёшга қадам қўяёттан эсада, тутумининг босик, ўзининг салобатлилигидан катта йигитларга менгзарди, бунга дуркун, бўйчанлиги ҳам сабабчи эди. «Бўларининг боласи ўн бешида бош бўлар, бўлмасининг боласи йигирма бешида ёш бўлар», мақоли айни ўн беш ёшли Жаҳонгир Мирзо шаънига айтилгандек эди. Шунинг учун Темурбек сафарга, жангларга кетар экан, ҳар доим уғруқни<sup>1</sup> Жаҳонгир Мирзога топширади ва кўнгли тўқ бўлади.

Бундан тўрт йил аввал Мовароуннахрда нотинчлик юз берди. Амир Ҳусайн Бадахшон хонлари билан саваш бошлади. Ҳирот ҳокими Малик Ҳусайн курт Балхнинг ҳоли қолганидан фойдаланиб лашкар юборди. Темурбек Балх ҳимоясига отланди. Ўшанда уғруқни бошқариш Жаҳонгир Мирзога топширилди. Ўн яшар амирзода уғрук билан Моҳонда Муборакшоҳ Санжарий ҳузурида туриб турди. Темурбек киши юборгач, дилкаш Кеш диёрига қайтиб келди. Икки йил аввал эса, бобоси Амир Жоку барлос Ҳирот ҳокими Малик Ҳусайн олдига элчи бўлиб борди. Ҳирот ҳокими элчини иззат-икром билан кутиб олди, меҳмондорчиликни ўринлатди. Кузатар экан, элчига шундай мактуб тутқазди: «Жанобингиз Сарахсга борадурмен, агар Темурбек ҳазрати олийлари илтифот кўргизиб ташриф айласалар, дўстлик ва иноклик ришталари боз мустаҳкам боғлангой эрди...» Темурбек мактубни ўқиб истехзоли жилмайди. Жаҳонгир Мирзо барини кўриб турарди:

— «Илтифот кўргизиб, ташриф буюрсалар...» Хурсонда бизга нисбатан ғараз бор. Амакимиз Ҳожи барлос айни ўша ёқда завол топди. Шул важдан Сарахсга бормагимиз жоиз эрмас... Амирлар улури не дейдилар? — ўтирилди Амир Жоку барлосга Темурбек.

<sup>1</sup> Уғруқ — Подшоҳ, хон ва сultonларнинг оила аъзолари ҳамда тирикчилик анжомларини ўзида жамлаган карвон.

— Фикрингиз бағыт ўринлидир, Темурбек! — Мать-куллади Амир Жоку барлос. — Сиз бормангиз. Ишониб бўлмайдур. Ҳар одимда бир хиёнат шерик...

— Ҳар нафасда хиёнат... Ҳар лаҳзада яхшилиққа ёмонлик қайтадур... — афсусланди Темурбек. — Ўшал музофотда турли вақтда номақбул ишлар содир бўлрон... Баридан боҳабармен...

— Қандай номақбул ишлар, эй валинеъмат соҳиб-қирон? — сўради қизиқиб Жаҳонгир Мирзо.

— Ҳа, сиз билиб кўйишингиз лозим бу тарихларни, амирзодам! — деди Темурбек ўғлига тикилиб. — Нафи бўлур. Хурсоннинг ҳақиқий ҳокими Амир Наврўз Арғун оға ўғли, мана шу Малик Ҳусайннинг амакиси бўлмиш Малик Фахриддинни зиндандан чиқариб олди. Зинданга эса отаси Шамсиддин курт ташлаган эди...

— Ўз отаси-я? — сўради Амир Жоку барлос.

— Ўз отаси. — Ҳикоясини давом эттириди Темурбек. — Амир Наврўз Малик Фахриддинни зиндан чиқариб олди, кейин ўз яқинларидан бирининг ожизасига уйлантириди. Ҳиротта ҳоким ҳам қилиб кўйди. Йиллар ўтиб Амир Наврўз фитна касрига қолди-ю Фозонхон қаҳрига учради. Озарбайжонда барча қавму қариндошлири қиличдан ўтказилди. Амир Наврўз паноҳ истаб бир пайтлар саховат кўргизган Малик Фахриддин олдига борди... Ҳирот ҳокими имонини ўртага кўйиб, садоқатини изҳор қилди, илтифотлар айлади. Аммо бу ноинсоф, Фозонхон одами Ҳиротта кириши билан Амир Наврўзни унга тутқазди! Амир Наврўз қатла тортилди. Малик Фахриддин шундоқ қирқ йилга яқин ҳукмдор бўлиб турди...

— Туз кўр қиласиган разил экан-ку! — деб юборди Амир Жоку барлос.

— Ўзи бундоқ хиёнатлар буларга ота меросму, қонида борму, ҳайронмен... Малик Ҳусайннинг отаси Малик Фиёсидин ҳам худди шундоқ мунофиқ бўлрон эркан... У Малик Фахриддиннинг иниси эди. Бири бирдан андоза олғон. Элхоний сultonлар лашкарбошиси Амир Чўпон сұлдуз Малик Фиёсидиндан кўмак ўтинди. Малик Фиёсидин бундай деди: «Сизнинг яхшилиқларингизни асло унутмасмен. Хотиржам бўлингиз. Жонимни гаровга кўйиб бўлса ҳам сизни сұлтондан сўраб оламен...» Шундан сўнг аҳдини эсдан чиқариб пайт пойлаб Амир Чўпон сұлдуз ва унинг ўғли

Жиловхонни бошларини кесиб султон Абу Саидга юборди! Амир Чўпон судуз доим Амир Наврўзни маломат қилиб: «У ғаддору бадкор тоифадан паноҳ излади...» дер экан. Оқибат ўзининг қисмати ҳам шундок юхоя топди. Ҳирот ҳокимлари сажияси ана шундокдир...

— Хиёнат, вафосизлик уларга йўргакда теккан дард экан-да... — муносабат билдири Амир Жоку барлос. — Шунинг учун ҳам бормангиз, деяпман-да! Чунки, Малик Ҳусайн, кўриб келдим, кўзлари бежо, филдираб турар экан... Ўша ноинсофлар авлоди-да, ким билади, бадкор дилида нима бор...

Жаҳонгир Мирзо эса ҳайратдан лол эди.

Темурбек ўйга чўмди.

— Аммо бир томони бор... — деди юхоят Темурбек. — Бирор тил учида бўлса ҳам дўстлик, бирордарлик сўзларини айтиб, хайриҳоҳлик билдириб, дийдорлашувга талпиниб турганда, унга илтифотсизлик намоён қилиш, эътиборсизлик кўргизиш, буткулрад этишни ҳам ўзимга эп билмаймен... Салтанат, давлат ишларида бу кечирилмас нарса. Малик Ҳусайн таклифини қабул қиласиз, ҳузурига борамиз. Фақат мен эмас, балки азиз фарзандим, салтанат борининг гули, жаҳондорлик умидининг устуни амирзода Жаҳонгир борадур, Муборакшоҳ Санжарий унга мулошимлик қиласур. Амирзодам салтанат русумини ўрганмоғи даркор. Ахир Қуръони каримда «Сизларга бир киши салом берса, унга яхши салом билан жавоб қайтаринглар ёки саломини айнан қайтаринглар» дейилғон...

Темурбек муншийи хосга бир мактуб ёзишни бујорди. «Малик Ҳусайн ҳазратларининг ҳалол ва оқил эканликлариға сира шубҳамиз йўқдур, — дейилган эди мактубда. — Инчунин, кўзимнинг нури, дилбандим амирзода Жаҳонгирни қошингизга юбордим. Уруқимиз, аҳли аёлимиз вилоятингизда қолрай. Ҳазратларининг олийжанобликлари, ҳимматлари тақозо эттанча уларнинг муҳофазаси, осойишталиқлари назарда бўлрай, иншооллоҳ. Улуғлардан улуғлиқдан ўзга нарса қайтмағай...»

Ўшанда Темурбек Жаҳонгир Мирзога ўзи бажариши лозим бўлган юмушни ишониб топшириди ва амирзода ҳам бунинг уддасидан чиқа олди — Сарахса Малик Ҳусайн билан дийдорлашиб қайтди...

Жаҳонгир Мирзонинг кўзлари юмуқ, эканлигини кўрган Ахий Жаббор: «Амирзодам энди уйқута кетдилар, пича фароят олсунлар...» — деди ўзича ва уйку сабабини Турўлон билан Онабўри афсонасига йўйди, ичидан ўзидан мамнун бўлиб қўйди. Уйротиб юбормаслик учун эҳтиёткорлик билан ўрнидан турди-да, оёқ учидан ташқарига чиқди. Мулозимлар тавин овоз чиқарив гапиришиб амирзода оромини бузиб қўймасунлар, деб ташвишланарди.

Амирзода эса ўз хаёллари ичра мустағриқ эди...

Болалиги-чи?.. Болалиги кўп гаройиб кечди!.. У эси-ни таниганидан бери бибиси Текина хотун қўлида тарбия топди. Бобоси Амир Таравайнинг елкасидан тушмас, бобоси ҳам уни жон-дилидан яхши кўрарди. Темурбек ёлғиз арзанда ўғил эмасми, арзанданинг арзандаси янам ширин эди, қаерга борса, ўша ерга бирга олиб кетарди. Текина хотун, Оллоҳ ўз раҳматига олган бўлсун, гаройиб эртаклар сўйлашга моҳир эди. Девлар билан олишиб ролиб чиққан паҳлавонлар, уч бошли аждарҳонинг учала бошини ҳам кесиб, у асир қилган пари пайкарни кутқариб кейин унга уйланган шаҳзода, Дажжолни ўлдирган баҳодир, ялмориз кампирни мот қилган йигит, куёвлар мусобақасида ютиб чиқиб, малика соҳиби бўлган ўғлон, Алномишу Барчин, Тоҳир-Зухра, Лайли Мажнунлар қиссаси... Тинглаганда у шундай берилиб кетардики, эртак қаҳрамонлари билан бирга куйиб-ёнарди, қувонарди, изтироблар чекарди. Текина хотун набирасининг шундай ҳолатларга тушишини ёқтирад, самимий ҳаяжонланганларини кўриб завқланар, боз-боз қизиқ чўпчаклардан сўйлаб берар эди. Жаҳонгир Мирзо узоқ вақт эшиттанлари таъсирида қолар, тушларида бари билан учрашиб, жангу суронларда аралашиб юрарди.

Бир ажойиб эртакни Жаҳонгир Мирзо жуда ҳам ёқтиради, уни бибисига такрор-такрор айттиргани эсида... Хоразмлик бир мард йигит севикли ёрини Палахмон дев қўлидан озод қилибди ва юртига йўл олибди. Дев уларни қувишга тушибди. Палахмон девга бораётганда ҳазрати Хизр пайдо бўлиб, мард йигитта учта от қилидан берган ва: «Буларни йўқотма! Қийин аҳвозда қолганингда биттасини олиб тутатсанг бир от учидан келади» деган экан. Ўша қилларнинг охиргиси қолган экан. Йигит тез қилини тутатибди. Шу ондаёқ учкур дулдул от пайдо бўлибди. Дулдул тилга кириб:

«Устимга мининглар!» дебди. Йигит билан қиз отга минибдилар. Дулдул шамолдай елиб кетибди. Палахмон дев ҳам бўш қелмабди, қувиб уларга етиб олай, етиб олай деб қолибди. Шунда дулдул мард йигитта дебди: «Ёлимнинг чап томонини қара, тўмиқ бор, ўша суякни дев йўлига ташла!» Йигит тўмиқни олиб орқасига ташлабди. Тўмиқ худонинг қудрати билан осмон ўпар тоққа айланибди! Палахмон дев ўша тоғнинг орқасида қолиб кетибди. Йигит билан қиз қувонганча йўлларида давом этибдилар. Дев тирмашиб, қўл-оёқлари тилиниб, уриниб-суриниб тоғдан ошиб ўтибди ва яна йигит билан қизни қувишга тушибди. Бир пайт йигит билан қиз орқаларига қарашса, Палахмон девнинг уларга етиб олишига бир баҳя қолган эмиш! Қўл узатса тутиб олар эмиш-да!.. Шунда дулдул: «Ёлимнинг ўнг томонини қара, тароқ, бор, ол-у орқангта ташла!» дебди. Йигит шундай қиласан экан, тароқ одам ўтиб бўлмас қалин чакалакзор ўрмонга айланибди. Палахмон дев ўрмон ичида, чакалакзорларда йўл тополмай, адашиб, сарсону саргардон бўлиб қолиб кетибди. Йигит билан қиз қувонганларидан бошлари осмонга етиб: «Энди девдан қутилдик, худога шукр!» дейишиб, йўлда давом этишибди ва Хоразмга етадай деб қолишибди. Палахмон дев ўрмонда дарахтларни тиши билан қирқиб, арралаб, синдириб йўл очиб чиқибди. Чунки дев қизни жуда яхши кўрар экан. Йигит билан қиз девнинг яна изларига тушганини билишибди. Улар дулдулга ёлворишиб: «Эй, дулдул! Бизга кўмак бер, бу ҳўл бало тарин ортимиздан келмакда! Уйимизга еттан жойимизда бизни яна етимдай олиб кетмасун!» дейишибди. От тарин тилга кирибди: «Ўмровимга қара, ўмровимга! Бир ойна боғлаб қўйилган. Ушани ол-у дев йўлига ташла!» Йигит ойнани девга қараб итқиттан экан — ойнадай тип-тиниқ баҳайбат тубсиз денизиз пайдо бўлибди! Палахмон дев денизиздан чиқа олмай чўкиб кетибди... Йигит билан қиз сов-саломат Хоразм мамлакатига келишибди ва мурод-мақсадларига етишибди.

Жаҳонгир Мирзо Текина хотундан буни эшитар экан, хаёлан йигит ўрнига ўзини қўйиб кўрар эди. Мана у қизни девдан қутқарди, дулдулга минди, тўмиқ, тароқ, ойналарни бир-бир дев йўлига ташлади... Қизик, ўшанда девдан қутулганларидан кейин, балонинг оғзидан қайтиб келган хушбахт қиз мард халоскорига

нималар деган экан-а? Миннатдорчилигини нечук из-хор қилган экан-а? «Бир умр фидойингиз бўлайин, йўлларингизни сочим билан супурайин, қўлингизга зиррапча кирса кишригим билан олиб ташлайин, нақдина умримни баҳшида айлайин!..» деган сўзларни айтганмикин-а қиз йигитта ўшандада... Жаҳонгир Мирзонинг мард йигитга ҳаваси келади.

Амирзоданинг ёш кўнгли ҳам ана шундай саргузаштли муҳаббат қиссаси қаҳрамони бўлишни истайди. Бунинг учун у ҳам пахлавон, баҳодирлар сингари олис юртларга бориб, ёр излаб, ғанимларни бартараф этиб, балолардан омон-эсон ўтиб, қаҳрамонликлар кўргизиши лозим. Ёрини дулдулга миндириб олиб келиши даркор.

Аммо... ўшандай ёр, ўшандай юрт қаерда?.. Ўшандай ёр бор, ўшандай юрт бор! Овозаси бутун жаҳонни тутиб кеттан ўшандай ёр ҳаваси амирзодани ҳам маст қилган! Буни Жаҳонгир Мирзо юрагининг тубтубида асрайди, сир тутади, ҳали бу ҳақда ҳеч кимга ёрилган эмас!.. Кимга ҳам айтади? Укаси Умаршайх билан бундай маъноларда сирлашмайди, падари бузрукворига айта олмайди... Фақат бир одам бор, — энаси Қутлуғ Туркон оқа! Жаҳонгир Мирзо Қутлуғ Туркон оқани эна деб ўрганган эди. Энаси ундан ҳамма нарсаниям очиқласига сўрайверади. Энаси шунақалар... Самарқандга боргандা пайт топиб энаси билан сўйлашади. Секин, у ёқ-бу ёқдан... Гап ўзи айланиб келиб қолади. Шунда шартта айтади қўяди. Энаси бундай гапларни соҳибқиронга бемалол билдира олади!..

Амирзоданинг хаёллари чодир чанғароғидан чиқиб осмон бағрида эркин Хоразм томонларга талпинди...

Ҳа, уни узокдаги бир ёр ўргантиради, ғойибдаги ёр! Амирзоданинг севгани Хоразм тупроғида ўсган қиз! Хоразмшоҳнинг олиймақом хонадони бўстонида япроқ ёзмоққа шайланган чечак, очилиб ўз кўрку жамоли билан оламни ҳайратга солмакни дилига туккан бир гунча... Исли Севин бика эмиш! Аммо Хонзода хоним, деб шарафланармиш... Хонзода хонимнинг дөвруғи юртлар оша Жаҳонгир Мирзога ҳам етиб келди. «Хоразмшоҳлар хонадонида бир ожиза бор эмиш. Ҳали бундай ҳусну малоҳат эгаси Ер юзига қадам босмаган эмиш. Башар фарзанди демакка тил бормасмиш, уни фаришталар маликаси деса, тўғрироқ бўлармиш. Шаҳар айлангани чиқса, юзига етти қават

парда тутиб олармиш, бутун эл томошага ошиқармиш. Жамолидан йўллар ёришармиш, ўттиз икки қасаба чироқ ёқмай иш қиласмиш. Етти иқлимдан совчилар келармиш... Ахир Амир Ҳусайннинг ҳам совчи юборганини Жаҳонгир Мирзо ўз қулоғи билан эшитган. Волидаи мұхтарамасининг ўзи қизининг ҳуснидан ҳайрон, чехрасига тикилиб ўлтирармиш...»

Амирзода кеча-ю кундуз войибдаги маҳбубасини ўйлаб чиқадиган бўлиб қолди. Қандай йўл тутмок, керак? Қандай қилиб узоқдаги ёр висолига етишади? Бир неча хос йигитларини олиб Хоразмта борсинму? Аммо, маҳбубаси девлар қўлида эмас ота-онасининг бағрида тинчгина яшаб юрибди. Совчилар юбортирсинму? Лекин совчи юборингиз, деб падарига бузрукворига қандай айтади? Айтса... ким айтади? Қачон айтади?..

Жаҳонгир Мирзо кўзларини очиб атрофга қаради. Офтобнинг оппок, беғубор нурлари чангароқ гардигига ўралиб жилва қиласди. Чодир ичи ёп-ёруғ. Ахий Жаббор ҳам чиқиб кетибди. Амирзода боши оғирлашганини сезди. Бедор ўттан кеча худди тушда кўргандек эди. Хаёлларнинг жўшқин оқими, афсоналар, хотиралар барча-барчаси аралаш-қуралаш бўлиб кетиб амирзодани ҳоритиб ташлади. Унинг кўзлари юмила бошлиди ва бироздан кейин Жаҳонгир Мирзонинг енгилгина хурраги эшитилди.

## ЎНИЧИ БОБ

### I

Мовароуннаҳр ҳукмдори Амир Ҳусайннинг ўлими ҳақидаги хабарни эшитганда, Темурбек ҳумоюн ўрдуда эди. «Тақдирдан қочиб бўлмас экан. Уни ҳимоя қилмакчи эдим, не талаб этса ризолик бердим... — ўйлади Темурбек. — Аммо унинг қасоси шариат амри бирлан рўбарў келибдур... Шариат амри олдида бандаси ожиздур...» У энди савашишнинг тамом бўлганини пайқади. Ҳа, бу ўн йиллар давом этган курашнинг ҳосиласи. Темурбек қачондир бир кун шундай ҳол юз беришини идрок кўзи билан кўриб турарди...

Секин ташқарига чиқсан Темурбек Ҳиндувон қальаси томон назар ташлади. Чанг-тўзон пардаси ичида

чулғаниб ёттан қалъада жанг ҳали давом этарди. Қуюқ, қошларини бармоқлари билан силар экан, қалъадан күз узмай мулозимни чақирди:

— Мамат!

Темурбек сўзини бошқа мулозимлар илиб кетдилар: «Мамат! Ҳумоюн ўрдуга!», «Мамат!, Ҳумоюн ўрдуга!», «Мамат!...»

— Лаббай, Амир соҳибқирон!

Мамат ўнг томондаги ўттиз қадамча наридаги чодирдан чиқиб келди. Унинг тўлиқ исми Муҳаммад Чуроға додҳоҳ бўлиб, Темурбек ихчамроқ қилиб «Мамат» дейишига ўрганиб қолган эди. Муҳаммад Чуроға додҳоҳ Амир Тарагай баҳодир оиласида катта бўлган, унинг отаси Амир Тарагайнинг садоқатли хизматкори эди. Муҳаммад Чуроға додҳоҳ билан Темурбек кичикликдан бир ҳовлида тепкилашиб катта бўлишган эди, улар бир-бирларига қаттиқ ишонардилар. Соҳиби ихлос ва чакқон Муҳаммад Чуроға додҳоҳнинг ёши бироз кичик, бўйи ҳам Темурбекнидан жилла паст эди. Узоқдан қараганда, бир келбати, агар Темурбекнинг кенг пешона, Муҳаммаднинг пешонаси кичик эканлигини ҳисобга олмаса, Темурбекка ўхшаб ҳам кетарди. Жамоат жам бўлганда улар соҳибқирон ва мулозим мартабалари доирасидан бир қадам ҳам четга чиқмасдилар, айниқса, Муҳаммад Чуроға додҳоҳ бунга қаттиқ риоя қиласди. Аммо ҳоли қолганларида мартабалар ўз-ўзидан қайгадир чекиниб, тенгқурлардай сухбатлашишар, ҳазиллашишар, бундан иккиси ҳам яйради. Муҳаммад Чуроға додҳоҳ кўп кўрган-билганларини, одамлар, сарой аҳлиниң ўзаро муносабатлари ва ҳоказолар ҳақида фикрларини баён қилас, соҳибқирон дикқат билан тинглар, қулоқ солар, хуласалар чиқаради.

Бандаси қизиқ қилиб яратилган. Ҳар кимсаннинг ўзички сирлари бор, уларни кўнглиниң туб-тубида астрайди. Аммо ким биландир бу сирларни ўртоқлашмаса, кўнглини ёзмаса, юракка оир келади... Шундоқ сирдош топиш бу оламда мушкул нарса; Темурбек буни билади. Бирорлар шамол бўлади, уларга сир айтсанг, оғзингдан юлиб олиб, бутун дунёга ёяди... Бирорвлар сув бўлади, сирингни олисларга оқизиб кетади, ўша ёқларда ҳосил беради. Бу маънода Муҳаммад Чуроға додҳоҳ шамол ҳам эмас, сув ҳам, балки тош эди, тош бўлганда ҳам тоғнинг туб-тубида пинҳона

ёттан, кимса қимиirlата олмас тош эди, сирларни у эшитарди, эшитарди-ю зинҳор сиртига чиқармасди. Темурбек уни кўп синаган, имтиҳондан ўтказган... Хуллас, Темурбек билан Муҳаммад Чуроға додҳоҳ от тепкисини от кўтаради, деганларидаи, бир-бирига сирдошу қурдош дўст эдилар.

Темурбекнинг Муҳаммад Чуроға додҳоҳга айтадиган гаплари бор эди, аммо бунга ҳар галгидек фурсат йўқ...

— Қалъага, Амир Жоку барлос жаноблари ёнига бор! — фармон қилди соҳибқирон. — Амир Сайфиддин, Амир Довуд ва Амир Улжайтуларни олиб тафтеш қилингизлар! Амир Ҳусайн ҳарамини, хазинаи дафинасини бу ён келтурингизлар!

— Бош устиға! — Муҳаммад Чуроға додҳоҳ маъноли боқди ва чаққонлик билан фармонни ижро этишга йўналди. Кетар экан, ўзи ёқтирадиган, ҳамиша айтиб юрадиган сўзларни такрорлади: — Худо пошшо, деганлар!

Темурбек Муҳаммад Чуроға додҳоҳга фармон берди-ю, юраги беҳол увалгандай бўлди. Темурбекка падари бузруквори шундай қаттиқ исм берган бўлса ҳам, у темирдан эмасди. У ҳам севган, мухаббат ўтида ёнган, ҳасратларга дил берган, кимгадир ишонган, кимдан-дир алданган, орзу-хаёллари мўл, худонинг лойдан бино бўлган бир бандасиёди, бандасига хос бўлган нарсалар унга ҳам тегишли эди. Темурбекнинг эсида, ўшанда ўн беш ёшдайди, илк бор мухаббат туйғуси унинг қалбига меҳмон бўлганда... Ўзи ҳам билмайди, чунки бу ҳодиса дафъатан юз берди.

... Падари бузруквори Амир Тарагай топшириги билан Темурбек Шайх Шамсиiddин Кулолнинг Шаҳри-сабз чеккасидағи кенг-мўл чорбогига йўл олди. Чорбог атрофи хушманзара жойлар эди. Шайхнинг уйига дарахтлару гуллар орасидан кириб борилар, йўлак бошида ҳовлидан берироқда кичиккина ариқ оқиб ўтарди. Ариққа иккита энсиз ёғоч ташлаб қўйилган бўлиб, улар кўпприк хизматини бажааради.

Ҳар келганда у бу гўзал боққа сукланиб боқарди. Темурбекни ҳамиша бир тартибда чиройли экилган дарахтлар, саркардасини қарши олган навкарлардай роз туришганча саф тортишиб, ранг-баранг гуллар эса хушчақчақ очилишиб-сочилишиб кутиб олишарди. Айни ёз палласи, Шайх боридаги мевалар ғарқ пиш-

ган, олтиндай олмалар, нок-нашватилар ям-яшил барглар ичиде сап-сарғайиб «Мени ол!» дегандай күзларни құвнатаради. Эндигина ўн бешта кирган, дунё бехабар, содда ва ялангтүш Темурбек, қўлида тол хипчинини ўйнантганча фусункор йўлақдан юриб келарди. Хаёлида эса, пирнинг уйидан чиққандан сўнг, тезроқ жўраларини олиб, отларни гижинглатиб Тошқўронга боришлари кераклиги, тоғ йўллари, у ердаги афсонавий гор томошаси, ғаройиб сафарнинг гашти, завқишавқи тинчлик бермасди.

Темурбек бепарво йўлак бошидаги ариқقا яқинлашди. Кўприкнинг ёнида кўк баҳмал дўппи кийган, соchlари майда ўрилган ўн-ўн бир ёшлардаги бир қизбона лим-лим тўлиб оқаётган ариқни томоша қилиб, сув ўйнаб ўлтираради. Қизча эгилганда учта-тўрта чилвир сочи сирғалиб сувга тушар, ҳар сафар ҳафсала билан уларни орқасига ташлар, аммо соchlар иссиқдан жон сақлабми, билдиrmай яна ўзларини ариқда отардилар. Кўзлари шаҳло, суюклук, юзлари ширмой нондай хушрўй бу ойимча қиз бирам ширин эдики, Темурбек унга бокди-ю кўрмагандек яна тикилди... Ойимчанинг жозибасиданми, ёки кун иссиғида салқин сувга қўл ювиб бироз роҳат қилмакчи бўлдими, ҳарқалай, кўприкнинг устида тўхтаб қолди, кейин чўнқайиб муздек сувга қўлини солди. Қирқ кокил ойимча шу пайт жилмайганча Темурбекка бокди, унинг самимий табассуми ўзига шундай ярашдики, йигит ҳайратта тушди. Ойимча қизнинг чиройли кўзларида қандайдир шу пайттacha Темурбекка нотаниш бўлган бир сеҳр, нур жилваланиб турарди. Негадир йигитнинг юраги орзиқиб кетди, сув юзида кун нури титрагандай, вужуди хосига ширин бир титроқ кирди!.. Беихтиёр, ҳазиллашгандай тикилиб турган офат ойимчанинг юзларига зилол сувдан сепди-да:

— Пучуқча-ей!.. — деб қўйди ўзи хижолат ва ўрнидан туриб Шайх уйига йўналди...

Уша куни Шайх уйига кўп муридлар зиёратта келишган экан. Ичкари ҳовлидан бола-бақра қизалоқларнинг қий-чуви эшитилиб турарди. Баҳмал дўппили, қирқ кокил ойимча қиз ҳам ана шундай муридлардан бирининг қизи бўлса керак, чунки Темурбек уни илгари бу ерда учратмаган эди.

Бор-йўги кўз очиб юмгунча ўтган фурсатда юз берган бу воқеа Темурбек ёдида қаттиқ ўрнашиб қолди.

Ойимча қизнинг ўзига ярашган самимий табассуми, майда ўрилган дилтортар сочлари, оғатижон шаҳло кўзларидағи ажабтовур сеҳр йигитни мафтун этиб қўйди. Менга нима бўляпти ўзи, деб қўярди ўзидағи ошуфталик ҳолатини кузатиб. У қирқ кокил қизни кўп ўйладиган одат чиқарди, кўргиси келиб қоладиган бўлди. Аммо, қаерда кўрсинг? Соддалик қилиб унинг исмини сўрамабди, қаердалиги ҳам номаълум... Шайх Шамсидин Кулол чорбогига бориб суриштирмоқчи бўлди. Кейин — бориб кимдан сўрайди-ю нимани сўрайди, исмини билмаса, кимнинг қизи эканлигини билмаса... — шу томонини ўйлаб қолди. Бунинг бефойда эканлиги кўриниб туради. Бироз вақт ўтказиб яна чорбоқقا борди, кўприкнинг тепасида яна қўлларини ювди, оқаётган зилол сувга тикилиб ўтириди... Шайхнинг уйи ҳамиша гавжум бўларди, муридлар пирларини ҳоли қолдирмасдилар. Темурбек ҳовлини тўлдирив юрган қиз болаларга пинҳона тикилиб, қараб чиқди. Аммо ойимча қиз йўқ эди...

Софингдан изтиробга туша бошлаган Темурбек, бирдан миясига ярқ этиб келган фикрдан қувониб кетди! Ойимча қиз Шайх муридларидан бирининг қизи эканлиги шубҳасиз. Бас, у муридларни топади ва... Бироқ тезда бу фикрнинг ҳам рози йўқ эканлиги сезилиб қолди. Чунки Шайх Шамсидин Кулолнинг муридлари кўп бўлиб, кунботишда Бухоро-ю Балх, кунчиқишида Андижону Марғилон, Қашқар, бу ёғи Хоразм, бу тарафда эса Самарқанду Тошкент, Ясси ёқларда истиқомат қилишарди. Нима, муридларнинг ҳар бирини шаҳарма-шаҳар, уйма-уй қидириб юрадими?... Қидириб борганда, уй соҳибига, қизингизни кўрсатингизчи, мен Шайх Шамсидин Кулол чорбогида кўрган қиз ўшамикин, дейдими?... Иложсиз жойи шу эди.

Хуллас, ойимча қиз юлдуздай ярқ этиб Темурбекка бир лаҳза кўринди-ю парилардек ғойиб бўлди. Ўртанган йигит қирқ кокилли қизнинг изини тополмай, ишқида куйиб-ёниб қолаберди. Темурбек юрган йўлида қизларни кўрса дарров, ўша ойимча эмасмикин, дея назар ташларди. Ҳали ҳам зинҳор кўнглини чўктирмас, бир куни уни албатта топамен, деган умидда яшайди.

Оғатижон ойимча тарихини фақат Муҳаммад Чурора доддоҳ билади, чунки Темурбек бу ҳакда у билан дардлашиб туради. Темурбек ойимчани соғин-

ганида, ҳамиша унга севиклисинг таъриф-тавсиғи-ни ўрнига қўйиб галириб берар, бунинг билан Муҳаммад Чуроға додҳоҳга айтишдан кўра ҳам кўпроқ ўзининг дил ўтига сув сепар, ошиқ кўнглини овутар эди. Муҳаммад Чуроға додҳоҳ гарчи ойимчани кўрмаган бўлса ҳам, Темурбекнинг ҳикояларидан унинг бағоят кўҳлик ва сулув бир бало эканлигини тасаввур этарди, ҳатто Муҳаммад Чуроға додҳоҳ, хаёлида ойимча қизнинг сиймоси ҳам пайдо бўлди...

Тақдирни тушуниш қийин... Бундоқ қараганда, қизни бир лаҳзагина кўриб, уни суйиб қолиш ва узоқ вакт унуга олмаслик ишониб бўлмайдиган нарсадай туюлади. Муҳаммад Чуроға додҳоҳ кўп ўйлаб шундай фикрга келди. Аммо, Темурбек табиатан ўзига хос инсон. У бир сўзли, саботи маҳкам, фикрини бўлар-бўлмасга ўзгартиравермайди, душманга айтган сўзи ўқ, дўстга айтгани даводир... Темурбекнинг юриш-туриши, тутуми, билими, одоби, муомаласи, аҳд-паймони, кўнглидаги ниятлари, шаҳду шижоати, қўрқмасу мардлиги, дўстларга садоқати, душманларга шафқати... — бари-бари қўшилиб улурликка даъво қиласди, Муҳаммад Чуроға додҳоҳнинг назарида. Улур инсонларнинг қалби, юраги ҳам улув, бундай қалб, юрак илтифотига сазовор бўлиш мушкул, аммо шунга етишган кўнгил унинг бир парчасига айланади... Шайх Шамсиiddин Кулол чорбоғидаги ариқча ёнида учрашган ойимча қиз шундай тақдирга муносиб кўрилган эди! Ойимча Темурбек қалбининг бир парчасига айланди, мана йигирма йилдирки, унга ҳам дард, ҳам дармон...

Темурбек Муҳаммад Чуроға додҳоҳга Амир Ҳусайн ҳарами ва хазина-дафиналарини келтириш ҳақида фармон берди-ю ўзини алланечук сезди. Сабаби, Амир Ҳусайннинг сулув хотини, Қозон Султонхоннинг қизи Сароймулхоним билан боғлиқ эди. Бу воқеа Самарқандда Чорсу майдонида, тунда юз берганди. Жета хони Илёсхўжани қувиб кетаётуб Самарқандда тўхтадилар. Амир Ҳусайн учун омонаттина қўйилган таҳтнинг чап томонида сўриларга тўшаклар солинганди. Шу ерда ўлтирган гўзал малика Сароймулхоним билан таҳтнинг ўнг томонида сўрида тиз чўккан амирлашкар Темурбек ловуллаган машъалалар ёруғида илк бор пинҳон кўз уриштириб қолдилар...

Ўшандан бери Темурбек Сароймулхоним қараши-

даги минг бир саволга жавоб топишга уринадир, топа олмай қийналадир. Орадан олти йил ўтибдирки, у Сароймулхонимга ҳали ҳануз бир оғиз ҳам сўз қоттани йўқ, холисанилло айтганда, маликада ҳам бунга иштиёқ сезилмади...

Темурбекнинг Сароймулхоним билан муносабати ҳам ёлиз Муҳаммад Чурова доддоҳга аён эди. Темурбекнинг кўнгли мойиллигини сезган Муҳаммад Чурова доддоҳ ҳатто бир куни, агар ижозат берсангиз, худо пошшо, деганлар, малика билан гаплашиш йўлларини изласам, дея очиқ айтди Темурбекка. Темурбек бош чайқаб эътиroz билдири: «Нималар деяпсен? Менга нигоҳининг ўзи кифоя. Бу ҳам Оллоҳнинг менга кўргизган бир илтифоти...»

## II

Хиндувон томонда энди суронлар эшигилмасди. Муҳаммад Чурова доддоҳ ўша ёққа шошилди. Амир Жоку барлос билан Амир Улжайту ҳарам аҳлини бир жойга жам қила бошлилди, Муҳаммад Чурова доддоҳ уларга кўшилди. Амир Сайфиддин некӯз ва Амир Довуд дувлат хазина-ю дафина тўплашга тутиндилар. Амир Муайяд арлот сайисхонага, Аббос баҳодир қипчоқ кўрхонага тайинландилар. Амир Сорибура жалойир омборхонани назоратта олди. Зиндачашм опардийга салтанат қўтонидаги кўйларни, Баҳром жалойирга молхонадаги молларни ҳисобга олиш топширилди.

Иш қизрин паллага кирганда, ҳумоюн ўрдудан чопар келиб, ҳамма нарса битта ҳам қолдирилмай қалъадан шаҳарга олиб чиқилсун, деган олий фармонни етказди. Қалъадан биринчи бўлиб Баҳром жалойир бир неча минг молни ҳайдаб чиқди. Уқтирганларидан кейин Саттор шиҳна дарвозани ланг очиб қўйди. Кейин Зиндачашм опардийнинг сон-саноқсиз кўйлари «баба»лаб қалъани шовқинга тўлдирди. Амир Сорибура жалойир одамлари омборхонадаги донларни қопларга жойлаштирилди, бурдой, шоли, арпа, сули, тариқ ва жўхориларни алоҳида-алоҳида қанорларга солишилди. Барини аробаларга ортдилар ва шаҳарга йўналдилар.

Амир Муайяд арлот навкарлари от ҳиди анқиб ётган улкан сайисхонага киришганда, бор-йўғи икки юзтacha от кўрдилар холос, бари араби отлар эди. Ҳар навкар бир отни миниб, иккинчисин етаклаб олди.

Аббос баҳодир қипчоқ ҳам қурол-аслаҳаларни арабаларда олиб чиқди. Ёғизланиб қолган арабалар вичиргичири, отлар дупури, қўйлар маъраши, молларнинг «мў-ў...»лари қалъанинг ичини тутиб кетди.

Хазиначидан қалитни олиб ичкарига кирганларида Амир Сайфиддин некўз ва Амир Довуд дувлат хазинага одам оралаганини сездилар. Нарсалар пала-партиш ётар, тилло-ю жавоҳирлар сандиги очилган ҳолича қолиб кеттан... Итирқин хонада тартибсиз кийим-кечаклар, сарполар, сахтиён этиклар, маҳси-кавушлар...

— Хўш... — деди томоқ қириб Амир Сайфиддин некўз. — Бу, албатта, Амир Ҳусайннинг ишидур... У қалъадан кетаётиб, хазинага кирган, шошилиб ўзига керакли буюму нарсаларни олган...

— Кетар жафоси қилган-да, макиёнчалиш, очофат!

Амир Довуд дувлат бошқа сўз қўшмади.

Бир ёқда турфа нодир нарсалар, қимматбаҳо югандар, тилло суви юритилган эгар-жабдуқлар, заррин камарлар, совуту дубулғалар кўзга ташланарди. Бошқа томонда — олтин кўзалар, косалар, катта-кичик идишлар, дуру забаржад тошлар, олмос, ақик, ёкут, зумрад, жавоҳиру марваридлар, тақинчоқлар, одатий тўқизтўқиз либослар... Амир Сайфиддин некўз котибга қаттиқ тайинлади:

— Хўш... хазинада бор нарсаларни шошилмай, бирма-бир дафтарга сол! Саноқда хатога йўл қўйма! Ҳушёр бўл! Уни нақ Темурбекнинг ўzlари тафтиш қиладилар-а! Барини ўzlари бирма-бир кўздан кечирадилар. Тафтиш этилғонда нарсалар дафтарда ва амалда бир хил бўлиши керак. Саҳвга йўл қўйғон чўби ясоқда етказиладур! Хўш...

Амир Сайфиддин некўз Темурбек одатини яхши биларди. Үлжага тушган бойлик давлат молидур, баробар хосу омнизиур, у соҳибқирон ёки айрим амирларники эмасдур, дер эди Темурбек; Темурбекнинг энг ёмон кўргани молимардумхўрлик эди, у бундай кишиларни одам қаторига қўшмасди.

Аммо энг матьсулиятли вазифа Амир Жоқу барлос, Амир Улжайту ва Муҳаммад Чуроға доддоҳлар зиммасига юклатилганди. Улар Амир Ҳусайн ҳарамини соҳибқирон ҳузурига етказишлари лозим эди. Ҳеч қаерда ёзилмаган, аммо ёзилганлардан ҳам кўра кучлироқ амадда бўлган қоида, русумга кўра, хон, подшо,

амир мағлубият аламини тотса, унинг ҳарамидан тортиб бутун мулку мамлакатигача ҳамма нарса ғолиб қўлига ўтар, ғолиб уларни ўз хоҳишича истифода этарди. Ғолиб лозим топса, енгилган хоннинг ҳарамидан ўзига хотин танлаб олар, бу музafferиятнинг баланд чўққиси саналар, эл томонидан табиий қабул қилинарди. Шунингдек, ғолиб жангда жасорат кўргизган амирлару асҳобларига сийлов сифатида бу аёллару канизакларни ҳадя айлаши ҳам мумкин эди.

Маъшум хабар ҳарам аҳлига еттанда, ҳеч ким ҳайрон бўлмади, ҳатто Амир Ҳусайннинг хотинлари ва канизаклари буни кутиб тураг эдилар ҳам. Онҳазратнинг ўлдирилганини эшигашгач, улар бирорнинг қўлига ўтишларини идрок этардилар ва, бу ёғи энди — пешона, деб бир-бирларини овутардилар...

\* \* \*

Мовароунинаҳр ҳукмдорининг хотинлари ичида Тармасиринхоннинг қизи Севинч Қутлуғ оқа катта нуфузга эга эди. Бўлар-бўлмасга кундошларига зуғум ўтказишни яхши кўрар, кўзи қаттиқ, айниқса, Сароймулхонимга кун бермасди. Бир ҳарамда иккита хон қизи бўлганидан, табиийки, орада рақобат чиқди. Тўғри юрган охунинг кўзидан бошқа не айби бор, деганларидай, Сароймулхонимнинг бир айби — ёшлиги, сулувлиги, дуркунлиги эди. Ёши ўтиброқ қолган Севинч Қутлуғ оқага бу ёқмас, унинг аламига алам қўшар, ҳаммаси тилидан заҳар бўлиб томар эди. Ҳарамга келган дастлабки пайтлари Сароймулхоним ўзини ҳимоя қилмоққа, бир-икки марта тушунтиromoққа уриниб кўрди. Бефойдалигини билгач, индамасдан енгадиган бўлди.

Ҳарам эшигида ўзига оро берган, бошига оқ ҳарир рўмол ўраган, икки ўрим сочини таманно ила орқасига ташлаган, қора иксун қабо кийган Севинч Қутлуғ оқа кўринди.

— Эри ўлиб, тул қолиб ўлтирибди-ю, бошига оқ рўмол ташлаганига ўлайми! — энсаси қотди Баён сулдузниң қизи Улус оқа кўзгуда қошларини тузатар экан.

— Эрсиз қопкетмай, деб қилган иши-да бу! — Тоғай Туркон оқа эшигтирмай деди. — Ўл, бу кунингдан беш баттар, қариб қуюлмаган!

— Жим!.. Қайнона биби келопти! — деди Кайқубод Хутталонийнинг қизи Одил-Мулк ҳазилкашлик билан.

Қолган аёллар, канизаклар ҳам мусичалардай гувранишиб, нималардир дедилар. Факат бир четда жим ўлтирган Сароймулхоним гапларга қўшилмас, ўз хаёли ила банд эди.

Севинч Кутлуғ оқа кундошларининг гапларини эшиттан бўлса ҳам, ўзини эшитмаганга солди, ҳеч кимга лом-мим демади. Аммо тарки одат амри маҳол деганлариdek, Сароймулхонимга игна санчиб олмоқчи бўлди:

— Ҳа-а... Жуда ўйга толиб қоптиларми?.. — пичинг аралаш деди у кибор билан ўнг қўлини биқинига тираб. — Ўзларини қайгуарга боттан қилиб кўрсатяптиларми?... Иchlарида эса ўзларини қўйгани жой тополмаяптиларми... А?... Шундайми?..

Сароймулхонимнинг чироили кўзлари Севинч Кутлуғ оқага ҳайрат билан тикилди:

— Вой... Нималар деяпсиз, эгачи?.. Нега қувонар эканмен? Нимага қувонай?..

— Нимага қувонай?.. Нимага, эмиш! Айтайми? Амир Ҳусайн ўлиб кутулганингга! Билдингми? Энди орада тўсиқ, йўқ-да...

— Сўзларингизга тушунмайдурмен, эгачижон!... Ие... Қанақа тўсиқ...

Бошқа аёллар ҳам қизий бошлиған сухбатни яхшироқ эшитиш, лозим бўлса қўшилиш учун,чувиллашиб уларнинг ёнига келдилар.

— Энди тушунмайдурғон бўлдиларми... — ясама қаҳ-қаҳлади Севинч Кутлуғ оқа. — Тушунмайсен-а, тушунмайсен!.. Хўш... Темурбек ўйнаши эканингни ким билмайди?.. А?.. Гапирсинлар-чи, ойимтилла?

Кутилмаган ҳужумдан ўзини йўқотиб қўйган Сароймулхоним нима дейишини билмай қолди. Кундошлар Севинч Кутлуғ оқанинг шундай одати борлигини, биргина Сароймулхонимга эмас, керак бўлса ҳаммага ҳам ўйнаш топиб бера олишини билишарди. Шунинг учун бу гапга эътибор қилишмади, аммо Сароймулхонимга ботиб кетди:

— Вой!.. Бундай гапни айтишга қандай тилингиз борди? Бирорнинг жуфти ҳалолини купша-кундузи маломатта қўйиш инсофданму? Қандай қилиб мен Темурбекнинг ўйнаши бўлай?.. Уни кўрмасам, сўзлаш-

масам... Тўрт девордан нари чиқмасам... Кап-катта хотин уялмайсизму шундай дейишга?..

— Ҳаммасини биламен! — Севинч Қутлуғ оқа яқин келиб Сароймулхонимнинг кўзларига қаттиқ тикилди. — Агар Амир Ҳусайн ўлмаганда сени бу қилмишинг учун от думига боғлатиб чўлларда саргардон қиласади!.. Амир Ҳусайн ўлиб сен қутилиб қолдинг, сен мочаҳар!.. Энди бу ойимтила Темурбекнинг ҳарамидан умидвор бўлиб ўлтирибди...

Фирони фалакка кўтарилиган Сароймулхоним энди чида буролмади! Аламу изтироб ичида ўртанганча деди:

— Нималар деяпсиз ўзи? Қанақа қилмишим?.. Ёрон гапиргани худодан қўрқмайсизму?.. Вой худо, бу қандай тухмат? Тухмат балонгдан сақла!.. Айтган сўзларингиз оғзингиздан чиқиб ёқангизга ёпишсун! Илоё, ўзингиздан бери келмасун! — Сароймулхоним бироз ўзини ўнглаб олди-да, секин босиқ деди: — Темурбек ҳарамидан умидвор эмасмен. Кўнглингиз тўқ бўлсун! Ўзиниям, ҳараминиям қўш қўллаб сизга бердим! Олингиз! Менга керак эмас! Менга керак эмас... Майли... керак эмас...

Сароймулхоним шундай деди-ю ўпкаси тўлиб, ўксисб йирлаб юборди. Улус оқа билан Тоғай Туркон оқа ва бошқа канизаклар уни ўртага олишиб юпата бошлидилар:

— Вой, нега йирлайсиз? Шунга йирлайсизму?.. Садқаи кўз ёшингиз! — бодомқовоқ Улус оқа Севинч Қутлуғ оқага оғринибгина қааркан, анордай кўксидан оқ заррин каштали рўмолчасини олиб Сароймулхоним юзларидаги ёшларни артди: — Кўйингиз, шунга йирлайсизму? Унинг ўзи нима-ю, сўзи нима бўларди...

— Чаён-ку!.. Чаён! Чакмаса туролмайдир... Э, заҳаринг ўзингга урсун! — шундай деяркан, шарттаки ўн тўққиз яшар Тоғай Туркон оқанинг ўзи ҳам катта маликани чакиб олди.

Севинч Қутлуғ оқа қараса, бошқа аёллар ҳам унга нимадир дейишмоқчи бўлишиб, оғиз жуфтлашга ҳаракат қилишмоқда. Бирдан унинг ичидағиси сиртига тошиб чиқди, шунча йил асрраб юрган аламини ташвишлари ўзига етиб нима қилишларини билмай мустарликда турган шўрлик хотинларга тўкиб солди:

— Ҳа, чаёнмен! Ажаб бўпти! Хўп бўпти! Билдингизму? Чаёнмен! Чакиб барингни жонингни оламен!

Чаёнигимни энди кўрсатамен сенларга! Кимсан, Тармасирихонни қизимен, Амир Ҳусайнни суюкли хотини! У менга уйланиб кўрагон бўлган, ҳал.. Сенлар, ивирсиганлар, ҳамманг мени бошимга бало бўлдинг! Сенлар келдингу оромим йўқолди, хотин бўлиб даврон сурмадим, эр нималигини билмадим! Ўроқда йўқ, машокда йўқ, ҳамманг келиб тортиб олишдинг мендан!.. — Севинч Қутлуг оқа бирдан увиллаб йиглаб юборди. — Тортиб олишдинг мендан!.. Тортиб олдинг барини! Сен, манжалақилар, мендан тортиб олдинг!.. Олди-и-нг!..

Севинч Қутлуг оқа ўқинчдан чидай олмай ўзини яқиндаги ўринга отиб ув солиб йигларди.

Ҳарам аҳли дам катта маликанинг аҳволига ачинар, дам андишасиз сўзларидан ҳайратда, уни худди биринчи марта кўриб туришгандай, «Вой, ўлмасам!..», «Вой!..», «Тавба!..» дейишиб ёқа тутар эдилар.

Шу палла эшикда ҳарам оғаси кўринди.

— Шовқун қилмангиз! — Ҳарам орасининг занчалиш овози дарров ҳаммани ҳушёр тортириди. — Халта-бухчангизни тайёрлангиз! Соҳибқирон Амир Темурнинг ҳумоюн ўрдусига таклиф этилронмиз!..

Ҳарам маликаларичувиллашиб апил-тапил ўринларидан турдилар. Ҳозиргина бўлиб ўттан гаплар жойжойида қолиб кетди. Барча тараддудга тушди, кимдир кўзгуга қаради, кимдир сочини тузатишга киришди. Сароймулхоним ҳам чиройли кўзларини безаган ёшлиарини арта бошлади...

### III

Вақт пешиндан оққан эди.

Амир Жоку барлос, Амир Улжайту ва Муҳаммад Чуроға доддохлар бошлиқ ҳарам аҳли ҳумоюн ўрдуга яқинлашиб қолди. Амир Ҳусайннинг хотинлари ясатиғлиқ маофаларда келишар, қизи ва канизаклари аробаларга чиқиб олишганди. Бу пайт Темурбек ҳумоюн ўрду олдида тикланган тахтда хазина-дафина буюмларини назардан ўтказиб, дафтар билан танишмоқда эди. Атрофда амирлару баҳодирлар чордона қуриб ўлтиришар, айримлари омборхона, қўтон, молхона, сайдисхона ва қўрхонадан олинган ашё-ю мол-ҳолни жойлаштириш ташвишида шаҳарда юришарди.

Темурбек хазина дафтарини варақлар экан, ҳарам

маликалари келишганды, йўқми, деган маънода тез-тез Ҳиндувон ёқда қараб кўярди. Узокдан ҳарам маликаларининг қораси кўриниши билан юраги булкиллашга турди. Мұхаммад Чурова доддоҳ, Амир Жоку барлос, Амир Улжайтулар унинг олдига келишиб қилинган ишдан ҳисоб бердилар. Мұхаммад Чурова доддоҳ Темурбекнинг бугдойранг юзи ҳаяжондан бироз қизариб кеттанини кўрди...

Ниҳоят ҳарам маликаларини бирма-бир соҳибқирион назаридан ўтказиш бошланди. Биринчи навбат Тармаширинхон қизи, ҳарамнинг маҳди улёси<sup>1</sup> Севинч Қутлуг оқага тегди. Мұхаммад Чурова доддоҳ катта маликанинг ким эканлигини айтганда, Темурбек унга эътибор билан қаради... Соҳибқирион Тармаширинхонни ғойибона ҳурмат қиласы. Рўбарўда ёши бироз ўтиб қолган, ўттизлардаги, аммо ҳали жозибаси ўзида хушрўйгина бир аёл туради. Эгнига қора иксун қабо кийибди, ўзига оро берибди... Севинч Қутлуг оқа Темурбек олдига мағрур юриб келди, ўзининг соҳибқирион томонидан танланишига имони комил эди, чунки шундай қылса «Кўрагон» унвонини олади. Ҳамма амирларнинг дилидаги орзузи шу — Чингизхон авлодига куёв бўлиш... Катта малика буни яхши биларди. Хушқомат гўзал маликага бокаркан, Темурбекда чиройли аёлни кўрган эркақда бўладиган ёқимли қизиқишдай бир туйғу уйгона бошлади... Севинч Қутлуг оқа, ҳарамнинг маҳди улёси, хон қизи мартабалари ҳаво бериб Темурбекка бир нигоҳ ташлади... Қулфи дили энди очилиб келаётган Темурбек сесканиб кетди, маликанинг кўзи қаттиқ зди, шу ҳамма нарсани ҳал қилди. «Яхшиликнинг ибтидоси шармдур» — хаёлидан кечирди Темурбек... У Севинч Қутлуг оқа соҳибқирион ҳарамига безак бўлади, деб шубҳа қилмаган амирларни, айниқса, маҳди улёнинг ўзини ҳам ҳайратда қолдириб, қутилмаганда бундай деди:

— Ҳиндувон мұхорабасида жон олиб жон берган, шуни деб Тошкентдан етиб келган дўстимиз Баҳром жалойир Рустами достон янглиғ жувонмардлик, аён этди! Маҳди улё Баҳром жалойирга муносиб кўрилрай!

— Муносиб кўрилгай! — дея қўллаб-куватлашди

---

<sup>1</sup> М а ҳ д и у л ё — ҳарамда катта хотинга бериладиган ном.

шу лаҳзанинг ўзида амирлару баҳодирлар. — Муносиб кўрилгай!

— Баҳром жалойир! — қичқирди Мухаммад чуроға доддоҳ...

Бу қадар мартабага мушарраф бўлиш, молларни эски шаҳардаги катта қўтонга жойлаб, қўриқчилар қўйиб эндиғина келиб турган Баҳром жалойирнинг етти ухлаб тушига ҳам кирмаганди. Унинг юраги ёрилаёзди. Ашаддий душмани бўлган Амир Ҳусайннинг суюкли хотинини ўз ҳарамига киритмак... Унинг устига улур хон Тармасиринхоннинг қизи...

Баҳром жалойир чаққонлик билан югуриб келиб, тиз чўкди-да, Темурбек қўлини олиб ўпди:

— Ўла-ўлгунча хизматингиздамен, Амир соҳибқирон ҳазратлари!

— Ўкситмай олиб юрасен! Уқдингму?

— Уқдим, Амир соҳибқирон!

— Чодирингни обод эт, амир!

Темурбекнинг илтифоти барча амирларни қойил қолдирди. Чиндан ҳам Баҳром жалойир аввал Темурбекка нисбатан парвосизлик қилганини ювиш учунми, ҳарқалай саваш майдонида чапсонлик намоён этди, бу эса Темурбек назаридан қочмади, фидойиликни кўра олди, адолат илиа ёндошли.

Суронлар ичида Баҳром жалойир кўзлари ўкинч ёшларидан лиммо-лим катта малика Севинч Қутлуғ оқани эргаштириб ўз чодирита олиб кетар экан, барча ўки ўзган амирни ҳавас билан кузатиб қолди.

Темурбекни энди ростакамига ҳаяжон чулғади: унинг оддида ўша бир қарашидан кўз нурлари кесилгандай бўлган, фақатгина нигоҳини эслаб қолган Қозон Султонхоннинг қизи Сароймулхоним турарди! Ўиласа, шу пайтгача Темурбек Сароймулхонимга тузукроқ ҳам назар солмаган экан. Нафси ламирини айтганда, бунга имкон ҳам бўлмаган... У яхшилаб разм солиб қаради: Сароймулхоним кўрки-ҳусни камолга еттан, истараси иссиқ, назокатли хушбичим жувон эди. Юзлари қирмизи оқ, чап юзидағи кичкина чиройли холи, икки чеккасидаги гажак бўлиб қайрилган зулфи, бежиримгина бурни, ёқут лабдари ўзига қуйиб қўйгандай ярашган... Эгнидаги волойи мовий рангдаги кўйлак, белини сириб турган авра арғувоний тўн маликанинг бутун кўрку латофатини намойиш этар, шамол эса бошидаги қизил ипак таканасини берилиб ўйнарди...

Юрганда чиройли қоматини тик тутиб юрар, тўннинг узунлигидан оёқлар кўринмас, худди юзиб кетаётгандай таассурот қоларди.

Темурбек бир қаращаёқ Сароймулхонимнинг ўтли нигоҳини ёқтириб қолганди. Ниҳоят ўша ёқимтой суюкли кўзларга энди қўрқа-писа ўғринча эмас, балки bemalol тикилиш фурсати етди. Темурбек ана ўшанга қувонарди. Аммо кутимаган нарса рўй берди. Сароймулхоним Темурбек олдига келганча, келиб тўхтаган пайтида ҳам, кейин ҳам, ажабо, бошини ердан кўтармади, Темурбекка бир марта ҳам нигоҳ ташламади! Сароймулхоним ерга қараганча тураверди. Бу нарса Темурбек юрагини бадтар оловлантириди... Малика шу пайт унинг кўзларини, ёқимтой нигоҳини интиқ бўлиб излаётгандарини жуда яхши биларди, аммо ўзи истаб турса ҳам ердан кўзини узмади...

Темурбек Муҳаммад Чуроға доддоҳга буюрди:

— Маликани бизнинг ғариб чодиримизга олиб кирингиз!..

Амирлар сурон кўтариб соҳибқирон қарорини қўллаб-қувватлашди. Муҳаммад Чуроға доддоҳ Сароймулхонимни етаклаб ҳумоюн чодирга киритиб юборди... Ёнидан ўтаётганда, бирдан Сароймулхоним Темурбекка сирли нигоҳ, ҳадя этди! Темурбек буни кутмаганди, шошиб қолди. Ҳа, бу ўша кўзлар! Бунда нозистигно бор, озгина ўпка-гина, озгина мунг шарпаси, куйдирмажон ўтнинг ёлқини, хиёл хокисорлик, шикасталиғ... Маликанинг чехраси лов-лов бўлиб қизариб кетибди.

Темурбек Амир Ҳусайн ҳарамидан яна икки аёлни, Баён сулдузнинг қизи Улус оқа билан Төвай Туркон оқани ўзига танлади. Кайқубод Хутталонийнинг қизи Одил-Мулк ҳумоюн фармонга кўра Амир Жоку барлосга инъом этилди, чунки амирларнинг улуғи ёшига қарамай жанг майдонида ҳам, аёллар бобида ҳам чавандозликни яхши кўрарди. Бу ҳаммага маълум эди. Дилшод оқа Шибирроҳ ҳокими Зиндачашм опардийга насиб этди. Темурбек Зиндачашм опардийнинг орқаваратдан қандайдир ўпка-гина қилиб юрганини биларди, бу билан унинг оғзига уриб қўймоқчи бўлди. Колган канизаклар амирларга тухфа этилди. Амир Ҳусайннинг дурри носуфта қизи Ҳиндувонда жасорат аён айлаган яна бир амир Элчи Бугага раво кўрилди.

— От келтирингиз! — буюрди бир пайт Темурбек. — Эски шаҳардан Ҳиндувонга зўрлаб кўчирилган одамлар шу бугуннинг ўзида уй-ўйларига қатарилсун! Эски шаҳарни обод этиб осойишта, тинч яшасунлар! Ҳеч кимса уларни безовта қиласун! Ҳиндувон қалъаси деворигача тупроқ билан тенг этилсун!

Сурон кўтарилидди. Ҳамма тайёр қалъани бузиш яхши эмаслигини билар, аммо шундай қилинмаса, у яна бирон фитначига макон бўлиб қолишини тушунарди.

Шу пайт рикобдорлар Темурбек тулпорини келтиридилар. Амирлар узангини икки томондан ушладилар, Амир Жоку барлос билан Амир Довуд дуғлат соҳибқироннинг қўлтиридан олишиб отга минишга кўмаклашдилар. Темурбек от бошини Ҳиндувон сари бурди, икки хос ясовул икки ёнида муҳофаза этиб бораради. Амирлар Темурбек изидан йўл оддилар.

Соҳибқирон қалъани бирма-бир айланиб чиқди, яхшилаб назардан ўтказди. Қалъа ишини Амир Кайхусрав билан Амир Муайяд арлотга топширгани учун, уларга жойларни бирма-бир кўрсатиб, маслаҳатлар берди:

— Мардумни бугуноқ Эски шаҳарга кўчирингиз! — яна таъкидади Темурбек. — Барчага кўмак берингиз, от-улову аробадан азият чекмасунлар! Зинҳор хор этмасунлар!

Амирлар бош ирраб таъзим қилдилар.

Амир Ҳусайн Эски шаҳарнинг қарийиб ярим аҳолисини қалъага кўчиришга улгурган эди. Бундан элнинг норозилиги ортди. Соҳибқироннинг Эски шаҳарга қайтиш ҳақидаги фармони қалъа аҳлини бафоят шодлантириб юборди. Кишилар қувонганидан ўзларини қўйишга жой топишилмас, «Илоё, умрлари узоқ бўлсун!» деб Темурбекни дуо қилишдан тиллари бўшамасди.

Ўн беш мингта яқин навкар одамларни кўчиришда кўмак беришди, буюмларни аробага ортишиб, гоҳ отда, гоҳ эшакда, гоҳ эса ўзлари юкларини орқалашиб Эски шаҳарга қатнашда давом этдилар. Ҳатто ярим кечада ҳам қалъа ичида, йўлларда, шаҳарда катта машъалалар ёруғида куймаланиб юрган, тобора сийраклашиб бораётган одамларни, турнақатор аробаларни кўриш мумкин эди.

Ҳиндувон қалъасини бузиш тоңг-саҳардан бошланди. Қалъа бўшаб қолган эди. Даставвал Амир Ҳусайн

саройининг томи кўчириб ташланди, эшиклари қўпориб олинди. Бузиш осон, қуриш қийин, деган ақидага кўра, эллик мингга яқин навкар ишга баравар ёпишдилар ва қалъани кун боттунча чангини осмонга чиқариб юбордилар. Турли ёқдан деворларнинг гурсиллаган, ёғочларнинг қарсилаган овозлари эшитиларди. Қалъани чанг-тўзон пардаси қоплаб олди.

Катта бинолар вайрон бўлиб, навбат қалъа деворига етганда, Саттор шихна ташвишга туша бошлади. Навкарлар унинг дарвозасига ҳам яқинлашиб қолишганди. У навкарларнинг тутумини ҳеч тушуна олмас, қалъанинг бузилаёттанига ақли бовар қилмасди. Навкарларга тапириб ҳам кўрди, аммо наф чиқмади. Бири «Кет!» дегандай қўл силтади, иккинчиси қулоқ солиб ҳам қўймади. Ҳамма томонда шовқин-сурон.. Саттор шихна тинчимас, гоҳ, деворга манжаниқдан қарсиллатиб тошлар отаёттан сипоҳларга борар, гоҳ, қайтиб дарвоза олдига келар, бир жойда туролмасди. Тошлардан бири ногаҳон нақшинкор дарвозанинг ўнг қанотига бориб тегди! Кейин чап томонига, яна ўнг томонига... Саттор шихна холи пайтларда дарвозанинг чиройли нақшларини, ислимий гириҳларини томоша қилишни ёқтиради. Гириҳлар унга дунёning, ҳаётнинг чигал ва адоксиз йўллари бўлиб туюларди. У ўша йўллар билан оламни неча бор айланиб кезиб чиққан... Шу пайт бир тош келиб яна ўнг қанотга тарақлаб урилди, ёғочни ўпириб, катта дарча очиб қўйди! Ҳар тош текканда дарвоза қарсилаб, жони оғриганини билдиргандай, зорланиб ёрдамга чақиргандай бўларди...

Саттор шихнанинг эси оғиб қолди! Манжаниқнинг тошлари дарвозага эмас, гўё унинг шўрлик пешонасига урилаёттир эди! У шуурсиз гандираклаб дарвоза томон бора бошлади. Шу орада яна бир тош чап қанотга тегиб уни ҳам синдириб тушди. Дарвоза лиқиллаб қолди. Навкарлардан бири жон ҳолатда Саттор шихнага бақирди:

— Қоч! Дарвоза қулайди!.. Қоч!.. Ўласен!..

Саттор шихна қулоқ солмади, аникрои, эшитмади. Битта навкар чолиб бориб қўлидан тутди-да, йигирма қадам нарида девор тагига ўтқазиб қўйди. Бирдан дарвозанинг ўнг қаноти синиб, гурсиллаганча ерга қулади! Бироздан кейин дарвозанинг иккинчи қаноти ҳам ўприлиб тушди... Саттор шихна тикилиб ўлтирад экан,

талпиниб нимадир демоқчи бўлди. Ортиқ даражада ҳаяжондан караҳт ва мажолсиз эди. Кулорига қайдандир йироқдан қичқириқ овозлари киар, аммо у қандай овозлигини идрок этолмасди. Навкарлар унга баравар қичқираудилар:

- Тезроқ қоч!.. Девор тагида қоласен!..
- Ҳой, девор босиб қолади, гушна!
- Жинними бу?.. Ажалингдан беш кун бурун ўласен-ку!..

Энди у тагида ўлтирган деворни қўпармоқда эдилар. Саттор шихна дўқ-пўписаларга парвосиз ўлтиришда давом этар, жойидан жилишни хаёлига ҳам келтирмасди. Жаҳллари чиққан икки навкар югуриб келишиди-да, уни қаттиқ туртишиди:

- Э, қоч, деяптилар сенга!.. Ўликмисен, тирикмисен?..

Саттор шихна уларга маъносиз назар ташлади. Водариго, бутун умрининг мазмунига айланган дарвозаси энди йўқ!.. Шўрликнинг дунёси қоронғу бўлди. Кўзларида нур кўринмас, ранги бўғриқиб қорайиб кетганди. Навкарларнинг вактлари зиқ эди, шартта унинг икки қўлтиридан кўтардилар-да, диконглатиб девордан узокроқча олиб кета бошладилар. Саттор шихна қайсарлик қилиб қадам босмас, оёқлари ер чизиб судралиб борарди.

— Роза ўлигини ортволди-ку, занғарни боласи!.. — зорланди навкарлардан бири. — Гапирмайдиям!...

— Қўй ерга! — деди иккинчиси. — Қўй ерга! Ўзи юрсин!

Навкарлар ҳолсиз Саттор шихнани бир амаллаб оёқка туриздилар-да, нари кетдилар. Саттор шихна бир қадам босиб, иккинчисига улгурмай гурс этиб ерга қулади. У бандаликни бажо келтирган эди...

## Ў Н Б И Р И Н Ч И Б О Б

### I

Жоме масжиди минорасидан янграган аzonдан кўп ўтмай, кўхна шаҳар узра карнайнинг босик, руҳлантиргувчи ёқимли овози тараля бошлади. Бироздан кейин унга новора билан сурнай садолари эргашди. Бари хушнуд дамларга ишора эди. Чорсу майдонининг кенг саҳнига сувлар сепилиб, супурибсидирилганди. Кўчадан шу пайт жарчининг ўқтам овози эшигили:

— Одамлару одамлар, боғда биттан бодомлар! Эшигмадим, деманглар! Бугун Абдулмузаффар Соҳибқирон Амир Темур Кўрагон ҳазрати олийлари Мовароуннахр султони деб эълон этиладур! Ҳамма Чорсу майдонига-а-а-а!... Чорсуга-а-а!... Чорсуга-а-а...

Шаҳарнинг тўрт томонига юборилган жарчилар маҳаллама-маҳалла юриб, барчани юқоридаги сўзлар билан чорлаб чиқдилар. Одатда, кимгадир жазо берилмоқчи бўлса, ё кимнидир тавбасига таянтириш нияти устун турса, элни Чорсу майдонига йивар эдилар. Кўхна Балх бундай йигинларни кўп кўрган. Аммо бугунги издаҳом мутлақо бошқача руҳда эканлигини одамлар яхши билишарди. Чорсудан эшигилётган даранг-дурунг садолар ҳам шундан далолат берарди. Амир Ҳусайннинг зулму тааддиларидан ҳориб-чарчаган, эзилган Балх ҳалқи Темурбекка ҳалоскор сифатида қарар, эҳтиром кўргизарди. Ҳиндувондан қайта кўчиб келганлар эса Темрубекни олқишлишдан, унга ҳамду санолар ўқишдан чарчашибди. Балхликлар худди байрамга бораётгандай болаларини ҳам олишиб Чорсу майдони томон оқа бошладилар.

Темурбек саҳарлиқдан сўнг бомдод намозини пири муршид Мир Сайид Барака билан бирга адо этдилар. Сўнг жойнамоздан туришмай, ҳар бирлари ўз ҳолича саловот ўқидилар. Мир Сайид Барака соҳибқирон учун алоҳида дуо ўқиди, илоё Темурбекнинг манглайнини ёруғ эт, умрини узоқ қил, жаҳон подшолари қаторидан кўркам жой ато айла, деб яратганинг ўзига ёлворди...

Мир Сайид Барака Маккай Мукаррама сайидларидан бўлиб, камтарона тирикчилик соҳиби, эл Тер-

миз ота деб атаб юборган машҳури оғоқ шайх Ҳаким ат-Термизийнинг ғойибона мухлиси эди. Беш юз йиллар муқаддам яшаган Термиз отанинг мухташам мақбараси бозор ичида жойлашган ва гавжум зиёраттоҳга айланганди. Чингизхон босқинида Термиз вайрон бўлди, ер билан яксон қилинди, обод бозор ўрнида хароба култепа қолди.

Термиз отанинг мақбараси ҳам бузилиб кетди. Шаҳар жанубга икки-уч чақирим ерга кўчди. Аммо эл бу табаррук жойдан қадамини узмади. Оллоҳ, кўнглига солиб, Мир Сайид Барака мўъжазгина хонақоҳ қурдирди ва улуғ пирнинг руҳини шод этмоқ ниятида шу ерда иқомат айлашга аҳд қилди. Зиёратга келгувчилар ниҳоятда кўп эди.

Иттифоқо, бир кун пешиндан олдинроқ лаҳзагина кўзи илиниб қолибди. Одатда, шайх кундуз кунлари ухламасди, таҳорати синиб қолишдан чўчирди. Аммо, ҳамма нарса худодан... ухлаб, туш кўрибди. Умрида биринчи марта Термиз ота тушига кирибди. Термиз ота унга шундай насиҳат этибди: «Сайид! Сендан ризолигим беададур. Бир шогирднинг холис хизматини адо этдинг, илоҳо, кам бўлмағайсен. Шул сонияларгача нотинч эрдим. Эмди кўнгил соқин бўлди, иншоолло, мулку мамолик бўстони қулф уриб яшнағай, дину имоннинг зилол булоқлари қайнашдан тинмағай! Илло, Мовароуннаҳрга юртнинг ўз ўғли подшолик қилур. Сен ул зотнинг ёнида бўлғил, унинг дил оиласига ғубор тушишига йўл бермагил! Эмди борғил... Бугунок ўлни ихтиёр эт!..» Ҳаяжонланган Мир Сайид Барака улуғ пирдан, юртга подшолик қилаётган кимдур, дея сўрамоқчи эди, тили айланмади, ажабо, фурсат ҳам йўқ экан, уйғониб кетди... Турибоқ таҳорат олди, аллақандай таважжуҳ билан пешин намозини ўқиди. Кейин Термиз отанинг сўзларини идрок этишга тутинди...

Мир Сайид Бараканинг хонақоҳи йўл бўйида эди, Балхдан Самарқандга, Самарқанддан Термизга қатнайдиган кишилар, ҳар турли йўловчилар Термиз ота қабрини зиёрат этишга кириб ўтардилар. Ана шундай пайтларда юз берган узун-қисқа сұхбатлардан Мир Сайид Баракада юрт ахволи, шаҳарлар, амирлару беклар, рунуду авбош ҳақида маълум тасаввур пайдо бўлганди. Амир Қозонхон ўлимидан кейин Мовароуннаҳрда юз берган ҳаражу

мараж<sup>1</sup>, юрт ичида амирлар ўртасидаги бошбошдоқлик, шу туфайли Жета хони Түглук Темурхоннинг икки марта мамлакатга бостириб кириши-ю Илёс-хўжахон босқинларидан боҳабар эди. Ҳисори шодмон ҳокими Амир Баён суддуз, Кеш ҳокими Амир Ҳожи барлос, Шибирғон ҳокими Муҳаммад Ҳожа опардий, Хўжанд ҳокими Амир Боязид жалойир, Хутталон ҳокими Амир Кайхусрав ва ҳоказолар тарихини оз-моз биларди. Амир Боязид жалойирнинг Түглук Темурхон тарафидан қатл этилганлиги, Амир Ҳожи барлоснинг Хурсонда ўлдирилганлиги ҳам унга маълум эди. Ажабки, бу кишилар борасида гап кетганда Мир Сайид Барака сўзларга лоқайдгина қулоқ соларди. Унинг диққатини Мовароуннахр ҳукмдори Амир Ҳусайн ва амирлашкар Темурбек ҳақидаги ҳикоялар кўпроқ ўзига тортарди. Темурбек тўғрисидаги тасаввури тўлиша борган сари, ўзи амирни сўраб-суриштирадиган бўлди. Шайхни қўрқмас, мард, ақлли, инсофли, диёнат йўлини туттан Темурбек қаттиқ қизиқтириб қолди. Айниқса, зиёратта келган бир амир ўзи иштирок этган ва шоҳид бўлган қуйидаги воқеани айтиб берганида, Мир Сайид Бараканинг шахрисабзлик амир хусусидаги тасаввури яна ҳам бойиди.

Темурбек жанглардан бирида Қарши шаҳрини олишга жазм қилди. Сал аввалроқ олти юз кишилик лашкарни жамлаб Хузор дарёсининг Жўйбори мавзесидаги бир чорбоққа келиб тушди, лашкарни ҳордиққа чорлаб, отларга дам беришга буюрди. Сўнг Хузор ёқдан шабгир қилиб Қаршини ҳалқадай қуршаб олдилар. Қаршида шаҳар ҳокими Амир Мусо навкарлари жам эди, улардан бир қисмини асир туширдилар. Амирнинг қариндошлари Ўрдушоҳ, Анонжак ва Кудаҳлар ўз қавмлари билан сичқоннинг ини минг танга бўлиб жуфтакни ростлаб қолдилар. Тасодифан шу кунларда Қарши карвонсаройида Кошгардан Бағдодга йўл олган савдогарлар яшаб турардилар. Темурбекнинг йигитлари Тамуқа қавчин билан Шодравон найманлар яхши разм солмай, уларни душман деб ўйлаб савашишга киришдилар ва тўрт боғлам кимхоб билан бошқа қимматбаҳо буюмларини тортиб олишиб, ўлжа сифатида Темурбекка келтирдилар. Одатига кўра

<sup>1</sup> Ҳаражу мараж — анархия, маъносида.

синчикалб тафтиш айлаган Темурбек ўлжанинг савдо-гарларники эканини билгач, барчасини бирон нарса-сини камайтирмай-нетмай дарҳол ўз эгаларига қайта-риб бериши буюрди... Бироқ савдогарлар хавфсирашиб аллақачон Қаршини тарк эттан эканлар. Темурбекнинг одамлари уларнинг изидан бориб, омонатларини ўз эгаларига топшириб қайтдилар.

Бу саховат ва инсоғ доирасида тутилган иш эл оғзида достон эди. Мир Сайид Барака ана шунга ҳам эътибор қилди, унинг шаҳрисабзлик амирга ихлоси кучайгандан кучайди...

Шундай бир пайтда, зиёратчилардан Темурбекнинг катта қўшин билан Амир Ҳусайн тарафга отлангани ва қаблал билод Балхни олмоққа бораётгани хабари-ни эшиитди. Мир Сайид Барака улуг пири Термиз ота башорат қилган фурсат етиб келганини ақлу идрок тарозисидан ўткари ва «Мовароуннаҳрга юртнинг ўз ўғли подшолиқ қилур!» сўзлари Оллоҳнинг қудрати билан худди ана шу Темурбек ҳақида айтилганига имон келтирди... Мир Сайид Бараканинг Темурбек билан Бўйё мавзеида дийдорлашувлари ана шундай сирли ва гаройиб тарихга эга...

Дўсту биродар бўлганларидан бери пири муршид Мир Сайид Барака Темурбекни турли ҳолатларда кузатди, хурсандчилик ва хафачиликларда ўзини қандай тутишига эътибор қилди. Пири муршидга шу нарса аён бўлдики, Темурбек улкан дарё экан, бутун долғалари тубида пинҳон, сиртидан эса лиммолим тўлиб оқаётган Жайхун сингари сокин... Унга бирор тош отса, парво қилмайди, тош чўкади кетади. Биронта сой ёки анҳор келиб қўшилса, гурур туйиб тўлқинланмайди. Тепасидан тақдир бўронлари елсалар, бўронларнинг тугашини кутади, унга қарши жунбушга тушмайди, ўз йўлида оқаверади. Дарё ёнида бўлганлар унинг саховатидан баҳраманд... Унга тўсиқ қўймоқни, ғовлар ташламоқни ўйлаган кимслар ҳолигавой, дарё йўлидаги ҳар қандай тўғонларни суриб кетади, чил-парчин этади! Ҳа, бу дарё ҳозир қудратга тўлган, камолга етган... Ҳиндувон қамали бунинг мисолидир, Амир Ҳусайн қисмати унинг исботи...

...Нихоят улар жойнамозни йиғиштириб, ўринла-ридан кўзголдилар ва бир-бирларига салом бердиларда, қайта қучоқлашиб кўрищдилар.

Темурбек ҳар қачонгидек хаёлчан, гўё бутун ҳеч қандай ҳодиса рўй бермайдигандай хотиржам бир ҳолатда эди. Унинг чехрасида Мовароунахр султони бўлишдек улкан қувонч ва шодлик излари сезилмасди, чиндан ҳам ютуқлардан шодланмаслиги билиниб турарди. «Мовароунахр султони бўлиш, Туркистонзамига эгалик қилиш Темурбекнинг минг ниятидан бири холос. Оре, рост...» — деб қўйди ичида Мир Сайийд Барака Темурбекка назар ташлаб, ўзи ҳам хаёл ис-канжасидан қутула олмай.

Ҳумоюн ўраду эшигига бирдан Мұҳаммад Чурова доддоҳ, кўринди, салом бергач, ташқарида жой тайёр бўлганининг хабарини билдириди. Темурбек пири муршидни олдинга ўтказди. Улар ташқарига чиқдилар ва чапга — сарҳовуз бўйидаги заррин тўшаклар солинган, оқ парқу ёстиқлар қўйилган панжара гулчин катта ба-ланд сўри томон йўналдилар. Темурбек бошида заррин дубулға, эгнига тилла тутмали қора чорқабтўн ташла-ган, чап сўфибармоғидаги олтин узукда «Рости-ю рус-ти» сўзлари ўйиб ёзилган эди. Пири муршид Мир Сайийд Барака одатдагидек бир хил либосда: печи чап елкасига тушиб турадиган оқ дастор салла ўраган, устида оппоқ узун ридо... Баҳор офтобининг илк нурлари кишига хуш ёқар, қиши ичи жунжиккан вужудларга ором бағишлиарди. Чорсу ёқдан келаётган ногора-ю кар-най садолари атрофни босиб кетмоқдайди.

Темурбек пири муршид билан сўрига ўлтириб, фотиҳа қилиб ҳам улгуришмай, кўча ёқдан шовқун эши-тилди: ўн беш човлик одам ўйин-кулгу қилиб чақчаклашиб келишарди. Улар Темурбекни улур кун билан табриклишга шайланишган аркони давлат вакиллари, нўёнлару амирлар эди. Бири бирига гал беришмай, «Ҳаҳ!».. «Ҳаҳ!..» деганча қарсиллатиб қарсак уришиб кичкиришар, ора-орада мана бундок ашула ҳам айтиб қўйишарди:

*Ас бўламен шу кечал  
Мас бўламен шу кечал  
Ас бўламен шу кеча, ҳаҳ!  
Мас бўламен шу кечал..*

Олдиндан кимдир, Амир Сайфиддин некўз бўлса керак, чарх уриб шох ташлаб ўйнаб келарди. Амирлар гўё келин олиб кетишга шайланишган куёвнавкарларга менгзардилар. Барчаси байрамга муносиб ясаниб олишган, рухлари кўтаринки, хийла баланд... Темурбек уларга назар солди: Амир Довуд дуғлат сақарлот чакмон кийган, Суюргатмишон эгнига авраси нилгун чин атласидан кимхоб қантара ташлаган, Амир Сайфиддин некўз зарбол ёқали мовут чакмонда, бошидаги оқ салласи ўзига ярашган... Бирори, — Амир Муайяд арлот экан, — пашминага ўралибди. Тамуқа қавчинда қундузи пўстин, Зиндачашиб опардийда танпўш, ана унисида — Аббос баҳодир экан, — ёроқ деб аталадиган эчки терисидан қилинган енгиз кийим, Шайх Муҳаммад Баён сулдузда олача ҳошияли тўн, Баҳром жалойирда сурра тўн... Бошларида эса минг баҳяли шафтоти гулли тақия, қора барра тақиялиги ҳам учрайди, қамчот бўрк дейсизми, дубулға қалпок, салла ё дўппи... баридан бор.

Амирлар сўридан ўн қадам нарида тўхтадилар.

— Соҳибқирон умрлари узок бўлсун! — гулдиради бирдан Амир Довуд дуғлат.

— Умрлари узок бўлсун!

— ... Бўлсун! — ўргатиб қўйилгандай бир овоздан сурон солишиб амирлар. Барчаси худди акалари кўникарида ютиб чиқиб, энг катта соврунни қўлга кириттан ёш болалардай хурсанд эдилар.

— Салтанат муборак бўлсун! — қичқирди энди Амир Жоку барлос.

— Муборак, муборак!

— Муборак бўлсун!

— Бўлсун! — Яна қийқириқ авжига чиқди.

Сурон ичида Амир Муайяд арлотнинг бўғиқ, Амир Сорибува жалойирнинг ингичка овозлари аниқ ажраблиб турарди.

— Бугун муҳтарам амирларга ҳар нима қилса, эркалик этса, ярашадур... — деб қўйди пири муршид Мир Сайид Барака кулиб. — Ушбу тақдирга муносибдурлар...

Кап-катта, бола-чақали, набирали одамларнинг болалардай самимий қувончлари унга ҳам ўтди-ю Темурбек жилмайиб қўйди. У амирларни сўрига таклиф этди. Ҳамма сўрига жойлашди.

— Жумла оламдаги жаъми ишларнинг ихтиёри Ол-

лоҳнинг измида, оқибати Оллоҳнинг хоҳишидадур... — сўзланди Мир Сайид Барака фотиҳа ўқилгандан сўнг. — Қуръони мажида дейилмишки, сен хоҳдаган кишингга мулк ато этвайсен, хоҳдаган кишингдан ул мулки тортиб олғайсен... Оре, рост...

— Ҳа, парвардигоримнинг карами ҳам улуғ, қаҳри ҳам қаттиғ... Ўзи паноҳида асрасун! — деди Темурбек. — Ҳаллоқи безаволга салламно!

Барча пири муршиднинг сўзларига қулоқ тутди. Амирлар Темурбек билан Мир Сайид Барака ўртасида пайдо бўлган хуш инсоний муносабатни кузатиб, келишар, яқиндагина учрашиб, оз фурсатда бир-бисиз туролмайдиган даражада иноклашиб кеттанларидан ҳам қувонишар, ҳам ҳайратга тушар эдилар. Амир соҳибқирон билан пири муршид орасида нозик ҳурмат пардаси бор эди, ҳеч ким ундан нарига ўтмасди. Амирлар буни ҳам англаб олдилар.

Мир Сайид Барака бўлажак мамлакат подшосига айтадиган бир неча сўзларини дилида асраб юарди, бинобарин, унинг муриди, йўқ, мурид эмас, муҳиби, дўсту биродари соҳибқирон Темурбек Мовароуннахр тахтига минаётган экан, шу маслаҳатларини айтиб қўймоғи жоиз. Ҳар нарсанинг ўз вақти бор. Чунки мулк бўстонида бахту иқбол ниҳоли ўсмоғи, алал-оқибат ҳосил бермоғи учун толеи юришган сultonлар сиёсати зарурдир. Сиёсат эса симобдай сирғалгувчи бир нарса...

— Зинҳор бу насиҳат эрмасдур... маслаҳат ўрнида қабул қилғайлар, Амир соҳибқирон!

— Насиҳат қилмакка ҳаққингиз бордур, пиrim! Малол этмангиз! — пири муршиднинг сўзини бўлди Темурбек. У Мир Сайид Бараканинг муҳим гали борлигини қалбан сезган эди.

Одатга кўра, бир четда ўлтирган муншийи хос бу сўзларни тарих дафтарига ёзиб бораради. Машшоқлар ҳам чалишдан тўхтадилар.

— Қуллук, Амир соҳибқирон! — пири муршид қўлидаги гулдор тасбихини айлантирапкан, давом этди. — Парвардигор манглайнин силаган банда фармон бермоқ иқболига эришгай, саодат тожига муносиб кўрилғай. Иқболли сulton ўз мамлакатида амри маъруф ва наҳийи мункар йўлларини қаттиқ тутғай. Фикри-зикри иллату залолатни йўқ қилишга йўналтирилғай. Бутун хаёли зулму ситамни қандоқ

даф этсам, деган қутлуг ўйлар бирлан банд бўлгай. Фитна-фиску фасод тиконларининг ўсишига эрк бермаяй. Қудратини ўз фуқароларини ҳимоя этишга қаратгай. Бандалар ичида баланд мартабага эришғони бечораларга ғамхўрлик қилиш учун бериғонини тушунгай. Салтанат шавкатини ҳолдан кетиб йиқилғонларга қўл чўзишда, деб билғай... Жумла мўминларни, эл-улусни баҳтли этмакнинг ягона йўли шу эканини анилгай!.. Оллоҳ берғон куч-қудратни адолатни юзага чиқаришга сарф этбой, куч адолатда эрконини асло унутмаяй!..

Мир Сайд Барака бўлажак салтанат ойини, тартиби, равиши ҳақида сўзларди. Темурбек билади, салтанатни юргизмак учун қоида русум лозим, Чингизхон ёсоси янглиғ бир тўра-тузук керак... Темурбек барчасини ўйлаб қўйган, фақат у тузукни саҳифага тушириш даркор... Вақт мусоида этса бас...

— Иншооллоҳ, — тасдиқ этди Темурбек ва беихтиёр чап қулидаги олтин узукка, ундаги «Рости-ю русти» сўзларига қаради-да, аста силаб қўйди. — Куч адолатдадур! Ҳа, пиrim! Дилемга тутмишменким, ҳар фурсат, ҳар масканда дини исломни қувватласам, ривож берсам... Салтанат тарихини шариат ила безасам... адолатни қарор топтиурсам...

— Оре, рост, Амир соҳибқирон! Дилингиз машриқидан чиққан ушбу сўзлар пири муршидингиз дилида ҳам садо топмишдур... — қувониб кетди Мир Сайдид Барака. — Аммо баъд... Расулиллоҳнинг хижрат этғонларига етти юз йилдан ошмиш. Бандасининг ғамини егувчи яратганинг ўзи. Шундօғ, бандаларини ўйлаб ҳар юз йилнинг бошида Оллоҳ таоло дини исломияни умматларига ёйгувчи ва тарқатгувчи бир кишини хоҳиш этадур. Ул тақдирида сайланиш ва сийланиш насибаси бор мард динга ривож бергувчи шарафига сазовор бўлгай. Биз, Термизда, машойих мажлисида бу хусусда гурунгларон зердик. Аввалги олимлар назарига кўра, хижратдан сўнги биринчи юз йилликда халифа Умар ибн Абдулазиз жаноблари ислом динини янгилашга эришиди. Бу вақтда ислом аҳли иттифоқига путур етиб, кўнгилларда бирлигу Оллоҳга муҳаббат ўрнини кина-ю адоватлар тўлдиримиш эди. Хорижийлар Ҳазрат Алига таъна тошларини ёғдиридилар, маломатга қўйдилар... Имом Ҳусайн бирлан ҳазрати Аббослар

ҳам ўринсиз лаънатлардан қочиб қутулоғмадилар, мұтаассибларнинг ошиғи олчи бўлди. Инчунин ислом заифланди... Халифа Умар барча низоларга чек қўйди!

— Хайрият!.. — муносабат билдириди Амир Сайдидин некўз.

— Иккинчи асрда, воажабки, ягона ислом динида етмиш икки ботил мазҳаб пайдо бўлди! Ҳа, ҳа, етмиш икки мазҳаб! Халифа Маъмун ибн Хорунаррашид жасорат ила бу ботилликларга чизик тортди ва мазҳаби ҳақ таолога, аҳли суннат ва жамоага ривож берди. Ушбу важҳдин динга ривож бергувчи унвонига муносаб топилмиш... Тавба, деб сўзламак лозим, учинчи аср бошида Маккан Мукаррамага бало ёғилди; Абу Тоҳир қарматийлари Каъбатуллоҳни забт этиб, нақ арафа куни ҳажга борғон мусулмонларнинг ўттиз мингини шаҳид қилдилар. Оллоҳнинг қаҳридан қўрқмай, Ҳажар ал-асвадни, яъни ўша муқаддас қора тошни судратиб олиб кетдилар, кўп ислом мамлакатлари хароб бўлди, эли қатли омга учради. Аммо тангри хоҳиш эттан халифа Мұтадир биллоҳ Аббосий қарматийлар устига зафарли юриш қилди. Дини ислом ва шариат боз тараққий йўлини тутмиш...

Мир Сайид Барака тасбихини оҳиста ўтирад экан, бирпас тўхтаб тин олди. Пири муршиднинг ҳаяжонлангани кўриниб турарди. Темурбек Мир Сайид Бараканинг оғзига қараб қолган, у пирини янгидан кашф этмоқда эди. Тингларкан, хаёлида ўзини ўша халифалар ўрнига қўйиб кўтарар, уларнинг ўрнида бўлса, у ҳам шундай йўл тутишини аниқ биларди. Амирлару баҳодирлар барчаси қаттиқ қизиқиб қолищди. Пири муршиднинг фасоҳату чечанлик билан айтган гаплари уларга мутлақо янгилик эди. Босқин утоштириш, мудофаа қилиш, саваш қуриш, ўлжа олиш, майдонларни жасорат гултожи ила бе-заш ва сурон тақиши ташвишида юрган, дунёнинг иши қилич ўйнатишидан иборат деб билган ялангтўш гушна амирлар сўз давомида: «Ия!..», «Ана холос!..», «Худобезорлар!» қабилида муносабат билдиришар, айниқса, қарматийларнинг Маккан Мукаррамани оёқости қилганларига чидай олмасдилар.

— Тўртинчи аср бошида халифалик мамлакатларида фисқу фасод авжига чиқмиш... — давом эт-

дирди сұхбатини Мир Сайид Барака. — Бидъат булулары салтанатлар уфқини қопламиш, ношаърий ишлар урчид кетмиш, жабр-зулм ортмиш... Ана шунда мұхтарам Изуддавла Дайламий Бувайхий халифалик бошига келиб дини Мұхаммадийға юксалиш руҳини баришламиш... Бешинчи юз йилликда Султон Санжари Мозий ислом динига шиддат беріб, баддинларни гүмден этмиш... Пайрамбар дини бағоят иқтидор даражасига эришмишким, бу замонда биронта ҳам шариатта хилоф иш рүй бермамиш... Олтинчи асрда дини исломга ривож қўшғон зот Фозонхон султон бўладур. Ислом дини заифлашган замон, — Оллоҳнинг иродасини кўрингиз! — Фозонхон султон юз минг аскари ила Лор саҳросида, Хурсонда, саромади замона, шайхул-машойих Иброҳим Ҳамавий этокини тутдилар ва «Ло илоҳа иллаллоҳу Мұхаммадун Расулиллоҳ!» калимасини айтиб, Тангри таолога имон келтирдилар, мусулмон бўлдилар... Етгинчи асрда эса уламо Султон Мұхаммад Худобандага «Дину шариатга ривож бергувчи» дея фатво битдилар...

Мир Сайид Барака яна жим қолди, аммо қўллари тасбих доналарини оҳиста санашдан тўхтамасди. Барчанинг диққати пири муршидда бўлганидан қулоқларга бошқа нарса кирмасди. Сукунат чўккач, Чорсу ёқдан ҳануз давом этаётган сурнай-у ногора садолари баралла эшитила бошланди. Темурбек ҳам, амирлар ҳам ҳали пири муршид гали тутамаганини, у яна нимадир демоқчилигини, юқоридаги сўзлар ўша айтилмоқчи бўлган мұхим гапнинг дебочаси, даромади эканлигини ички шуур билан идрок этар эдилар. Ростдан ҳам шундай бўлиб чиқди. Пири муршид энди оғиз жуфламоқча чоғланғанди, бироқ Амир Улжайту сабрсизланиб сўраб қолди:

— Тақсири олам... Дини исломга ривож бергувчиларнинг саккизинчиси ... ким экан?

Бу Мир Сайид Баракага айни муддао бўлди.

— Оре, рост... Жанобингиз ҳам бу хусусда хаёлларга бериладурмен... — Пири муршид Темурбекка қараб давом этди: — Алқисса, саккизинчи, яъни бизнинг асримизда дини исломга ривож бермак, юксалтирумак қай мўтабар зотта насиб этвай эркан? Оллоҳ таоло ҳар бандасига ҳаракатига қараб баракат ато айлайдур. Амир сохибқирон, жанобларида ушбу қутлув

вазифаға иқтидор бордур, шижаат ҳам күчлик, ихлос ҳам етарлук... Парвардигори эгамдан умидвормен, саккизинчи юз йиллиқда ушбу шарафли рутбага, иншооллох, ўзлари сазовор бўлғайлар, жаҳонгирик русуми или олам мамлакатларида дину шариатга адолат бирла ривож бағишлиғайлар! Алҳамду лиллаҳи роббили оламин!

Мир Сайид Барака бу сўзларни фавқулодда бир таважжуҳ билан айтдики, уларнинг сеҳри беихтиёр Темурбек қалбини чулгаб олди. У хиёл бошини эгидда, ўнг қўли кўксиди, эшитилар-эшитилмас «Куллуқ!..» деб қўйди. Пири муршиднинг юzlари эҳтиросдан яна ҳам қизариб кетганди. Кўнглида ўйлаб юрган сўзларини Темурбекка айта олганидан, яна, бу шундай қутлув айёмда юз берганидан баҳтиёр эди! У теран қаноат ҳиссидан энтиқди. Кейин қўлларини очиб ҳақ таоло ҳақига, Расулиллоҳ ҳазратлари руҳига, чорёру саҳобаларга саловот ўқиб, деди:

— Илоҳо, Амир соҳибқирон манглайларини ёруғ қил, адолату дини ислом хизмати йўлида ўзинг мададкор бўл! Омин!

Ҳамма суронли «Омин!» дея дуога қўл очди:

— Оллоҳу акбар!

— Амри маъруфни ҳам бошлаб бердилар, пиrim... — лутф қилди Темурбек.

— Вазифамиздур, зеро вазифамиз, Амир соҳибқирон!.. — жавоб берди Мир Сайид Барака жилмайгандча.

Пири муршиднинг сўзлари амирлар учун чиндан ҳам амри маъруф бўлди. Мутаассир амирлар ўйланишиб қолган эдилар.

— Хўш... — шивирлади Амир Сайфиддин некўз ёнида ўлтирган Суюрғатмишхонга, аста томоқ қириб кўяр экан. — Ажаб, Оллоҳ таолонинг дини шунчалик хорликларга дучор бўлса-я! Тавба...

— Ҳа, осон йўллар йўқ бу дунёда, амир жаноблари! — Суюрғатмишхон бошқалар дикқатини жалб этмаслик учун қарийб пичирлаб гапирди...

Олдинда Темурбекнинг Чорсу майдонида бўладиган салтанат таҳтига ўлтириш маросими кутарди. Пири муршид Мир Сайид Бараканинг сўзлари эса ушбу маросимнинг руҳий тасдиги сифатида жаранглади. Кун тепага келиб қолган, лекин тушга ҳали вақт бор эди.

Бутунги маросимнинг назорати Амир Жоку барлос билан Аббос баҳодир қипчоққа юклатилганди. Тез орада фотиҳа бўлишини сезган Амир Жоку барлос секин сирғалиб сўридан тушди-да, мулозиму ғуломлар томон юрди.

— Шитоб рикобдорларга буюрингиз! Отларни тайёр этсунлар! Хос ясовуллар шай бўлсунлар! Машшоқлар шу ердаму? Шай турсунлар! Аббос баҳодир! Сен мингбоши, юзбоши, ўнбошиларни, илғор навкарларни сафлашни буюр! Ҳозир қўзғалмоққа фармони олий берилгай! Жаҳонгир Мирзо билан кеча Шаҳрисабздан келган Умаршайх Мирзолар чодирига ҳам кўз ташлаб кўй! Аммо улар, биз соҳибқиронни Чорсу майдонида кутиб олурмиз, дейишганди... Уқдингму?

— Уқдим, эй амирул умаро! — жавоб берди Аббос баҳодир.

## II

Ҳумоюн ўрдунинг олдида ҳам карнайнинг мардона садолари янгради.

Панжара гулчин сўрида Чорсу майдонига жўнашга фотиҳа ўқилгач, амирлар апил-тапил пастга тушиб, икки тарафда қўл қовуштириб турдилар. Темурбек пири муршидга йўл берди, аммо Мир Сайид Барака тасбих, туттан ўнг кўлини кўксига қўйиб, бир четта чиқди:

— Биз рози... Амир соҳибқирон! Юрсунлар!..

— Қуллук! — деди Темурбек ва отларга қараб юрди.

Рикобдорлар жиловидан тутиб турган бедовлар, сувлук чайнаб сабрсиз ер тепинишарди. Аввал пири муршидни отга миндиридилар. Сўнг Суюргатмишон билан Амир Довуд дувлат Темурбекнинг қўлтиғидан олишиб минишга кўмаклашишди. Амир Жоку барлос ва Амир Сайфиддин некўзлар узангилардан ушлашди. Темурбек: «Ё пирим!» деганча нусрат нишонли узангига оёқ қўйди. Ажабо, ҳар гал отга чапдаст, енгил минадиган Темурбек ҳозир бу ишни қийналироқ амалга ошириди. Юганлари зарҳал, тилло ўмилдириқли, олтин эгар қўндирилган, ёпинчиғи яшил кимхобдан бўлган оқ от афсонавий аргумоқларни эслатар, офтобда ярақ-юрук қиласди. Эгарга жойлашиб ўлтирас экан, Темурбек бунинг сабабини англагандай бўлди. Авваллари унинг ташвиши камроқ, юки енгилроқ эди, шу важдан отга

ҳам сакраб осонгина миниб оларди. Ҳозир унинг юки оғир, юк бўлганда ҳам залворли юк... бедови эса ҳар галидек от эмас, салтанат бедови! Энди унинг елкасига бутун Мовароуннаҳр, Туркистон ташвиши тушмокда... Эгар, олтин эгар эмас, салтанат тахти! Ҳа, бу салтанат бедовига миниш осон кечмади. Агар Амир Довуд дувлат, Суюриатмишхон сингари дўстлари унинг қўлтиридан олишмаса, Амир Жоку барлос билан Амир Сайфиддин некўзлар салтанат узангиларини тутиб туришмаса, тахтта миниш қийин кечарди, минганда ҳам узангиси тутилмаган эгардай оғиб кетиши ҳеч гал эмасди.

Энг аввал аробада машшоқлар йўлга тушдилар ва кета-кеттунча хизматда бўлдилар. Ёқимли карнай-сурнай, ногора садолари чор атрофга таралди. Машшоқлар билан изма-из отланган хос ясовуллар — улар қирқ нафар чоғли эди — муҳофаза юзасидан йўл тараб боришарди. Эллик қадамча орқада йўлнинг ўртасида олойи оқ отда Темурбек келар, икки чеккада иккитадан хос ясовуллар бор эди. Йигирма қадамча ортда пири муршид Мир Сайид Барака, Амир Довуд дувлат, Амир Сайфиддин некуз ва бошқа амирлар, мингбоши, юзбоши, ўнбошилар, баҳодирлар, фавжларнинг илғор навкарлари катта йўлни эгаллашганди. Осмон тиник, осуда, офтоб тепага келиб қолган, баҳорнинг ёқимли бир куни...

Чорсу майдонида одам гавжум эди. Балхнинг ҳамма маҳаллаларидан келган кишилар майдонни тўлдириб гуррас-гуррас кезиб юришарди. Майдоннинг ҳар жой-ҳар жойига қўйилган сўриларда машшоқлар соз чалиб ўтиришар, қизиқчилар турфа хил томошаларни давом эттиришарди. Чап томонда тикилган дор агрофида кўп одамлар тўпланган, кундузлик дорбозлар жуда моҳир экан, айниқса, беш-олти яшар боланинг баланд дор устида кўрқмай кўрсатган ўйинларидан ҳамма хайратда ёқа ушларди.

Ўнг томонда Жоме масжиди олдида эни йигирма қадам, бўйи ўттиз қадам келадиган ҳашаматли сўри қилинган, унга тўққиз зинадан чиқиларди. Ранг-баранг гиламлар тўшалган сўрининг ўртасида баланд олтин тахт савлат тўкиб турарди. Бу Туркистон тахти эди, у ўз соҳибини кутарди. Тахт орқасида тепада тўқ ҳаворанг байроқ ҳавода ҳилпирав, унда бир-бирига ёндош тасвирланган учта кулранг ҳалқа ярақлаб кўри-

нарди. Тахтнинг пойида каттагина ўроғлиқ оқ қигиз кўзга ташланарди.

Чорсу майдонини идора қилиш Амир Муайяд арлот билан Мұхаммад Чуроға додҳоҳлар чекига тушганди. Мұхаммад Чуроға додҳоҳ Темурбекнинг шахсан буйруғи билан Чорсуга келди. Темурбек ҳар бир йиғин, қурутойни ўз вақтида, рисоладагидек қилиб ўтказилишини яхши кўрар, ҳар ким ўз вазифасини ўринли адo этишини талаб қиларди. Бу маънода унинг инжиқлиги ўзига яраша эди. Чорсудаги маросимни ҳаётида шу дамгача кечган йигинларнинг энг мухими деб ҳисоблаган Темурбек, Мұхаммад Чуроға додҳоҳга: «Мамат! Бор, ўзинг назорат қил! Подшоликнинг бошланиши улус ёдида қолсун!» деб тайинлади.

Амир Муайяд арлот фавжининг бир қисми тахт олдиғаги катта саҳнни чегаралаш билан банд. Чегара олингач, саҳн одамлардан ҳоли қолди. Темурбек келдиган йўлнинг майдонга кираверишида чап томонда уч карнайчи ва бошқа машшоқлар чолғу асбобларини созлаб хизматта шай туришибди.

Тахт томон юмушлар билан машғул Мұхаммад Чуроға додҳоҳ ногаҳон Жаҳонгир Мирзо ва Умаршайх Мирзоларнинг ясовуллар кузатувида майдонга кириб келаёттганларини кўрди-ю ўша ёқда ошиқди. Айрим амирлар ундан, соҳибқирон олий тахтта сазовор бўлмоқдалар-ку, аммо нечун кейинги кунларда руҳсизроқ кўринадилар, деб сўраб қолдилар. Мұхаммад Чуроға додҳоҳ, Амир соҳибқироннинг одатлари шундок, хурсанд бўлганликларини билдиrmайдилар, деб жавоб берди ва амирларни тинчлантириди. Аммо, бу гапда жон бор: соҳибқироннинг чиндан ҳам кайфияти синиқроқ... Сабаби — Жаҳонгир Мирзо! «Биласанми, Мамат, — деди бир куни Темурбек унга, улар ҳумоюн ўрдуда одатлари бўйича ёлғиз сұхбатлашиб ўлтирас эдилар. — Шу Жаҳонгир ўғлим захмдор бўлиб қолди-да... Бориб кўриб юрагим эзилди. Чақмоқдай йигитнинг ётишини қаратгин! Тағин чидамли, жони оғриганини билинтиrmайди... Сен бориб кўриб келиб тур, мен борсам, ақдли йигит-да, азоб чекканимни кўриб ўзиям ичидан эзилади. Соҳибқирон давлат юмушлари билан овора бўлиб қолдилар, дегин...» Ўша-ўша, Мұхаммад Чуроға додҳоҳ ҳар куни амирзода олдига боради, би-

роз ўлтириб, сұхбатлашиб қайтади. Жаҳонгир Мирзонинг ҳам оёғи соғайиб қолди, аммо ҳали босиб юра олмасди. Кеча Шахрисабздан Умаршайх Мирзо ҳам етиб келди. Шахрисабзда ҳоким қилиб қолдирған Ики Темур соҳибқиронга мактуб йўллабди, эл тинч, юрт осуда, эмну омонлик экан. Бугун Чорсуга келишини ҳам Муҳаммад Чурога доддоҳ маслаҳат берди:

— Чорсуни томоша қиласиз, баҳри дилингиз очилади, амирзодам... Амир соҳибқирон сизни у ерда ёнмаён кўрсалар, у кишига мадад бўлади. Худо пошшо, деганлар...

Ҳамма Темурбекнинг худди эгизаклардай икки ўслига ҳавас билан қарап, дунёда ҳозир улардан баҳтлироқ одам бўлмаса керак, деб ўйларди. Майдонга кираверищда Жаҳонгир Мирзодан бошқа барча кишилар отдан тушдилар ва юганларни бу ерда турган сайисларга тутқаздилар. Отларни алоҳида отхонага олиб кетдилар. Ахий Жаббор амирзода тулпорини етаклаб келарди. Улар майдон марказига боргандарида Муҳаммад Чурога доддоҳ қаршилади-да, «Кам бўлмангиз, наҳлавон!» дея Жаҳонгир Мирзони мақтаб қўйди ва таҳтнинг орқасида ўнг томонда турасизлар, деб тайинлади. Изма-из ака-ука Абул Маолий ва Али Акбар Термизийлар ҳам етиб кеддилар. Атрофдаги түбәнни кўрган Абул Маолий Термизий ҳайратдан ёқа ушлаб, дамба-дам: «Ё Аҳад!», «Ё қудратингдан!» деб қўяр эди.

— Соҳибқирон Амир Темур Кўрагон ҳазрати олийлари яқинлашиб қолдила-а-р! Соҳибқирон Амир Темур Кўрагон ҳазрати олийлари қадам ранжида қилмоқдала-ар! — деб қичқирди шу пайт майдонга кириб келган Аббос баҳодир қипчоқ.

Амир Муайян арлот унинг истиқболига ошиқди.

— Ҳамма нарса шайму, амир жаноблари? — сўрали Аббос баҳодир отдан тушаркан, у ҳаяжондан бўғриқиб кеттанди. Сайислардан бири унинг отини ҳам отхонага етаклади.

— Ҳамма нарса соҳибқирон қадамларига мунта-зир, баҳодир! — жавоб берди Амир Муайяд арлот.

Шимол ёқдан маҳобатли карнай овозлари яқинлашиб келарди. Майдондаги томошалар ҳам ниҳоясига етгиди шекилли, атроф бўшаб қолди. Ҳамма тараддууда, Мовароуннаҳр сultonини кутиб олиш иштиёқида йўлга

тикиларди. Тахтнинг рўбарўсида турган ҳалойик, ичида Жоме масжиди имоми билан кўк саллали одам ҳам уриниб-суриниб юришарди.

Кўча оғзида машшоқлар аробаси пайдо бўлди. Арабадан тушган машшоқлар майдонга кираверишда чап томонда ўлтирган созандаларга бориб қўшилдилар. Кейин йўл тараб келган ясовуллар отларини топширишиб, ўзлари кўча оғзидан то тахт жойлашган ҳашматли сўригача бўлган оралиқнинг икки томонига ҳар беш қадам-ҳар беш қадамга сочилиб туриб олдилар. Фало-ғовур кучая бошлади.

Нихоят, Темурбекнинг безаклардан ярақлаган олойи оқ оти кўринди. Созандалар тантанали «Шодиёна» куйини бошлаб юбордилар. Майдон ёқимли бир жунбушга келди. Амир Муайяд арлот билан Муҳаммад Чуроға додҳоҳ соҳибқирон оти юганинг икки томонидан тутдилар ва оҳиста олтин тахт сари етакладилар. Орқадан етиб келган аркони давлат соҳибқирон изидан тахт сари пиёда равона бўлдилар. Жаҳонгир Мирзони ҳисобга олмаса, майдонда ёлғиз Темурбекгина от устида эди. Бу пайт бирор-бировга гапирмас, гапирса ҳам эшитмас, чунки карнай овозлари, мусиқа салоларидан қулоклар қоматта келгудай эди.

Темурбек мингтан салтанат бедови олтин тахт олдида тўхтади. Изма-из келаётган давлат аъёнлари орасида барлос, дуғлат, арлот, жалойир, сулдуз, найман, қипчок, некуз, қавчин сингари барча қавмларнинг сардорлари, нўёнлар, амирлар бор эди.

Амир Муайяд арлот ишораси билан карнайлар тўхтади, мусиқа овозлари тинди. Фало-ғовурлар ҳам пасайди. Пири муршид Мир Саййид Барака аста зинадан сўрига чиқди — уни узок-яқин барча аниқ кўра оларди, — ҳалойикда таважжух, айлаб деди:

— Эй машаралмуслимин! Муқаддас Қуръони карим нозил этилон муборак рамазон ойининг ўн иккинчиси, чаҳоршанбаи муродбахш, яъни ушбу кунга соғсаломат етиб келдик, алҳамду лиллаҳи роббил оламин! Мана, бошимизга Оллоҳ ўз нурини ёғдириб туриди, кўнгилларимиз ҳам моҳи рамазон шарофатидан ёрувва обод. Кўнгилга тўсик йўқ... Оре, рост. Кимки Оллоҳга таваккал қиласа, яраттанинг ўзи унга пушти-паноҳдир, деганлар жаноби пайрамбаримиз. Дини исломни устивор қилишда, мусулмончиликни йўлга қўйишда

фидойи жонлардурмиз. Бас, Туркистон салтанати жаҳон султонлари ичида ўзгир ва мумтоз Абулмансур Абулмузаффар соҳибқирони акбар Амир Темур ҳазрати олийларига муносиб кўрилғай, лойик топилғай! Ва биз аҳли саййид, то охир нафас соҳибқирон ҳазратларига садоқатда бўлғоймиз, деб онт ичурмиз!

— Онт ичурмиз! — қўллашди пири муршидни акаука Термизийлар. — Онт ичурмиз!

— Мағрур бошимизни соҳибқирон фармони чизифига қўюрмиз! — гулдиради Амир Довуд дуғлат. — Фидокорлик ва итоаткорлик камарини белимизга қаттиқ боғлаб хизмат қилишга қасам ичурмиз! Аҳди байъат қилурмиз!

— Қасам ичурмиз! — қичқирди Амир Жоку барлос.

— Қасам ичурмиз! — қўшилди Амир Сайфиддин некуз.

— Қасамга қасам! — сас берди Амир Муайяд арлот...

— Қасам! — чинқирди Амир Сорибуға жалойир.

— Қасам!.. — ортда қолмасликка тиришди Суюргатмишон.

Аббос баҳодир қипчоқ, Амир Кайхусрав, Амир Улжайту, Тамуқа Қавчин, Шодравон найман, Шайх Муҳаммад Баён сулдуз, Зиндачашиб опардийлар ҳам «Соҳибқиронга хизмат этурмиз!» деб сурон солдилар! Изма-из Муҳаммад Чуроға додҳоҳ, Жаҳонгир Мирзо, Умаршайх Мирзо, Ахий Жабборлар ҳам овозларига зўр бердилар. Мингбоши, юзбоши, ўнбони, фавжларнинг илрор навкарлари ҳам арслондай наъра чекардилар. Ҳар ким шу палла ўзининг Туркистон султонига хайриҳоҳ эканлигини ҳоли қудрат нима биландир изҳор этишга, бир четда турмасликка ҳаракат қиласди.

Темурбек олойи оқ отда ўлтирас экан, майдонга қарап, юрт бошига келишдек иқбол унга фақатгина ўттиз тўрт ёшга кирганда насиб эттанлигини ўйлар, бу подшо бўлмоқ учун хийла кеч эканлигини ҳис қиласди. Искандар Зулқарнайн бу ёшда аллақачон жаҳонни забт этиб бўлганди... Аммо, ҳар ошиққа беш кунлик давр, дейдилар. Ҳар кимнинг ҳам Оллоҳ буюрган вакти, фурсати бор, ҳар бир иш навбати билан ўз айёмида юз берадир...

— Соҳибқирон Абулмансур Амир Темур Кўрагон

ҳазрати олийлари оқ кигизга солинсун! — амирларга буюрди пири муршид Мир Сайид Барака...

Атрофдан:

- Оқ кигизга солинсун!
- Оқ кигизга! Оқ кигизга!..
- Оқ кигизга солинсун!.. — деган даъватлар янгради.

Нўёnlару амирлар энди турк султонларини тахтга ўтқазиш, шарафлаш удумини адо этишга кирищдилар. Амир Жоку барлос билан Амир Довуд дутлат тахт пойида ўроғлиқ ёттан оқ кигизни олиб келдилар ва салтанат бедовининг ёнига тўшадилар. Карнайлар тагин ишга тушди, мусиқа садолари авжга чиқди. Темурбек отдан тўғри гулдор шокилали чиройли оқ кигизга қадам қўйди... Кигизнинг ўнг томонини барлос амирлари тутдилар, чап ёғини дувлат, арлот баҳодирлари, қолган томонларини некўз, жалойир, судуз, найман, қипчоқ, қавчин сардорлари ушладилар. Пири муршид Мир Сайид Барака, ака-ука Термизийлар, Мухаммад Чурога доддоҳ, Умаршайх Мирзо, Жаҳонгир Мирзонинг вакили Ахий Жабборлар ҳам мўътабар хонлик кигизнинг бирон ерига қўл теккизиб қолиш умидида шопшилдилар. Барча «Бисмиллоҳир раҳмонир раҳим!» дедида, кигизни ердан даст кўтардилар. Халойик унда ўлтирган Амир Темурга боқиб сурон солди, бунга зўриқдан карнайларнинг фат-фати яна ҳам мадад берди...

- Муборак бўлсун!
- Қутлуғ бўлсун!
- Буюрсун! Буюрсун!
- Сурон! Сурон!.. — садолари тарағди майдон узра.

Нўёnlару амирлар шундай сўзларни тақорлаганча, шовқуну хитоб садолари остида Туркистон султони Амир Темурни оқ кигизда кўтариб майдон айланиб чиқдилар. Сўнг уни тўғри ҳашаматли сўрига туширдилар. Амир Темур чўғдек ёниб турган гиламлар устидан ўз одатига кўра оқсоқолигини билдириласлик учун шошилмай олтин тахт томон юрди...

— Бисмиллоҳир раҳмонир раҳим! — деди соҳиб-қирон ва салобат билан олтин тахтга бориб ўлтириди... Карнайлар тўққиз марта гуркираб садо берди. Аркони давлат, нўёnlар, амирлару баҳодирлар, мингбоши-юнбошилар, барча қавмларнинг сардорлари Чигатой улуси султони Амир Темур ҳазрати олийларига тўққиз марта тиз букиб таъзим қидилар.

Суронлардан майдон ларзага келди. Ахий Жаббор Жаҳонгир Мирзога «Муборак бўлсун! Муборак бўлсун, амирзодам!» дер, Муҳаммад Чурога доддоҳнинг эса кўзларидан ёш оқарди... Барча Амир Темур ўз мақсадига эришди, Мовароунинаҳрнинг ягона ҳукмдори бўлди, деб қувонарди. Бу эса, аслида буюк мақсад сари ташланган биринчи қадам эканлигини ёлғиз Амир Темургина ҳис қилар эди холос...

Алқисса, милодий бир минг уч юз етмишинчи йил тўққизинчи апрелдан эътиборан тарихда салкам беш юз йил ҳукм сурган, бу борада тенги йўқ сулола жаҳон майдонига кириб келди. Бу сулола соҳибқирон Амир Темур Кўрагон ҳазратлари номи билан бошлиниади.

Шу куни оқшом янги салтанатга ис чиқариб юбориш маъносида Балх халқи учун Чорсу майдонида ифторлик берилди. Ифторликлар мамлакатнинг жами шаҳру қасабаларида ҳам ўтказилди.

Ушбу музafferият ҳақида турли мамлакатларга элчилар юборилиб, муборак фатҳномалар<sup>1</sup> етказилди.

## Ў Н И К К И Н Ч И Б О Б

### I

Баҳор ўз сепини тўла-тўкис ёйган яйловлар ҳам ортда қолди.

Абулмансур ҳазрат соҳибқирон Амир Темур раҳнамолигидаги музafferият уруқи Қарши шаҳрига етиб келди. Шаҳарга кираверишда чап томонда чорраҳа йўл кўриниди. Йўллардан бири Самарқанд, Тошкент тарафларга кетар экан. Ахий Жаббор чапдаги йўлни кўрсатиб хушчақчак келаётган Жаҳонгир Мирзога юзланди:

— Бу йўл Занжирсаройга боради, ундан Бухорога, кейин Хоразм мамлакатига ўтиб кетади...

У парвосизгина шундай дер экан, ўтган иили Хоразмга боргани, қизиқ сафар таассуротлари ёдига тушди. Ўшанда Ахий Жаббор худди шу йўл билан Хоразмга бориб келганди.

— О, амирзодам! Бу йўл кўп узоқ йўл... — давом

<sup>1</sup> Фатҳнома — зафар хабари битилган расмий мактуб.

этди Ахий Жаббор худди ундан бирор буни сўраётгандай. — Хутталон ҳокими Амир Кайхусрав арабасини гиддиратиб юрган кезларим, унинг мактубини хоразмшоҳга олиб боргандим, йўлларда кўп ҳоргандим...

Ахий Жаббор, агар Жаҳонгир мирзо рўйхушлик берса, Хоразм билан алоқадор қизиқ воқеалардан сўзламоқчи эди. У Хоразм билан боғлиқ хотираларини титкилашни яхши кўрарди. Шу маънода гапига секин Хоразмни қистириб ўтди. У амирзодага кўз ташлади, ташлади-ю ҳайрон бўлиб қолди. Жаҳонгир Мирзо чехрасида хушчақчақликдан асар ҳам йўқ, ўйчан бир қиёфага кирганди. Бу Ахий Жабборга таниш ҳолат. Амирзода атрофдаги хуррамликни ҳам сезмагандай; тикилиб туради-ю, аммо ҳеч кимни кўрмасди, ўзи шу ерда-ю хаёли бошқа ерда юрарди. «Амирзодамнинг кайфлари чоғ эди-ку, нима бўлдийкин? — ўйлади Ахий Жаббор ўзича. — Оёғидаги жароҳатданмикин, десам, битиб кеттан, ҳатто Термизда қиличбозлик машқини бошлаб ҳам юбордилар... Ё бирон нарсадан ранжидаларму экан?..»

Падари бузруквори Турон мамлакатининг султони деб эълон қилингандан кейин Жаҳонгир Мирзо Ахий Жаббор назарида катта йигитта айланиб қолгандай бўлди. Бўйлари яна ҳам ўсиб, юзлари тағин ҳам тинклилашиб кетгандай туюлди, сабза урган мўйлаби қалинлашгандай, кўзлари яна ҳам ёрқинлашгандай... «Давлат ҳам салобат беради-да кишига... — хаёлидан ўтказди Ахий Жаббор. — Аммо салобату гурур ҳам ярашганга ярашади...»

Балх муҳорабасида баҳодирлик кўрсаттани ва фидойилиги, айниқса, азиз фарзанд, салтанат бοғининг гули, Ҳазрат соҳибқирон дийдасининг нури валиаҳд Жаҳонгир Мирзони ҳимоя қилишдаги жасорати туфайли Ахий Жаббор ўнбошликка раво кўрилди. Салтанат пешвоси русумга кўра, унга чўмоқ,<sup>1</sup> укпар ва қимматбаҳо тошлилар қадалган ўтога,<sup>2</sup> камар, турнабеллик қилич ва бир от инъом қилиш ҳақида фармон берди. Ахий Жаббор ўзида йўқ хурсанд эди, у умрида биринчи бор шундай мартабага эришиб турибди. Аммо нима иш қилиб қўйдики, уни шу қадар сийлаб юбордилар? Бу сийловни оқламоқ учун ҳам у кўп хиз-

<sup>1</sup> Чўмоқ — темир гурзи.

<sup>2</sup> Ўтога — бош кийимга тақиладиган зийнатли белги.

матни ўринлатмоғи керак. Шубҳасиз, бу аввало Жаҳонгир Мирзонинг ҳиммати, унинг саъи ҳаракати билан воқе бўлди. Ҳа, Жаҳонгир Мирзога ҳар қанча фидойилик кўргизса оз, хизмат қилса кам. Ахий Жаббор ўн аскарга бош бўлиб амирзода қўшини сафидан жой эгаллади, ўзи аслида Жаҳонгир Мирзонинг энг яқин хос ясовули вазифасини адо эта бошлади. Улар доим бирга эдилар.

Жаҳонгир Мирзо саъжиясида чиндан ҳам ўзгариш рўй бермоқдайди. Болалик-ку аллақачон ортда қолиб кетган, энди ўсмирлик йиллари ҳам унга хайр-хуш дейишмоқда. Энди у валиахд сифатида юрт тақдири ни ўйламоғи, салтанат қудратини пойдор этиш ғамини емоғи керак. У Ҳазрат соҳибқирон Амир Темурнинг суюнган тоги, тоғдай тираги, бебаҳо умиди... Укалари ҳали ёш, Мироншоҳ Мирзо бўлса эндигина тўртта кирди холос.

Балҳдан Самарқандга қайтишда Жаҳонгир Мирзо давраси соҳибқирон ўрамидан кейинги ўринни банд қилди. Ҳумоюн уғруқ ортидан фозиллар, амирлар, нўёнлар, баҳодирлар жой олишганди. Энг охирида Балҳдаги қутлув ғалабадан сўнг мамлакат султони Амир Темур қилган армонсиз тухфалару қимматбаҳо буюмлардан ошиб-тошган лашкар келарди. Ҳамиша Амир Темур қўшинида бўлгандек, тўрт фавж чопқунчилар ҳумоюн ўрдунинг тўрт томонида тўрт фарсах масофа да юриб, ўз вазифаси — қўриқчиликни бажәрар эди. Ҳумоюн уғруқ Термизда тўхтаб янги салтанат шаъни га берилган ифторлиқда иштирок этди...

Жаҳонгир Мирзо отини ўз ҳолига қўйган, заррин эгар устида бехол чайқалиб борар, хаёллари ҳам чайқалишда эди. Ўнбоши, мана бу йўл Бухорадан Хоразмга ўтиб кетади, деб шунчаки бир гап сифатида айтди. Аммо бу Жаҳонгир Мирзога қаттиқ таъсир қилди. Амирзода фақат Жайхунга келганида узокдаги ёрини эслади. Унгача салтанат тантанаси билан борлиқ воқеалар уни банд этиб ташлаганди. Кемалардан ясалган кўприкнинг устида, дарёни лим-лим тўлдириб Хоразм томонга оқаёттан баҳорги лойқа сувларга боқди-ю амирзоданинг юраги орзиқди. Унинг кўнглидаги тўйгулар ҳам ана шу кўклам сувларидаш шарқираб ётибди, аммо ўшалардай лойқа... Агар мумкин бўлса, кемалардан бирини шартта олса-ю дарёда Хоразм томонга йўл тутса!

Улур она дарё уни, албатта, муродига ошно қиласи. У моҳпайкар дилдорини кемага солиб, сайру томоша қилдирса, Тўрўғон билан Онабўрилар сингари меҳру муҳаббатнинг гаштин сурсалар...

Хозир ҳам йўл ҳақида эшигди-ю гойибона дилдори хаёлида жамол кўргизди. Маҳбубаси сари қандай йўл топишни билмай лол бўлиб юрарди, мана, Хоразмга элтадиган йўллар ҳам бор экан... Ўнбоши Ахий Жаббор бу йўлдан бориб у диёрни кўриб ҳам келган экан. О, Хоразм! Сирли мамлакат! Қандай жойлар экан-а! Амирзода Хонзода хоним ҳақида энаси Қутлур Туркон оқага ёрилиши мумкин холос. Уни энаси тушунади. Бошқа ҳеч кимга айта олмайди. Аммо... ўнбушига бу гапнинг бир учини чиқарса-чи? Биринчидан, бу йигит унинг сирини худди ўзиники каби асрайди, бирорвга билдирмайди, иккинчидан, энг муҳими, Хоразмга бориб келган, у ерларни яхши билади. Хоразмшоҳ Ҳусайн Сўфига Амир Кайхусравнинг мактубини элтган экан, демак саройга кирган, Хонзода хоним тўғрисида ҳам бирон нима эшигтандир? Қандай бўлмасин, маъшуқа ўлкасидан келган хабар ошиқ дилининг тутунини ёзади, дардига ярайди. Амирзода агар гап учини чиқарса, Ахий Жаббор ҳушёр йигит, дарров англаб олади, қўлидан келган ёрдамини аямайди албатта. Ўйлаб-ўйлаб йўлинни топгандай бўлди... Жаҳонгир Мирзо ўнбошини гапга солиб, ўзини Хоразмга сира ҳам қизиқмаган бир кишидай кўрсатади-да, шаҳар, хон саройи, бозор ва бошқа нарсалар ҳақида ўсмоқчилаб саволлар беради, варойиб нарсалардан ҳикоя қилиб беринг, дейди...

— Амирзодам, не бўлди?.. Ё оёқларида дард қўзғолдиму?.. — сўради Ахий Жаббор. У Хоразм ҳақида гапириш бошқа вақтга қолганини сезиб афсусланди. Бу пайт уғруқ Қаршининг қалъасига яқинлашиб қолганди. Ўнбоши қалъанинг қалин деворини кўриб, унинг бундан ўн йиллар муқаддам Темурбек тарафидан бунёд этилганини эслади, тўғриғи, шундай деб эшигтан эди.

Жаҳонгир Мирзо Ахий Жабборнинг ўзи гап бошлаб қолганидан мамнун бўлди. Орқароқда келаётган ўнбоши етиб олсин, деган маънода йўрга отининг жиловини хиёл тортди.

— Йўқ, асло! Оёғим яхши, жароҳатдан асар йўқ, Оллоҳга шукр! — жавоб қилди амирзода. У қандай қилиб мақсадимга эришсам, яъни Ахий Жабборни Хо-

разм ҳақидаги сұхбатта бурсам, деган үйда зди. — Ҳали чорраҳадаги йўлни айтдингиз... Наҳотки, ўша йўл Занжирсаройга борса?

Ахий Жаббор амирзоданинг йўл тўғрисида сўраганидан ичида суюнди. Шояд, Хоразм ёқлардан ҳам сўз очиб қолса...

— Ҳа, бу йўл Занжирсаройга олиб боради.

Амирзода Ахий Жабборнинг ўзи Хоразм томонлардан гапириб қолар, деб куттан зди, аммо у Занжирсаройдан нари ўтмади, ҳали орада Бухоро турибди, ундан кейин Хоразм...

— Бухорога неча кунлик йўл экан?

— Жадал юрилса, беш-олти кунда етиш мумкин... — Ахий Жаббор кейин кутилмаганда қўшиб қўйди: — Аммо Хоразмга йўл узоқ...

Жаҳонгир Мирзонинг юраги тез-тез ура бошлади. Ўзини бепарво кўрсатиш учун деди:

— Узоқ бўлса... бир ўн кунлик йўл бордир?... Ё кўпмикин?..

Ахий Жаббор қувониб кетди. Демак, амирзода Хоразм ҳақида сўрайтилар. Айни муддао! Фақат жавоб берганда, ҳушёр бўлиш керак, амирзоданинг қизиқиши сусайиб қолмасин. Амирзоданинг ўzlари сўрамасалар сўз очиш одобсизликдир. Сўраганларида эса шундай сўзлаш лозимки, унинг ҳаваси ортиб қайта-қайта саволлар берсин...

— Йўл узоқ, амирзодам... — яна аввалги гапини такрорлади Ахий Жаббор. — Занжирсаройдан Бухорогача йўл даштдан ўтади. Бухородан Амударёга қараб юрмак лозим. Дарё ёқалаб юрилса киши адашмайди. Бийдай чўлда ёлғиз юриш хатарли, дарё эса ҳамроҳ, доим ёнингизда. Омул шаҳридан кемага тушиб бориш энг мақбул йўл. Хеваққача ўн кун... Хевақ ва Котдан сўнг хоразмшоҳ Ҳусайн Сўфи пойтахти Гурганжгача камида бир ҳафта юрилади...

Ахий Жаббор амирзодага зимдан разм солди-ю унинг диққат-эътибор билан эшитаётганини кўрди. «Қизиқ гапни ҳали айтганим йўқ... — хаёлидан кечирди ўнбоши. — Агар хоразмшоҳ саройида бўлганим, саройдаги айрим воқеалар, айниқса, хоразмшоҳ бирордари Оқ Сўфининг дунёда ягона қизи Хонзода хоним ҳақида сўзлаб берсан, амирзодани қизиқтириб қолиши турган гап. Аммо, Хонзода хоним борасида сўз очсинми, йўқми?...»

«Хайрият, — деди ичида амирзода. — Гап Гурганжга етиб келди. Энди гап бошқа ёқقا кетиб қолмасин. Шунинг учун, у савол бериши керак. Аммо ҳушёр туриши лозим, саволлари гаройиб бўлсин, ўнбошини чулғаб ташласин!..»

— Бу Гурганж деганингиз қандай шаҳар экан ўзи?..

Амирзода билан ўнбоши сұхбатга алаҳсишиб, ҳумоюн ургукнинг қалъага кирганини сезмай қолдилар. Соҳибқирон ўрами қалъа ичига ўрнашди. Бошқаларга шаҳарнинг турли даҳаларидан жой ҳозирланган эди. Жаҳонгир Мирзо тўпи шаҳар ташқарисидаги хушманзара бир чорбокқа йўналди. Ҳумоюн ургукнинг Қаршида беш кун бўлиши, сўнг ота юрт Шахрисабзга жўнаши белгиланганди.

— Гурганж жуда кўхна шаҳар, хоразмшоҳларнинг пойтахти экан. Хоразмшоҳ Отсиз, айниқса, Муҳаммад Хоразмшоҳ замонида гуркираб овозаси оламга кетган экан. Аммо Чингизхон мұҳорабасида сув босиб кетибди...

— Сув босиб кетибди?... Қандай қилиб?..

Жаҳонгир Мирзо йўргалай бошлиган отини секинлатди. У асли Хоразм, умуман Туркистон тарихини яхши биларди. Амир Темур хонадонида фарзандларига билим бериш, ҳарбий маҳоратни ошириш борасида ҳамиша қайғуриб келинарди, айниқса, мамлакат ва жаҳон тарихи теран ўрганиларди. Қисик кўзлари доим кулиб турадиган, чиройли юзли қиссанон Мавлоно Убайд қишининг узоқ кечалари соҳибқиронга мозийдан ҳикоялар қилиб берганда, Амир Темур болакай амирзодани ҳам ўлтириб тинглашга ундар, ўзи ҳар турли саволлар ёрдириб ташларди. Ана шу сұхбатларда амирзода хийла саводини оширган, ҳатто бир марта Буюк Турк ҳоқони Истамий ҳақида қайта-қайта саволлар бериб отасини ҳам, қиссанонни ҳам ҳайрон қолдирган... Хоразмшоҳлар Такаш, Маъмун, Муҳаммад Хоразмшоҳ ўғли Султон Жалолиддин тақдирлари ҳам унга маълум. Аммо ҳозир у Ахий Жаббор тапларини Хоразм ҳақида биринчи марта эшитаётган ғофил бир одамдай берилиб тингларди.

— Ҳа! Гурганжни мұҳорабада ола олмагач, Амударёнинг сувини тўсиб шаҳарга буриб юборибди-да...

— Афсус!... — Жаҳонгир Мирзо бош чайқади. — Демак, Гурганж сув босган ҳолда хароба бўлиб ётибди, денг?

Ахий Жаббор ҳозир шаҳарнинг ободу фаровон экани, унда гавжум бозор-расталар, карвонсаройлар, мадрасалар, масжидлар борлиги тўғрисида тўлқинланниб сўзлаб кетди.

— Ҳатто мен бир кун, амирзодам, Қайсария бозорига кириб оғзим очилиб қопти. Одамнинг тумонотлигидан на одинга юра оламен, на ортга!.. Игна ташланса ерга тушмайди... Жума кунлари бозорларда одам сийрак тортиб қоларкан...

— Хоразмшоҳ Ҳусайн Сўфи қандай одам экан? — гапни кесишига мажбур бўлди Жаҳонгир Мирзо, қараса Ахий Жаббор «ўтлаб» кетмоқда. — Шундан сўйлангиз-чи.

— Маъқул, амирзодам... Ҳусайн Сўфи қўнғирот ўмоқидан Танрадойнинг ўрли бўлармиш... — жавоб берди Ахий Жаббор. — Уларнинг Амир Кайхусрав билан қалин оға-иниилиги бор экан, мени яхши меҳмон этдириб сийлади, шундан билдим. Аммо иниси Юсуф Сўфи чўрткесар, ўжар бир одам экан. Жаҳли бурнининг учида туармиш... Хоразмшоҳ саройи жудаям муҳташам экан! Ана саройу мана сарой! Ўймакор устунлар, нақшинкор деворлар, сарбаланд дарвозалар... Тўрабика мақбараси.. Ҳа, кекса-ю ёш бутун Хоразм аҳли бир одам ҳақида гапиришни яхши кўрар экан...

Жаҳонгир Мирзо, чамаси энди мақсадга эришдим, дилбари маҳлиқо Ҳонзода хоним таърифига навбат етди, деб ўйлади ва шоша-пиша сўради:

— Хўш? Хўш?.. Бутун Хоразм аҳли гапиришни яхши кўрадиган одам ким экан?

Ўнбоши мамнун томоқ қириб қўйди-да, деди:

— Шу денг, Чингизхон навкарлари Гурганжга чоп-қун қилганда, ўзларини ғолиб билганда, шайхул-машоийих Нажмиддин Кубро етмиш ёшда эканлар. Сиз бормангиз, дейишларига, ялиниб-ёлворишларига қарамай, ўзларини аямай қўшин олдида салтанат тувини баланд кўтариб қаттол душманга юзма-юз чиқибдилар. Бешаф-қат ғанимнинг биринчи ўқи турни маҳкам ушлаган шайхга тегиб нобуд қилибди!.. Кўлларидан турни олмоқчи бўлсалар, қўллари ҳеч тур дастасидан ажralmas эмиш. Дастани кесиб олибдилар, қарангиз! Ул зотнинг табаррук қабрларини зиёрат этдим... Қабрлари ҳам, шундок, Қайсария карвонсаройига яқин жойда...

Жаҳонгир Мирзо Ахий Жабборнинг бироз лақма-

лигидан ичида ранжиди. Нажмиддин Кубро улур зот, юртни деб жон фибо қылган, түгри, аммо бунинг амирзодага нечоғлик дохиллиги бор? Керак бўлса, амирзоданинг ўзи ул шайхул-машойих ҳақида ўнлаб ҳикоялар айтиб бериши мумкин. «Яна йироклаб кетди... — деди амирзода ўз-ўзига. — Асосий нарсани унутиб ҳали тогда юради, ҳали бовда... Балки Хонзода хоним тўррисида ҳеч нарса эшитмагандир?.. Ёки шартта шу ҳақда сўрасинму эркан?..»

Ахий Жаббор жимиб қолди. «Яна нима десин? Ҳаммасини гапириб бўлди. Энди... Хонзода хоним ҳақида гапирсинми йўқми? Борди-ю гапирса, буни нега айтмоқдасиз, деб сўраб қолсалар... унда нима дейди? Бирорвинг ожизасидан гап очиш гуноҳи азимдир, бас қилингиз, десалар, нима деган одам бўлади?» Ахий Жаббор ўз-ўзига мана шундай саволлар берар эди.

Шундай пайтда Жаҳонгир Мирзо бирдан сўраб қолди:

— Хоразмшоҳнинг фарзандлари, ўғиллари кўпми?..

Ўнбоши ялт этиб амирзодага қаради: ёрқин кўзларда ним табассум ўйнарди. Ана энди bemalol гапирса бўлади. Чунки амирзоданинг ўзлари сўрамоқдалар.

— Бор, бор! — ошиқданча жавоб берди Ахий Жаббор. — Ўғилларини билмаймен... Аммо Ҳусайн Сўфи биродари Оқ Сўфининг дунёда ягона қизи бор экан, у ҳақда кўп эшитдим, амирзодам. Катта-ю кичик ўшал ожиза хусусида оғиз кўпиртиришни яхши кўрар эканлар...

Жаҳонгир Мирзо юзига қон тепди, вужудини қандайдир ҳаяжон чулгади.

— Оғиз кўпиртирас эканлар?.. Англамайроқ турибмен...

Ахий Жаббор энди ёйилиб кетди:

— Ҳа, амирзодам! Оғиз кўпиртириб гапирав эканлар, кўринган одамки бор, ўша ожиза тўррисида орзидан бол томиб гапиради! Ўзиям ўн тўрт кунлик ойдай эмиш. Хоразм мамлакатида унинг баркамол ҳусни ма-лоҳати ҳақида ҳофизлар қўшиқлар айтармиш, шоирлар ғазаллар битармиш... Қайсиadir бир шоир гўё ўшал нозик адо шаънига ушмундоқ ашъор ҳам биттан эмиш. Ёдлаб ҳам олгандим. Мана:

*Анингким, ол энгинга менг яратди,  
Буйи бирлан сочини тенг яратди...*

Тағин ўшал ашъордан «Бўйунг сарву санобардек, белинг қил...», «Юзунгни нурина минг нур етмас...» деган сўзларни айтиб юрганлари қулоғимга чалинди, амирзодам...

Жаҳонгир Мирзо индамай тинглар, агар савол бериб қўйса, узокдаги ёри ҳақидаги гап узилиб қолади, деб қўрқар, айни пайтда ўзини бепарво кўрсатишга тиришарди. Отлар ҳам сухбатнинг нозиклигини англагандай бир меёрда йўрвалаб борарди.

Сўзлари амирзодага маъқул келаётганини кўрган ўнбоши бамисли қанот пайдо қилди:

— Ўшал ожиза дилбанд бағоят донишманд эмишда... Ожиза бўлганлари билан ўзлари шаддод эмишлар! Ҳатто падари бузрукворига, амакиларига кенгашлар берар эмиш. Ҳусайн Сўфи ҳам қизимизнинг қалини салтанатимга тенгдур, дер эмиш! Үҳ-ҳў!.. Қаранг-а!.. Қалини бутун салтанатга тенг! Бошқа бирон мамлакатдан элчилар келса, машварат бўлса, ул ожиза хоразмшоҳга вазира қатори эмиш. Ҳа-ҳа, вазира қатори! Оқилона маслаҳатлар берар эмиш-да...

— Исми нима эркан ўшал ожизанинг?.. — ўсмоқчилади амирзода...

— О... таърифи билан бўлиб исмини айтишни ҳам ёдан чиқарибмен! — деди Ахий Жаббор, бу ҳақда гапириш унга хуш ёқиши кўриниб турарди. — Исми ҳам бағоят гўзал! Унинг исми Севинбика! Аммо Хонзода хоним деб машҳурдир. Ўзбекхоннинг набираси бўлар экан... Энг танг қоладиган жойи шуки... — Ахий Жаббор шу ерга келганда беихтиёр кулиб юборди. — Афу этингиз... Хонзода хонимга жуда кўп совчилар келар экан-да, аммо ақдли қиз ҳеч кимга тегишга рози бўлмас экан. Даشتி Қипчоқнинг нуфузли нўёнлари, Мовароуннаҳр амирлари, Хоразм беклари ва бошқа узоқ-яқиндан ҳукмдорлар Хонзода хонимга оғиз солиб совчилар юборар эканлар...

— Ие! Нега?.. Ҳа... Ҳа... Хўш? Хўш?.. — каловланди амирзода... Шу палла Амир Ҳусайннинг ҳам совчи юборгани эсига тушди. Ахий Жаббор амирзода холатини сезди-ю, бироз таажжубланди, аммо билдирамади, хотиржам сўзини давом этдириди:

— Олтин ўрда хони Урусхондан совчи келибди...

— Урусхондан?.. Ўша қекса подшодан-а?

— Ўшандан. Ҳусайн Сўфининг ҳам, Оқ Сўфининг ҳам кўнгли йўқ экан. Аммо нима деб жавоб қилишни

билмабдилар. Қизи бор уйга одам келади-да, дейишибди күйибди. Шунда Хонзода хоним, унинг ақлига қаранг, «Эй падари бузурквор, эй қодир амаки, ташвишга асло ўзингизни урмангизлар, совчиларга мен ўзим жавоб бергаймен!», деб Ҳусайн Сўфи-ю Оқ Сўфини тинчлантирибди.

— Совчиларга ўзи жавоб берибдими? — ҳайратланди амирзода.

— Ҳа... Ҳамма ана шуни гапиради. Ҳудди эртакдагидек, амирзодам. Эсласам ўзимни кулгидан тия олмаймен. Хонзода хоним совчилар билан кўришиб, Урусхоннинг ёшини, салтанатини сўраб-суриштирибди. Совчилар, Урусхон қалинга Олтин Ўрда мамлакатининг бир йиллик хирожини ғамлаб кўйди, дейишибди. Яна қанча мол-дунё керак эса беради, бу томонидан қўнглингиз тўқ бўлаверсин, деб қўшиб қўйишибди. Хонзода хоним бундай жавоб қилибди: «Урусхон ҳазрати олийлари менга уйланмоқчи бўлсалар, шундай қалин юборсунлар...»

— Ие! Ҳали Хонзода хоним Урусхонга розилик бердиларми?.. — шошилиб Ахий Жаббор сўзларини кесди амирзода отнинг жиловини тортиб, унинг ёрқин кўзларида ташвиш учқунлари чақнади. — Қалин сўраган бўлсалар...

— Йўқ! — деди кулиб Ахий Жаббор. — Қизиги шунда-да! Хонзода хоним, Урусхон менга қалин юборсунлар, дебди... «Менга мамлакатнинг бир йиллик хирожи ҳам, бошқа мол-дунёлар ҳам керакмас, — уқтирибди доно қиз. — Барчасини ўзига олсун. Менинг қалинимга эса ўнта қўзи, йигирмата бўри, ўттизта йўлбарс, қирқта айғир, элликта нўхта, олтмишта ахта, етмишта зарғалдок, саксонта чақалоқ, тўқсонта тўргай, юзта юмалоқ берса кифоя!» «Бор-йўғи сўраган қалингиз шулми?» дейишибди ҳайрон қолган совчилар. Улар, қиз туяларга ортилган той-той ипаклар, сандик-сандингиз зархарид моллар, тилло-ю зар буюмлар, кимхоб либослар буюради, деб кутишган экан. «Сўраган қалиним шу!» — жавоб қилибди Хонзода хоним. Урусхоннинг совчилари қайтиб кетишибди...

Жаҳонгир Мирзо бундоқ жумбоқ қалинни ҳеч эшиитмаган эди, ҳайратга тушди. Қалинни топиш қийин эмаслигини кўриб, наҳотки севганим ўзимга насиб этмаса, дея қалбига титроқ кирди. Урусхондай подшога буларни топиш нима деган нарса?..

— Кейин нима бўлди? Урусхон... қалинни олиб келиб берибдими?..

— Гапнинг энг қизиқ жойига келдик... — жилмайди Ахий Жаббор, атрофга кўз югуртириб. Ҳали улар чорбоққа етмаган эдилар. — Айтишларича, совчилар боришиб Урусхонга қалин шартларини маълум қилганда, хон ўйланиб қолганмиш. Мамлакат фозилларини ҳузурига чорлаб, воқеани тушунтириб: «Эй аҳли фузало, бу қандай қалин бўлди?» — деб сўрабди. До нишманд кишилар қизнинг ақлига қойил қолишибди, аммо қалин таъбирини хонга қандок қилиб тушунтирсак экан, дея бошлари қотибди. Бир фозилу оқил киши бор экан, оқибатни ўз устига олиб, минг узрлар билан хонга қалин таъбирини бундай таърифлаб берибди...

— Жуда ғаройиб...

— Қалиннинг таърифи бундай экан: «Ўнта қўзи — мен ҳозир ўн яшар қўзибайман, йигирмата бўри — хон йигирма яшарлиги вақтида бўридай шиддатли, олғир эди, ўттизга кирганда йўлбарсдай кучга тўлганди, қирқ ёшда айғирдай чопоғон эди, эллиқда нўхталангандай ақли расо бўлди, тўлишди, олтмишда ахталангандай қайтиб қолди, етмишда зарғалдоқдай тилда бору дилда ҳеч нарса бўлмайди, саксонда гўдак боладан фарқи қолмайди, тўқсонда тўрқайдай тили тутилиб қолади, юзда тухумдай чайқалиб ётиб қолади...» Шундан кейин Урусхон совчи ҳам, қалин ҳам юбормаган эмиш. Хоразмда бу воқеани ҳамма билар экан...

Жаҳонгир Мирзога бу таъриф шунчалар нашъя қилдики, қаҳ-қаҳ отиб кулиб юборганини билмай қолди. Амирзоданинг беғубор кулгуси шаҳарнинг иссиқда ҳолсизланиб ётган тупроқ кўчасига безак бўлиб тақилди. Орқароқда келаётган амирлар, мулозимлар ҳам нима гаплигини билмасалар-да, уларга қараб ўзларича кулиб қўйдилар. Жаҳонгир Мирзо Хонзода хонимнинг бетимсол ҳусни жамоли ҳақида эшитган, унинг ишқида ўртаниб кун кечирар эди. Энди Хонзода хонимнинг фаросати, ақли, тиник, идрокли эканини кўриб бир меҳрига ўн меҳр қўшилди. О, Хонзода хоним! Хонзода хоним! Сен қандай малакдурсенки, олисда туриб, ҳали ойдай жамолингни кўришга муяс-сар этмай бағирни ўртайсан, борди-ю, насиб қилиб, ёнингда бўлмоқ толеига эришса, бечора амирзодани меҳринг офтобида бир йўла ёндириб юбора қолар

экансан-да!.. Майли, куйдириб кул қил, аммо бир ҳимматинг билан такрор уни тирилтиргайсен, майли уни йўқ эт, бир табассуминг или яна бор этгайсен!..

Ахий Жаббор Жаҳонгир Мирзо қайфиятида кутилмаганда ўзгариш рўй берганига таажжубланди. Унинг ҳикоясини жиддий тинглаб келаётган эди, нега бирдан қах-қах отиб кулиб юборди? Айниқса, Урушондан бошқа совчи келмаганини эшиганида хурсанд бўлиб кетди. Бу томони Ахий Жабборга қоронғу эди.

— Хонзода хоним ҳеч кимга тегмаймен, дейди денг? — хушчақчақ сўраб қолди Жаҳонгир Мирзо, унинг ёрқин кўзларида завқ-шавқ аломатлари кўриниб туради. — Тегмаймен, дейди... Тегмаймен, дейди... Хо-хо-хо!..

— Ҳа, амирзодам! Ҳеч кимга тегмаймен, дер экан... — жавоб берди Ахий Жаббор. — Ўзимча ўйлайман-да, амирзодам, шундай маҳлиқо меҳри ҳам бирон инсон боласига насиб этарму экан? Шундай моҳпайкарнинг кўзларига тўйиб-тўйиб боққувчи бахти чопган ким экан? Ушмундоқ малаксиймонинг ҳам суйган ёри бормикин?..

Жаҳонгир Мирзо шартта кулгудан тўхтади. Унинг чиройли кўзлари катта-катта очилиб кетган эди. Ахий Жаббор бу кўзларга тикилди-ю уларда лим-лим изтироб кўрди. Балки изтироб эмас, роҳатларга қоришиқ дард, армонларни ичида яширган орзу, умидсизликка тўлиб-тошган умид кўрди. Нимадир демоқчи бўлди, аммо мажоли келмади. Отлар ҳам ўз-ўзидан тўхтаб қолишганди.

— Амирзодам... Сизга нима бўлди?..

— Бағрим ёнаётири... Бағримга ўт туташган... — ўртанди Жаҳонгир Мирзо... — Ўтнинг учи Хоразмда... Хоразмда...

Амирзода жавоб кутмай отини йўрттириб кетди. Ҳанг-манг бўлиб қолган Ахий Жаббор унинг ортидан отини тезлатар экан:

— Амирзодам! — дер эди холос. — Амирзодам!.. Амирзодам...

Шу асно орқадан чопар етиб келди.

— Соҳибқирон Амир Темур ҳазрати олийлари салтанат боғининг гули амирзода Жаҳонгирни ҳумоюн ўрдуга чорлайдилар!..

...Орадан беш кун ўтгач, ҳумоюн угруқ Қаршидан Шаҳрисабзга қараб кўчди. Савдогарлар қиёфасидаги

ўттизтacha одам ҳумоюн уғруқдан ажралиб чиқди ва Қаршининг кираверишидаги чорраҳадан Хоразмга йўл олди. Той-той ипаклар, турфа хил буюмлар ортилган карвоннинг бошида Алуфа тавочи борарди. Жаҳонгир Мирзонинг хос ясовули ўнбоши Ахий Жаббор ҳам ўн йигити билан шу карвонга қўшилиб жўнаб кетди.

## ЎН УЧИНЧИ БОБ

### I

Самарқанддан ўтиб Дизақни ортда қолдириб Тошкентда ҳам тўхтамаган Амир Мусо ўттиз кун деганда уриниб-суриниб Йангкетга етиб келди. Шаҳарда ҳам тургиси келмай яйлов томонларга ошиқди. Нихоят, Йангкентдан тўрт чақирим наридаги хушманзара адир устига чодир тиқди. Ёнма-ён тепаликда, сойликдан нарида Тармочук бошлиқ ўн йигит ҳам ўз олачуқларини ёздилар, чодирларини ўрнатдилар.

Ҳали йўлда эканлигидаёқ соҳибқирон Амир Темурнинг Балҳда қозонтан зафари ҳақидағи хабар қулогига етди. Юрагига бамисли наштар санчилгандай бўлди. Бир душмани — Амир Ҳусайн — ўлибди-ю иккинчиси — Амир Темур — тирик қолибди! Устига устак, Темурбек Мовароуннаҳр султони бўлганмиш! Барча қавмларнинг сардорлари унга қўл бериб, аҳдпаймонни мустаҳкам қилган эмишлар! Бошқалар-ку майли, аммо Зиндачашм опардий қандоқ қилиб бунга рози бўлди экан? Шибирғон ҳокими Зиндачашм опардий Темурбек ҳақида яхшими, ёмонми, бирон гап чиқса, иғнанинг устида ўлтиргандай бўлиб эшитарди. Мумаласи ҳам шундоқ, ўлганинг кунидан тишининг оқини кўрсатади, ичида нима бўлса бўлади, сиртига чиқармайди. Амир Мусо у билан сирдош эди. Темурбек Зиндачашм опардийга Амир Ҳусайннинг хотини Дилшод оқани ҳадя этибди. Албатта, бу билан Зиндачашм опардийни қарздор этиб қўймоқчи бўлган, опардий олдига бир устихон ташлабди-да, устихон... Аммо қанақа устихон денг? Ўҳ-хў!. Дилшод оқа келишган, хушбичим аёл эди, уни Амир Мусонинг иқи сурди. Бир марта бу гўзалнинг мардлигига қойил қолган, тан берган; Туғлук Темурхон замонида, тангу торлик йиллари Темурбек билан Амир Ҳусайн паноҳ истаб Хе-

вақ ҳокими Тўкал ҳузурига йўл олдилар. Амир Мусо ҳам бирга эди. Кутимагандан Тўкал уларни тутиб банди этмоқни ният қилди, яхшиямки амирлар бу макрни ўз вақтида сезиб қолдилар. Оқибат икки ўргада уруш чиқди. Тўкалинг мингта яхши қуролланган лашкарига амирларнинг бор-йўғи олтмиш кишилик аскари рўбарў бўлди. Мурғоб дарёси этагида юз берган бемон савашишдан сўнг Тўкалда элликта, амирларда еттита аскар қолибди! Жанг тугай дегандা, душман ўқи Амир Ҳусайн отига тегиб қулатди. Шунда Дилшод оқа шавҳари Амир Ҳусайнга шартта отини бериб, ўзи пиёда қолди!..

Бас, нима қилмак лозим? Энди биргаллашиб ҳаракат қиладиган, оғзи маҳкам, дили қаттиқ сафдошлар топмак зарур. Темурбекнинг бошига баҳт қуши, давлат қуши қўнганини ёқтирмайдиган кишиларни бир жойга қовуцтирумак даркор... Бундоқ кишилар эса, улус ичида излаганга топилади.

Даставвал унинг кўз олдига Зиндачашм опардий келди. У отаси Мұхаммад хожа опардий вафотидан сўнг Шибирғон ҳокимлигини ўз зиммасига олган эди. Шибирғон кўп йиллардан бери опардий қавми тасарруфида бўлиб, эгилаверишни унча хуш кўрмайдиган шаҳарлар сирасига киради. Зиндачашм опардий ўзи ҳам биргина Шибирғон билан чекланмоқчи эмас аслида... Унинг нияти каттароқ... Амир Мусо буни сезади, аммо билдирамайди. Зиндачашм опардий отаси амалга оширомаган орзуларнинг этагидан туттан... Майли, қарға «қағ» этсун, ўз вақтини чор этсун, ўзини хурсанд қилсун, аммо бу ишга бош қўшиб берсун... Амир Мусога шуниси муҳим...

Амир Хизир Ясовурийнинг ўғли Абу Исҳоқ ҳам Зиндачашм опардийга ўхшаш, фози йўқ хаёллардан бошини оғритиб юради. Қачон қарасанг, туриш-турмушидан нолигани нолиган. Унинг отаси бир вақтлар Тошкент вилояти ҳокими эди. Аммо Абу Исҳоқ Ясовурийда ҳозир ҳемири ҳам йўқ, шомирзаи қоқкуруқнинг ўзгинаси. Отасидан қолган катта мол-мулкни соvuриб бўлди. Унинг амакиси Али Ясовурий барча ясовурийларни олиб күёви Бухоро ҳокими Маҳмудшоҳ, Бухорий ҳузурига кетган. Ясовурийларнинг ҳам Темурбекдан ўзларига яраша гиналари бор... Бор эмас, кўп. Улардан ҳам маслаҳат олмоқ мумкин, бирон нарса ваъда қилинса, албатта, бош қўшишади. Амир Жоку

барлос бир айб топиб Маҳмудшоҳ Бухорийни эл олдида бир қирчанғи от думига боғлатиб чоптирган ва орқа-олдига савалатиб жазолаган эди. Бундай ишни Амир Жоку барлос ўз хоҳишича қиладирму? Албатта, Темурбекнинг ижозати, балки фармони билан адо этган. Жазо беришда Амир Темур қаттиқ тартиб ўрнатган: жазоларни ўзи белгилайди. Агар амирлару сардорлардан бири ўз билгича иш кўрса, ўзи жазоланади. Маҳмудшоҳ Бухорийнинг ҳам орқаси ҳали дарралардан ачишиб тургандир, бундай хорлик осонликча ёддан чиқмаса керак. Улус орасида афсона бўлиб кетган бу воқеа базму зиёфатларда ҳамиша эсланар, Бухоро ҳокимига ҳазил аралаш бир марта албатта исирга қилиб тақиб ўтиларди...

Амир Мусонинг умиқ боғлаган кишиларидан бири Хутталон ҳокими Амир Кайхусрав эди. Агар бу шиддатли, қўрқмас амирнинг дилига йўл топилса, уни мақтаб кўпиртирилса, у мақтов гадоси, мухолифат устуни бўлиши муқаррар. Бироқ, тез одам, орқа-олдини ўйламай, шошилиброқ иш қилади, шу томони бор. Умуман, ундан фойдаланиш мумкин...

Шуларни ўйлар экан, Амир Мусо барини бир жойга йиғиб эмас, балки ҳар бири билан алоҳида-алоҳида машварат қуриш лозимлигини кўнгилга тутди. Ҳар бири билан холи гаплашади, чунки ҳар бирининг ўзига айтиладиган гап бор, айтилмайдиган гап бор...

Амир Мусо чодирининг ичи худди эртага бу ердан кўчиб кетадиган маззангнинг уйига ўхшар, нарсалар боғланган ҳолда ётар, агар ҳозир шитоб кетиш зарур бўлиб қолса, дарҳол йиғиштириниб йўлга чиқа оларди.

Неча йиллардирки, Амир Мусо хонадонида аҳвол шу: бир жойда қўним йўқ, фароғат йўқ, доим бесаранжомлик, қувди-қувди, чоп-чоп, бамисли ит ётиш, мирза туриш... Бу нарса, айниқса, завжаси Орзумулк оқага ёқмасди. Орзумулк оқа йигирма тўққиз ёшлардаги, қорамағиздан келган, сулув, кўзга яқин бир жувон эди. Амир Боязид жалойирни Туглуқ Темурхон хоинлиқда айблаб қатл этдиргач, хотинлари-ю қизлари амирлару нўёнларга тортиқ қилинди. Амир Боязид жалойирнинг севимли қизи Орзумулк оқа Қаршининг нуфузли зодагонларидан Амир Мусога раво кўрилди. Амир Мусо ўн саккиз ёшли Орзумулк оқани кўриб худога шукрлар қилди, ёш дўндиқ нарса унга ёқиб қолди... Орзумулк оқа Амир Мусо ҳарамида катта хоним рутбасига эришди

ва аста-аста амирнинг суюкли ёстиқдошига айланди. Амир Мусо қаерга бормасин, Орзумулк оқани бирга олиб кетади. Унинг устига тўрт йил аввал улар қизалоқли бўлдилар. Гўдаккинага Туман оқа деб от қўйдилар. Ҳозир қумридек чучут отиб, тили чиқиб, шириндан-ширин бўлган вақти... Амир Мусо ҳориб-чарчаганда Туман оқани қўлига олиб ўйнатади, қилиқларидан, шўхликларидан завқ олади, дунёниг барча ташвишларини унугади. Фарзандларининг ичида Амир Мусо иккитасини — энг биринчи хотинидан туғилган ўрли Амир Муҳаммадбек билан мана шу мардаккина Туман оқани бошқача кўради.

Орзумулк оқа шаҳарда ўстган, дашту далани кўрмай вояга етган бир қиз эди. Амир Мусо қўлига келиб кўчманчи турмушга ўргангунча кўп азоб чекди. Дашту ёбонларда юрганларида ҳеч кимга билдирамай неча бор йиғлаб-йиғлаб ҳам олган. Кейин манглайга ёзилгани шу экан-да, деб тақдирга тан берди. От минишни, йўрттиришни ўрганди. Аммо кейинги вақтларда, қачон биз ҳам бундок шаҳарда яшаймиз, биёбонлардан кўрқамен, дея эрига инжиклик қиласиган одат чиқарди. Орзумулк оқа ўзининг ҳар қанча эркаликлари, ноз-фирғоларини Амир Мусо кўтаришини яхши биларди... Ақлли жувон бундан унумли ва ўз вақтида фойдаланар, меёридан оширмас, айниқса, Амир Мусонинг иши тушиб турганда устаси фаранг бўлиб кетарди...

## II

Мағриб уфқи қорая бошлади, яйловга кечки салқин тушди.

Дунёниг тубигача кеттан яйловга тикиларкан, Амир Мусо яна бир марта Тармочуклар чодирига бориб, қоровулликда ҳушёр туринглар, деб тайинлаб келмоқчи бўлди. Чунки кеча ҳар хил тушлар кўрибди, бугун кун бўйи кўнгли тинчимади. Қаёққа юришни билмай бир жойда туриб қолсанг, юрмасанг ҳам тинканг қурийди. Кишини мужмалликдан ортиқ ҳоритадиган нарса йўқ...

Амир Мусо сойлиқдан ўтиб навкарлар чодирига яқинлашди. Юз қадам наридаги навкарлар чодири Амир Мусоларниқидан қарама-қарши томонда эди. Ичкаридан қаттиқ қаҳ-қаҳ овозлари эшитилди. «Мен нима деймену қўбизим нима дейдир, — ўзича навкар-

лардан ўпка қилди амир. — Оламни сув олса буларга нима! Тўпифига чиқармиди!.. Тушундик!..» Навкарлар эса амирларининг чодир ёнида турғанларидан буткул бехабар, ўзларини яйловдагина эмас, балки оламда ёлғиз санашиб йигитлар дунёсининг қизиқ ва бепарда гапларидан сўзлашар, оғизларидан боди кириб, шоди чиқиб, маза қилиб кулишарди. Бари йигирма — йигирма беш ёш атрофидаги гушна йигитлар эмасми.

— Секинроқ гапурайлик, гапимизни бирор эшитиб қолмасун! — деди бир навкар эҳтиёт чорасини қилиб.

— Э, мунча бақирасизлар? Қулоқ ҳам керак...

— Аммо бирор эшитиб қолсаям падарингта суф, дейди-да... — қўшимча қилди учинчи навкар.

Кимdir бунга кулди:

— Ким эшитади? Атроф дала-саҳро! Амиrimiz бўлсалар катта хоним ойим билан... Лекин катта хоним ойимлар ҳам хўп диркиллаб турган нарса эканлар-а...

«Ие! — ҳайратга тушди бутун вужуди қулоққа айланган Амир Мусо жойида беихтиёр тўхтаб. — Биз ҳақимизда гапиришяпти-ку! Қани, нима дейишаркин... Қани...»

— Бас қил! — Бу Тармочук эди. — Амиrimizни тинч қўяйлик. Бошқа гап йўқма? Ўзимизнинг гаплардан қиласверайлик. Ҳа!..

— Мен нима деяпмен? — эътиroz билдири ҳалиги навкар, унинг гапларидан сўзамол ва ҳазилкаш эканлиги сезилиб турарди. — Бир нима деяпманма? Амиrimiz катта хоним ойим билан дам оляптилар, деяпман холос... Катта хоним ойим хўп келишган нарса... амиrimizнинг ҳам ҳеч армони бормикин, демоқчиман... Шу ёмон гапма, айтинглар-чи, ёмон гапма? А?..

«Вой зангар-ей! Гапга тўн бичганини!..» — деб қўйди ғазабдана бошлаган Амир Мусо. У дадил киришга қарор қилди, аммо шу лаҳзадаёқ жойида тўхтаб қолди. «Йигитлар зеришишади-да, у-бу гапи деб қаттиқ тегиш яхшимас, — ўйлади ўзича. — Ахир мустарликда суюнгани шулар-ку...» Амир Мусо авваллари ҳам тасодифан йигитларнинг шундоқ шалоқ гаплари устидан чиқиб қоларди. Улар нималарни гапирмайди, дэйсиз. Эркагу аёл орасидаги ялангоч гаплар, беҳаё қиликлар, бешарм воқеалар ҳақида сўз кетади...

— Ёмон гапма!... Ёмон гапма!.. Бас қил! — кесиб

ташлади Тармочук. — Бошқа гаплардан гапир! Билиб қолса нақ бошингни олади!..

— Хўп, хўп... Бошқасини айтамен... — рози бўлди сўзамол навкар ва сўзни шундай бошлади: — Бир одамнинг йигирма ёшли Бердиқул деган ўғли бор экан. Унинг эси жойида эмас экан. Отаси эсвосни кўп табибларга кўрсатибди, ўқитибди. Бердиқулнинг соғай-ган-соғаймаганини билиш учун отаси ўғлиниг бир тенгкурига бундай дебди: «Қани, жўрангни бир синагин-чи. Отанг сени уйлаб қўйсан, хотин олиб берсан, деяпти. Нима дейсан, дегин. Соғайтан бўлса, тўй қила-миз...»

— Бердиқул, — дебти ўртоги. — Отанг сени уйла-моқчи... майлими?..

— Майли!.. — жавоб қилибди дарров Бердиқул кўзлари ўйнаб.

— Уйлаб қўйса... нима қиласен? Масалан, келин билан чимилдиққа кирдинглар..

— Дарров келинни қучоқлаб оламан! — дебди иш-шайиб Бердиқул...

— Баракалла... Кейин-чи?..

— Жойга ётқизаман-да!..

— Жуда яхши... Кейин-чи?

— Кейин иштонига қўл юбораман...

— Ўҳ-ҳў!... Ёмонсан-ку! Кейин-чи?

— Кейин иштонборини етаман...

— Ана-ана...

— Иштонборини сууриб оламан-да, варрак учира-ман!..

Ҳамма қаҳ-қаҳлаб кулиб юборди.

— Оббо, галварс-ей! — деди Тармочук. — Варрак учирармиш!.. Хо-хо-хол!.. Олдингдаги варракни парпи-ратмайсанма!.. Варраккина турибди-я, варраккина!..

Чодир беғубор кулгудан ёрилиб кетар даражага келди. Амир Мусога ҳам нашъа қилди, аммо овоз чи-қармади. Қараса, ҳали бу сўлақмонларнинг гапи тутамайдиган. У қаттиқ йўталди-да, чақирди:

— Тармочук! Ҳо, Тармочук!

— Лаббай, амирим! — чодирдан ташқарига отилди Тармочук. Ортидан бошқа навкарлар ҳам югуриб чиқ-дилар.

— Йангкент томонга иккита қоровул қўй! Шарпа сезишича, дарҳол билдиришсун! Тушундингму? Faф-латда қолма! Ҳозир борингиз!

— Ҳозир кетаётган эдик... ўзим қоровул турамен!..

Тармочук шу заҳотиёқ сўзамол навкарни олиб Йангкент йўлидаги тўрт юз қадам наридаги манзилга жўнади.

Амир Мусо навкарлар чодиридан қайтаркан, ўзини қандайдир енгил сезди. Йигитларнинг олди-қочди гаплари ҳам яхши бўлди, бироз чалғиди. Кун бўйи кўнглинини банд қилган хижиллик ҳам тарқаб кетганга ўхшади. Унинг ўрнида шиддатли иштиёқ пайдо бўлгадай бўлди. Чодирига келар экан, бутун сўлқиллаган хотини Орзумулк оқа билан гуфтугў қилишни дилга тутди. Икки-уч кундан бери ўзи билан ўзи бўлиб ёндошгани ҳам йўқ...

Амир Мусо бир йўталиб қўйди-да, чодирга кирди. Унинг келганини қўрган Орзумулк оқа ўрнидан туриб кутиб олди.

— Тинчликмикан? — сўради ташвишланган ҳолда Орзумулк оқа. — Ҳаяллаб кетдингиз, амирим...

Липиллаб турган шамнинг ёруғида Орзумулк оқага амирнинг чехраси чиқиб кеттанидан кўра очиқроқдек туюлди.

— Тинчлик, Орзу... Йигитларни қоровулликка ўзим жўнатиб кедим. Бормасам бўлмас экан... Билардим ўзим ҳам. Валақлашиб, оғзига нима келса гапиришиб ўтиришибди. Ваҳа-ваҳа... Ваҳа-ваҳадан бошқа гап йўқ.

Улар тик турган ҳолда гаплашмокда эдилар.

— Узоқ қолиб кетдингиз-да... — Орзумулк оқа бирдан мавзуни ўзгартириди. — Бу дашту биёбонда жонингни ҳовучлаб яшайсан... Ишқилиб, худонинг ўзи асрасин...

— Орзу... Сен қийналиб кетдинг. Қаршидаги ҳовлимиз ҳам бизларни сориниб қолди... — Амир Мусо баҳмал кўрпачага ўлтириди. — Тушундик... Саргардонлигимиз сабабини биласен... Темурбек салтанатни эгаллабдур. Битта душманим кетди, аммо иккинчиси... Уни ҳам гумдан қиласен!

— Яхши дўстлар топишингиз керак, амирим! — деди Орзумулк оқа чиройли кўзларини чақнатиб. — Ҳаммага инонмангиз! Жалойирларга кўпроқ суюнингиз! Ҳарқалай уларга куёвсиз.. Куёвни пайтамбарлар ҳам сийлаганлар... Уларни алдаб-сулдаб, ваъдалар берсангиз, гапга киришади. Ҳаммаси мол-дунёга ўч. Лақмаликлари ҳам бор...

— Рост айтасан, Орзу... Баҳром жалойир билан

сўйлашамен. Унинг ўғли Одилшоҳ ҳам ишончли бола. Улар билан яқинлигимиз бор ўзи... Амир Сорибуро жалойирга одам юборамен. Унинг ҳам Шайх Нуридин деган ўғли пишиққина, чайиргина... Баён сұлдуз-нинг ўғли Шайх Мұхаммадға албатта хабар қиласмен...

У иргиб чиқсан күзларини Орзумулк оқага тикканча жим қолди. Чиройли хотини бор, ёш, дүндикқина... Қадди-қомати келишган... Орзумулк оқа меҳри товланған амирнинг бошқачароқ тикилаётганини сезди. Ичида: «Вой... Бугун менда юмушлари бор шекилли...» деб ўйлади ва аллақандай шириң туйғудан чекрасига қон тепди...

Шу пайт чодирнинг чап томонида етти-саккиз қават кўрпача устида ётган тўрт яшар Туман оқанинг уйқуси қочиб, нимадандир безовта бўла бошлади. Орзумулк оқа ўрнидан турди-да, бориб қизчасининг устига эгилди ва уни юпатишга тутинди. Иттифоқо, хотин Амир Мусога орқа ўтириб қолди ва Туман оқа устига қаттиқ энгашганидан, оппоқ шоҳи кўйлагининг этаги хийла кўтарилиб, қизил ипак лозими шам ёруғида ловуллаб кўринди... Орзумулк оқа буни атай қилдими ёки тасодиф ишими, Амир Мусо билолмади. У хотинининг шундок — оқ шоҳи кўйлагу қизил ипак лозим кийишини жуда ёқтиради. Унинг завқи жўшиб кетди, тамшангандан аста билдирамай бориб, дўндик хотинининг орқасидан қучоқлади. Амирнинг нафаси-юшидатини сезган Орзумулк оқа ўзига ярашган нозистирно билан: «Зўрга ухлатдим қизингизни... Уйроғиб юборасиз...» деди пичирлаб ва бир қўли билан диркиллоқ сийнасида ўйнаб юрган Амир Мусонинг олғир кўлини нари сурди... Орзумулк оқа қараса, амирул замон шу туришдаёқ чавандозликни бошлаб юбормоқчилар...

— Шамни олиб қўяй... — Орзумулк оқа усталик билан эрининг қучоғидан сирғалиб чиқиб, ётишга хозирлана бошлади. Амир Мусо ечинди-да, юшоққина ўринга чўзилди.

Чодир туйнугидан гир-гир баҳор шамоли эсарди.

Орзумулк оқа ёлғиз ички кийимда қолгач, шамни чодир эшигининг ёнига қўйди. Зарурат бўлмаса-да, қадди камолини намойиш этиб Амир Мусо кўзларини ўйнатиб у ёқдан бу ёққа юрди. Яна қизчаси ёнига борди, яна эрига орқа ўтириб энкайди, ёстик, тўғрилан, қизчаси устига кўрпача тортган бўлди... Ёнига кир-

ганды Амир Мусо уни худди илк марта күраёттандай қаттиқ бағрига босди! Орзумулк оқанинг тирсиллаган күкраги эрининг күкрагига майингина ботди... Бундан ортиқ ташна бўлган Амир Мусо ютоққанча Орзумулк оқанинг дудокларидан, томокларидан ўпа бошлади. Хотин энтикар, нозланар, шавҳарининг кўнглини олиш учун ҳамма ҳаракатини қиларди... Амир Мусо шу палла дунёни унугтган эди, амирлар ўртасидаги жанжал-нинзолар, мартаба талашишлар, тахту салтанат курашлари, саргардонликлар, барчаси қаердадир ортда қолиб кетди! Дакан хўroz қўндокқа чиқди, қанотларини ёзиб эндинга завқ-шавқ билан қичқиришга киришган ҳам эдик, ташқаридан ташвишли овоз эшитилди:

— Амирим! Амир ҳазратлари!..

Чақираётган Тармочук эди. «Хе, амиринга ҳам лаънат, ўзингта юз ҳазор! — ичида сўкинаркан, Амир Мусонинг ирриб чиққан қўзларида разаб ўти чақнади. — Нима бало бўла қолди экан? Мунча шошилмаса? Ишнинг қоқ белига тепди-я!

Амир Мусо апил-тапил кийиниб ташқарига чиқди. Ўттиз қадамлар нарида безовталанган Тармочук турарди.

— Амирим! Амир Темур ҳазратларидан бир элчи келибдур! Зудлик билан жаноби амирни кўраманма, дейдир. Фурсатим зиқ, дейдур...

— Кўпми улар? — Амир Мусонинг биринчи сўрагани шу бўлди, агар Темурбек одамлари кўп эрса, ҳозироқ қочиб қолиш ғамини чекмақда эди.

— Беш-олти киши холос, — жавоб қилди Тармочук.

— Тушундик... — Ишнинг оқибати нима билан туғашини тахмин қилар экан, Амир Мусо ҳар эҳтимолини ўйлаб буюрди: — Тармочук! Йигитларни чақир! Аммо икки киши бу ерда қолсун.

Амир Мусо беш-олти йигити кузатувида қоровул манзилгоҳига йўл олди. Уйқуси чала қолган одамдай ланж бўлган Орзумулк оқа тездан турди-ю ўзича гудраниб, йифиштиринишига киришди.

Манзилгоҳда Амир Мусони Темурбекнинг ишонгандай йигитларидан Аббос баҳодир кутиб турарди. Улар бир-бирларини яхши билишарди, турли пайтларда кўп бор дуч келишганлар. Амир Мусога, умуман бу гайратли баҳодир ёқарди. Аббос баҳодир Арслонхон минарасидан сакраганда Амир Мусо айни ўша издаҳом-

да бор эди, бу ғаройиб синовни ўз кўзи билан кўрган ва Аббос баҳодирга ичида тан берган...

— Ҳазрат соҳибқирон Амир Темурнинг муборак фармонларини бошимизга туғ этиб қошингизга келдик, амир жаноблари! — деди Аббос баҳодир саломалиқдан сўнг. — Амир соҳибқирон, саргардонлик ҳам Амир Мусонинг жонига теккантур, бирга олиб келингизлар, деб юбордилар...

— Ҳазрат соҳибқироннинг ўzlари ҳозир қаердалар? — айрим янгиликларни билиш мақсадида сўради Амир Мусо, жавобдан қочиб.

Аббос баҳодир ҳам интиқ бўлиб турган шекилли, кўп гапларни айтиб берди.

— Амир соҳибқирон Самарқандни салтанатларининг пойтахти деб эълон қилдилар. Жуда катта қурилишлар бошлиномоқчи... Амир Довуд дувлат жаноблари девонни бошқариш бирлан Самарқанд дорувалигини ҳам адо этадур...

— Амир Жоку барлос қайси мансабдадурлар эркан? — сўради Амир Мусо. — Амир Сайфиддин некўзчи?

— Ушбу амирларга, яна Алуфа қавчин бирлан Тамуқа қавчинларга лашкар амириги ва тавочиликраво кўрилди...

— Ўҳ-ҳў!..

— Ҳа!.. Амир Сорибуғ жалойир, Ҳусайн барлос, Давлатшоҳ, баҳши уйғурлар девон амирлари бўлдилар. Кўп амирлар баҳодирлар сардори этиб тайинландилар. Барча туманларга сардорлар қўйилмиш...

Аббос баҳодир соҳибқироннинг Балхдаги улкан музаффариятдан сўнг тантана-ю дабдаба билан Шахрисабзга келгани, икки ой бу беҳиштдек жойда хешу акраболар ўрамида роҳату фароғатда кун кечиргани, шундан кейин салтанат ва истиқлол таважжухини муборак маскан Самарқанд сари қаратмоқчи бўлгани ҳақида сўзлади. Аббос баҳодир яйраб гапирар, ҳар бир сўзи рўпарасида турган Амир Мусо қалбини тилиб кетаётганини етти ухлаб хаёлига ҳам келтирмас эди. Шахрисабз борасида сўз кетганда, олампаноҳ Амир Темур Кўрагон ҳазрати олийларининг Қозон Султонхон қизи Сароймулхонимга уйланганлари, етти кеча етти кундуз тўй-томуша давом этгани ҳақида завқ билан ҳикоя қилди, ўша тўй ошига кетадиган ўтинни тайёрлаш ўттиз баҳодир ичида унга топширилгани ва

эллик аравадан зиёд түнкани бир ўзи ёриб ташлага-  
ни ни ҳам гап орасида қистириб ўтди. Сүнг кулиб деди:

— Энди Ҳазрат соҳибқиронга қариндош ҳам бўлиб  
қолдилар, амир жаноблари! Муборак бўлсун!

— Қуллуқ! Қуллуқ! Оллоҳнинг беадад илтифоти...  
Тушундик... — жавоб қилди Амир Мусо. У бўласи  
Сароймулхонимнинг соҳибқирон ҳарами мартабаси-  
га эришгани ҳақида бошқа ҳеч нарса демади.

— Шитоб Самарқандга етиб боришимиз зарур... —  
уқтириди сўз охирида Аббос баҳодир. — Буюрилон  
муддатдан кечика ётирмиз... Ваъдамиз жавзо бошлари  
эди. Жанобларини Йангкентдан топамиз, деб ўйлағон  
эрдик, аммо яйловда айланиб қолдик, фурсат кетди.  
Фурсат учар қушдир, ҳа... Иложи топилса, бутунок,  
ҳозироқ йўлга чиқсак, девдим...

Орага жимлик чўқди. Ҳамма гап от устида бўлмоқ-  
да эди. Аббос баҳодирнинг йигитлари ҳам, Амир Му-  
сонинг йигитлари ҳам бир қўлларида жилов, бир  
қўлларини қиличга тираб сухбатта қулоқ солар эди-  
лар. Фир-фир эсган қир шамоли баданларни жунжик-  
тира бошлади. Амир Мусо нима жавоб қиласам экан,  
деб ўйга ботди.

— Тушундик... Амир соҳибқироннинг бизга кўргиз-  
ган илтифотлари учун баюят миннатдормен, бошимиз  
осмонга етди... Албатта, юртга қайтраймиз, қайтмасак  
қайга боргоймиз?... Сўзларингиз тўри, баҳодир! —  
Аббос баҳодир фикрини тасдиқлади Амир Мусо. —  
Тез йўлга чиқмоқ зарур! Аммо ҳозир қоқ ярим кеча,  
йигитлар ҳам толиқдан... Салдан кейин тонг отади,  
саҳар йўлга чиқурмиз. Сизлар бу ерда ҳордиқ олин-  
гиз, бизлар кўч-кўронни шай қиласайлик. Камбағал  
бўлсанг кўчиб кўр, деганлар, хе-хе-хе... Маъқулми,  
баҳодир жаноблари?

— Маъқул, амир жаноблари! — розилик билдириди  
Аббос баҳодир, чиндан ҳам улар бетиним йўл босиб  
ҳориб-толган эдилар. Пичагина бўлса ҳам оёқларни  
ёзиб нафасни ростлаб олиш истаги устунилик қилди.  
Тонг ёришиши билан йўлга чиқишига келишдилар.

...Аббос баҳодир кўзига кун нури тушганидан уй-  
ғониб кетди. Офтоб тиккага келиб қолган, йигитлар  
ҳам ҳали қаттиқ уйқуда эдилар. «Нас босибди-ку биз-  
ни!..» — ўзидан ўзи вижиниб деди Аббос баҳодир ва  
йигитларни бирма-бир уйғота бошлади. «Нечун амир  
жаноблари бизларни уйғотмадилар эркан? Узоқ йўлга

чиқамиз, яхши ҳордиқ олишсин, дептилар-да...» — деб ўйлади Амир Темур элчиси.

Аббос баҳодир атрофга боқди-ю, ажабо, атрофда биронта ҳам чодир кўринмаганига ҳайрон бўлди... Бийдай сахрода ёлғиз ўзларидан бошқа ҳеч ким кўринмас, зор ҳам учмасди. Фақат тўрт юз қадамлар нарида бир-иккита кичиккина ўчоқ ва ундаги янги куллар бу ерда яқингинада ҳам одамлар истиқомат қилганини билдириб туради. Амир Мусо ерда ҳам, осмонда ҳам йўқ, эди. У тундаёқ кўч-кўронини олиб қаёққадир ғойиб бўлганди...

## ЎН ТЎРТИНЧИ БОБ

### I

— Пўшт! Пўшт! Йўлни холи қўйингиз! Пў-ў-ўшт!..

Кеш дарвозаси ёнида Самарқанд остонасида игна ташланса ерга тушмас тумонот одам тўплантан. Улар ичида Самарқанднинг казо-казолари, нуроний оқсоқоллар, кадхудолар, шунингдек, уч кундан сўнг бўладиган муаззам қурултойда иштирок этмоқ учун Тошкент, Хўжанд, Дизак, Андижон, Ахсикент, Балх ва бошқа туману қасабалардан келган амирлар, бекларни кўриш мумкин. Дарвозанинг олдига йўлга жуда катта оқ пояндоz ташланган. Карнай-сурнайлар одамларни бир-бирлари билан гаплашибга қўймайди. Оқ пояндоz пири муршид Мир Сайид Баракадан чиқсан таклиф эди. Соҳибқирон Амир Темур Кўрагон мамлакат пойтахтига қадам ранжида қилмоқда. Илоё, босган қадами оқ бўлсин, йўли очисин. Жаҳонда жумла мўъминларни баҳтли этмакка бел боғлаган султоннинг ниятлари оқ, иншооллоҳ!..

Энг аввал пири муршид Мир Сайид Бараканинг отдан тушишига кўмаклашдилар. Амир Темур Кўрагон тулпорининг узангисини рикобдорлар қолиб, Амир Довуд дуялат, Амир Жоку барлос, Амир Сайфиддин некўз ва Амир Муайяд арлотлар ушлашга шошилдилар. Соҳибқирон султонларга хос виқор билан оҳиста отдан ерга тушди:

— Бисмиллоҳир раҳмонир раҳим!..

Амир Темур шундай деди-да, карнайларнинг суронлари остида пояндоzга қараб юрди... Соҳибқирон

пояндоздан ўтиши биланоқ, амирлар ва бошқа кишилар қий-чув солишиб, ёпирилишиб пояндозга ўзларини отдиilar. Барча Ҳазрат Соҳибқирон пойи қадамларидан табаррук бўлган матоҳдан бир парча бўлса ҳам олиб қолмоққа ошиқарди.

Амир Темур Самарқанд шаҳрига қадам қўйди...

Унинг болалиги шу қадимий шаҳарда ўтган, дейиш мумкин, кўп марта падари бузруквори Амир Тарагайга эргашиб, Самарқандга келган... Ўсмирлик, йигитлик чорларида эса Самарқандда, Конигилда бўлган кўпкари, кураш ёки бошқа шундай дил очар томошаларни бирон марта ҳам қолдирган эмас, улардаги совруну ҳадялар ҳамиша шаҳрисабзлик амирзодага ҳалводай гап эди. У Самарқандни беш қўлдай биларди. Бирон нарсадан сиқилса, зерикиб қолса шартта Маматни олиб ўша ёққа жўнаб қоларди. Самарқандга борганда дунёнинг кенглигини англагандай бўлар, дили яйради. Ҳали болалигидаёқ жаҳонгирилик ҳавасида бетизгин хаёлларга берилар экан, Самарқандни пойтахт қиласидаги хусусида орзуларга ғарқ бўларди. Бешинчи иқлимдаги гўзал шаҳарлардан бири Самарқанд мамлакатнинг марказида жойлашган. Темурбек Шаҳрисабз мадрасасига қатнаб юрган маҳаллар қайсиdir бир китобда ўқигани эсида. Ҳалифа Маъмун Самарқанд вилояти ҳақида сўраганида, унга шундай жавоб беришган экан: «Самарқанд бамисли ойқўрғоннинг ўзи. Дарёси фалак қасрининг дарёсига монанд, далалари эса осмон ёритқичларидаи фусункордир...» Амир Темур назарида бу жуда ўринли таъриф. Чиндан ҳам, далалари серҳосил, боғлари ажабтовур тароватли, сувлари шарқироқ ва равон бу масканинг файзи мутлақо ўзгача. Куз фаслида шаҳар ҳавоси бироз салқин бўлади. Шарқ тарафдаги тоғдан неча кунда бир қаттиқ ел эсиб туради. Қиши фасли совук, баъзан қор уч қаричгача ёғади. Ёзлари эса мўътадил, баҳори ниҳоятда гўзал. Тупрови бамисли жаннат тупроғи, ғалланинг баридан учрайди. Меваларини айтсангиз! Соҳибқирон, айниқса, Самарқанднинг ношпоти, муруди ва анжирини ёқтиарди. Гуллари эса ажойиб! Амир Темурнинг бир одати бор: у қаерга борса, ўша ерда ўсадиган гуллар уругини олдиради ва олиб келиб эктиришни яхши кўради. Бир куни у дўсти Мамат билан Самарқандда ўсадиган гулларни зринмай санаб чиқишиди. Қизил гул, гули раъно, гули нафармон, шаббўй, савсан, ҳарам, гулхайри,

райхон... Саноқ ўттиздан ошиб кетди! «Бу шаҳарнинг фариштаси бор!» дерди Амир Темур ва Самарқанднинг кўрку салобатидан ич-ичида қувониб қўярди...

Бироқ бу сафар, мамлакат султони сифатида шаҳартга қадам қўйганда Самарқанд нечундир соҳибқиронда авваллардагидек таассурот қолдирмади. Авваллари улкан ва фариштали туолган шаҳар унга ҳозир оддий шаҳарлардан бири бўлиб кўринди. Кўчалари тор, катта шаҳарларга хос салобат сезилмайди. Шаҳарда, одатда, шоҳкўча бўлади. Самарқанднинг шоҳкўчаси йўқ. Чорсу майдони-ю унга келиб уланган катта-кичик кўчалар... Шаҳар кўркига кўрк қўшадиган маҳобатли бинолар йўқ даражада. Жоме масжиди, карвонсарой, Садр Сулеймон мадрасаси, кўхна Арк... Арк мутлоқ таъмирга муҳтож, мадрасани бўлса қайтадан қурмоқ керак. Шаҳарнинг қалъаси бўлмаган. Чингизхон босқинида вайрон қилингандан бери атрофи девор билан ўралмаган, тўрт томондан эстган дайди шамоллар bemalol шаҳарга кириб кетаверади... Бу нарсалар Амир Темур дилини увиштириди, аммо ҳеч кимга ҳеч нарса демади.

Шаҳрисабзда амирларга мансаб улашилганда Амир Темурнинг почкаси Амир Довуд дуғлат ҳам амирлик, ҳам девонни бошқариш лавозимини эгаллаганди. Соҳибқирон унга Самарқанд доруғалигини<sup>1</sup> ҳам топширди, чунки пойтахтда амалга ошириладиган юмушлар кўп, раҳбарликка сергайрат одамлар керак. Бу мансабга Амир Довуд дуғлат муносибdir. Амир Жоку барлос мард инсон, садоқатли, чўрткесарлиги, қўполлиги ҳам майли, аммо Амир Темур назарида, унинг бир нуқси бор: у одам айиради, ўз қабиласига тортади. Агар Амир Жоку барлосга қолса, ҳамма олий мансаблар фақат барлосларга берилиши зарур, шаҳарлар ҳокимлари, амирликлар, туманбошилар бари барлослардан бўлса. Чунки барлослар салтанатни қўлга киритишида жон олиб, жон бериб фидойилик кўргиздилар, шунинг учун улар барча мансабларни эгаллашлари даркор... Соҳибқирон Балҳдан жўнашдан олдин Амир Улжайту опардийни қаблал-билодни бошқаришга қолдирмоқчиди, Амир Улжайту опардийларнинг нуфузли амири, дунё кўрган оқил одам. Аммо у бу фикрни айтиб улгурмай, Амир Жоку барлос сўз очиб қолди ва Балх ҳокимлигига болалик дўсти Жўрон барлос-

<sup>1</sup>Д о р у р а — шаҳар ва вилоят ҳокими.

нинг ўғли Мурод барлосни таклиф этди. Тўғри, Амир Жоку барлос ҳам, Мурод барлос ҳам, Амир Темур ҳам Қорачар нўён авлодлариурлар... Амир Темур индамай рози бўлиб қўяқолди.

Самарқанд соҳибқирон ташрифига ўзгача бир таважжух билан ҳозирлик кўрган эди. Табиатда эрка фасл — ёзнинг ҳукмронлиги бошланган. Қуёш кўк тоқидан ўзига муқим жой қилиб олган. Ҳумоюн уруқ Амир Довуд дувлат етагида Бозоркўча орқали Чорсу майдонига қараб юрди. Воқеа жума куни бўлиб ўтмоқда эди.

Чорсу майдони одамга тирбанд, шаҳар аҳли сайилга чиққан... Майдон четидаги савдо расталаридан ҳаридорлар аrimайди. Ҳар қадамда ширапазу кабобпаз, новвойлар ўз санъатларини намойиш этиб кўнгилларни яйратишади. Ҳар тарафда шодиёна садолари... Карнай-сурнайлар майдондаги ғало-ғовурни босиб қўйишмоқчи бўлгандай овозларига зўр беришар, аммо бунинг уддасидан чиқа олмасликларига кўзлари етиб, тиниб-тиниб қолишарди. Бу ерда раоёнинг<sup>1</sup> барча вакилларини қўриш мумкин: баҳодирлар ва сипойилар, уламо ва оқсоқоллар, косибу ҳунармандлар, хотинхалаж, бола-бакра... Оёқ остида ўралашиб юрган болакайлардан тортиб мадрасанинг толиби илмлари-юсило мударрисларгача, барча-барча байрамдагидек ясаниб олишган. Ҳамма ўз иши билан банд, ҳар ким олам гўзаллигидан ўзича завқ олади... Ана, қўлидан акаси туттан беш ёшлардаги бир болакай, сўлакайини оқиздириб хўрозқанд сўрар экан, ҳайратланиб атрофга боқади. Кабобпазнинг олдига борганда, акасига кабоб жанжали ҳам қилиб қўяди.

— Ие! Қантти устига кабоб ейсанми? Қоннинг оғрийди, эси йўқ! — юпатади акаси. Осмону фалакда ўйин кўрсатаётган дорбозга яқинлашганларида бола хўрозқандни қўлига олганча, сўришни ҳам эсдан чиқариб, анграйиб томоша қила бошлайди...

Амир Довуд дуғлатнинг одамлари ҳумоюн уруқ ўтиши учун Чорсу майдонида эни ўттиз қадамдан кам бўлмаган «йўлка» очиб, муҳофаза этиб туар эдилар. Ҳумоюн уруқ суронларга тўлиб-тошган майдонда тўхтаб ўтирмади, чапга Арк кўчаси томон бурилди. Сайил фақат Чорсу майдонидагина эмас, балки ша-

<sup>1</sup> Раоё - тебе ҳалқ.

ҳарнинг турли депараларида ҳам авжида эди. Жума куни Самарқанднинг Жомеъ масжидларида хутба нағози ўқилди, хушовоз хотибларнинг Оллоҳ таоло, Муҳаммад алайҳиссалом, ундан сўнг Суюргатмишхон ва соҳибқирон Амир Темур Кўрагонлар муборак номларига бағишлиланган қутлуғ ваъзлари янгради, мўъмин-мусулмонлар имонларига имдод бўлиб хизмат этди.

## II

Амир Темур эгачи Кутлуғ Туркон оқанинг кенг ва мўл ҳовлисига келиб тушди, бу Арқдан унча узоқ эмасди. Бодомқовоқ, хушрўй, онасидан кўра кўпроқ отасига торғтан, юмалоқ юзли Кутлуғ Туркон оқа хурсандчиликдан ўзини қўйгани жой топа олмай қолди. У ҳали соҳибқирон Балҳда экан, шавкатли амирни қандай кутиб олиш ғамини ея бошлаганди. Худога шукр, шундай кунларга етди! Амир Довуд дуғлат, ҳумоюн угруқ Шаҳрисабзда тўхтаб тургандаёқ, соҳибқирондан ижозат олиб, бир неча кун аввал Самарқандга жўнаб кетганди.

Нуфузли дуғлат амирининг ўғли Амир Довуд Темурбек эгачиси Кутлуғ Туркон оқага уйлангач, келиннинг пойқадами ёқибми, Самарқанднинг эътиборли кишиларидан бирита айланди. Кенг саҳни ҳовли ҳамиша меҳмонлар билан гавжум. Мана, йигирма йillardirki, Амир Довуд дуғлат ва Кутлуғ Туркон оқа шу ҳовлида умргузаронлик қилишади, тўйлари ҳам шу ерда ўтган. Парвардигор тўрт йил уларни фарзанд йўлига қаратди. Биринчи фарзандлари Сулаймоншоҳ туғилганда катта тўй бўлиб кетди. Ўшанда Амир Тарарай билан Текина хотунлар набираларнинг кетмакет туғилганларидан шошилиб қолдилар. Битта гижинглаган тойни етаклаб, безатилган олтин бешикни олишиб, Самарқандга келишиб улгурмай, орқаларидан Шаҳрисабзда Темурбек хонадонида яраттанинг иояти билан бир ўғил дунёга келганлиги, келини Турмиш оқа юқидан бўшаб олганлиги ҳақида хушхабар етди. Сулаймоншоҳ Жаҳонгир Мирзодан ойига катта эди холос.

Аввали ҳаражу мараж замонларда Темурбек вақтбевақт, кўпинча кечаси, яшриниб бу ҳовлига кириб келар, дунё тор бўлиб қолганда шу ердан паноҳ то-

парди. Самарқанд деганда, Темурбек даставвал меҳрибон этачисининг фариштали ҳовлисини кўз олдига келтирас, бундан кўнгли сув ичар, вужуди яйрарди. Чорпахилдан келган, бақувват, гулдираб, босиқ оҳантда тапирадиган Амир Довуд дуғлат қачон қай вақтда юз беришидан қатъи назар Темурбекнинг ташрифидан, шижаатли амир билан дийдорлашганидан мислсиз қувончларга ботарди. Ўлимдан тап тортмас дуғлат амирининг ўнг юзида билинар-билинмас қилич изи кўриниб турар. Темурбекнинг келажак кунлар ҳақидаги сўзларини эшитганда, қисиқ кўзлари мамнунликдан ўйнаб кетарди. Эгачи ҳам, почча ҳам ҳамиша суюкли иниларига кўмак қўлини чўзишга тайёр турардилар.

Олий мартабали меҳмон қўш табақа дарвозадан ичкари кириши билан, оёғига жонлиқ сўйдилар. Меҳмонни ҳовли ўртасидаги атрофига қалин толлар экилган, зилол сувлари лиммо-лим ҳовуз томон бошладилар. Ушбу ҳовуз бўйида ўлтириш Темурбекка азалдан хуш ёқарди. Ҳар сафар келганида тол тагидаги супада ипак тўшакда паркувга ёнбошлиб, зилол сувга термилганча хаёл суришни яхши кўрарди. Қутлуғ ташриф саратоннинг сариқ кунларидан бирида юз беришини, кун иссиқ бўлишини назарда тутиб, эгачи билан почча, соҳибқирон бироз роҳат қилиб ўлтирсин, дея ҳовуз устига атайлаб чиройли панжарагулчин сўри ясатдилар. Тўртта нақшин устунга ўрнатилган кўшксимон нилийранг том ҳавода муаллақ туриб қолгандек туюларди. Амир Темур кўшк унинг ҳурматига маҳсус бунёд этилганини билиб, эгачиси билан поччасига меҳри боз жўш урди...

Ҳовлиниң ўнг томонидаги очиқ айвон тагидан дилтортар наволар тараларди. Машхур найчи Султон Аҳмад, моҳир қонунчи Хожагин Жаъфарий, удни қийворадиган Султон Муҳаммадлар ўз шериклари билан қамишдан бел боғлаб хизматда эдилар.

Амир Темур даставвал пири муршид Мир Сайид Баракани сўрига таклиф этди:

— Марҳамат кўргузсинлар, пиrim!

Мир Сайид Барака эҳтиромлари учун соҳибқиронга шукроналар келтириб, сўрига биринчи бўлиб чиқишдан ўзини тийди ва қўлларини кўксига қўйиб:

— Биз ризодурмиз! Биз ризодурмиз! Ўзлари бошлаб берсунлар, Амир соҳибқирон! Ўзлари!.. — дея мулозамат билдириди.

Навбатма-навбат Суюргатмишхон, Амир Жоку барлос, Амир Сайфиддин некўз, Амир Муайяд арлот, Давлатшоҳ баҳши уйғур, Амир Сорибуғ жалойир, Муҳаммад Чуроға додҳоҳ ва бошқа амирлару баҳодирлар ҳам сўридан жой олдилар. Аҳди салтанат жамулжам эди. Ёз неъматлари ила безанган дастурхонга бири-биридан мазали таомлар тортилди. Жамбилиу райхонлар ҳиди анқиб турган умоч ошидан сўнг, титрама кабоб, унинг ортидан коваток буғлама келди. Ора-орада хасип, каллапоча, яхна жигарлардан ҳам тановул айлаб қўярдилар.

Мамлакат пойтахти Самарқандга қадам қўйгандан кейин ҳам Амир Темур кайфиятида бирон бир ўзгариш сезилмади. У шаҳар, эл, раият аҳволини кўрибми, ҳар хил ўйлар оғушида қолгандек эди. Мамлакат хони Суюргатмишхон ҳам Амир Темур ҳолати таъсиридами, ўз хаёллари билан банд, лом-мим демай ўлтирибди. Пири муршид эса соҳибқирон кайфиятидаги салқиликни Кеш дарвозаси ёнидаёқ пайқаганди, барини ўзича чарчоқликка йўйди. «Амир соҳибқирон ҳорибтoldилар, — хаёлга берилди Мир Сайийд Барака. — Ахир анов-манов эмас, нақ салтанат юки, залвори унинг азамат елкасига тушиб турибди! Идрокли, фаросатли инсон бундай ҳолларда сўнгсиз ўйларга ботмоғи табиийдир!»

Пири муршиднинг фикрлари ҳақиқатта яқин чиқди. Бироз чарчоқлик бор эди аслида. Катта бир чўққига чиқиб, ортга, ўтилган йўлга завқ билан назар ташлаган сайёҳга ўхшарди соҳибқирон шу паллада!.. Сайёҳ, энг баланд чўққига чиқдим, мақсадимга етдим, дея мағрур бошини кўтариб атроф оламга боқади, боқади-ю забт этган чўққисининг кичиклигини, юксак чўққиларнинг эса олдинда савлат тўкиб турганлигини кўради... Қалбини ярим ғолиблиқ туйғуси билан ярим ўқинч хисси чуллаб олади. У чўққиларга чиқмоқ учун ҳали кўп тер тўқмоқ кераклигини англайди... Пойтахтга келганларидан баҳтиёр амирлару баҳодирлар соҳибқирон хаёлларидан бехабар яйраб ўлтиришар, шодлик майидан маству мустағриқ эдилар. Машшоқлар ҳам тин олишмасди, «Уззол» ва «Алёр»дан кейин уфор ҳаволари янгради. Энди Самарқандда яшаётган машҳури замон бастакор Махсумзода Хоразмийнинг дилхуш савту нақш оҳангларига навбат етди.

Шу пайт зарчўвали палов келтирилди.

— Кўп таомларни тановул этсак-да, таомлар пошшосига ҳамиша жой топилур! — ҳазил аралаш сўзланди пири муршид. — Биз... бошладук! Олсунлар, Амир соҳибқирон!

Амир Темур фағфурий лаганга қўл юборди... Кейин ўзга амирлар ҳам хушбўй ҳиди таралиб турган олтиндай паловни иштаҳа билан тановул қилишга киришдилар.

— Эй, соҳиби шараф амирларим! Бизлар Турон ерининг болалари дурмиз. Фарзандлариға мулк улашфонда Чингизхон юртимизни ўзининг иккинчи ўғли Чигатайхонга раво кўрмиш. Маълумингизким, Чигатай улуси ушбу дамларда парокандадур...

Соҳибқирон кучли, ўқтам овоз билан галирар, шошилмас, овозида кишини ўзига ром этиб олгувчи қандайдир жозиба, сеҳр мужассам эди.

— Оре, рост... — деб қўйди пири муршид Мир Сайид Барака.

Бу пайт ош ейилиб, фағфурий лаганлар йиғишириб олинганди. Офтоб тиккага келган бўлса-да, толлар орасидаги сўрида мўътадил ҳаво ҳукм сурарди. Шавкатли амирлару баҳодирлар ҳамон сукут сақлаб келаётган соҳибқироннинг ногаҳон сўз бошлаб юборганидан ҳушёр тортдилар. Суюргатмишхон Амир Сайфиддин некўзга қаради, у одатдагидек томоқ қириб қўйди-да, рўбарўда тиз чўккан Амир Жоку барлосга кўз ташлади, Амир Жоку барлос — Амир Муайяд арлотта... Амир Темур сўзларди:

— Хоразм қўнғирот ўмогидан Тангадой авлоди Сўфилар қўлидадур, Жета бўлса Қамариiddин ва Анқо Тўра каби қайсар амирларга тобе... Улар улуснинг қўллари етган бўлакларини малолсиз ўз ҳукми қарорлари қабзасига киритиб, жаҳон ягонасимен, деган хаёл этагини тутмишлар... Оллоҳ инояти бирлан кўнглимида улуг мақсадлар, мулку миллат тамойиллари устивордир; бас, қадим юртни тикламоқ, синган косани бутламоқ лозимдур. Оллоҳ таоло биз суйган баңдаларига қулай имкон ато этди, бундай чоғда фурсатни, келиб турган омадни қўлдан бермак — кечирилмас жиноятдур! Оллоҳ берган омад — Турон юртнин тикламоқдур, фурсат ҳозирдур, ушбу лаҳзалардур!..

Салтанат акобирлари соҳибқирон сўзлари мағзини чақищга уриндилар. «Оллоҳ берган омад — Турон юртнин тикламоқдур!» дея пицирларди ичиди Амир До-

вуд дүглат. Амир Сайфиддин некўз бир лаҳза ўзаро бош-бошдокликлар тинган, дориломон Турон мамлакатини кўз олдига келтириди.

— Мақсудни ҳамиша катта қилмак керак... — Пири муршид бирдан ҳали соҳибқирон сўзлаш ҳавосида эканлигини англади-ю жим бўлди. Чиндан ҳам Амир Темур сўзида давом этди:

— Катта давлат машаққатлар эвазидур. Даставвал ўз уйимизни ўнглаб олайлик. Жаҳон элини баҳтиёр қилмакка бел боғлаён султон иморати мустаҳкаму событ бўлмоғи зарур. Давлатимиз турининг марказига айланажак Самарқанд шуҳрати-ю довруғи оламдаги барча макону манзилларга етиб борсун! Пойтахтда олиймақом бинолар, тиллакори саройлар бунёд этилсун!

«Иншооллоҳ!», «Бунёд этилсун!» деган сўзлар янгради. Амир Темур пойтахт Самарқанд, унда қурилажак иморатлар, хусусан, Кўксарой ва Бўстонсарой қасрлари, шаҳарни камар янглиғ ўраб оладиган девор, ўқдек кесиб ўтадиган кўчалар, улар бўйида маржондек тизиладиган икки ошёнали савдо расталари, масжиду мадрасалар ҳақида завқ-шавқ билан гапирди. Айниқса, шаҳар атрофида барпо этилажак ажиб хушманзара боғларни шундай таърифладики, ўлтирганлар ўзларини бу дилрабо боғларда кезиб юргандек, сарин ҳаволардан нағас олгандек ҳис қилдилар.

— Салтанатнинг зафар дарвозаси олислардан савлат тўкиб турсун! — давом этди ҳаяжонда Амир Темур. — Ушбу юмушларимиз баоят хайрли ва эзгутир. Давлату салтанат кўшкини эзгу ва хайрли ишлар пойдевори устига бунёд этилса, унинг қадри-ю қудрати, иншооллоҳ, фалак кунгиралари қадар сарбаланд бўлғай!

— Барҳақ эгам ўз марҳаматидан дариф тутмасун! — қўлидаги садаф тасбихни айлантирап экан, Мир Сайид Барака тилак билдириди. — Зоро шаҳар қурмак, бунёд этмақдан ўзга хайрлироқ юмуш йўқдур. Алҳамду лиллаҳи роббил оламин!

— Рост сўзладилар, пири! Рост сўзладилар! — пири муршидни қўллаб-қувватлади Амир Сайфиддин некўз.

Атрофдан маъқулловчи овозлар эшлиди.

— Бас, фирдавсмонанд Самарқанд овозаси оламшумул Бағдод шаҳрини лол айласун, токи аламли кўз ёшлари Дажла бўлиб оқсун! Миср рашику ҳасаддан

ўзини дарёи Нилга отсун! Қўстантия эса дардини Шўр дарёга айтиб йиғласун!

— Айттанингиз келсун, илоё, соҳибқирон! — гулдиради Амир Довуд дурлат овози. Амир Темурнинг сўзлари ҳаммадан ҳам Самарқанд доруғасини қувонтириб юборди.

— Айттанингиз келсун! Бағдод ҳам, Миср ҳам лол қолсун!

— Оллоҳ, қўлласун! Оллоҳ, қўлласун! — қабилида овозлар эшитилди.

Амир Темур кўзлари билан кимнидир қидира бошлади. Амирлару баҳодирларнинг ҳар бирида, соҳибқирон мени қидирмаётганмикинлар, деган тараддуд англашилди. Пири муршид Мир Сайид Барака ҳам шундай ҳолатта тушди. Олийшон назар ҳаммадан ўтиб, қўйироқда тиз чўккан амирлардан бирида тўхтади.

— Амир Оқбуро!

Хушёр турган Амир Оқбуро найман шитоб ўрнидан қалқди ва қўл қовуштирганча деди:

— Амрингизга муңтазирмен, соҳибқирон ҳазратлари!

Амир Оқбуро найман қирқларга борган баланд бўйли, товоқ юзли кетмонсоқол бир киши эди.

— Монанди йўқ пойтахтимизни обод этиш юмушларига бош қўшингиз! Барча харажатни хазинадан олурсиз. Харажатлар устидан мутасадди эрурсиз, амир жаноблари!

— Баш устига, аълоҳазрат! Олий ҳимматлари учун қуллук!

Амир Темур мамлакатда ўзига иморат қургувчи фуқаролардан биринчи йил ҳечқандай хирож олинмаслигини Амир Довуд дурлатга уқтириди. Сўнг Муҳаммад Чуроға додҳоҳга юзланди:

— Мамат!

— Қулоғим сизда, Амир соҳибқирон! — Муҳаммад Чуроға додҳоҳ жойидан туриб таъзим бажо келтирди.

— Қурутойга барча амирлар қадамлари етдиму?

— Бепоён мамлакатимиздаги мавжуд туманлару қасабалар амирлари, қадҳудолари шай бўлиб интиқ турибдурлар...

Муҳаммад Чуроға додҳоҳнинг жимиб қолганини кўрган Амир Темур унда қандайдир хижолатчилик шарпасини сезди:

— Нечун жимиб қолдинг, Мамат? Амир Мусодан дарак борму?

— Аббос баҳодирнинг кетганига хийла фурсат бўлди... Балки ҳали у Амир Мусо жанобларини топа олмагандир. Худо пошшо, деганлар. Топса, албатта келадур. Фақат...

— Хўш?..

— Фақат Шибирғон ҳокими Зиндачашм опардийдан ҳали дарак бўлмади...

Даврада шов-шув қўтарилиди:

— Зиндачашм опардий келишдан бош тортибдурми?.. — ҳайрон сўради Суюргатмишон, ёнида ўлтирган Амир Муайяд арлотдан.

— Келмаганига яраша, хабар ҳам бермапти-я, қи... — бирдан ўзини тўхтатиб қолди Амир Муайяд арлот. — Қи... зиқ...

— Бу давлати қайтганлигидан нишонадур. Эҳ, афсус... — япасқи бурнини силаб қўйди Амир Жоку барлос.

— Юракнинг катталигини кўрингиз! Нақ отнинг қоптоли-я, отнинг қоптоли! — койинди Давлатшоҳ бахши уйғур.

— Бадбаҳтлик унга юз бурибдур... — сўз қўшди Амир Сайфиддин некўз. Амир Сорибуғ жалойир ҳам қараб турмади:

— Эсидан мосуво бўлганму?...

— Вос-востга қолибdir шўрлик... — деди яна Амир Жоку барлос.

— Унинг ўзбошимчаликлари ўзи бир талай... — ғазаблангани билиниб турарди Амир Муайяд арлотнинг.

— Бурнини ерга яхшилаб ишқаб қўйиш керак! Жазосини олсун! — Амир Оқбуғо найманнинг гапи шубўлди.

Хуллас, кутилмаган воқеага муносабат билдираман одам қолмади. Бирор у, деди, бирор бу. Амир Темурдай шон-шавкат эгаси сўзларини икки қилиш, салтанат қурултойига келмаслик ёки кечикиб қолиш чиндан ҳам оқил одамнинг иши эмас... Амирлару баҳодирлар ана шундан ҳайратда эдилар.

Пири муршид Мир Сайид Барака вазиятни чамалаб ўзида сўзлашга эҳтиёж сезди:

— Пайғамбар жанобларидан саҳобалар сўрдиларки, борди-ю наби ва расул мақомида эрмаса эрдин-

гиз, қандай юмуш илгини тутар эрдингиз, дедилар. «Султонлар хизматини сидқидилдан адо этиб, Оллоҳнинг бандаларига наф етказур эрдим», — деб жавоб беридилар расулиллоҳ!

Амир Темур бир нұқтага тикилганча хаёлга толди. Соҳибқироннинг, ҳамма нарсани билиб туриб ўзини билмаганга олиш салтанатни бошқаришда иложсиз усуллардан эканлигини англаганига кўп бўлди... Зеро билиб билмасликка олиш жувонмардлар одатларидаңдур.

Мана, Зиндачашм опардийга жазо бериш кераклигини айтишмоқда... Жазо бериш осон, Амир Темур фармон қиласди, бориб айбдор бошини оладилар, вассалом... Йўқ, шошилмаслик жоиздир. Ҳатто турфа балоликлар қилиб, қилич кўтариб қўйиб гуноҳкор бўлиб қолганлар ҳам оқибатда тавба-тазарру билан келсалар уларнинг бад қилмишларини унутмоқ зарурдир, ҳурматларини жойига қўймоқ фарз, токи улар ҳам ўз одамларинга айлансунлар!.. Шу палла икки йил аввал Бойсун торида Амир Ҳусайн билан жанг вақтида юз берган ҳодиса соҳибқирон ёдига тушди. Амир Темур томонида қилич тутган ясовурийлар васвасага тушибми, лашкарни танг қолдириб, майдонни ташлаб кетмоқчи бўлдилар. Буни кўрган хос ул-хос навкарлар, ясовурийлар амирларини банди қиласиз, деб туриб олдилар. Айниқса, Амир Жоку барлос, Баҳром жалойир ва Аббос баҳодирлар бу фикрда қоим здилар. Амир Темурнинг раъии бунга йўл бермади. «Эй олийжаноб амирларим! — деганди ўшандада Амир Темур. — Биз толе ва иқболимизнинг эрта тонгида турибмиз. Истиқлолимиз баҳорининг дастлабки паллаларини бошдан кечирмоқдамиз. Буни англаб етайлик! Агар биз ясовурийларни ҳибс айласак, ёвузлик белгиси шаънимизга доғ бўлиб тушадур. Сўнг ўзгалар даргоҳимиздан паноҳ изламаслар, аксинча йўлни йироқдан олгайлар. Юртни сўрамоқ ҳам кўп оғир кечадир. Билингизким, иқбол ниҳоли адолат ва хайру эҳсон булоғидан сувичмас экан, ул баҳтиёрик мевасини тутмас, саодат соясини бермас...»

Амирлар соҳибқирон сўзларининг мағзини чақиб кўриб, ўз фикрларидан қайтдилар. Ясовурийларга дашном беришдан нарига ўтилмади. Бир куни Амир Ҳусайн ҳам юрт амирларидан нолиб, бу ўзбошимчаларни фақат қилич билан бирлаштирмоқ керак, деганида, соҳибқирон: «Қилич бирлаштиrmайди, Ҳусайн-

бек, қилич айиради» қабилидаги сүзлари билан ҳукмдорни ҳам ўйлантириб қўйган эди...

Кўпни кўрган қария Амир Улжайту опардий бошини қуи солиб ўлтирас, шубҳасиз, соҳибқирон ҳазратлари ҳали ҳозир унга оғиз очиб қолишлари мумкинлигини ҳис қилас, бир жиҳати буни кутар эди ҳам. Улар Зиндачашм билан бир қабиладан эдиларда. Қария адашмади:

— Инсон боласи яхши насиҳат ила вояга етгай... — Айни Амир Улжайтуга қараб гапирди Амир Темур. — Яхши сўз илонни иңига киритар эмиш... Бориб бундоғ қариндошингизни инсоф йўлига чорлангиз, уришиб койиб қўйингиз! Бу ерга келсун, имону зътиқод майдонининг шаҳсуворлари сафида бўлсун. Қатордан қолмасун. Ҳаёт ниҳоли қаҳру ғазаб шамолида хору ҳаробликка юз тутмасун...

Барча жим бўлиб қолди.

Амир Улжайту опардий оҳиста ўрнидан қўзғолди, қариянинг чорасизлиги кўриниб турарди, у қўлларини кўксига қўйиб, узр тили билан деди:

— Фаҳму фаросат кишиларига зоҳиру ошкордир, Амир соҳибқирон... Зеҳну идрок эгалари ақл кўзлари ила кўриб турибдурлар... Ўзингиз билурсиз, сиз учун ҳамиша белим боғланғондур. Аммо... ушбу юмушга киришсам, ҳар қанча доно насиҳату ўғитим ҳам наф бермай, икки ўртада хижолатлик пардаси юзимга соя ташлаб қолмогидан қўрқамен... Дон юмшоқ ерда уна дур, афсуски, шу ёшга кириб тошдан униб чиққанини кўриш ҳали насиб этмади...

— У ҳолда қандай кенгаш қилинур? — сўради соҳибқирон кекса амир гапларидағи мантиқда тан берар экан.

— Амир соҳибқирон ижозат айласалар... — дадилланди энди Амир Улжайту опардий. — Бу юмушнинг адоси фарзанди дилбандим Хожа Юсуфга топширилса... Аввалан, улар Зиндачашм билан тенгқурдурлар, сониян, бир-бирларига қаттиқ гапирсалар ҳам ботмайди...

Шу куниёқ Хожа Юсуф билан Тобон баҳодирлар Зиндачашм опардийни инсофга чақириш учун Шибирғонга йўл олдилар.

Амир Темур Хоразмга кетган Алуфа тавочи ва Жетага пинҳона юборилган тинғчидан ҳам хабарлар кутарди.

### III

Самарқанд доруғаси ҳовлисининг ичкариси ташқарисидан қолишмайдиган даражада гавжум бўлиб кетди. Бошига гулгун такана ташлаган, мовийранг илак кўйлак устидан бекасам авра тўн кийиб олган Қутлур Туркон оқа чарчаш нималигини билмас, ҳовлида чарх уриб юрарди. Муштипар эгачининг ушбу воқеадан нечоғлик мамнуну масрур эканлигини муҳтарам ўқувчиликимиз тасаввур этсалар керак... Дунёда якка-ю ёлғиз инисининг баланд мартабага эришганидан, ўзини ўтга-чўққа уриб тинмаган Темурбекнинг юргашига келганидан беадад баҳтиёр эди у.

Қутлур Туркон оқа Амир Темурнинг аҳли аёлинни эҳтиром ила кутиб олишга қаттиқ саъи ҳаракат кўргизди. Этачи, айниқса, инисининг Сароймулхоним билан бир ёстиққа бош қўйганидан кўп қувонди. У авваллари ҳам Сароймулхонимга ики суюб қаради. Қозон Султонхоннинг сухсурдай номдор қизи юриштуриши, тутуми, одоби, ҳусни-мaloҳати билан диккатни ўзига тортарди. Аммо ҳеч қачон уни кун келиб иниси Темурбекка ёстиқдош бўлади, деб хаёлига ҳам келтирмаган эди. Тақдир экан. Қудратли подшоларга гул юзли маликалар керак! Сароймулхоним Темурбекка жуда муносиб малика. Темурбекнинг ўзи ҳам энди Чингизхон авлодига кўрагон бўлди, ҳа, Чингизхон авлодининг куёви! Эҳ-ҳе!.. Хон авлодидан эмассан, деб укасини ҳамиша камситиб келадилар, ҳар сафар шундай гапни эшилтганда, Қутлур Туркон оқанинг бағри увалгандай бўлади. Энди гапириша олмайди ичи қоралар, ғаразгўйлар! Темурбек хон авлодидан бўлмаса ҳам, хон куёви! Куёвни эса пайғамбаримизнинг ўзлари сийлаганлар!..

Эгачининг эсида, Шаҳрисабзда, уларнинг тўйида хурсандчилиқдан кўз ёши ҳам қилиб олди. Ясаниб-безанган, мушку анбарларга кўмилган келинни чимилик хонасига кузата ётиб, пешонасидан ўпаркан: «Илоё, Темурбек билан қўша-қариб, мункиллаб-сункиллаб юрингизлар!» деди, деди-ю кўнгли бўшашиб кетди, аммо кўзларига қалқдан ёшни бирорга кўргизмади... Мана ҳозир, келинлик саодатидан чиройи гул-гул очилиб кетган, тўпифигача оппоқ ипакка бурканган, латофати барқ уриб турган Сароймулхоним билан кўришар экан, хаёлидан: «Ҳа, қизга бергисиз жувон бор,

тойга бергисиз ғунон!..» деган сўзлар кечди. Ёнида шукрчи<sup>1</sup> катта соябонни соя қилиб келарди. Келиннинг қирмизи оқ юzlари офтобданми ё ҳаяжондан яна ҳам ол ранг қасб этган, жон офати бежирим ёқут лаблари қимтинган, чап юзидағи кичкина қора холи эса, нима бўляпти ўзи, дегандай атрофга ҳайрон боқарди. Сароймулхоним дарвозадан киргани ҳамон:

— Ассалому алейкум, ғамгузорим меҳрибоним эгачим! — дея таъзим бажо айлади ва ўзини Кутлуг Туркон оқанинг қучоғига отди.

— Оллоҳга шукр! Оллоҳга шукр! — эгачи ардоқли келинини бағрига босганча, узоқ вақт қўйиб юбормади...

Эгачи-келин ушмундоқ дийдорлашишиб турганларида, машшоқлар эндиғина «Уззол» куйини бошлаган эдилар, Сулаймоншоҳ тенгқурлари Жаҳонгир Мирзо, Умаршайх мирзо ва Жаҳоншоҳ, иби Жокулар билан бирга ҳовлига кириб келдилар.

Ўн беш ёш атрофидаги ўсмир йигитлар, катталар ўз-ўзлари билан бўлиб эътибор қилмаганларидан фойдаланишиб, бироз Арк кўчасида кезиб юришни ихтиёр этдилар.

— Валинеъмат соҳибқиронга жаҳон тахти муборак бўлсун! — Жаҳонгир Мирзо билан Умаршайх Мирзоларни қутлади Сулаймоншоҳ.

— Муборак бўлсун! — қўшилди Жаҳоншоҳ, иби Жоку.

Жаҳонгир Мирзо «Қуллуқ!» дегандай таъзим қилди. Йигитларнинг катталарникига ўхшамаган ўз завқшавқлари, ташвиши-ю муаммолари, йигилиб қолган турфа сирли гаплари бор эди, бир-бирлари билан тезроқ ўртоқлашмоқ истардилар. Ҳали уй кўрмаган салт йигитларнинг учрашганда илк гаплари, кўпинча муҳаббатдан, ёрдан бўлади. Кейин бошқасига навбат. Жаҳонгир Мирзо Сулаймоншоҳ билан Жаҳоншоҳларга кўнглидаги туйғуларидан, Хоразм ёқлардан сўз очмоққа, айни пайтда дўстларининг фикрларини билмоққа шошиларди. Аммо ёнгинада укаси Умаршайх Мирзо борлигидан истиҳола этиб, сир айтишни бошқа вақтга қолдирди. Дўриллоқ овозли, елқадор Сулаймоншоҳ билан бурни суйридан келган, ияги учли, шартаки Жаҳоншоҳлар буни сезишиб, бир-бирларига маъноли

<sup>1</sup> Шукрчи — соябон кўтариб юрувчи хос хизматкор.

қараб қўйиши. Авваллари ҳам кўп бор оғаларининг сирли гапларидан бенасиб қолган табиатан бироз қўрс Умаршайх Мирзо, яrim ёш бўлса ҳам, ёш-ёш экан-да, дегандай ичидагижиниб қўйди.

Суюкли амирзода кўринавермаганидан кўнглининг бир чети хижил бўлиб турган Кутлуғ Туркон оқа дарвоза томонга назар ташлади-ю суюниб кетди. Темурбек салтанатининг келажаги бўлган амирзодалар келишмоқдайди. Жаҳонгир Мирзо! Фарзанди аржуманда, салтанат тожининг дури, подшоҳлик айвонининг устуни, иқбол бўстонининг гули! Тоза кўнгил Темурбек ва моҳичехра Турмиш оқа — икки гаройиб покиза тийнатнинг ошкору тансиқ меваси! Кутлуғ Туркон оқа Жаҳонгир Мирзонинг тиник юзларига, ёрқин кўзларига тикиларкан, бу кўзлар тубида қандайдир исмсиз бир мунг кўради, сабабини эса тушунолмасди. Балки волидаи муҳтарамаси Турмиш оқанинг вафот этганидандир? Турмиш оқа — Жаҳонгир Мирзо билан Оқа Беги хонимларнинг онаси — дунёдан эрта кетди. Онасилик изтироби амирзодани тинч қўймаёттганмикин?.. Амирзода Кутлуғ Туркон оқага қаттиқ, боғланиб қолган, сирларини айтар даражада яқин эди, тез-тез дилини ёриб туради. Ўз навбатида соҳибқирон эгачиси ҳам амирзодани ўз фарзандидай, балки ундан ҳам ортиқроқ авайлаб ардоқлар, сўраб-сурештиришдан чарчамасди. Балх муҳорабасида оёғига ўқ текканини эшишиб, то аниқ хабар олгунча юраги така-пуга бўлди. Шаҳрисабзда, Темурбек билан Сароймулхоним тўйига боргандаги соглом ва дуркун амирзодани кўриб Оллоҳга шукрлар қилди. Ушанда қизиқ бўлди. Югуриб келган Жаҳонгир Мирзо энаси билан саломлашиб ачомлашгач, негадир одатдагидек нари кетмади, эркалик қилибми сўйкалиб тураверди, нур тўла жавдираған кўзларига қараганда, зарур гапи борга ўхшарди. Энаси ҳушёр торти.

— Амирзодам, сиҳҳатингиз тузукми?.. — сўради у.

Жаҳонгир Мирзо жилмайди.

— Оллоҳга шукур! Тузук-да!.. Сиҳҳатим тузук... эна...

У худди онасига суйканган қулундай ёндошли-да, энасининг қулоғига яқин келиб, ҳаяжон ичидаги нималарнидир шивирлай бошлади. Шивирлаш хийлагина чўзилди. Кутлуғ Туркон оқа эшитар экан, аввалига тушунмай ҳайрон бўлиб турди, кейин чирой-

ли юмалоқ юзларига табассум ёйилди-ю оғзининг таноби қочди:

— Вой!.. Вой ўзим гиргиттон! Ўзим гиргиттон! Бўйингиздан айланайин-а, бўйингиздан!.. Хоразмда-я, Хоразмда... Хонзода хоним... Эсимда, эсимда...

Юзлари қизариб кетган Жаҳонгир Мирзонинг ёрқин кўзларида бироз хижолат шарпаси сезиларди, бора-бора ўрнини табассум згаллади.

Кутлуг Туркон оқа тушунди: Жаҳонгир Мирзо бу «юмуш»ни нуфузи кучли, сўзи тош босадиган энасинг зиммасига юкламоқчи... Бу ҳақда падари бузрукворимга айтингиз, демоқчи... Шу томонларини ўйлаб кўйингиз, дея яна эслатмоқчи... Ўйлайди, энаси ўйлайди. Нафсила мирини айтганда, энаси уринишни бошлаб юбордиям. Соҳибқирон билан кенгашиб ҳам кўрди. Амир Темур эшигиб эътиroz билдирамади, фақат мийифида кулиб қўйди. Соҳибқироннинг фарзандлар тақдири, уларни ўйли-жойли қилишда жуда инжиқ эканлигини Кутлуг Туркон оқа яхши биларди. Қон тоза бўлиши лозим, дер эди Амир Темур очиқчасига.

Шуларни хаёлдан ўтказар экан, Кутлуг Туркон оқа тили марҳабога безанди:

— Келингизлар, келингизлар!..

Дуркун амирзодаларнинг расида бўйларига қараб қувонган Кутлуг Туркон оқа Жаҳонгир Мирзодан бошлаб барчаси билан кўришиб чиқди, ҳар бирининг пешонасидан ўпид, елкасига уриб-уриб қўйди.

— Сулаймоншоҳ! — ўғлига буюрди Кутлуг Туркон оқа. — Сизларга ана бу чекка хушманзара айвонда жой ҳозирланган. Борингизлар! Чак-чаклашиб ўлти-рингизлар!

Кенг ҳовлида «Уззол» оҳанглари янграрди.

Амир Темурнинг иккинчи хотини кўзлари қийик Улус оқа, Амир Баён сулдузнинг қизи, орқароқда соябон остида хиёл этилганча одоб билан Кутлуг Туркон оқанинг холи бўлишини кутарди. Сариқ ипак матодан кўйлак кийган йигирма беш ёшлардаги Улус оқанинг бўйи Сароймулхонимга қараганда пастроқ эди. Беш қадамча нарида соҳибқироннинг башанг кийинишган ҳурилиқо канизаклари кўринди. Умаршайх Мирзонинг онаси Тўлун оқа, Мироншоҳ Мирзонинг онаси Менгли бика ва Торай Туркон оқалар ним табассум ила муҳтарама эгачининг катта хоним билан кўришишаётганини кузатиб турардилар.

— Марҳабо, хонадонимизга хуш келибсизлар! — уйга таклиф этди эгачи қувончи чексиз, меҳмонлар билан кўришиб бўлгач.

Барча остонасига оқ, пояндоз тўшалган уйга қараб юди. Олдинда Сароймулхоним, орқароқда Улус оқа ва канизаклар оҳиста қадам ташлаб, келишарди.

— Бисмиллоҳир раҳмонир раҳим! — Сароймулхоним оппоқ ипак кўйлаги барини хиёл тортиб назоқат билан пояндозга қадам кўйди...

Хонадон соҳибаси муҳтарама меҳмонларни ичкарига чорлади. Деворларига лов-лов ёниб турган гиламлар осилган хона кенг ва чиройли. Бежирим токчаларда зарҳал идишлар, фагфурий коса ва пиёлалар, ироқий кўзалар териб қўйилган, у меҳмонхонадан кўра кўпроқ янги тушган келинчак хонасига ўхшарди. Маликалар шоҳона безатилган дастурхон атрофига тиз чўкишди. Дуюи фотиха тортилди.

— Барчангизга подшолик қутлуғ бўлсун, ардоқли келинларим! — деди Кутлуғ Туркон оқа қўлларини кўксига қўйиб.

Келинлар ва канизаклар ўринларидан турдиларда, тавозе билан эгачига бош эгдилар:

— Ўзингизга ҳам қутлуғ бўлжай, эй бонуйи кубро<sup>1</sup> ҳазрати олиялари!

— Илоё кам бўлмангизлар! Ўлтиргингизлар!

Дастурхондаги ноз-неъматлар нигоҳларни ўзига сирли имларди. Нон синдирилди. Бир неча «Олинг! Олинг!»лардан кейин Сароймулхоним қимтинибгина дастурхонга қўл чўзди ва хиноли икки нозик бармоғи билан қатлама нондан жиндай ушатиб, оҳиста оғзига солди. Ўртадаги катта баркашда мева-чевалар — олма-ю мурут, ўригу гилос, узуму шафтоли — баридан бор эди. Моҳича деган хамири майда-майда кесилган суюқ овқатдан келтирдилар. Барча роҳат қилиб тановул айлади. Шўртаккина бу мазали таом Улус оқага айниқса жуда ёқди, яна ичкиси бор эди-ю, сўрашга ийманиб ўзини тийди.

Маликалар ўзларини ҳур ва малолсиз хис этсунлар, деган маънода соҳибаи хонадон Кутлуғ Туркон оқа шундай сўз деди:

— Ҳар банданинг манглайнини Оллоҳ ёруғ қилсун! Бандасини ўзи сийласун! Темурбекдек бор саъи ҳара-

<sup>1</sup> Бонуйи кубро — энг улур аёл.

катини шариату миллатнинг равнақ топишига қаратган, дину давлатни ўйлаган инсон оламда камдир. Ана шундай бир инсонга сирдош бўлмак, унинг шабистонига маҳрамлик вазифасини адо қилмак сиз париухсорларга буюрибдур... Бу Оллоҳнинг буюк илтифоти... — Эгачи бироз жим қолди. — Наргизга боқингиз: нарғиз гули бедорлиги учун ҳам олтин тож сингари тилларанг кўринадур. Кўзга яқиндур! Ҳушёру бедор турингиз, соҳибқиронингиздан ҳамиша огоҳ бўлингиз!

— Куллук, ғамгузор эгачи! — миннатдорчилик билдириди Сароймулхоним. — Соҳибқирон ҳазратларининг сарварлик савдоси тушган азиз бошлари, илоё, тошдан бўлсун!

— Оллоҳнинг лутфи муҳофазаси, бемисол карами соясида басаломат юрсунлар, илоё! — қўшилди қийик кўзлари чақнаб Улус оқа.

Канизаклар ҳам хусравона шахту шижоатлар соҳиби ҳақига дуо қиласар эдилар.

Хонага жимлик чўкди. Ҳамма одоб сақлаб, ерга тикилган, кимса сўз демасди. Ҳовлида айвон тагидан таралаётган дилтортар наволар энди баралла эшитилар, кишида ёқимли туйғулар уйғотарди. Шу пайт машшоқлар «Дилхирож» куйини чала бошладилар. Маҳди улё сайида Сароймулхоним секин бошини кўтариб, нимтабассум билан Улус оқага бокди ва ерга қараб ҳарир кўйлагининг этагини ўйнаб ўлтирган Тогай Туркон оқага ишора айлади. Улус оқа ширин жилмайди ва маъқул, дегандай оҳиста бош тебратди. Қопқора шаҳло кўзлари ёниб турадиган ўн тўққиз ёшли Тогай Туркон оқа «Дилхирож»га жуда яхши рақс тушарди. Канизак хиром айлаганда ҳар сафар маликалар тўпланиб томоша қилишар, завқларга ботишар, мунглиф кўнгилларини яйратишар эди. Канизакни қайта-қайта ўйинга тортишарди-да, рақс тутагач: «Ўйинни хўп қийворасиз, қаерда ўргангансиз?..» деб сўрашар, ҳатто «Ҳазрат соҳибқиронни ҳам ўйинингиз билан ром этиб олганмисиз? Валинеъмат ҳазратларига шундай ўйин тушиб... берасизми?..» қабилида тегажоғлик қилишдан ҳам тап тортишмасди.

Аммо ҳозир ҳеч ким ҳеч нарса демади... «Дилхирож» эса бутун ҳовли-ю хонани ёқимли садоларга тўлдириб, дилларни қитиқлаганча жаранглашда давом этарди...

## Ў Н Б Е Ш И Н Ч И Б О Б

### I

Аббос баҳодирни «тонгсақар йўлга чиқурмиз» деб тинчлантириб, ўзи ўша тундаёқ кўч-кўронини йигишириб жўнаб кетган Амир Мусо жавзонинг охирларида чўлу биёбонларни оралаб Амударёдан ўтиб, Шибирғонга етиб келди. Нафсиlamрини айтганда, Туронзамин қанчалар улкан юрт бўлмасин, ҳозир Амир Мусонинг Шибирғондан бошқа борадиган ери, Зиндачашмдан ўзга сирини айтадиган одами ҳам йўқ эди ҳисоб. Йангкентда ҳам уни тинч қўймай топиб келдилар-ку ахир.

Балхнинг ғарб томонида жойлашган, тўртинчи иқлимининг иссиқ музофотларидан бўлган Шибирғон ям-яшил боғлар ичра ғарқ эди. Банди Туркистон тизмаларидан оқиб келадиган Жузжон дарёси шаҳарга яқин келганда, гўёки Шибирғонни ўз оғушига олмоқчи бўлганда икки ирмоқ ҳосил қилиб, икки ёнидан оқиб ўтарди. Шаҳарнинг кўркам қалъаси жуда мустаҳкам эди, Амир Мусо ҳар сафар келганда шунга диққат қиласди. Қалъа деворининг баландлиги унинг назарида йигирма газга бориб қолади. Ҳарқалай, Қарши қалъасидан паст эмас... Бир куни Тармочукقا қалъа атрофини қадамлаб чиқчи, деб буюрди. Тармочук шу заҳоти ишга киришди ва айланиб саккиз минг қадам санади. Тевараги сув тўла хандақ билан ўралган қалъа ўртасида маҳобатли Арк ва ҳоким саройи жойлашган, масжиду хонақоҳлар ҳам анчагина бор. Муҳаммад Ҳожа опардийнинг, кейин эса Зиндачашмнинг ҳокимлик маснадида хотиржам, эмину эркин ўлтиришларига ҳам сабаб, мана шу устивор қалъай кўрғон эди, албатта.

Амир Мусонинг Шибирғонга келиб билган биринчи янгилиги Амир Темурнинг Зиндачашм опардийни Самарқандга қурултойга чақириб элчи юборганлиги бўлди. Бу бир ой олдин юз берибди. Элчи катта ҳурмату эъзоз билан кутиб олинибди, арқда зиёфат уюштирилибди.

— Фурсатимиз зикдур, — таъкидлабди элчи ўшанда зиёфат устида. — Ҳазрат соҳибқирон аввало Шибирғон ҳокими Зиндачашм опардийнинг сихдатлари тузукми, деб сўрадилар. Сўнгра жанобларини муazzзам қурултойга келсунлар, деб тайинладилар...

— Ҳазрат соҳибқироннинг фармонлари биз учун отилган ўқдек!.. — жавоб қилибди Зиндачашм опардий. — Рост сўрабдурлар, сиҳдатимда узилиш бордур, бодим кўзиб, белимни ҳеч ола олмадим... Кел, дебдилар, борурмиз бешак-шубҳа... Битта жонимиз омода... Изингиздан кафанимни олиб, бўйнимга шамширимни илиб етиб борурмен!.. Курултойда иштирок этурмен!..

Шибирғон ҳокими эски биродари Амир Мусонинг ногаҳоний ташрифидан қувониб кетди. Ўзи Амир Мусо қаерда экан, дея унинг мулоқотига интиқ бўлиб турганди, ҳатто қидириб киши юбормоқчи эди ҳам. Охирги марта қўришганларига ҳам бир йилча бўлиб қолди.

— Уша элчини таний олдингизму, полвон? Ким эркан? — сўради Амир Мусо. У Зиндачашмни кичклигидан яхши биларди. Авваллари дўсти Муҳаммад Ҳожа опардий оддига келаркан, бўйи паст, тўлачадан келган болакайни кўриб, «Полвон!», «Полвон!» деб эркалар, бунинг билан дўстига хайриҳоҳлигини таъкидлагандай бўларди. Зиндачашм ҳам, Амир Мусо ҳам бунга ўрганиб қолганлар, аммо энди паканабўй Шибирғон ҳокимини «Полвон» деб атаганларини кўрганлар ҳар гал истеҳзо аралаш мийикда кулиб қўяр эдилар.

Тез-тез галиришга одатланган Зиндачашм опардий айёрлиқда тулкини ҳам ортда қолдирадиганлар хилидан эди. Чайир, кўзлари йўқ даражада қисик, шунинг учун кўзидан бирон нарсани уқиб олиш ҳам қийин... Ўзи ҳам баъзан нимага ишониб, Амир Темурдай қудратли соҳиб уз-замон билан қадр талашишга киришаёттанини тушунмас, аммо бу ҳавосат унга хуш ёқарди. Амир Темурнинг нақ ўзи билан бўйлашмоқда ахир! Қулоқсизликнинг оқибати яхши бўлмаслигини кўнглиниг қаериладир сезар, тутумини ўзгартиришга эса курби келмасди.

Ростдан ҳам нима учун Зиндачашм опардий, валламати замона, нақ, етмиш бешта қишлоғу қасабага эга Шибирғон вилояти ҳокими ўзи ўзига бек бўлмай, кимгадир бўйсунмори керак? Аксинча, ўзгалар унга бўйсунсунлар, бош эгиб юкуниб келсунлар! Ростдан ҳам нима учун у кимнингдир тааддиси захмини тортиши даркор, кимнингдир иддаосини қуловига сирға қилиб тақиб олиши лозим? Йўқ, у бу вазифани ўзгларга қўяди! Ўзи эса аста-аста Балхни, Дарагезу Дерзаб, Жузжону Андхойни бирин-бирин ўз тасаррӯфига олмоқни ният қилган. Олади ҳам! Иншоolloҳ!..

— Йўқ, таний олмадим, тағойи. Ёши қирқларда бир киши. Мұғулми...

— Чакки қўйиб юборибсиз! Зинданга солиб чуритиш лозим эди! Тушундик... Бош эгиш керак эмас... Қўрқиш керак эмас... — деди ҳар бир сўзини салмоқлаб Амир Мусо.

Қаршилик амирнинг Зиндачашиб опардий отаси билан аввалдан борди-келдилари бор, яхши дўсту биродарлик рутбасини сақлар эдилар. У Зиндачашибни уйлашда Мухаммад Ҳожа опардийга жўяли кенгаш берган ва эътиборли амирлардан Хутталон ҳокими Амир Кайхусрав иниси Кайқубод ожизаси сулув Хушқад оқага совчи бўлиб борган эди. Оқибатда юртнинг икки нуфузли хонадони хеш-ақраболик ришталари ила боғланиб қолди. Даставвал Кайқубоднинг опардийлар амири билан қуда бўлиш ҳоҳиши йўқ эди, аммо Амир Мусодай саромади замона ўртага тушганидан, бу таклифни рад эта олмади.

— Гапингиз ғалатироқ бўлдими, тағойи?..

Зиндачашиб опардийнинг қисиқ кўзлари қисилгандан қисилиб, нарқув ёстиққа ёнбошлаб олган Амир Мусога қаттиқ тикилди. Суҳбат ҳоким меҳмонхонасида кечмоқда эди.

— Қўрқиш керак эмас, дедингиз... Айтинг-чи... Агар Амир Темур ҳузурига бораётган амирларни меҳмон қилиб, алдаб, ярим йўлда қўйдек бўяизлатиб, у дунёга жўнаттирган бўлсан... Улар соҳибқирон одамлари бўлсалар... Хўш, бу қўрқишига кирадирму? А?..

Амир Мусо индамади.

— Балхда ҳам Абулмансур соҳибқирон, дея улуглашиб Амир Темурни оқ, кигизга солдилар... Ҳамма калапатра бўлиб кигиз четини ушлашга отилди. Ит ҳам, бит ҳам... Мен атайлаб кигизга талпинмадим... Мен...

— Қўйсангиз-чи! Йўғ-е?.. — деб юборди бирдан Амир Мусо, ҳайратда, иргиб чиққан кўзлари яна ҳам каттароқ очилиб. — «Кигиз солди»да шундай қилдингизму?.. О, полвон! Тушундик!..

— ... Мен Темурбекни бундоғ мартабага нолойик, деб ҳисоблаймен! Сиз аввалдан буни билурсиз... Хўш... бу қўрқишига кирадирму? Шуни бош эгиш деб аташ лозимму?.. А? Лозимму?..

Амир Мусо Зиндачашиб опардийнинг офтобда қовжира бетган яккам-дуккам майсалардай игна-игна

малларанг соқолига тикилиб қолди. У синамоққа гапирғанди, Зиндашм опардий чинакамига бобиллаб берди. Бас, у Амир Мусо ўйлагандан ҳам кучлироқ душман экан! «Маъқул... — деди ичида. — Лекин бу ҳали кам. Уни бот-бот Амир Темурга гиж-тижлаш керак, токи соҳибқирон ҳақида бирон сўзни эшитиши биланоқ, жунуни қўзиб, ўзини қўйгани жой топмасун!»

— Пойтахти фирдавсмонанд Самарқандга қурултойга чақирибидалар... — мазах аралаш сўзда давом этди Зиндашм опардий. — Қадам босмадим! Тушиб қолрони йўқ! Яқинда Амир Темур атайлаб икки элчи жўнатибдур...

— Яна-я? Жуда сизга кўз тикиб қолибди-ку, полвон? Кимлар экан?

— Хожа Юсуф билан Тобон баҳодирлар...

— Ие! Қариндошларингиз-ку? Йўлга солсунлар, деганда...

— Ҳа-а-а... — аламли тиржайди Шибирғон ҳокими. — Зиндашм опардий оёғини қўлга олиб чопиб келадур, деб ўйлаганлар соҳибқирон ҳазратлари... Элчиларни худди бозорда хўржинларини йўқоттан шўрлик бозорчилардай қайтариб юборишим мумкин эди-ю... Ҳа-ҳа-ҳа! Иккисини ҳам зиндонга тиқтириб қўйдим. Бургага таланиб ётишибди. Буни бари сизнингча, бош эгишта кирадирму? А, айтинг-чи, қўрқишига кирадирму? А?.. Тора?..

Амир Мусонинг энди таслим бўлмай иложи йўқ, эди:

— Э, тутумингизга қойил! Гапнинг ўғил боласини айтдингиз! — Амир Мусо ёстиқдан тирсак узар экан давом этди: — Сизни Амир Темурга бош эгадур, қўрқадур, деб ноҳақ гапирибмен! Ростакамига полвон эканлигингизни кўрсатиб қўйибсиз! Тушундик... Ахир сиз «гах! деса, «парр» этиб қўлга қўниб турадиган беданаи хокисор эмассиз! Сиз кўзи ўткир, баландпарвоз лочиндорсиз, Балҳдай улкан музофот узра чарх уриб юрган сорлочин! Шибирғон лочини! Шибирғон лочини бош эгмайдур, Шибирғон лочини қўрқув нима билмайдур!

Амир Мусо шундай дер экан, ичида Шибирғон ҳокимининг қатъиятидан мамнун бўлди. Энди жиддий уринишлар палласи келди. Ўзини бутун Мовароуннахр даъвогари деб билган Амир Темурга қаратилган

ҳали қинидан чиқмаган ғазабу ғанимлик қиличининг тифи айрим ҳадя этилган Дишод оқа сингари марҳамату сийловлар туфайли ўтмаслашиб қолгани аниқ. Айёр Амир Мусо ушбу сұхбатта ўша қилични чархлаб қўйишдек бир юмуш деб қаради.

Шибирғон ҳокими тағойини мот қилганидан ниҳоятда масрур эди, унинг юзларига табассум ёйилди, кўринар-кўринмас кўзлари ҳузурдан йўқ бўлибгина кетақолди.

— Аммо бир нарсани дил-дилингизда муқим туғингизким, полвон, Темурбек сизни кўкартирумайдур! Ҳа, кўкартирумайдур!

— Сизни ҳам, тағойи! Сизни ҳам кўкартирумайдур! Бу равшан!

— Ҳа, ҳеч кимни кўкартирумайдур...

Иккиси ҳам ўз хаёллари билан бўлишиб ерга тикилганча жим қолдилар.

## II

Зиндачашм опардий отаси Муҳаммад Ҳожа опардий руҳини шод қилиш учун худойи ўтказишни ният қилди, турли жойларга чопарлар жўнатди. Қарши амири, насибаси қўшилган экан, маъракага етиб келди. Эртасига қолган меҳмонлар ҳам жам бўлдилар. Номи худойи бўлса ҳам, Шибирғон ҳокими бўлажак издаҳомга бир қурутойдай қарапди. Бухордан Маҳмудшоҳ Бухорий билан Абу Исҳоқ Ясовурий ўн беш кун оддин йўлга чиққан эканлар. Бухоро ҳокими Маҳмудшоҳ Бухорий Абу Исҳоқ Ясовурий амакиси Али Ясовурий қизига уйланганидан куёв сифатида Ясовурийларда катта ҳурмату эътиборга эга эди. Абул Маолий Термизий, уни худовандзода деб улуғлардилар, Шибирғонга жўнамоқчи бўлиб турганида Хутталондан чопар келиб Амир Кайхусрав мактубини топширди. Мактубда Хутталон ҳокими нақиблар нақибига сабр қилиш лозимлиги, Амир Кайхусрав Термизга етиб келгач, Шибирғонга эш-қўш бўлиб боришларини ўтинган эди. Шайхулислом Абулворис Самарқандий эса Шибирғонда Зиндачашм опардий олдида истиқомат қиласди. Шайхулислом сарбадорлардан азият чеккач, Самарқанддан кўнгли совиди, Муҳаммад Ҳожа опардий билан эскидан қадрдонлиги боис Шибирғонга келиб туриб қолди.

Худойи баҳонасида Зиндачашм опардий ўзига яқин кишиларни бир жойга йиғиб, мавжуд вазиятда қандай йўл тутмоқ борасида бақамти бош қотирмоқчи эди. Маъраканинг эртаси туш вақти меҳмонларни шаҳар жанубига Жузжон дарёсининг бўлинган ерига олиб чиқди. Пастроқдаги улкан чархпалақдан ариққа сув қуйиларди. Ариқ атрофига гулу райхонлар экилган, шоҳи кўрпаҷалар тўшалиб, парқувлар қўйилган супани айланиб ўтиб яна дарёга қўшилиб кетарди. Чархпалак кўрачаларидан бир меёрда ариққа қуйилаётган сувнинг шовуллаши кишига хуш ёқарди.

— Қани, пиrim, супага чиқсунлар!.. — қўл қовуштирганча таклиф этди худовандзодани Зиндачашм опардий.

— Қуллуқ! Қуллуқ! Ё, Аҳад! — Абул Маолий Термизий гавдасининг юмалоқлигига муносиб бўлмаган бир чаққонлик билан супага чиқди. Меҳмонлар ҳам бирин-кетин супага жойлашдилар. Қуръон ўқилди.

Шибирюн ҳокими даврага зимдан назар қилди. Ана термизлик саййид ёнларида шайхулислом Абулворис Самарқандий, кейин Амир Мусо, Амир Кайхусрав, Маҳмудшоҳ Бухорий, Абу Исҳоқ Ясовурий... Бўлажак Хуросон салтанатининг акобириу аъёнлари...

— Оллоҳга шукр! — деб қўйди Абул Маолий Термизий барра кабобдан тановул айлар экан; бошига катта дастор салла ўраб олганидан ўртадан пастроқ бўйи яна ҳам кичрайиб кеттандай туюлар, ингичка овозида ясамалиқ шундоққина сезилиб турарди. — Бизни ҳам сийлагувчиларни, бошида тутғувчиларни яратганингта шукр! Ўзингта шукр! Ҳа!..

Даврадагилар бу гапларга унча эътибор қилмадилар, аммо пойгақда тиз чўккан Зиндачашм опардий пирининг сўзларидағи яширин маънони илғаб олди. Гап шундаки, Абул Маолий Термизий дилининг тубтубида кўпдан Амир Темур марҳаматидан умидвор бўлиб юрарди. Соҳибқирон ана менинг этагимдан тутади, мана менинг этагимдан тутади, деб интиқ турганда, у Бўйё мавзеида Мир Сайид Бараканинг Темурбек олдига келгани, соҳибқироннинг шири муршидга қўл бергани, байъат қилингани воқеаларини тафсилотлари билан эшитди... Эшитди-ю ўша куни кўзига уйқу илинмади. Мир Сайид Бараканинг чапсонлик кўргизиб улоқни олиб кеттанидан, ўзининг эсландовурларча фурсатни қўлдан бой бериб, оғзидағи

ошни олдириб ўлтирганидан қаттиқ изтироб чекди, иззатталаб дили лат еганини яширлмай қолди. Маккаки Мукаррамадан қачон келгани ҳам номаълум. Термиз ота хонақосида ивирсениб истиқомат қилиб юрган Мир Сайид Бараканинг топқирлиги-ю ўзгирлиги уни бир куйдирса, Темурбекнинг уни кўпдан била туриб шундай олий эътибордан дариг туттани, илтифотсиз қолдириб четлаб ўттани икки куйдирар эди. Ё, тавба! «Алҳамду»ни айтиб юриб, куппа-кундузи Темурбекни Абул Маолий Термизийдан тортиб олиб ўзиники қилди қўйди-я!

Темурбек адашди, адашганда ҳам ёмон адашди. Бу аниқ. Ҳали унинг этагини тутмай, Мир Сайид Баракага қўл берганига пушаймонлар ейди, аммо унда кеч бўлади. Майли, у бу ёгини худога солди... Худди шу нарса худовандзодани Зиндачашиб опардийга яқин қилиб қўйди, дилида тинчлик бермаётган алам туйғусини аланга олдирди.

Худовандзода шошилиб қолди. У бир нарсага амин бўлдики, агар пирлик рутбаси учун курашмаса қуруқ қолавериши мумкин экан. Бас, Зиндачашиб опардий, Амир Кайхусрав ва Амир Мусоларни энди ҳеч кимга бермаслиги, қандай йўл билан бўлса-да, ўзиники қилиб олиш керак, вассалом! У муридларига меҳрибончилик кўрсатиш маъносида совға-саломлар жўната бошлади. Муридлар ўз навбатида унинг зоти бобракот эканлиги, бундай улур сиймонинг атроф-музофотларда учрамаслиги, шунингдек ҳар хил кароматлари ҳақида сўз юритардилар. Худовандзода Шибирғон ҳокими билан Хутталон ҳокимини, бир-бирларига билдиримай зиёрат қилди, уларнинг ҳар бирига давлату қудрат белгиси сифатида турнабеллик қилич ҳадя этди.

Абул Маолий Термизийнинг тарин бир нияти бор: у нуфузли Қарши амири Амир Мусони ҳам ўзининг муриди қилиб олиши лозим. Худовандзода Амир Мусонинг Балхга келиб Темурбек билан учрашишдан ўзини олиб қочганини биларди, айни пайтда уни излаб Самарқанддан одам юборилганидан ҳам боҳабар эди.

Амир Мусо хаёлга чўмганча сойдаги бежирим ишланган чархпалакка термилиб ўлтирас, қандай қилиб амирларнинг ҳар бири билан хуфия гаплашиш йўлларини қидирарди. Чархпалак дунёning тимсоли эканлиги ҳақида у кўп эшигтан. Ҳа, чархпалак — дунё, анави кўрачалар эса — дунёга ёпишиб олган одамлар.

Хов ана, энг тепага чиқсан күрача офтобда ялтираб, ўзини олам-жаңонга күз-күз қилмоқда, бу — Темурбек... Аnavи сувга шүнғиб түлиб чиқиши илинжида тубтубга ботиб тойиб бўлиб кетган эскирган күрача — Амир Мусо... У ҳам юксакларга чиқади, чиқажак! Чархпалақ айланиб турса, бас!

— Амир Мусо жанблари, қаерлардан сўраймиз энди? — Қарши амири хаёлларини бўлиб жаранглади худовандзоданинг ингичкадан келган овози. — Замон ўзгариб, пароканда бўлиб кетдик чамаси... Балхда, Темурбекнинг таҳтта миниш айёмларида кўринмадиларму?.. Сўгин, Самарқанддаги қурутойга ҳам қадам ранжида этмадилар шекилли...

— Насибамиз ҳар турли ерларга сочилона эркан... Ўшаларни териб еб юрибмиз-да, тақсири олам... — жавоб қилди Амир Мусо чархпалақдан кўз узиб. — Фақир киши панада деганларидай...

— Оре, рост... — ўзини Мир Сайид Бараката менгзаброқ давом этди худовандзода. — Аммо баъд, ҳар он, ҳар лаҳза кўзимиздан ўтиб турадурсиз. Инчунин, соғиниб қолғонимизни ҳам билдиримак жоиздур...

— Қуллуқ, ҳазрат, қуллуқ! Тушундик...

— Ва ё... Темурбек... нафас олдириғони қўймайдурларму?.. — сўради маъноли жилмайиб қўяркан Абул Маолий Термизий.

Амир Кайхусрав, Абу Исқоҳ Ясовурий ва Маҳмудшоҳ, Бухорийлар ялт этиб бир-бирларига қараб олдилар. Нима дейишини билмай қолган Амир Мусо ирвиб чиқсан кўзларини ёлворгандай Зиндачашм опардийга тикиди. Бу унинг, ёрдамга кел, дегани эди.

— Ҳазрат, Темурбек кимга нафас олдиришга қўяётирики, Мусо тағойига йўл берадур? — Зиндачашм опардий бемалол сұхбатлашишта тўсик бўлиб турган пардан орадан кўтариб ташлади. — Амир жанблари ҳам сизу биздек ноҳақ сиёсатдан азият чекиб юрибдурлар...

Сұхбатга бошқалар ҳам аралаша бошладилар:

— Ҳа... Юрт тепасига келганларига тўрт-беш ой бўлмай,вой-бў-ўй, Темурбек бизларни жуда қисиб қўйдилар... — қўрқа-писа сўз олди Маҳмудшоҳ, Бухорий. У озгин, новча эрқақсабзига ўхшаган, тепакал бир одам бўлиб, гапни секин гапирав, гапини тугатиб, бир лаҳза сұхбатдошининг кўзига тикилиб туриш унга одат эди. Қисиқ кўзлари доим кулиб турганга ўхшар-

ди. Сўзларкан, ичида: «Гап эгасига етиб бормасмикин ишқилиб?» деган ўй кечди. — Бурунлар хийла эркину ҳур эрдик, энди ҳаммамиз Самарқандга қараб қолдик...

— Самарқанд йўталса йўталамиш! Самарқанд йўталса йўталамиш! Самарқанд юр, деса, югуриб кетамиш, ўтири деса ётиб оламиш! Таомил шунаقا! Таомил шунаقا! Ҳа! — кимгадир кесатиб гапирди Амир Кайхусрав.

— Ҳали тўхтаб туриңгиз! — киноя қилди Абу Исҳоқ Ясовурий. — Буям ҳалво... Темурбекни биламен... Ҳали ҳаммамизни бурнимиздан ҳалқа ўтказиб, ҳўқиз қилиб кўшга қўшиб, салтанат ерларини ҳайдатадир... Ҳа-ҳаха!

Ясовурийлар Чингизхон замонидан бери Ҳисор ва Толиқон музофотларида ҳукмронлик қилар эдилар. Амир Хизр Ясовурий вафотидан сўнг, улардан путур кетди. Макондан, нуфуздан ажralиб қолган ўғил Абу Исҳоқ Ясовурий ва ука Али Ясовурийлар шунинг учун ҳам Амир Темур салтанатидан аламда эдилар.

— Биримизни ҳўқиз қиладур, бошқамизни ўша ҳўқизни уриб ҳайдайдиган қамчи!.. — Зиндачашиб опардий заҳархандали деди. — Ҳўш, Темурбек ким бўпти ўзи? Ҳон авлодимики, ҳамма унга сажда қилади?..

— Ҳўқиз бўлиш ҳам ёмон эмас, ҳарқалай... — мазахсинди Амир Мусо. — Эшак қилиб минмасалар бўлди, эшак қилиб!.. Тушундик!..

— Эшакнинг гўшти ҳаром бўлсаям, кучи ҳалол! Кучи ҳалол-да! — аламини яширмай деди Амир Кайхусрав шокоса кўзларини чақчайтириб, оғзини дастрўмоли билан ёпар экан.

— Эшак ҳам эшак... — ёнаётган оловга ёғ сепди яна Абу Исҳоқ Ясовурий. — Бу аҳволда итнинг кейинги оёғи бўлиб юраверамиз, ҳа...

Даврани кузатиб ўлтирган Абул Маолий Термизий ичида мамнун бўлиб қўйди. Унинг чамаси бўйича, амирларнинг барчасини бешак-шубҳа соҳибқиронга мухолифат эълон қилгувчилар сафига қўшса бўлади. Шу лаҳза кўнглидан кўп режалар кечди, уларни ошкор қилиш керакми, йўқми, айтиш фурсати етдими, етмадими — шуларни ўйларди. Аммо худованздода билади — ҳамиша қарорсиз замоннинг ўз режаси бўлур, бунга шак йўқ. Энди бу ёғи Оллоҳга таваккал. Абул Маолий Термизий «ҳаракатта баракат» ақидаси этаги-

дан тутиб, Зиндачашм опардий билан келишилган фикрларни очиб ташлашга аҳд қилди.

Шу пайт шаҳар ёқдан от чоптириб келган бир сипоҳ юз қадам нарида секинлаб, отидан тушди ва супага яқинлашиб кела бошлади. Чамаси вақти зик зди. Зиндачашм опардий орқа ўтириб ўлтирганидан, сипоҳ келганини кўрмади. Сипоҳ ясовул қулогига нимадир шивирлади, ясовул эса бош чайқади: «Машварат кетмоқда. Бироз кутиб тур!» Айни шу палла Абул Маолий Термизий сўз бошлаб қолган эди:

— Абу Исҳоқ жаноблари баюят рост айтдилар, — босиқ деди худовандозда. — Ахир сакнинг орқа оёри бўлиб юриш бандай мусулмонға нораво қисматдур. Сиздек валламатлар, биздек саййидлар ушмундоқ аҳволга тушиб турибдурмиз. Бас, кўнгиллар кўнгиллардан сув ичсун! Аҳдни бир жойга қўяйлук. Аҳду паймон белбоини белимизга маҳкам боғлайлук. Масал борким, кўтоҳ қилич баҳодирлар қўли бирлан узун бўлур, давлат умри саййидларнинг сўзи бирлан фузун бўлур!..

Абул Маолий Термизий узок гапирди. У ўз гапида бўлажак Хурсон давлати ва бу давлат нуфузи, истиқболлари борасида тўхталди. Хусусан, Хурсон давлатининг пойтахти ҳам қулай жойлашиши, ҳам устивор Анжо қалъасига эга эканлиги, бу қалъанинг ҳатто «Шоҳнома»да эслаб ўтилганлиги, уни Фирдавсий Тусий «Сафиддиз» деб атаганлиги, шунингдек. Темурбек пойтахтидан йироқлиги эътиборга олиниб, Шибиррон бўлиши лозимлигини таъкидлади... Асли Зиндачашм дилидаги бу гапларни Шибиррон ҳокимининг ўзи айтганда, барчанинг ғашини келтирган бўларди. Абул Маолий Термизий эса юрт бошқариш даъвосидан йироқ, холис ва ҳалол одам, ҳамма амирлар пиридур, сўзларининг залвори барчага баробар тушади. Шунга қарамай, «Хурсон давлатининг пойтахти Шибиррон бўлса... подшо ким бўлади?..» деган савол ҳамманинг ичини кемиради. Амир Мусо ўлтирган жойида безовталашиб қўйди. Амир Кайхусрав нимадир демоқчи бўлиб оғиз жуфтлаган эди, у томондан келган қўланса ҳиддан худовандзданинг кўнгли ағдарилаётди, аммо Хутталон ҳокимини атай сўзлашга қўймади:

— Асил мақсад юртни чегириб олишдадир! Як жузва як тан бўлиб Темурбек салтанатига мухолифи муносиб тушмакдадур! Пайрамбаримиз ҳадисларида ай-

тилмишки, одам боласининг юраги қушчага ўжшаб бир кеча-кундузда етти мартаба ўзгариш қилас эмиш. Оре, рост. Азал-абад одам боласи шундокдир. Аммо баъд, бизларнинг юракларимиз ушбу аснода қушчага эмас, шерга менгзасун ва етти бор ўзгариш у ёқда турсун, балки аҳдини ўзгартирмасликка етти бор қасам ичсун! Илло, ўшаңда Оллоҳдан фатҳу зафар атосини сўрай олгаймиз! Ё, Аҳад!..

Абул Маолий Термизий сўзлари барчани сеҳрлаб қўйди. Гарчи Зиндачашм опардий худовандзодага тикилиб турган бўлса ҳам, унинг қисиқ кўзларидағи шодлик аломатларини илғаш қийин эди. Амир Мусо яккам-дуккам қошларини силаркан, иргиб чиққан кўзларини ерга тикканча «Тушундик... Тушундик...»дан нари ўтмас, Амир Кайхусравнинг ҳамон бир нима демоқ илинжида тараддуудда эканлиги сезиларди. Абулворис Самарқандий билан Маҳмудшоҳ Бухорийлар эса худовандзоданинг ҳар сўзига тан беришиб, бир-бирлашиб қараб бош тебратиб ўлтирадилар. Факат Абу Исҳоқ Ясовурийгина «Хўп аробани қуруқ опқочяптилар-да, пиrim!» дегандай юзларида истеҳзо аралаш бир илжайиш вайритабиий равишида қотиб қолганди.

Сипоҳ безовталанаар, аммо машваратни бузишга журъят этмасди.

Зиндачашм опардийга чархпалакнинг айланиши тезлашиб, кўрачалардаги сувнинг шовуллаши бир-бирига уланиб кетгандай туюлди. У кўзларини каттароқ очиб, пирига пинҳона қараш қилди. Худовандзода бу қарашда, даврада комил ишонч уйғотмоқ учун ҳали кўп гайрат талаб этиладур, пиrim, тарин бир саъи ҳаракатингиз лозим бўлур, деган илтижони уқди. Абул Маолий Термизий одатда саботларга птур етган шундай ҳолларда ҳамиша қўллайдиган синалган усулни танлади:

— Каломуллоҳ — Куръони каримнинг «Фатҳ» сураси бағоят улуг ва мұтабар суралардандур. Аззама қадраху<sup>1</sup>. Ҳижрий олтинчи санада<sup>2</sup> жаноби пайғамбаримиз ва Макка мушриклари орасида Худайбия сулҳи воқе бўлмишdir. Мазкур сулҳ Макка мушриклари устидан қозонилган зафар ибтидосидур. Илло Мадинада нозил қилинган «Фатҳ» сураси шул ҳақинададур. Мұҳаммад алайҳиссалом: «Бу кеча мента дунё ва ундаги бор нар-

<sup>1</sup> Қадрини улуг қилсун (араб).

<sup>2</sup> Милодий 627 йил.

салардан суюклироқ бўлган бир сурा нозил қилинди», деб беадад шодланрон эканлар... — Абул Маолий Термизий ҳамманинг дикқати бир жойга жам бўлганига ишонч ҳосил қилгач, давом этди: — Ушбу сурада мўъмин-мусулмонларнинг дини ислом учун қилғон жиҳодлари, айрим имони заиф кимсалар ва мунофиқларнинг жиҳодда иштирок этмаслик баҳоналари хусусинда, саҳобаларнинг то охир нафас Оллоҳ йўлинда курашда Расулиллоҳга боғларон байъат-қасамёдлари тўғрисинда хабар этилмишдур. Ё, Аҳад! Бизнинг юмушимиз ҳам бир жиҳоддур, ҳа-ҳа, жиҳоддур! Бас, эй жаноби амирлар, Оллоҳ дилимизга солғон йўлдан айру тушмайлик! Аён бўлсунким, имони заиф кимсалар, мунофиқлар шайтони лаъян этокини тутғон бандалар қаторидан жой олурлар! Ундоғларнинг жойи, илло, тамуғдур<sup>1</sup>! Оллоҳнинг ўзи ҳаммамизни мағфират айласун!..

Абул Маолий Термизий «гап тамом» дегандай, ўзини орқароқ тортиб жойлашиб одди-да, «Аъузу биллаҳи-минаш шайтонир рожим, бисмиллаҳир роҳманир роҳим», дея «Фатҳ» сурасидан тиловат қила бошлади... Худовандзода узоқ ўқиди, унинг қироати баоят ширали бўлиб, кишининг юрак-юрагига етиб борарди. Кўрачалардаги сувнинг шовуллашини демаса, бутун олам сукунат ичра гарқ, эди...

Шундан сўнг, ҳеч ким бирон нарса дейишга журъат этмади, зоро «имони заиф кимсалар ва мунофиқлар» қаторига кириб қолишни истамасди.

— Дастурхондаги ҳар бир нарса, егулик, ким менга қўл чўзаркин, дея маҳтал бўлиб турад эмиш... Қани, олингизлар!

Абул Маолий Термизий шундай деди-да, дастурхонга эгилиб, оқ фарғурий косадаги ақиқдай гилос шарбатидан тотинди. Мехмонлар ҳам оддиларида дастурхон борлигини энди билгандай, бараварига қўл узатдилар. Ясовул бир четдаги сўрида ўлтирган машшоқларга ишора қилди. Савту наволар бошланиб кетди.

Зиндачашиб опардий дилида мамнунлик ҳиссини түйди, аста дўстларини, — аслида эса мухолифларини, у буни аниқ билади, — бир-бир кузатиб чиқди. «Барчангиз менга бўйинсунадурсиз ҳали, Хуросон давлатини тузиб, оламни ҳайратта солурмен, иншооллоҳ!» деб қўйди ичиди у.

---

<sup>1</sup> Т а м у ғ — дўзах.

Шу пайт фурсат етганлигини күрган ясовул Зиндашм опардийга яқинлашында, охиста шивирлади:

— Чопар бор, давлатпаноҳ...

— Чопар? Қанақа чопар? Чопар бўлса кутиб турсун демабмидим? Жондан азиз дўст-биродарлар, мўътабар меҳмонлар ила бир лаҳза фароғат оғушида бўлайлик, оромимизни бузмасунлар, демабмидим?.. — ясовулга қийғир қарашиб қилди Шибирғон ҳокими.

Ясовул хижолат тортди:

— Битта жоним омода... Аммо, ошиғич хабар, давлатпаноҳ...

— Хўш?.. Қандай ошиғич хабар эркан?

Шу пайтгача ўзини игнанинг устида ўтиргандай ҳис қилган чопарга жон кирди, «бир қошиқ қонидан кечиши»ларини ўтинди-да, деди:

— Давлатпаноҳ!.. Балх тарафдан ошиғич хабар етдиким, Амир Темур Кўрагон лак-лак қўшин бирлан Шибирғон сари юз бурибдур...

— Нима-нима? Нима дединг?.. — қулоқларига ишонмади Зиндашм опардий, шу лаҳзадаёқ аъзои баданига муздек титроқ югурди.

— Ла ҳавла вало қувват! — деб юборди Абульвотрис Самарқандий.

Чопар, сўзим англашиларли бўлмади шекилли, деб ўйлади ва яна такрорлади:

— Амир Темур Кўрагон лак-лак қўшин тортиб...

Чопарнинг сўзи оғзида қолди:

— Ясовул! Олиб бор бу фитначини! Чўби ясоқقا еткурилсун! Фитна гапни қайдин топибдур? Топронларни топингиз! Бу ғанимларнинг ишидур! Барчамизнинг дилимизга қутқу солмакчилар! Темурбек Самарқандда салтанат юмушлари ила бандурлар! Самарқанд қаёқда-ю Шибирғон қаёқда!.. Орада тўқсон тош йўл турибдур. Хо-ҳо-ҳо! Қўшин тортиб келар эмиш... Хо-ҳо-ҳо!..

Зиндашм опардийнинг кулгуси, кулгу эмас, кўпроқ қафастга тушиб қолган шер боласининг аламли ниодсига ўхшаб кетди, унинг ўз гапига ўзида ҳам ишонч йўқлиги кўриниб туарди.

Ҳамма қотиб қолди. Ясовул сездирмай машшоқларга «Тўхтатингиз!» ишорасини қилди. Даврадан файз кўтарилиган эди. Шибирғон ҳокими назарида сукунатни титратиб турган чархпалакнинг айланиши секинлашгандай туолди, кўрачалар ҳам илгаригидай бир-

бирига уланиб эмас, айри-айрича «шалоп... шалоп...» этиб товуш чиқарар эди.

Сукунатни биринчи бўлиб Амир Мусо бузди:

— Зудлик билан Темурбекка элчи юбормак жоиз, токи Шибирғонга келиб юрмай, изита қайтсун!.. Тўғри йўл шулдир, полвон!.. Тушундик...

— Тўғри йўл шулдир, Зиндачашм жаноблари! Тўғри йўл шулдир! — Амир Кайхусрав ҳам Амир Темурнинг Шибирғонга бостириб келаёттанига заррача шубҳа қилмасди. — Жаноблар! Камина ҳозирок Хутталонга отланурмен! Юрт ёлғиз қолди! Юрт ёлғиз қолди!..

— Агар соҳибқирон менинг бу ердалигимни билсалар, нақ теримга сомон тиқадур! Бухорога шошилишим даркор! — тили ечили безовталаңган Маҳмудшоҳ Бухорийнинг, у қўрққанини яшириб ҳам ўлтирамади.

— Рост дедилар!.. Шошилишимиз даркор!.. — тасдиклади Абу Исҳоқ.

Абул Маолий Термизий бало-қазодай келган бу янгиликдан ҳайратта мустағриқ бўлди. Эй буқаламуни қажрафтор дунё!.. Худованзоданинг кўз олдида ҳамиша бир хил либосда — оқ, ридода, печи чап елкасига тушиб турадиган оқ дастор салла ўраган Мир Сайид Барака намоён бўлди. Мир Сайид Барака катта-катта кўзларини унга қадаб термулиб тургандай «Ҳазрат, нима қилмоқдалар? Бенаф оворагарчиликка берилубсиз, ҳали менга етишмагингизга жуда узок...» деяётгандай туюлиб кетди. Унинг юраги сиқилди. Бир қарорга келиш даркор эди.

— Замон ғаниматдур, такаллуфларга ҳожат йўқ, деган эканлар Шайх Нажмидин Кубро... — гапни улуғлардан бошлиди Абул Маолий Термизий. — Филҳақ, фурсат кам... Идрок кўзи билан қаралса, шу лаҳза Маҳмудшоҳ Бухорий ва Абу Исҳоқ Ясовурий жаноблари ўз юртларига қайтсунлар, дегимиз келадур... Алалхусус, Амир Кайхусрав ила бизларга ҳам ижозат... берилса, мақбул бўлур... Зиндачашм жаноблари! Биз Мир Сайид Барака бирлан бу ерда бақамти келиб қолсак ярашмас... Ҳали ул зот бирлан гурунгимиз узок бўлур... Э, Аҳад!..

Зиндачашм опардий худованзодани биринчи марта кўраёттандай унга тикилиб қолди. «Фатҳ» сурасидан нақл қилганлари, ўқиганлари қаёқда қол-

ди-ю, ҳозирги гаплари қаёқда?.. Ўзгалар эса ичларида хурсанд бўлиб ўлтирсалар ҳам керак...

— Ичларингизда оташ йўғу, аммо ўзларингиз яхши қайнайсизлар... — қаттиқ узиб олган Зиндачашм опардий бошқа ҳеч нарса демади.

Шу куниёқ Амир Мусодан бошқа барча ўз юртларига жўнаб кетди.

## Ў Н О Л Т И Н Ч И Б О Б

### I

Хоразмшоҳлар пойтахти Гурганжнинг марказида жойлашган Қайсария карvonсаройи шаҳарга ўзгача кўрку салобат баҳш этиб туради. У Қутлуғ Темур<sup>1</sup> минораси ёнгинасида. Минорадан хоразмшоҳ Султон Тажкаш мақбарасига қадар катта майдон Қайсария номи билан машҳур бўлиб, карvonсарой ва гавжум бозордан иборат эди. Бир ойдирки, Алуфа тавочи бошлиқ элчилар шу ерда истиқомат қилишади.

Алуфа тавочи келган кунлариёқ саройга чопар юбориб, Турон султони соҳибқирон Амир Темур Кўрагоннинг хоразмшоҳ Ҳусайн Сўфи жаноби олийларига муборак мактубларини олиб келганлиги хусусида маълум қилди ва илтифот кўргизиб қабул этишларини сўради. Лекин ҳалигача жавоб ола олган эмас. Ахий Жаббор ўнбоши билан Амир Кайхусрав ўғли Султон Маҳмудлар боришганда, ўн кундан сўнг келасизлар, деб тайинлашибди. Ҳа, яна хоразмшоҳ Ҳусайн Сўфи, элчилар бир шаҳримизни айланиб томоша қилсунлар, қудратимизни кўриб, қўйсунлар, ҳам деганмиш... Бу, айниқса, Ахий Жабборларга ёқиб тушди. Энди улар шаҳарда bemalol юриш имконига эга бўлдилар.

Амир Темур Кўрагоннинг элчиси савдогарларини Қайсария бозорига жойлади, ўзи эса азиз-авлиёларни зиёрат этди. Соҳибқироннинг раъйига кўра, салтанатда шундай одатга риоя қилинарди. Қайси юрт, ё шаҳарга борилса, даставвал азиз-авлиёлар қадамжолари зиёрат қилинсун, жонлиқ сўйилиб ис чиқарилсун, ўтганлар руҳига қуръон туширилсун... Шунга кўра,

<sup>1</sup> Қутлуғ Темур — XIV асрнинг биринчи ярмида Хоразм ноиби.

элчилар Гурганждан чиқаверишдаги зовияга<sup>1</sup> бордилар. Улур шайх Нажмиддин Кубро қабри устида бунёд этилган бу хонақохдан зиёратчилар қадами узилмас эди. Жонлиқ сўйилди. Жам бўлган дарвешлар ва мусофиirlар ярим коса-ярим коса шўрва totинишиб, ўтган азиз-авлиёлар ҳақига тиловат қилдилар, Турон султони Амир Темур Кўрагон жаноби олийлари ҳақига дуо қилдилар. Машҳур шайх Жамолиддин ас-Самарқандий зурёди, қирқ ёшлардаги чиройли қироат соҳиби Киромиддин ас-Самарқандий зовияда шайхлик мартабасида экан.

Зиёратдан бошқа кунларда Алуфа тавочи бекор ўтирумади, либосини ўзгартириб, ватансиз бир дарвеш қиёфасида елкасига кашкулини осганча, ҳассасини дўқиллатиб шаҳар айланди, бозору мадрасаларга борди, катта-кичикка назар солди, эл орасида юрган ҳар турли гаплардан бирма-бир терди...

Алуфа тавочи эндиғина аср намозини ўқиб бўлган эдики, эрталаб саройга кетган Ахий Жаббор билан Султон Маҳмудлар ҳужрага кириб келишиди:

— Бўрими, тулки? — сўради Алуфа тавочи Ахий Жабборга чап кўзини қисиб. Бу унга одат бўлиб қолганди. Ўртача бўйли, айри соқол Алуфа тавочининг чап кўзи кўрмасди. Айтишларича, бир пайтлар Амир Ҳусайн жаҳли чиқиб унинг юз-бошига қарамай қамчи солиб юборган экан, чап кўзига қаттиқ тегиб кетиб, ногирон бўлиб қолибди.

— Бўри, иншооллоҳ! — қичқириб юборди Ахий Жаббор.

Султон Маҳмуд индамай қараб турар, унинг қувонган ёки қувонмаганини ҳам билиб бўлмасди. Ўн саккизларга кирган Султон Маҳмуднинг келбати худди отасига ўхшаб кетарди, баланд бўйли, шокоса кўз, шошилиб тупук сочиб гапиради, бир гапни икки марта такрорлайди, жуссаси чогроқдан келган... Уни Амир Кайхусрав хизматида юрган пайтидан бошлаб биларди, бироз «ичимдагини топ»роқ, писмиклиги ҳам йўқ эмас. Ҳусайн Сўфи саройида ҳам Ахий Жаббор кўзини шамралат қилиб, кимлар биландир учрашиб, пицирлашиб юрди... Бу ерда кўп бўлган, танишлари ҳам бисёр...

— Хоразмшоҳ Ҳусайн Сўфи ҳазрати олийлари жума

<sup>1</sup> З о в и я — дарвешлар ва сўфийлар мусофиirlарини назаридан.

куни сизни саройда қабул айлайдилар, тавочи жаноблари!

Агар Алуфа тавочининг юмуши соҳибқирон мактубини хоразмшоҳга топширишдан иборат бўлса, ўнбошининг вазифаси бошқачароқ — очикроғи, Жаҳонгир Мирзонинг дардларига малҳам топиш... У амирзодага маҳлиқо Хонзода хоним ҳақида янги, дилни ёриштиргувчи муждалар олиб бормоги даркор. Ба агар, иложи топилса, Турон мамлакати подшоси Амир Темур Кўрагон валади Жаҳонгир Мирzonинг ғойибона муҳаббатли дуои саломини ул Билқиси замона Хоразм маликасига пинҳон йўллар билан бўлса-да етказмори лозим. Чунки, малика менинг эр юзига қарашга тоқатим йўқ, дер эмиш. Совчиларни ўзи қайтарар эмиш... Ахий Жаббор ўнбошининг ақли қосири дерки, агар Хонзода хоним Турон мамлакати валиаҳди Жаҳонгир Мирzonинг кўнгил ўртанишлари ҳақида эшитса, шубҳасиз, унинг бебаҳо қалбида ҳам акс-садолар пайдо бўлур!.. Аммо буни қайсар маликага қандай етказилади, ким етказади — бу ёри муаммо эди.

Келганларининг учинчи куни Ахий Жаббор ўн йигити билан Қайсария бозорига боришиди. Жуда тиқилинч бозор экан, қадам қўйгани жой топилмайди. Бозорнинг бир маромдаги аллаловчи сурони кун иссиғида кишида эринчоқлик кайфиятини туғдирар, аммо зерикиб турган йигитларга бозор кезиши Оллоҳнинг бир илтифоти эди.

— Бирам катта бозор эканки, дастингдан кетай! — деди барваста, юмaloқ юзли, дўрилмоқ овозли Учқора деган йигит атрофга завқданиб кўз ташлар экан. Кейин эшитилар-эшитилмас минфирилади:

*Ер тўймайди ёмғирга,  
Хотин — эрга... тўймайди.*

Бу унинг яхши кўрадиган қўшиғи эди. Учқора уни вақти-бевақт бўлар-бўлмасга ҳам такрорлаб юришни ёқтираради.

— Бизнинг Қарши бозори бундан катта, иккита келади! — мақтанди Йаналтекин. Юзлари чўзинчоқдан келган бу йигит Учқорадан тикроқ эди.

— Лофинг ҳам бор бўсин-е!

— Катта дедим, катта! Агар эрталаб кирсанг, эртасига шомда зўрва айланиб чиқасен! Кўргансан-а,

Йўлқутлуг? — йигитлардан бирига мурожаат қилди Йаналтекин.

— Кўрганмен, кўрганмен... — жавоб қилди панг овозда йигит, мийифида кулимсирар экан. — Аммо... бизнинг Бухоро бозори оддида иш эшолмайди! Ўҳ-ҳў! Бариси ўтаверсин, Қарши бозориям, Гурганжиям!

— Ие! Ие! — деганча қолди Йаналтекин... — Вой туюмижоз-ей!

Йигитлар бозорни кўтаргудай гуриллаб кулиб юбордилар, айниқса, маза қилиб кулаёттан Учқоранинг дўриллоқ овози бошқалар ичида ажралиб турарди.

— Сайра, дастингдан кетай, сайра! — Йаналтекиннинг ғашига тегиши учун Йўлқутлугни атай мақтар эди Учқора. — Ҳа, овозингдан кетай-а!

Беғубор ҳазиллардан Ахий Жаббор ўнбоши қалбига нур киргандай бўлди.

Йигитлар атторлар, аллофлар ва қассоблар рассталарини бир-бир кезиб чиқдилар. Бирон нарса олиш ниятлари бўлмаса ҳам, сурон солишиб, «Сирва неча пул?», «Буғдой неча пул?», «Гўшт қанчадан?» деб сўраб қўйишарди; бир-бирларига: «Анови балдорни олиб қўй, келинпошшога!..» «Маржондан ол, маржондан!» дея тегажолик қилишарди. Ёз пишиқчилик авжида бўлганидан, ҳамма томонда қовун-тарвузлар тоғ-тоғ бўлиб уюлиб ётар, турли-туман мевалардан бозор чаманзорга айланган эди. Қовун бозорини оралар экан, нимтўр гурвакларни кўрди-ю Ахий Жабборнинг оғзидан сув келиб кетди. Гурвакнинг бари хилидан бор экан, оқ, кўк, қора... «Йигитларни бир Хоразм қовунига тўйдирайин!» дея кўнглидан кечирди ўнбоши. Унга оқ гурвак кўпроқ ёқарди, шираси ўткир-да, айниқса, оқноввоти... «Нони гўшт»дан бўлса тагин яхши.

— Йаналтекин, мана пул, қовунлардан иккитасини танла-чи! — буюорди Ахий Жаббор. — Ширинидан ол, ширинидан!

— Ҳўп бўлади, ўнбоши жаноблари!

Йаналтекин қовунларга яқинлашди. Ҳар бири бир қучоқни тўлдирадиган қовунларга боқиб, қайсисини танлашни билмай қолди, эгилиб уларни шапатилаб кўра бошлади. Бошқа йигитлар эса «Мана буни ол! Мана буниси яхши!» дея, Йаналтекиннинг бошини айлантиришгани айлантиришган эди.

Қовун сотаёттан силкима телпакдаги дехқон улар-

нинг мусоғир эканликларини кўрди-да, ўзи иккита «нони гўшт» қовунидан танлаб берди:

— Ина! Иккиси-да дим яхши, ширин!

Деҳқон қовунлардан яна битта олди ва қулимсира-ганча Йаналтекинга узатди:

— Пули геракмий. Миймон акансиз... «Нони гўшт» ҳам нон, ҳам гўшт...

— Бозорингизга барака! — дейишиди йигитлар. Учқора, Йаналтекин ва Йўлқутлуғлар биттадан қовун кўтариб олдилар. Тиқилинчда катта қовунни кўтариб юришдан ортиқ азоб йўқ экан, ҳарқалай, Учқорага шундай туюлди. Кимdir ўтаётиб билмай туртиб кетади, ўзгаси пўнғиллаб ўгади...

Қандолат бозорида қизиқ ҳодиса рўй берди.

Расталарга ҳар хил қанд-қурслар, новвоту пашмаклар, тутталқону майизлар, парварда-ю печаклар қўйилган. Ҳамма бозорларда бўлганидек, бу ерда ҳам ўралашгувчилар кўп... Ранг-баранг ноз-неъматларни кўрган Учқоранинг кўзлари ёнди, у ширинликлар гадоси эди. Қорамагиздан келган ўрта ёшлардаги хотин қанд-қурслар сотиб ўлтиради. Учқора қўлидаги қовуни шеригига берди-да, растага яқинлашди, кейин индамай қўл узатиб чиройли қанддан бирини олди ва айлантириб томоша қила бошлади. Хотин бир хаёлда Учқоранинг қўлини тутиб, қандни қайтариб олмоқчи бўлганди, Учқора чаққонлик билан айлантириб қандни оғзига солар экан, деди:

— Ундай бўлса, сизгаям йўқ, менгаям!

Йигитлар қаҳ-қаҳ отиб кулиб юборишиди. Қандолатчи хотин ҳайрон жилмайиб қараб турарди:

— Ол! Яна бирисин ол, боломай! Тоқ бўмийди!.. Еганга пул йўқ... — деди хотин кулиб.

Ахий Жаббор қандолатчи хотиндан новвот сотиб олиб, қанднинг пулинни бериб тинчитмоқчи эди, шу пайт ёнида кимdir унга шивирлаб қолди. Боқса, гунгурсдай бир ёшуalli.

— Биласизми, ким бу хотин?.. Хоразмда машҳур Ражаббиби ширапаз деганлари шу бўлади. Ҳамма билади, — деди у. — Қанд-қурсиям зўр. Пошшо саройини ҳам Ражаббиби таъмин қиласди. Айниқса, маликалар, хоразмшоҳ қизлари унинг парварда-ю новвотларини жуда яхши кўришади...

— Маликалар-а?..

— Ҳа, маликалар!

Ёшулли шундай дегач, йўлига равона бўлди. Жаҳонгир Мирзо ўнбошисининг миясида нимадир ярқ этди, аллақандай умидланиб, кўзларини катта-катта очганча растага яқинлаша бошлади...

## II

Алуфа тавочи хоразмшоҳлар саройининг эшикоаси кузатувида барча соқчилардан ўтиб, ниҳоят Ҳусайн Сўфи кўринишхонасига қадам қўйди. Бу, тавочининг назарида, узунлиги ўттиз газ, эни йигирма газ келиши аниқ, шифти ҳам баланд кенг-мўлгина бир хона эди. Рўбаруда меҳроб олдида бироз баландликка жойлашган заррин таҳтда хоразмшоҳ Ҳусайн Сўфи ўлтирас, ўнг томонда уламо-ю фузало, чап томонда амирул умаро ва иўёнлар саф тортиб туришарди. Саф тортганлар орасида хоразмшоҳнинг укалари Юсуф Сўфи билан Оқ Сўфилар ҳам бор эди.

— Турон султони соҳибқирон Амир Темур Кўрагон элчиси! Самарқанди фирмавсмонандан ташриф буюрмиш! — остоңада туриб овозини баланд кўтариб ошкор қилди эшикоаси.

Алуфа тавочи дадил қадамлар билан таҳт пойи томон юрди. Беш қадамча қолганда тўхтаб таъзим бажо келтирди. Шу аснода бир лаҳза хоразмшоҳга назар ташлаб улгурди. Хоразмшоҳ Ҳусайн Сўфи қирқларга борган юмалоқ юзли, қора соқол, истараси иссиқ бир одам эди. Амир Темурнинг элчиси эгилганча таҳт пойига яқинлашди ва қўлидаги найча қилиб ўралган муборак мактубни бир ўпид тавозе билан Ҳусайн Сўфига тутқазди. Шу алпозда ортига чекиниб, аввалги жойига қайтди-да, қўл қовуштириб кутишда давом этди.

Ҳусайн Сўфи найчани олиб писандсизлик билан ёнидаги мулозимга узатди:

— Қани, ўқиб йибор-чи!

Атрофда ҳозир бўлган сарой аҳли диққат билан мулозимга тикилди. Жимлик чўқди. Мулозим оҳиста найча муҳрини оча бошлади. Кўринишхонада фақат қофознинг шитир-шитир овози эшитиларди. Ниҳоят, мулозим икки тирсак узунликдаги мактубни ёзиб, баланд овозда ўқишига тутинди. Мактубда ҳукмдорларнинг номаларида бўладиган одатий даромаддан сўнг шундай сўзлар битилган эди:

*«... Чигатой гастури измини тутуб, Туркистонзамин ерини барча даъвогарлар илинидан халос этдукким, ушбу аввалроқ юборилғон фатҳномамиздан Сизга маълуму машҳурдир, иншоомлоҳ. Баъд, Кот ила Хевақ Чигатой улуси ҳалқасынгагур. Туркистонзаминда ҳаражу мараж важҳидин Сиз аларга таадди<sup>1</sup> кўлини узотдингиз. Эмди фурсат етдиким, ўз эгасига тобшурғайсиз. Умид улдурким, бу ишда даҳл қилмағойсиз.*

*Соҳибқирон Амир Темур Кўрагон.  
Самарқанд. Ҳижрий 772...»*

Мулозим мактубни ўқиб бўлиб, таъзим қилганча ортта чекинди.

Кўринишхонага нохуш жимлик чўқди...

Бундан беш-олти йил аввал Ҳусайн Сўфи уддабуронлик кўргизиб Гурганж шаҳрини эгаллаган ва хоҳиши изн берганча ҳукумат юргизиб келарди. Гурганж Жўчи улусига, Кот ила Хевақ Чигатой улусига боқарди, ҳар икки томондан ҳам ҳали ҳеч ким хоразмшоҳга эътиroz билдиrmаган эди. Ҳусайн Сўфи назидада, Хоразмга кимнингдир қўли етиши қийин, Оллоҳнинг ўзи бало-қазолардан асраб, уни икки саҳро орасига жойлаган. Шу нарса бироз ҳаво бериб турганиданми, мулозим мактубни ўқиганда, хоразмшоҳ атрофдагиларга: «Бу қандай бедодлиғ!» дегандай назар ташлади ва мийифида пайдо бўлган мазахсимон кулгуни яшиrolмади. Аъёнлар ҳам нима дейишларини билишмас, хоразмшоҳнинг ўзи сўз очишини кутардилар. Фақат Юсуф Сўфи безовталаниб, нимадир демоқчи бўлар, аммо оғиз очишга журъят этмасди.

Жимликни хоразмшоҳнинг салобатли овози бузди:

— Агар элчи бўлмаганингда, чироғим, бу мактубинг учун сени зиндоннинг энг қоронғу ҳужрасига ташлашим лозим эди-я, элчи деган номинг бор-да... — Ҳусайн Сўфи сўzlаридағи заҳарханда оҳанг Алуфа тавочининг эт-этидан ўтиб кетди. — Соҳибқиронингга бориб айтасен: Кот билан Хевақни бериб қўядирган нодон ҳали дунёга келмапти, де! Ҳали ундоқ одам онасининг қорнида ётган экан, де!.. Англадингму, чироғим?..

— Англадим, англадим!.. — тасдиқлади қўл қовуштирганча Алуфа тавочи.

<sup>1</sup> Таадди — зўравонлик, маъносида.

Бирдан Ҳусайн Сўфининг юмалоқ юзидан мазахсиз мон кулгулар йўқолди, ўрнини қаҳру ғазаб эталлади:

— Мен Хоразм вилоятини қиличимнинг кучи билан иликка киритдим... Кимки уни олмоқчи бўлса, қиличига суюнишига тўғри келади...

### III

Худди шу паллалар шаҳарнинг жануб томонида Қайсария карвонсаройидан кейинги муюлишда ғалати ҳодиса рўй берди...

Шаҳардан чиққандан сўнг кўп ўтмай хушманзара бир ўланзор бошланиб кетар, шаҳар аҳли у ерга чиқиб туришни хуш кўради. Хоразм малиқалари ҳам вақти-вақти билан ўланзорга чиқиб мўъжазгина Зангори кўл бўйида гулгун чодир тикишиб хордик, олишар эди. У ердан шаҳар ёқقا термилсангиз, кўзингиз даставвал ягонаи фалак бўлиб турган Қутлур Темур минорасига тушарди.

Чоршанбай муродбахш куни малика Хонзода хоним ўзининг бир неча дугоналари билан ўланзорни ихтиёр этмакни кўнгилга тугди ва сирдош канизак Оққизни ёнига чорлатди. Канизак малика чақиртирганидан қувониб кетди, чунки бутун Хонзода хонимга айтадиган муҳим гапи бор... Уузун оқ кўйлагининг барлари шамолда елпинганча, ҳовлидаги гулзор ёнидан югуриб ўтиб саройнинг иккинчи ошёнасига чиқа бошлади.

Оққиз деганимиз ўн беш ёшлардаги қораҷадан келган, дуркунгина, тиқмачоққина, кулча юзли, кўзлари ўйноқ хушрўй бир қиз. Мўнди қизалоқ тувилганда яхши ният билан Оққиз деб атаган эканлар. Худди бўяб кўйилгандай қоп-қора қошлари қорача рухсорни тағин ҳам кўҳлик қилиб юборган. Қора соchlари узун бўлмаса ҳам бутун орқасини эталлаган...

Оққиз зинага энди бир-икки қадам қўйиб-қўймаган эдики, кимдир орқадан, гулзор ёқдан товуш берди:

— Мен бу ёқдамен, Оқ!..

Канизак шарт ортига қайтиб эшиқдан чиқди, осто-нада тўхтаб, ҳовли этагида, ўттиз қадамлар нарида лов-лов ёниб турган, одамнинг белидан келадиган чаман гулларга синчковлик билан тикилди. Ҳеч ким кўринмади. Канизак маликанинг яшириниб олганини билди. Хонзода хоним ҳамиша шундок, содда Оққизни лақиљатишни хуш кўради, бирон жойга яшириниб

олади-да, қидириб топа олмаганларидан роҳат қиласди. Охири топгунларича сабри чидамасдан, кула-кула «Мана, мен!» дея яшринган жойидан ўзи чиқиб келади. Оққиз ҳам анойи эмас, ўзини малиқани роса қидирганга солди, зиналарни қараб чиқди, эшиклар орқаларини кўрди, аммо гулзор томонга бормади... Бироздан кейин гуллар ичидан қаҳ-қаҳ отган Хонзода хонимнинг хушбичим бўй-басти намоён бўлди. Маликанинг қадди камолидан латофат барқ уриб турарди.

— Бопладим-а, Оқ... Бопладим-а!.. — Шундай дер экан, маликанинг хиёл ёшланган жон офати кўзлари ҳузурдан чараклаб ёнарди.

Оққиз Хонзода хонимга термилди, термилди-ю уни худди илк марта кўраётгандай маҳлиё бўлиб қолди. Ажабо, шу ўзининг маликасими?.. Аёл зотидан бўлатуриб унинг кўз узгиси келмай, шунчалар мафтун бўлиб турибди-ю, йигитларнинг албатта, беҳушу бекарор бўлишлари аниқ-да! Шундан маликанинг ғойибона ошиқу шайдолари кўп, доврути бутун Туронзаминга таралган. Талабгорларнинг сон-саноги ҳадсиз...

Чиндан ҳам Хонзода хоним гўзалликда табиатнинг дурри яктоси эди. Нур билан чайилгандай оқсариқдан келган тиниқ юzlари жозибага тўла, тим қора ҳилол қошлилар чиройли, шахло кўзлари ўтли, юпқа ақиқ лаблари жон олади, иринининг ўнг томонидаги мўъжазгина қора холдан бошқа бу тоза рухсорга дахл этган бирон нимарса йўқ... Чиний нилгун кўйлагини хиёл тутиб турган кўкраклари ўзларида олам-жаҳон сеҳрни нихон этган эдилар. «Маликам нақ балои офатнинг ўзгинаси!» — деди суқи кириб Оққиз... Олтин Ўрда хони Ўзбекхоннинг қизи Шакар бика билан хоразмшоҳ Ҳусайн Сўфи иниси Оқ Сўфиларнинг дилбанди Севинбика Хонзода хоним номида машҳури жаҳон бўлиб кетди. Хонзода хоним эндиғина ўн тўрт ёшга кирди.

Малика билан қанизак бир варакайига қаҳ-қаҳ отиб кулиб юбордилар.

— Намунча тикиласен?.. — сўради Хонзода хоним Оққизни енгилгина туртиб. — Одам кўрмаганмусен?

— Қанчалар чиройликсиз, маликам!

Оққиз Хонзода хонимни қучоқлаб олди.

— Суйкалишини кўрингиз...

Хушчақчақ қизлар саройга қараб юрдилар.

— Биласенму, Оқ... Нима демоқчимен? Қани, топчи?

Улар икинчи ошёна зинаси олдида тұхтадилар.

— Топсам... нима берасиз? — аймокиликка үтди  
Оққиз...

— Вуй, очкүз-е! Сенга нима керак?

— Шаҳар берасизми?

— Қайси шаҳарни истайсен?

— Кот керакмас...

— Ие!

— Хевақ керакмас...

— Ўлақолинг!..

— Марви Шоҳижхаон керакмас...

— Вой-вуй! Ҳали мен сенга бердим, сен олмадинг...

— Ҳа-да!

Икки қиз хийла тортишдилар. Бухоро-ю Балх, Тошканду Саройлар ҳам иш бермади. Ҳонзода хоним қайси шаҳарни айтса, Оққиз, йўқ дерди. Ҳазил-хузул билан бошланган гап жиддий тус ола бошлади.

— Қайси шаҳарни истайсан, хўп, ўзинг айтақол! — ён беришга мажбур бўлди охири малика. — Хоҳлага-нингни ол, майли!

— Оллоҳ тилагингизга етказсин, маликам!.. Менга... Самарқандни берингиз... — одатда сўралгандা бўладиган хижолатдан ийманганча ўйноқи кўзларини Ҳонзода хонимга тикиди канизак...

Ҳонзода хоним тағин қаҳ-қаҳ отиб кулиб юборганини билмай қолди.

— Она шахрингни сориндингму? Ўлақолинг... У кун ҳам Самарқанд деганда билдирмай кўз ёши қилиб олдинг-а!

Оққиз асли Самарқанддан, аниқроғи, Самарқанднинг кунчиқишидаги Кумушкент қишлоғидан. Канизакнинг отаси шайх Киромиддин ас-Самарқандийнинг муридларидан эди. Оққизни ўн ёшида шайхга назира қилиб бердилар. Шайх уни хоразмшоҳ Ҳусайн Сўфига бағишилади. Саройда Оққиз одоби ва юриштуриши билан маликага ёқиб қолди, уни бобоси Ҳусайн Сўфидан тилаб олди. Ўша-ўша, мана тўрт йилдирки, Ҳонзода хоним билан Оққиз бирга ётишади, бирга туришади. Оққиз ота-онасидан ҳам, беш опа-сингилларидан ҳам, — оиласда олти қиз эдилар, — бехабар яшайди. Фақат ҳар гал Самарқанд деганда юраги титраб кўяди, мунглуғ қизнинг бундан ортиғига қурби келмайди.

— Йўқ, ундор эмас... — деди Оққиз бироз маъюсталиниб. Кейин ўзини ўнглади-да, деди: — Маликам, ижозат берсалар, бир сирни айтсам...

— Ҳа, ўлақолинг!.. Шаҳарни мен берсам, сирни сиз айтсангиз... Ҳечам-да! Шаҳар олдингму, энди меннинг гапимни эшишиб қўй! Кейин сеникини эшитамен!.. — қайсарлик қилди атай Хонзода хоним.

— Бош устига, маликам!..

— Жума куни Зангорикўл бўйига борамиз, Оқ...

Хонзода хоним амакилари Ҳусайн Сўфи ва Юсуф Сўфи қизлари Иқбол бика ҳамда Сиймин бикалар билан бирга хушманзара ўланзорга боришлари, ҳақида айтмоқчи экан. Сарой баковули қозон-товоқларни аробага ортиб тонгсаҳардан чиқиб кетади. Маликалар эса чошгоҳга қолмай ўланзорда бўлишади, сўлим майсалор эрталаб ўзгача бир манзара касб этади.

— Қандоқ ақллисиз-а, маликам! — қувонганини яширмади Оққиз...

Тўрт томони қалин девор билан ўралган ҳайҳотдай саройда, у ер бу ерга чиқмай, диққинафас кун кечираётган қизлар учун хушманзара ўланзорда кезиши, Зангори кўл бўйида гулгун чодирларда дил яиратиб ҳордиқ олиш Оллоҳнинг бебаҳо бир инъоми эди. Оққиз ширингина энтиқди, ўланзорга боргунча бўладиган шаҳар сайри, ям-яшил майсалар, чексиз борлик, кўйлакларни нозик баданларга чиппа ёпиштириб фир-фир эсатган ёқимли қир шамоли, осмонни тўлдириб бошлар узра туриллаб учайтган турфа қушлар — бари, бари кўз олдидан бирма-бир ўтди. Маликалар севган мунозара, баҳс эса Оққизга жуда ҳам ёқарди...

Канизак кўзларида аллақандай ўт чақнаб маликага яқинлашди:

— Қулогингизни беринг, маликам, бир сир айтамен...

Малика яхши эшитай дея, бежирим қулоқни бирорвга кўргазишга қизганиб яшириб турган қоп-қора сочларини қулогининг ортига йиғиб қўйди. Улар ҳамон зина ёнида эдилар. Оққиз шивирлади:

— Маликам, бир қошиқ қонимдан кечасиз... Самарқанддан хабар бор...

— Ўлақолинг. Тағин Самарқанд, дейди... Қандай хабар? — чимрилди Хонзода хонимнинг қора ҳилол янглиғ қошлари.

— Турон сultonи соҳибқирон Амир Темур Кўра-

гон ҳазратларининг паҳлавон ўғли валиаҳд Жаҳонгир Мирзо ҳуснингизнинг ошигу шайдоси эрмиш... Жаҳонгир Мирзо...

Хоразм маликаси кутилмаган янгиликдан ҳайратланганча, қулорини оҳиста нари олди, юзларида-кўзларида ҳеч нарсани билдиримайдиган бир ифода қотиб қолганди. У Оққизнинг жавдираб турган, минг бир сир яширин умидвор кўзларига шаҳдо кўзларини қадади:

— Нима... дединг, Оқ?

Канизак сўзини давом этдирмоқчи бўлиб турганди, гап узилиб қолди. Ҳовлига шу пайт ўн олти ёшли Иқбол бика билан ўн беш ёшли Сиймин бикалар қуваллашиб кириб келдилар. Оққиз Жаҳонгир Мирзонинг сифатлари, ҳусни-ю кўрки, шавкату шижоати ҳақида, Ражаббиби ширарапаздан қандай эшиитган бўлса, шундай гапириб бермоқчи эди. Нафси ламирини айтганда, канизак бу хушхабардан — ҳа, унинг назарида, бу ажойиб хушхабар! — бениҳоя ўзмон бўлди. Ким билсин, насиб этиб малика Самарқандга келин бўлиб тушсалар, Оққизни ҳам олиб кетарлар?.. Шояд. Кумушкентга ҳам бориб-келиб туради-я.

— Севин! Ҳой, Севин! Яхши, шу ерда экансан! — чопиб келди чўзинчоқ юзли шартаки Сиймин бика. — Билдингми, нима бўлди?

— Нима бўлди? — сўради хушламайтина Хонзода хоним... Оққиз дугоналарининг келишгани малиқага ёқмаганини сезди.

— Иқболга совчи келди! Иқболга совчи келди! Иқбол эрга тегади!

— Совчи келди? Қаёқдан... совчи келди? — жон ҳолатда бирдан сўраганини билмай қолди Хонзода хоним. Оққиз маликасининг оқсариқдан келган юзларига қизиллик юрганини кўрди, бу маликани яна ҳам гўзал қилиб юборган эди.

— Ҳа, ўл! Дарров суюнчилайди-я! — хижолатдан ерга қаради Иқбол бика. — Ўлгангинанг тузук!.. Тегади, тегади эмиш!..

Сиймин бика қаҳ-қаҳ отиб кулар эди:

— Иқбол эрга тегади! Эрга тегади...

...Хоразм маликалари орзиқиб кутган жума куни ҳам этиб келди.

Кун кўтарилиганда маликалар тушган, тепасига ҳаворанг ва заррин матолар ёпилган маофа саройдан чиқиб, қалқинганча жануб сари йўналди. Маофа ароба

устида бўлиб, унда Хонзода хоним, Иқбол бика, Сиймин бика ва Оққизлар ўлтиришарди. Икки соқчи қўриқлаб бораётган рангин маофани кўрганлар, дарров унинг кимга тегишли эканлигини фаҳмлашар ва кўзларини четта олишга тиришар эдилар.

Йўл Қайсария карвонсаройидан кейинги муюлишгача донғил ва равон эди, сарой оддида туриб йўлда нималар бўлаётганини бемалол кўра олиш мумкин. Муюлишдан кейин ўланзорга яқинлашган сари йўл хивлатлашиб борарди. Маофа муюлишдан ўнгта бурилиб бироз юрган эдики, юқорида биз эслатиб ўтган ғалати ҳодиса рўй берди...

Маликалар Зангрикўл ва хушманзара майсазор, унда кечажак дамлар ҳақида ширин суҳбат қуриб, бир-бираiga гал бермай чуурлашиб келишаёттан бир пайтда, кутилмаганда: «Бос! Олдини тўсиб чиқ! Олдини!», «Аввал соқчини қурит!», «Маликаларни олиб қочамиз!» деган даҳшат ва ваҳимага тўла сўзлар янгради. Қизлар қўрқиб кеттганләридан беихтиёр: «Вой!..» деб юборганларини билмай қолдилар. Хонзода хоним маофадан қараб, тўртта ниқобли одамларни кўрди, уларнинг қароқчилар эканини дарров билди ва қўркувдан вужудига титроқ кирди. Тўс-тўполонда икки соқчи икки ёнда қароқчилар билан саваш қуарди, аравакаш ҳам қараб турмади, аммо уларнинг босқинчиларга бас келиши қийинлиги аниқ, эди. Иқбол бика билан Сиймин бика қўрқанларидан дир-дир қалтирашар, Оққиз бўлса Хонзода хоним қўлларини маҳкам ушлаб олган, тили калимага келмас, қорача юзлари оқариб кеттанди. Фақат унинг хаёлидан: «Куппа-кундузи Гурганжда Хоразм маликалари маофасига юрак ютиб ҳужум қилишга журъат эттан ер юткурлар кимлар экан?» деган сўзлар кечар, қароқчилар ҳақида аввал эшиттан турли ваҳимали воқеалар эсига тушар, худога ёлвориб, пичирлаб: «Ўзинг паноҳингда асрал!»ни такрорлашдан чарчамас эди. Ташқаридан олатасир савашиш аро «Иҳ!», «Аҳ!» деган товушлар, қиличлар овози эшитилиб туради.

Маликаларнинг ўз ғами ўзларига етиб турганда, яна бир ташвиш қўшилди. Қаттиқ, қўркувдан Сиймин бика ўзидан кетиб қолди, қизлар унинг билан овора бўлиб, ташқарини ҳам унутдилар. Иқбол бика Сиймин бика-нинг докадай оқариб кетган чўзинчоқ юзларига оҳиста-оҳиста шапатилаб: «Қўрқма! Қўрқма! Сиймин, кўзингни оч!» дер, Оққиз қизнинг сурх новдадай но-

зик қўлларини, жонсиз беҳол оёқларини уқалар, Хонзода хоним унга кўмаклашар эди.

— Вой, энди нима қиласиз-а!.. Сув сеп! Юзларига сув сеп! — ҳаприқарди Хонзода хоним.

— Сиймин! Кўзингни оч! Кўрқитма! — ёлворарди Иқбол бика...

— Бу қандай кўргилик! — ёзгиради Оққиз...

Бечора қизлар пичир-пичир даражасида ана шундай чугурлашар эдилар.

Ташқарида ҳали-ҳануз тўс-тўполон ҳукмрон, ора-орада дўриллоқ овозли қароқчилар сардорининг «Маликаларни олиб қочамиз!», «Аробани бур!» қабилида сўзлари эши билар, аммо қароқчилардан ҳеч ким дадил бир ҳаракат қилишга журъат этмасди. Буни соқчиларнинг мардона турганларига йўйган, ичида суюнган Хонзода хоним кутилмагандан узокдан, шаҳар ёқдан яна аллақандай бегона сипоҳларнинг таҳдиидли қичқириқларини баралла эшилди:

— Аламон! Аламон!

— Ур-ҳо, ур! Ур-ҳо, ур!

— Тўхта!

— Ушла! Ушла!

Хонзода хоним жон ҳолатда маофа пардасини кўтариб овозлар келгани томонга қаради! Не кўз билан кўрсинки, қилич яланючлаган аллақандай одамлар ҳайқириб от солиб келишарди. «Қароқчиларнинг шериклари! Ёрдамга келишмокда!..» — деган фикр ўтди Хонзода хоним хаёлидан. Йўлнинг уйлар сийраклашиб, яйлов бошлинаёттан хилват ерида маликалару икки соқчи, — аравакаш ва гала-гала қароқчилардан бўлак ҳеч ким йўқ... Бу қандай бедодлик! Даставвал соқчиларнинг қароқчилар билан теппа-тeng жанг қилаёттанларидан кўнгли тўқ Хонзода хонимнинг энди қўрқувдан бутун аъзои бадани жимиirlаб кетди. Оқсариқ юзлари оқаргандан оқарди, юпқа ақиқ лабларидан қон қочди: «Энди уларни ёт одамлар асиralардай олиб кетишади, энди Хоразм маликаларини олиб бориб чўри қилиб сотишади... энди... энди...» — Хонзода хоним у ёрини ўйлашдан қўрқарди.

— Худо урди! Яна қароқчилар келяпти! — деди Оққиз шўрлик...

— Қароқчилар?.. — жон ҳолатда сўради шу пайт ҳуши ўзига келган Сиймин бика чиройли кўзларини ола-кула қилиб, аммо тағин бехуд бўлди.

— Сиймин! Сиймин! — талпинди Иқбол бика. — Кўрқитма!..

Хонзода хонимнинг тили боғланиб қолганди, Оққиз ёрдамлашгани Иқбол бикага интилди.

Номаълум қароқчиларнинг сурони эса тобора яқинлашар, уларнинг нима мақсадда от бостириб келаёттани соқчиларга ҳам, қароқчиларга ҳам, маликаларга ҳам бирдай қоронғу эди.

— Тегма! Қоч деяпман сенга, худо қарғаган!

— Тўхта! Тўхта! Қаёққа қочасен? Думингни туғиб қўямен, даюс!

— Гўштингни канорага иламен, пир урган!

Вазият шундай танг ва бетизгин бир пайтда, куттимаганда дўриллоқ овозли қароқчилар сардорининг шерикларига буюргани эшитилди:

— Маликаларни олиб қочиш кейинга қолди! Улар кўпчилик экан! Тўқнашсак ўламиз! Тез бўл, дастингдан кетай!

— Ўлсак ўламиз, аммо маликаларни қўлдан бермасбиз! Келсун ўшалар, бир ўзим барини тинчитамен! Келсун! — кекиртагини чўзиб пинғилаганча эътиroz билдириди сардорга бошқа қароқчи. Аммо унинг пўк, панг овози сардорнинг дўриллоқ овози остида қолиб кетди:

— Гапни чўзма! Кетдик!.. Лалайиб ҳамма ишни расво қилдинг!..

Қароқчилар соқчилару маликаларни ҳайратта солиб «Кетдик!», «Кетдик!» деганларича тумтарақай қочиб қолдилар.

Бўлиб ўтган воқеадан ҳеч нарса англашмаган маликалар умиднинг фира-шира шарпаси билан қўркувнинг ошкор дағдагаси орасида нима қилишни билмас эдилар.

— Ўзимизнинг одамлар-а? — от чоптириб келаётган номаълум одамларга ишора қилиб сўради шошапиша шеригидан соқчиларнинг ёшроғи. Унинг қилич ялаб ўтган юзидан қон оқарди.

— Танимаяпман... — қувонишини ҳам, қувонмасликни ҳам билмай сўзланди ёши улутроғи. У неча бор маликаларни кузатиб бундек йўлтўсарларга дуч келмаганди. — Ўлай агар, ҳеч бирини танимайман! Шай бўлиб турайлик-чи... Буларни ҳам гумдон қиласиз, керак бўлса!..

У шундай деди-да, олтмиш қадамлар нарида келаёттан одамларга ҳавосат қила бошлади:

— Яқинлашма! Жойингда тұхта! Тирик қоламан десаң, яқинлашма! Хоразмшоқ наукарларига тенг келолмайсан!..

— Ҳа, тенг келолмайсан! — мададға келди иккинчиши.

Йигирма қадамча яқин келиб қолған номаълум қароқчилардан бири, афтидан сардор бұлса керак, неғадир тұхтаб хотиржам деди:

— Яроғингни четта ол! Гапларимга қулоқ сол! Савашмоқ, ниятимиз йүқ, бундан бұлсın күнглинг түқ! Бизлар шаҳрингга мусофирмиз. Йүлдан ўтиб борар эдик. Күрдикки, рангоранг маофа қароқчиларға йўлиқмиш... Савоб излаб юрган йигитлармиз. Онамиз бизларни савобга туқсан. Бир бечорани куппа-кундуз кўчада қақшатиб кетаберсинарму? Зинҳор! Илло...

— Оғзингта ҳараб гапир, эй мусофир! Нега булар бечоралар бўларкан? Ким айтди сенга, булар бечоралар деб?.. — Ёши улуғ соқчининг овози энди кўтарила бошлади.

— Ким айтди сенга, бечоралар деб?.. — қўшилди бошқаси...

— Ундей бўлса булар ким? — сўради ҳалиги овоз.

— Булар бечоралар эмас! Булар — Хоразм маликалари Хонзода хоним, Иқбол бика, Сиймин бика, Оққиз ойимлар... Зангорикўлга сайр эттали боришмоқда... Бизлар эса соқчилармиз.

Номаълум одамларнинг нияти тўғри эканлиги, ниқоб киймаганларидан ҳам кўриниб турарди, соқчи буни туйди, маликалар олдида бироз бўлса-да, хижолатдан кутилишга уринганлити сезилди.

— Таваккалту алаллони деган эр, на талқону на қалқоннинг ғамин ер! Олтинга бергисиз сўзларни дединг, эй соқчилар улуғи! Кимга кўмакка ошиққанимизни билганимиз кўп яхши бўлди. Оллоҳга шукр! Хўш... Кўрдингки, биз дўст кишилар, дўст демакки ўз кишилар! Дўстларга ҳам тиф кўтарадиларму, а? — соқчини уялтирган бўлди номаълум одамлар сардори. Бу Ахий Жаббор ўнбоши эди.

Сиймин биканинг оёқларини тинимсиз уқалаётган Оққизнинг юраги ҳаяжондан неғадир бир қалқиб кетди. Нега шундок бўлганини қизгинанинг ўзи ҳам тушуна олмади. У оҳиста маофа пардасини кўтариб ташқарига мўралади. Ниқобсиз номаълум одамларнинг олдида баланд бўйли, бараваста келбат, шон мўйлов, жус-

садор бир йигит соқчиларга дарс берарди. Унинг мардана овози қулоққа хуш ёқарди.

Шу пайт Ахий Жабборнинг дайди нитоҳи беихтиёр маофа пардасини хиёл кўтариб турган Оққизга тушди. Аъзои бадани ногаҳон титраб кеттанидан ўзининг олдида ўзи ўнғайсизланди. «Ажабо, ким экан бу хушсурат қора қиз... Хонзода хониммикин? Аммо маликани оқ юзли, деб таърифлардилар...» Оққиз тездан ўзини пардадан орқага олди.

— Ана, маликам! Халоскорларни худонинг ўзи етказди! Худога шукр! Кутулдик! Кутулдик! — пиширлади шоша-пиша Оққиз Хонзода хонимга.

— Айтганинг келсин-а, Оқ!.. — хўрсинганча деди малика...

— Худонинг ўзи асрари!.. — йирламсиради куёвга унашиб қўйилган Иқбол бика ҳар хил хаёлларни ўзидан нари қувиб.

Маликалар шивирлашиб гаплашар, қувончдан бир-бирларини қучишар, мунграшар эдилар.

Соқчи олижаноб мусофиirlарни кўриб қиличини пастга туширди. «Улар олтига экан, ҳаммаси норгул йигитлар. Жанг қилсан ҳам омон қолмасдик...» — деб қўйди ичиди у, аммо сир бой бермасликка тиришди.

— Ким бўласизлар? Қаердансизлар?.. — сўради сўнг сўзларига имкон қадар вазмин тус бериб.

— Хўш, кимсизлар?.. — қўшилиб қўйди иккинчи соқчи. Аравакаш гапга аралашмасди.

Ахий Жаббор томоқ қириб қўйди-да, соқчиларга эмас, балки ҳозиргина жамол кўргизган хушсурат қора қиз ўтирган маофага қараб залворли сўз бошлади. Ахий Жабборнинг шериклари ўн беш қадам орқада ер тепинган отларда маофадан кўз узмай туришарди.

— Бизлар, билингизким, Турон султони соҳибқи-рон Амир Темур Кўрагон ҳазрати олийларининг паҳлавон фарзанди, асал қанди, суюнган тоғи, салтанат кўз қорачурининг нури, иқбол чаманининг сурури шаҳзода Жаҳонгир Мирзо йигитлариurmиз. Самарқанд шаҳридан келғонмиз... Бизга савоб ишлар қилмоқни шижоатли шаҳзодамиз ўргатганлар. Бизга ташаккур айтмангиз, йўқ асло! Ташаккургизни олам аҳдининг амирзодаси, жаҳондорлик боянинг гули, олийқадр сарвар шаҳзода валиаҳд Жаҳонгир Мирзога билдирингиз!

Ахий Жаббор бироз сукут қилди, сўнг қўшиб қўйди:

— Ўзимни Ахий Жаббор баҳодир дейдилар, бор-йўки амирзодамнинг ўнбошиларидан биримен...

Маофа ичида эса шу палла бундай сұхбат бўлиб ўтмоқда эди:

— Вой, Оқ... Жаҳонгир Мирзо йигитлари дурмиз, дейдирму?.. — ҳайратда сўради Хонзода хоним. — Улақолгур... Ўша... Мирзому?..

— Шундок эмиш-ку... — қувончдан юрак-бағри увалган Оққизнинг ҳар доимги ўйноқи кўзлари ёшлиниб малиқага тикилди.

Жаҳонгир Мирзонинг йигитлари кетмоққа шайланар эдилар. Буни сезган қув Оққиз шартта маофа пардасини неchanчи бор кўтарди, Ахий Жабборга бир жилмайиб нозли боқди-ю сўз қотди:

— Олам аҳлининг амирзодаси, жаҳондорлик борнинг гули шаҳзода Жаҳонгир Мирзога ташаккури мизни еткурингиз, эй паҳлавон йигит!

Хонзода хоним ҳеч кимга билдиrmай «Ўл-а!..» деди да, Оққизнинг чап биқинидан чимчилаб олди...

Кун тиккага келиб қолганди.

## Ў Н Е Т Т И Н Ч И Б О Б

### I

Жета ҳукмдори Кепак Темур сийратида буқала-мунлик аломатлари, салтанатта ёғийлик<sup>1</sup> кайфиятлари пайдо бўлганлиги унга қарши қўшин тортилишига олиб келди. Қўшин сафига синашта лашкарбосилар Баҳром жалойир, Аббос баҳодир қипчоқлар, шунингдек, Шибирён ҳокими Зиндачашиб опардий лашкарлари киритилди. Амирул умаро Амир Жоку барлос дастлабки икки лашкарбошини қўллаб-қувватлади, аммо учинчисига келганда эътиroz билдиришга журъат этди:

— Амир соҳибқирон, мўгул вилояти бағоят мухим вилоятлардантур. Ишонимли саркардалар бормоғи лозим сарҳадимиз. Анқо Тўра, Қамариiddин каби найрангбоз амирлар у ерларда хаёлнинг бўмбўш майдонида ҳавойи орзулар тўпини суриб юрибди... Чапдаст баҳодирлар керак. Зиндачашиб опардий каби сабо ҳам

<sup>1</sup> Ёғий — душман.

суюна олмайдиган кишилар шу ерларда юра турсун-микинлар...

— Шибирғон ҳокими билан туз-қатиқ ялашқонсиз, яқинсиз... — пичингсиз, түрри күнгилда деди Амир Темур. Унинг кенг пешонасида бир чимдим тириш пайдо бўлди. — Аксинча, бундоқ қилғонимизга мамнун бўлурсиз, деб ўйлагон эрдик, амир жаноблари!..

Одатда маълум жанг, муҳобага иштирок этиш — ўша саркарда-ю сипоҳ учун шараф саналарди, чунки бу обрў-мартабага эришишнинг, гоҳо эса аввалги гуноҳларни ювишнинг бирдан-бир йўли, имкони эди.

— Амир соҳибқирон, туз-қатиқ ялашқоним учун ҳам, бу сўзни дейман. Шибирғон ҳокими зътиборингизга унчалар муносиб эрмасму, деб ташвишдамен...

— Қай бир подшоҳ ўз салтанатини ғаддорлик ва зулм асосига қурса, кишилар дилини ранжитишга қаратса, — деди Амир Темур, таҳтдан тушиб амирул умаро ёнига оҳиста юриб келаркан, — давлати қарорсизликка рўбарў бўладир. Биз салтанатимизни кишиларга меҳру шафқат кўргизиш, уларни ҳимоя этиш заминига қурамиз!.. Одамларнинг кўнглини олиб хотиржам айлаймиз. Хотиржамликдан ортиқ бойлик йўқ. Агар одамлар бунинг қадрига етмасалар, нонкўрлик мақомига юз бурсалар, у ҳолда уларнинг ёмон қилмишлари ўзларига қайтадир. Ҳаллоқи безаволга салламно!

Орага бироз жимлик чўқди. Амир Темур давом этди:

— Йўқ, борсун, ўзини оқласун. Зиндачашм опардий шунга яраша анча-мунча иш қилиб қўйди. Имкон берайлук.

«Шибирғонда юриб фитна чиқарғондин кўра, бу ёқда кўз олдимизда бўлғони маъқул!» — кўнглидан кечирди Амир Темур хаёл сурганча кўринишхона ичida у ёқдан бу ёққа юрар экан.

Амир Жоқу барлос беихтиёр ўша «анча-мунча» ишларни эслаб кетди.

...Зиндачашм опардий қайсаарлик аломатларини аён этиб, тир ойида Самарқандда бўлган олийшон қурутойга келмагач, Амир Темур унга бир неча марта элчи йўллаб инсофга чақирди. Охирги элчилар Тобон баҳодир билан Зиндачашм опардийнинг қариndoши, Амир Улжайтунинг ўғли Хожа Юсуфлар борганларида, ул бетавфиқ ҳар иккисини ҳам банди қилди. Зудлик би-

лан Шибирғонга отланиш ҳақида фармон берилди... Шаҳар дарвозасидан ташқарида қўр тўкиб турган гардунқудрат<sup>1</sup> лашкарни кўриб, Зиндачашм опардийнинг эс-хуши бошидан мосуво бўлди. Ялиниб-ёлвориб Амир Темурдан гуноҳидан ўтишини тилади, шамшир ва ғанимни олиб қутлуғ даргоҳ остонасига бош ургаймен, деб оғиз кўпиртириди. Кафолат сифатида шу пайт қалъада бўлган Амир Мусога ўз укасини қўшиб ҳумоюн ўрдуга юборди. Изма-из Амир Улжайту ҳимоясида Самарқандга палос ўшишга шошилди. Амир Темур Зиндачашмнинг ҳам, Амир Мусонинг ҳам гуноҳларидан ўтди, уларни яна салтанат ишларига дохил қилди...

Орадан кўп ўтмай Зиндачашм опардий пири Абул Маолий Термизий билан тагин итоат йўлидан чекиниб, девгуур вассасага берилиб, Термизни ишғол этибди, горат қилибди, деган хабар келди. Зиндачашм опардий-ку, хўп-хўп, худовандзода-чи, уни нима йўлдан оздирдийкин? Ахир у жўяли маслаҳат бериб такасалтанг Зиндачашмни тизгинлаши мумкин эди-ку? Дарҳол Термизни озод қилиш, ғанимни бартараф этишга энди амирул умаро Амир Жоку барлоснинг ўзини юборди... Эҳ-ҳе, эсласа гап кўп...

Ушанда Амир Жоку барлос жуфтакни ростлаб Термизни ташлаб қочган Зиндачашм опардийни Шибирғонгача қувиб келди. Бўлди саваш, бўлди саваш. Қалъага яшриниб олган Зиндачашм опардий чопар юбориб, кўришмоқда ижозат тилади. Қалъадан чиқиши биланоқ, югуриб келиб Амир Жоку барлос этагини ўшишга турди:

— Бад қилдим, адащим! Қилмишимдан чандон пушаймонмен! Мени Амир соҳибқирон олдида ҳимоянгизга олсангиз! Сиз ҳимоя қила оласиз, чунки мени яхши биласиз... Фақат сиз! — Зиндачашм опардий амирул умаронинг этагига маҳкам ёпишди.

Одамнинг юзи иссиқ экан, Шибирғон ҳокими илтимосига у йўқ дея олмади. Бирга Самарқандга келдилар. Амир Жоку барлос бошқа амирларни иттифоққа чакирди, баҳамжихат соҳибқирондан Зиндачашм опардийга афв сўраб, шафқат қилишга ундади. Амирул умаро ҳумоюн ўрдуга боришга борди, аммо энди бу гал шафқат бўлишига ҳеч ишонмасди. Бирок! Амир Темурнинг саховатпеша подшоҳ эканлигини яна бир бор

<sup>1</sup> Гардунқудрат — буюк қудратли

ўз кўзи билан кўрди. Соҳибқирон илоҳий суннат йўлини тутиб, султонларга хос раҳму шафқат дарёсидан баҳраманд этиб, келган амирларнинг ҳурмати, бебош Зиндачашм опардийнинг қонидан кечганини билдириди! Тўй қилинсун, деган қутлуғ фармон бўлди. Зиндачашм опардийга хилъат, камар, туя, от ва қўйлардан бир кўп ҳадя этилди. Бадбахтнинг мартабаси кутилмаганда аввалгидан ҳам юксакка кўтарилиди...

— Бир қошиқ қонимдан кечасиз, Амир соҳибқирон... — ўтинди Амир Жоку барлос. — Бароят рост дедилар, ҳар кишига имкон берилмоғи лозим! Борсун, Сиз ҳақсиз, борсун, ўзини оқласун!

«Ишқилиб охири бахайр бўлсун, охири бахайр бўлсун! Касофатнинг қасрига қолиб юрмасак, бас!» — деб қўйди ичида Амир Жоку барлос. Амирул умарода, тезлик билан Зиндачашм опардийни ҳузурига чақиририб, бир-икки сўз айтиш нияти туғилди ва кетишга изн сўради...

Амир Темур мулоғимни чорлатиб, шаҳар марказидаги шоҳкўча қурилишини бориб кўражагини билдириди ва Амир Довуд дуғлат билан Амир Оқбуо найманларга шай бўлиб туришларини тайинлади.

\* \* \*

Баҳром жалойир ва Аббос баҳодирлар лашкари йигирма кун деганда Кепак Темур вилоятига қадам қўйди. Олдиндан баланд тепалик уфқни тўсиб ётарди. Баҳром жалойир, шу ерда нафас ростлаб олайлик, бир киши бориб тепалик атрофини кўздан кечириб келсун, деган фикрни ўртага ташлади. Аббос баҳодир буни маъқуллади, бу яхши таклиф эди. Баҳром жалойирнинг ўғли Одилшоҳни юбордилар. Одилшоҳ бир дунё ваҳима олиб келди:

— Тепалик ортида ёмғир қатралариdek беҳисоб, дараҳт барглариdek беадад қўшин еру кўкни тутиб ётибди!..

Баҳром жалойир эшитиб иккиланиб қолди.

— Егий кўпчилик бўлса...

Аббос баҳодир шартта унинг сўзини кесди:

— Жаноби амир! Ортта қайтиш мумкин эмас! Чора излаш даркор, ёв устига қандай от солиш йўлларини топиш зарур! Ҳали Амир соҳибқироннинг юзларига қарааш бор!..

— Камина ҳам шундай демоқчийдим, ҳа-ҳа, шундай демоқчийдим... — Аббос баҳодир сўзини қувватлади Баҳром жалойир. — Ўзга ниятим йўқ! Не учун келдик ахир!..

Кепак Темур билан бўлажак жанг русуми-ю равиши икки лашкарбошининг эс-хаёлини тамоман банд қилиб қўйди. Сипоҳлар жойлашиши, баронюру жавонфор, қалбу чаноҳлар мавқеи, жанг бошланиш вақти, Зиндачашм опардий лашкари билан жўр бўлиб ҳаракат қилиш ва ҳоказолар хийлагина бош оғритадиган муаммолар эди. Шундай пайтда, Баҳром жалойир лашкарида айрим кишилар бевафолик қилиб, сотқинлик кайфиятига берилганлиги маълум бўлиб қолди. Кутимаган янгилик амирлар кўнглига хирадлик солди. «Жалойир қабиласига хос одат бу бекарорлик! — гижиниб қўйди ичида Аббос баҳодир... Боязид жалойир ҳам шундай қилмиши учун Тувлук Темурхон ғазабига учраган эди...»

— Қандай бу сотқинликдан воқиф бўлдингиз, жаноби амир? — сўради Аббос баҳодир. — Хайриятки, билиб қолибсиз...

— Иғонинг ичида бўлганлардан биттаси шундай гапни эшитдим, деб келиб айтиб кетди...

— Ёраб, фитна қилгувчи ҳам ўzlари, айтгувчи ҳам! Бу қандай кўргилик! — ғойибона сотқинлардан ёзгирди Аббос баҳодир.

Танг вазият юзага келди. Амирларнинг бошлари қотди. Бир томондан, ёғий кўпчилик, унга бас келиш мушкул, иккинчи томондан, энг ёмони, ўз ичинидан ёвчиқиб турибди. Адолат кўзи билан қаралса, ҳозир жангта киришмаслик энг тўғри йўл бўлади. Демак, сулҳ тузмоқ керак. Сулҳ! Узок мушоҳадалардан сўнг амирлар қуидаги қарорга келдилар. Вақтдан ютиш мақсадида душман билан сулҳ айласунлар ва Удан ота зиёратгоҳи тарафда жойлашган Зиндачашм опардий лашкари билан қовушиб, кучайиб душманга қайта юзма-юз бўлсунлар!

...Амир Темур Хоразмга юборилган Алуфа тавочидан хабар кутиб турар, элчининг қайтиши чўзилиб кетаётганидан кўнглининг бир чети хижил эди. Шундай пайтда Жета сарҳадидаги вазиятни билиб, ғазаб ўти алнга олди, унинг Баҳром жалойирдай, Аббос баҳодирдай, Зиндачашм опардий каби амирларини танг аҳволга солиб қўйган беадаб душманни бир кўриб

қўйиси келди ва дарҳол йўлга чиқди. Шимолий сарҳадларни бир ёқли қилмай туриб, бошқа ишларга киришиш мумкин эмаслигини Амир Темур теран ҳис қиласарди.

— Ҳеч жаҳонда жанг қилмакка бориб, майдонга қадам қўймай, сулҳ тузиб ортта қайтадиларму? Бу қайси рисолада битилвон?.. — сиёsat қилди Амир Темур Баҳром жалойир билан Аббос баҳодирга. Унинг кўришгандага, амирларга биринчи айтган сўзи шу бўлди. Амирларнинг бошлари эгилиб қолди. Зиндачашм опардий эса офтобда қовжираб кеттан яккам-дуккам майсалардай соқолини силаб-силаб қўяркан: «Холингиз нечук?» дегандай амирларга зимдан қараб туради.

Амир Темур тепалик ҳақида сўраб-суриштириди, тепаликнинг нариги ёғидаги Ойиша хотун сувида кўприклар борму йўқлигини аниқлади, от солса сакраб ўтиш мумкинлигини билиб мамнун бўлди. Саҳармардондан уч лашкарни уч қисмга ажратди. Даставвал Баҳром жалойир тепаликка чапдан, бир палла ўтказиб Аббос баҳодир ўргадан, охирида эса Зиндачащм опардий ўнг ёқдан чиқиб бордилар. Бурғу ва карнайларнинг овозидан еру кўк қиёмат қойимга ўхшаб қолди. Кепак Темур лашкари сулҳ тузилгач, хотиржам эди. Сипоҳлар ким қайда — бирори ухлаётган, бирори овда, бирори эса овулма-овул кезиб юради... Тепаликни тутиб кеттан Амир Темур аскарларини кўриб, барчаси ваҳима исканжасида: «Ал-Фирор! Ал-Фирор!» дея қочишга турдилар. Шунда «Ёгий лашкари изидан қувилсун!» деган олий фармон бўлди. Зафарнишон қўшин душманни накомиший йўсинда Саккиз Ёроч мавзеи томон қувиб кетди.

## II

Вақт чошгоҳдан ўтиб қолди. Тепаликда қад ростлаган ҳумоюн ўрду чодири подшо бошидаги тож мисоли атрофда ягона эди. Куйироқда ёнбагирларда эса чодирлар кўп, чап томонда Мир Сайид Барака, Амир Жоку барлос, Муҳаммад Чуроға доддоҳ, Амир Сайфиддин некўз ва бошқа мулоғимлар чодир тикишган. Ўнгу сўлда яна ҳам куйироқда ҳар жой-ҳар жойда қоровулларнинг олачуклари ёмғирдан сўнг бодраб чиққан қўзиқоринлардай сочилиб ётарди.

Фир-фир эстган қир шамоли елпиб ўйнаётган яшил

саропарда олдида, олтин тахтда ўлтирган Амир Темур шимол ёқдан кўз узмасди. Кепак Темур лашкари ортидан от солган сипоҳлар аста-аста уфқ қаърида ғойиб бўлдилар. Шимол ёқдан элас-элас келаётган жанг сурони демаса, борликқа жимлик чўккандай эди.

Амир Темур жанг юмушлари билан банд бўлиб теварак-атрофга яхшироқ назар солмаган экан. Парвардигор бепоён чўлни жуда фусункор қилиб яратибди! Чўлнинг қоқ ўртасида жойлашган тепалиқдан тўрт томон яққол кўзга ташланиб туради. Кунботиш ёқда бир текис уфқача ястаниб ёттан, қалин лолақизгал-доклардан нимпушти ранг қасб этган ям-яшил майсазорлар... Кунчиқища кумуш тасмадай билтанглаб оқаёттан Ойиша хотун сувидан нари йироқ-йироқларда янги майсазорлар янги чиройли қирларга туташиб кетган... Сув бўйида яқингинада, нари борса уч юз қадамча масофадаги кичик тепалик буткул лолалар билан қопланиб, ажабтовур лов-лов ёниб кўзни олади. Жануб томонда майсазорлар охирида қишлоқлар кўринади. Қанчалар кенглиқ, ажойиб манзара!.. Қани энди ўша майсазорларда юмалаб-юмалаб ётсанг! Диморингга турли хил кўкатлару гуллар, ёввойи йўнричқа-ю лолаларнинг қоришиқ ачқимтири ширин ҳиди гуп этиб урилса! Тўйиб-тўйиб нафас олсанг! Эсида бор, Жаҳонгир Мирзо турилганда, курсанд бўлганидан ҳеч қаерга сигмай, от чоптириб Қамашининг чўлига чиқиб кетган, худди шундай белга урган кўм-кўк ўтлар устида юмалаб ёттан эди!.. Ҳайхот! Энди амирзодани уйлайман, деб юрибди, дарров шунча йиллар ўтиб кетдими? Замон югуриқдир, югурик! Амир Темурнинг юраги орзиқди, негадир чуқур хўрсиниб қўйди.

Бирдан у ўзини дунёда танҳо сезди! Бундай ҳолат тез-тез такрорланиб турадиган бўлиб қолди сўнгги пайтларда... Водариғо... Ота-онадан бир ўғилу икки қиз дунёга келдилар. У — ёлғиз ўғил, танҳо. Йўқ, танҳо эмас, мана этачи-сингиллар — Кутлуғ Туркон оқа билан Ширин бикалар бор. Ҳамиша ёнида оқил пири муршид Мир Сайийд Барака, шижаатли амирлари бор, Мухаммад Чурова доддоҳ бор... Ўғиллари Жаҳонгир Мирзо, Умаршайх мирзо, Мироншоҳ Мирзозлар, қизлари Оқа Беги хоним ва Султон Баҳт бегимлар бор, худога шукур... Аммо у ўзини барибир танҳо сезади. Балки салатанатнинг баланд мартабаси, давроннинг юксак чўққисида турганлиги боис — у

ерда эса жой фақат битта! — ёнида ҳеч ким кўринмас? Балки, жаҳонгириликни ният этгани сабаб у танҳоликни тез-тез ҳис қиласидиган, ўйладидиган бўлиб қолгандир? Ахир жаҳонгирилик шерикчиликни ёқтирмайди. Жаҳонгирилик — танҳолик деганидир.

Шу пайт орқадан бир аёл кишининг журъатсизгина товуши эшитилди:

— Амир соҳибқирон ҳазратлари...

Амир Темур оҳиста айтилган ширали, ботинан кучли бу овозни кўрмай туриб ҳам, ўнлаб-юзлаб овозлар ичидан ажратади. У шимол ёқдан кўз узмай маҳди улё Сароймулхоним келганини билди. Сароймулхоним Амир Темурга қарашга ботинмай таъзим бажо қилди-да, назокат билан тахт пойидаги ловуллаган гиламга тиз чўқди, узун қирмизи кўйлагининг кенг ба-роқ-бароқ барлари буткул тахт пойини згаллаб олди. Эшитилар-эшитилмас, ўз-ўзига айттандек:

— Энди... ҳеч кимга йўл йўқ... — деб қўйди.

Ноз билан айтилган самимий сўзлар, гўё «Танҳолик оламининг ягона соҳибаси мендурман!» деган мълони англаштиргандай эди. Малика хиноли нозик бармоқлари билан Амир Темурнинг ногирон оёрини майин уқалай бошлади.

Шундагина Амир Темур шимол ёққа михланиб қолган нигоҳини узди ва Сароймулхонимга тикилди. Ажабо, унинг ўзини танҳо ҳис қилган вақтларини маҳди улё, ҳали янги келинчак Сароймулхоним дарҳол сезиб олади ва танҳолик балосига балагардон бўлишга шошилади. Ҳозир ҳам, малика саропарда ичиде экан, Амир Темур ҳолатидаги ўзгаришларни пайқади-ю чиқиб келди ва ҳеч қандай сўз қўшмай, соҳибининг олий фармонига мунтазир жория мисоли сокин ўлтирди.

— Биби...

Сароймулхоним энди аста бош кўтарди ва нимтабассум ила Амир Темурнинг катта-катта қўзларига қиё боқишига журъат этди:

— Ҳазратим... — деди маҳди улё, тағин ўз ишига машғул бўлди.

Амир Темур Сароймулхонимнинг келинчаклик ма-лоҳатидан гул-гул очилиб кетган кўрку жамолига, қирмизи оқ юзига, икки чеккасидаги икки зулфига, бежирим ёқут лаблари, бурни-ю қошлирига завқ-шавқ ила термилди. Чап юзидағи чиройли ягона холидан неча бор ютоқиб-ютоқиб бўсалар олган экан, — са-

наб ўлтирган... Қора хол, мени унугиб қўйдингиз-  
ку, дегандай хафа, аччиғидан яна ҳам қорайиб кетган-  
дек қўриди...

Амир Темур билан Сароймулхоним куёв-келин-  
лик давронида масти мустафариқ эдилар. Уларнинг тўйи  
олти ой аввал Шахрисабзда бўлиб ўтди. Етти кеча етти  
кундуз карнай-сурнай овозлари юрт осмонини тутиб  
ётди. Қозонлар ўчоқлардан тушмади, майдонлар улоқ-  
чи отлардан бўшамади. Тўйнинг еттинчи куни калапат-  
ра бўлиб елиб-юрган янгалар заррин либосларга бур-  
канган келин-куёвни ёр-ёрлар жарангголари остида  
чимилдиқ хонасига олиб кирдилар ва саккиз қават ипак  
кўрпаларга киритиб қўйдилар. Бир пайт хонадан ҳам-  
манинг чиқиб кетгани сезилди... Амир Темур қараса,  
қайлиги катта шоҳона жойнинг у четида мусичадекки-  
на бўлиб ётиб олибди. Худди бегоналардек. Амир Те-  
мур Сароймулхоним томон қўл юборди... Қайлиги бу-  
тун вужудига титроқ кириб ожизгина унинг қўлларини  
ўзидан нари итарган бўлди, куёв иддаосини қўймади.  
Бироз ўтмай Сароймулхонимнинг муаттар бўйларга  
кўмилган хушбичим қомати Амир Темурнинг фароғат-  
га ташна саҳродай кенг бағрига сингиди кетди...

Амир Темур тонг отар-отмас хонани тарқ этди. Одам-  
лар айтишмасин тагин, куёв жуда ҳам ўлиб турган экан-  
да, деган андиша ўртада туради. Кўчада уни куёвжўра-  
лар Амир Сайфиддин некўз, Амир Сорибуғ жалойир  
ва Муҳаммад Чуроға додхоҳлар кутиб олишди. Амир  
Темур яқинлашар экан, амирларнинг девор ортидаги  
ўзаро пичир-пичир гаплари қулогига чалинди:

— Амир соҳибқирон кечаси билан қўш ҳайдаб чиқ-  
қан бўлсалар ҳам чехралари тиник, қадамлари ил-  
дам... — деди ингичка овозли шартаки Амир Сорибуғ  
жалойир.

— Ҳа, худо ярлақабди куёвимизни... — жавоб қил-  
ди Амир Сайфиддин некўз. — Кўнгил тортар ёр бўлса,  
шундоқ бўлади...

Амир Темур мийифида кулиб қўйди.

Куёвни Амир Сайфиддин некўз ҳовлисига олиб кет-  
дилар. Таом ейилгач уни ҳордиқ олсин дея, салқин  
холи хонага киритиб юбордилар. Амир Темур бутун  
шомда оғатижон келинчак билан тагин дийдорлашув-  
нинг қандоқ бўлишини ўйлай-ўйлай ухлаб қолди...

Хаш-пащ дегунча бир ой ўтиб кетди.

Амир Темур умр лаззатидан сархуш эди, Сарой-

мулхонимнинг ҳусни малоҳати, меҳру муҳаббати, қайноқ оғуши, нозу таманноси, жон олар эркаланишларидан таърифи йўқроҳат-фароватларга чўмар экан, ушмундоқ бир нозик адони яратиб, унинг илтифотига мушарраф этган парвардигорга ҳар сафар шукроналар айтарди. Энди у ўзини ёлғиз, танҳо сезганида сулув Сароймулхоним чодиридан паноҳ излайдиган бўлиб қолди. Шу ерда у дунё ташвишларини унут айлар, ўзлигини бутунлай унинг қўлига топшириб қўйган пок насабли гўзал маликага соҳибу ҳамхоналиқ туйғуси қонини боз-боз кўпиртирас эди.

Амир Темур ҳозир ҳам оёғини уқалаёттан Сароймулхонимнинг чап юзидағи ягона қора холидан кўз узолмай қолди...

Бирдан Мовароуннаҳр султони ўрнидан турди. Маликани лол қолдириб «Юринг!» дегандек, қўлидан ушлади, кейин дарров қўйиб юборди ва уч юз қадамча наридаги, буткул лолалар билан қопланиб, лов-лов ёниб кўзни олаёттан кичик тепаликка қараб туша бошлиди. Шу лаҳза унда Сароймулхоним билан ёлғиз майсазорлар аро кезиш истаги голиб келди. Самарқандда ҳам баҳор фасли эди, бир кун султон билан малика сайр этиб жануб томонга Сиёб бўйига бордилар. Амир Темур аввалдан ёқтириб юрган каттагина майдонда тўхтаб, айланишиб юрдилар. Кейин шу ерга дараҳт ўтқазмоқчи бўлиши, Амир Темур уя қазиди, Сароймулхоним бақувват ниҳолни тутиб турди. Султону малика яхши ният билан икки туп чинор экдилар. «Бу ер бофимиз бўладир, Биби, иншоolloҳ, Боги Чинор бўладир», — деди Амир Темур ўшанда. Расида чинор кўчатларига боқар экан, Сароймулхоним хаёлидан бир нарса ўтгандай бўлди: «Ниҳол — фарзандга ўхшайди-я. Оллоҳ ўзларига ҳам шу чинорлардай азamat фарзандлар ато қилсун! Ноумид шайтон!..»

Улар тепаликка етай деб қолдилар. Оддинма-кетин пастга тушиб боришаёттан султону малика узокдан худди дунё ташвишларидан холи чопқилашиб, ўйнашиб юрган болакай билан қизалоқча ўхшардилар. Амир Темурнинг олтиндай товланаёттан зар чопони, Сароймулхонимнинг қирмизи кўйлаги ям-яшил майсазорлар ичра яққол ажралиб туради.

Амир Темур тепаликка чиқди, малика сал қўйирокда тўхтади. Ақиқдай қип-қизил лолалар уларни ҳар томондан ўраб олишибди. Осмон тип-тиник, по-

ёнсиз майсазор, гүё оламда Оллоху иккиси холос, бошқа ҳеч ким йўқ эди соҳибқирон назарида. У лолалардан бир нечасини узмоқчи бўлиб атрофга аланглади. Лолалар: «Мени ол!», «мени уз!» дегандай талashiшиб уни шошириб қўйишиди. Бири-биридан гўзал, бири-биридан нафис... Амир Темур иккита лола танлади ва соҳибқироннинг бебадал меҳру ҳимматидан баҳтиёр Сароймулхоним ёнига келиб икки зулфининг тепасига тақиб қўйди. Маликанинг қирмизи оқ юзи, лолаларнинг ранги урди шекилли, яна оловланди, чап юзидаги хол эса бадтар қорайди. Амир Темур Сароймулхонимни уялтириб, унинг дилрабо чехрасига бир дам тикилиб турди, аммо ҳеч нарса демади. Аксинча, Сароймулхоним чираб туrolмади, ёқимтой кўзларини қадаб:

— Ҳазратим... нима бўлди? — деб сўради кулимсираганча, аммо саволига жавоб ололмади.

Амир Темур энди тез-тез лолалардан уза бошлади. Бир даста бўлгач, келиб Сароймулхонимнинг қўлларига тутқазди. Маликанинг қучоги лолаларга тўлиб кетди. Умри бино бўлиб ҳалигача, ажабо, шунча лолани кўрмаганди. Лолалар бири-бирига гал бермай Сароймулхонимнинг ҳаяжондан кўтарилиб тушаётган нафис кўкрагига бош қўяр эдилар. Тепалиқдаги лолалар эса Амир Темур билан Сароймулхонимлар атрофида қувончдан ўзларини қўйгани жой топа олмай майин чайқалишда давом этардилар...

### III

Шом маҳали Муҳаммад Чуроға додҳоҳ кириб, Амир Сайфиддин некуз зудлик билан қабул қилишларини сўраганини маълум қилди. Мамлакат ва раъият вазири амир Сайфиддин некўз соҳибқироннинг ишонган устунларидан, ҳумоюн ўрдуга истаган вақтда кира олиши мумкин. Аммо у одоб доирасида юришни яхши кўрарди.

Амир Темур некўзлар қабиласининг бошлиғида бироз ташвиш аломатлари борлигини сезди. Соҳибқирон пири муршид Мир Сайийд Барака, қиссаҳон Мавлоно Убайдлар билан сұхбатлашиб ўлтиради.

— Тинчликми, вазир жаноблари? — қуюқ, қошлиари бир-бирига интилди Амир Темурнинг.

— Ҳўш... — одатдагидек томоқ қириб қўйди Амир

Сайфиддин некуз салом-алиқдан сүнг. — Иншооллоҳ, тинчлик... Тинчлик...

— Саваш майдонидан чопар келдиму?

— Йўқ, Амир Соҳибқирон... Ҳали чопар йўқ... Аммо бошқа ёқимсиз бир гап эшилдим. Илонлар пўст ташлайдир.

Амир Темур унга энди ҳайрат билан боқди:

— Ёқимсиз бир гап эшилдим?..

Қиссаҳон Мавлоно Убайд ўзини ошиқча сезди-ю кетишига ижозат сўради ва оҳиста сирғалиб саропардадан ташқари чиқди.

— Ҳа... Бир қошиқ қонимдан кечасиз, Амир соҳибқирон. Муборак хотирингизни безовта айлаб, тарин ул бадният борасинда сўз қотмакка мажбурмен... Хўш... айтмасам дилим куядир, айтсан тилим...

— Қайси бирлари борасинда сўз қотмоқчилар, амир жаноблари? — кинояли сўради Амир Темур. — Улар бир нечта... бор...

Мир Саййид Барака унга маъноли қараб қўйди, аммо сўз қўшмади.

— Хўш... Шибирғон ҳокими Зиндачашиб опардий, Амир Мусо ва Абу Исҳоқ Ясовурийлар шум ният этагидан тутмишлар. Ҳудовандзода Абул Маолий Термизий ила шайх Абулворис Самарқандийлар уларга қўл бермишлар... Қаросмон<sup>1</sup> деган жойда шикор қилаётган чорингизда, худонинг ўзи асрасун, Сизни, Амир соҳибқирон ҳазратлари, тузоқча туширмоқча аҳду паймон этмишлар, баҳти қаролар... — куйиниб гапиранкаркан Амир Сайфиддин некўз очиқдан-очиқ «Жонингизга қасд қилмоқчи эканлар», дея олмади, аммо Амир Темур буни тушуниб етди.

— Ла ҳавла вала қуввата, илла-биллаҳ! — деб юборди пири муршид мухолифатчилар ичида Абул Маолий Термизий ҳам борлигини билиб.

Амир Темур чиндан ҳам бу ерга келган куни ақобириу аъёнлар орасида, Қаросмонга овга чиқиш нияти борлигини ошкор қилганди. Умуман, у овни жонидилдан яхши кўрарди. Дунёда ов қиласиган жой иккита бўлса, бири Қаросмон, битта бўлса шунинг ўзи, деб ҳисобларди соҳибқирон.

— Бу хабар қайдин етибдур? — хотиржам сўради Амир Темур, чехрасида ҳеч қандай ўзгариш сезилма-

<sup>1</sup> Қаросмон — Ўтрор яқинидаги бир мавзе.

ди. Аммо Амир Сайфиддин некўз, унинг соқол учини икки бармоғи орасида қаттиқ эзгилаётганини кўрди.

— Хўш... Абу Исҳоқ Ясовурий, воқиф эрурлар, заифамизнинг биродари туур. Шу ҳақда аҳду паймон қилиниоч, ўзини ҳавосат босиб, жанобингизни огоҳ этиб қўйди... Хизринг валади...

Саропарда ичига жимлик чўкди. Ташқарини қоронгулиқ қоплаган, очиқ эшиқдан шимол ёқда олис-олисларда ловуллаб ёнаётган қоровулларнинг гулханлари кўзга ташланади.

Амир Темур гулханларга тикилар экан:

— Халлоқи безаволга салламно! — ўзининг яхши кўрадиган сўзларини тақрорлади. — Балога ўзи рўбарў айлаб, чорасини ҳам ўзи етказадир...

Сўнг «бунга нима дейдилар?..» дегандек пири муршидга қаради. Мир Сайийд Барака ҳам фурсат пойлаб турган эди, дарров сўз бошлади:

— Амир соҳибқирон, куфрони неъмат ила ношукурлик бандасига берилғон тутма табиатдур, вовайлолар бўлсун! Кўрнамаклик ва фирибгарлик анинг безаклари... Шибирғон ҳокими ва ҳамтабақлари ҳаққинда нима ҳам дейин? Авваллари ҳам ушмундоқ адабсизлик зоҳир этғонларида ҳимматингиздан кўп гуноҳларини тилаб олдук. Мана, жанобингиз Зиндачашиб опардий билан худованձода — шунга бир йил ҳам бўлмади ҳали, — Термизни ғорат қылғонларида шу тийиксиз тилим бирлан, шайтони лаъин буларни йўлдан оздирибдур, бу сафар ҳам хатоликларини афв этсунлар, деб сиздан ўтиндим... Ҳа, ҳа, ўтиндим... Аммо тадбири тақдирига мос келмағон ул бадҳоҳларнинг қора ниятини билиб, қоним қайнаб кетди, астагфуриллоҳи ал-азим! Энди тилим бирон калимага келмай туур, Амир соҳибқирон...

Амир Темур соқол учини эзгилашда давом этарди.

...Салтанат қўшинлари Жета ёқдан ғолибона қайтишгач, ҳумоюн ўрдудан, бир ой музafferият нашидасини суриб, ҳордик олинсан, деган олий фармон бўлди. Амир Темур Баҳром жалойирнинг жангда ҳалок бўлганини эшишиб, афсус чекди. «Жалойирлар ичиди инсофлиси шу эди, начора, Оллоҳнинг хоҳиши, ўрнига ўғли бор-ку!» дея ўзини юпатди ичиди Амир Темур. Савашда қаҳрамонлик намоён этган амирлару баҳодирлар жасорати ҳамманинг оғзида. Ҳусусан, Зиндачашиб опардий лашкари илғорлик кўргизиб, жуда кат-

та ўлжаларни қўлга киритибди. Опардийнинг ўзи ғаним тўпини ёриб, турини йиқитибди, оқибатда Жета қўшини қочишга юз тутибди. Манаман, деб керилиб юрган Аббос баҳодир ҳам, Одилшоҳ жалойир ҳам унинг соясида қолиб кетишганмиш... Ҳамма, айниқса, Зиндачашм опардийнинг ўзи катта сийловлардан умидвор эканлигини яширмас эмиш...

Бир ҳафтадан сўнг, Абулмансур соҳибқирон Амир Темур Кўрагон ҳазрати олийлари шикорга азму қарор қилдилар ва фалон куни Қаросмонга йўл оладилар, деган овоза тарқалди. Шибирғон ҳокими, Амир Мусо, Абул Маолий Термизий, Абу Исҳоқ Ясовурий ва Абулворис Самарқандийлар, қачон шундай кун келаркин, дея пойлаб юришарди. Ўша куни сахар улар асъаса-ю дабдаба билан Қаросмонга отландилар. Қаросмон бир томони баланд-чақир чўл, бир томони хилват чангальзорлардан иборат шикорбоп жойлардан саналарди. Катта ов иштиёқида отларга қамчи урган Зиндачашм опардийлар Қаросмонга етиб келганларида ҳали Амир Темур Кўрагон ҳазрати олийларидан дарак йўқ эди. «Хайрият, ҳаммадан аввал келибмиз...» — хурсанд бўлиб кўйди ичиди Зиндачашм опардий. Бирон хилватдан мъкулроқ жой топиш ниятида йўлни чангальзор ёқка буришди. Шу пайт рўбарўдан чангальзордан бир бўри отилиб чиқди, отликларни кўрди-ю ўнг томонга бурилиб чўл томонга қочди. Чамаси кимлардир уни қувиб келмоқдайди. Зиндачашм опардий бўри овини жуда яхши кўрарди. У бўри изидан от солмоқчи эди, Амир Мусо бунга йўл бермади:

— Полвон, шер турганда... аллақандай бўрига вақт сарфлаш на ҳожат? Бунчалар паст кетмангиз, ҳоким жаноблари!

— Аммо бир лаҳзада тутардим-да!.. Майли, қўймадингиз... — Зиндачашм опардий бўри овини кейинга қолдирди.

Улар бамайлихотир чангальзорга яқинлашган ҳам эдиларки, етти ухлаб тушга кирмаган ҳодиса рўй берди. Рўбарўдаги бир тўп қора чантал ортидан Аббос баҳодир бошлиқ ўтизга яқин паҳлавон сипоҳлар ўқдай отилиб чиқдилар-да, ҳе йўқ, бе йўқ, уларга ташландилар ва қўлларини орқага қилиб боғладилар. Аббос баҳодир зудлик билан ҳумоюн ўрдуга мухолифатчилар қўлга олинганлиги ҳақида чопар жўнатди. Ҳеч нарсани хаёлига келтиришмай орқароқда қолишган Зинда-

чашм опардий сипоҳларидан беш киши, улар ичида Амир Мусонинг йигити Тармочук ҳам бор эди, амилар тутилганини кўришиб, қўрқувдан тумтарақай қочиб қолишиди.

Воқеа кўз очиб юмгунча бўлиб ўтди. Ҳайрат ичида лол қолган Зиндачашм опардий, нима гап, деб сўраб ҳам улгурмади. Албатта унда, Аббос баҳодирлар хато қилдилар, бироздан сўнг танишиб: «Э, билмабмиз, сизларни фалончилар, деб ўйлабмиз!» дейдилар-да, қўлларини ечиб юборадилар, деган ишонч устивор эди. Бироқ Аббос баҳодирнинг хотиржам эканлигини кўрган Зиндачашм опардий вазиятнинг у ўйлагандан кўра жиддийроқлигини фаҳмлай бошлади.

— Не қилмақдасиз, баҳодир?.. Танимадингиз чоғи... Бошқа деб ўйладингизму? Ҳеч қиси йўқ... Адашувчилик, хато шунақа, бўлиб туради ҳаммада ҳам... Қўлларимизни ечингиз, баҳодир! — Зиндачашм опардийнинг қисиқ кўзлари катта-катта очилиб кетган, офтобда қовжираган яккам-дуккам майсалардекmallarang соқоли чорасиз тикрайиб турарди. — Амир соҳибқирон ҳазрати олийларининг ишонган амирини, унинг дўстларини ҳибсга олмак, аёндурки, салтанатга қарши фитнадур! Ҳали, иншоollox, жазонгизни олурсиз!

— Тушундик... Бизга фитна қилинғон... — деди Амир Мусо секин.

— Овга чиққанларнинг ўзлари овландилар... — сўзга қўшилди Абу Исҳоқ Ясовурий. Зиндачашм опардийга бу гап қизиқ туюлди, унинг самимий айтилдими ёки киноя, кесатиқми эканини тушуна олмай қолди, ўйлаб кўришга фурсат йўқ эди. Бошқаларнинг эса бошлари эгилган, лом-мим дейишмасди.

Уларга дарҳол қоп кийгиздилар ва аробага орқа-орқа ўтқазиб қўйдилар. Чайқалиб бораётган Зиндачашм опардийни бир ўй кемираради, у ҳамманинг ҳам кўнглидан шу палла ўхшаш хаёллар кечаётганини сезарди: «Амир Темурни ўлдирмоқчи бўлганимиз ҳақидаги сирни ким... ҳумоюн ўрдуга етказди экан?.. Ким? Ким?.. Амир Мусоми? Йўғ-е! У доим ёнимда бўлдику! Абу Исҳоқ Ясовурийми? Асло! У Амир Темурнинг ашаддий душмани-ку! Абулворис Самарқандийми?.. Абул Маолий Термизийми? Пиру муршид ва шайх...» Аробага қўшилиб унинг хаёллари ҳам чайқала бошлади. Ким?.. Ким?.. Қани энди иложи бўлса-ю Зинда-

чашм опардий ҳар бирининг кўзига узок-узоқ тикилса, бор сир-асрорни билиб, билиб олса! Кошки эди!..

— Гуноҳимиз недур?.. — бўғилиб деди Зиндашм опардий яна тили қалимага келиб. Унинг овози қоп ичидан қовоғари йўнғиллашидай эшитилди. — Гуноҳимиз не? Кечани кеча, кундузни кундуз демай, қон кечиб, майдонда от суриб, Амир соҳибқирон деб, салтанат деб жонимизни фидо қилишга тайёр турғонимизми айбимиз?.. Ёраб, бу қандай сийлов бўлди?..

Амир Мусо ҳам ўзича нималарнидир ғудраб борарди.

Аббос баҳодир ҳеч қайсисига жавоб бермади. Унинг одамлари худди оғизларига толқон солиб олгандай чурқ этмасдилар.

Ароба ҳумоюн ўрдудан тўрт юз қадамлар берида жойлашган Аббос баҳодир чодири олдида тўхтади. Бу ерда Амир Темур ҳузурига юборилган чопар муҳим топшириқ билан қайтиб келиб, Аббос баҳодирни кутиб турган экан. Аббос баҳодир шошилинч, тутқунлар олдидаёқ сўзламоқчи бўлган чопарга: «Тўхта!» ишорасини қилди. Сўнг бир чеккага тортиб секин гапириш лозимлигини уқтирди. Чопар дона-дона қилиб деди:

— Амир соҳибқирон ҳазрати олийлари фармон қилдилар: фақат Амир Мусони олиб ҳумоюн ўрдуга етиб борар эмишсиз!..

#### IV

Қаросмон мавзеида Зиндашм опардий бошлиқ мухолифатчилар қўлга олингани, уларнинг ичидаги Амир Мусонинг ҳам борлиги Сароймулхонимни қаттиқ ташвишга солиб қўйди. Нима қилса ҳам қариндош, жигар ахир. Қандай чора бўлиши мумкинлигини ўйлаб ўйига етолмай турганда, кўз ёши дарё Орзумулк оқа кириб келди-ю ўзини унинг оёғига ташлади ва кўйлаги барларини ўпганча ялиниб-ёлвора бошлади:

— Ёрдам берингиз, маликам! Хонам куйди! Ёрдам берингиз! Войдод! Хонам куйди, куйди-и-и!.. — Орзумулк оқанинг қорамагиз чиройли юzlари кўз ёшларидага чўмилар эди.

Сароймулхоним Орзумулк оқани дарҳол ўрнидан турғизди. Нима гап деб, сўраб ўлтирмади. Сўраса, бекорга келинининг бағрини ўяди. Аксинча, юпатадиган сўзлар қидириши, топиши керак... Улар бир-бирлари-

га яқин, ёшлари ҳам тенг, сирдош дугона эдилар. Бундай яқинлик Сароймұлхонимнинг ҳали Амир Ҳусайн ҳарамидалик пайтидан, балки ундан ҳам олдинрок башланган, ҳозиргача давом этиб келади. Бир-бирлари номларини аташмай, ҳурматан «Қиз!» деб чақирадилар. Эрлар ўртасидаги мұносабатлар қандай даражада эканлиги хотинларнинг тотувликларига ҳеч таъсир қила олмасди. Ҳарқалай, шу пайттака биронта шундай бўлган ҳодисани эслай олмайдилар.

— Амиримни фитначилар йўлдан урибдур, йўлдан урибдур! — деди Орзумулк оқа. — Унинг айби йўқ, қиз, унинг айби йўқ! Амир соҳибқирондан бўлангизнинг қонини сўраб берингиз! Илоё, дунё тургунча турингиз!

Сароймұлхоним бўласи Амир Мусонинг бекарор феъл-авторли эканлигини билар, унинг Амир соҳибқирон ҳазратларига ҳамиша душманнамо кайфиятда юришини ич-ичидан ёқтирамас эди. Учрашганларида, уни неча бор инсофга чақирди, Орзумулк оқага доим: «Бўламларни йўлга солингиз, ҳой қиз!» деб тайинлади. Аслида у соҳибқиронга дўст, аммо шу мақомда барқарор тура олмайдир... Начора, ҳамма нарса Оллоҳдан...

... Мұҳаммад Чуроға доддоҳ саропардага яқин келиб, мурожаат қилди:

— Маҳди улё жаноби олиялари! Амир Темур Кўрагон ҳазратлари арзадоштингизни эшитишга тайёрдурлар!

Сароймұлхоним хос саропардадан чиқиб учрашувга шошилди. Бу пайт соҳибқирон таҳтдан тушиб, ҳумоюн ўрду олдидағи ям-яшил майдонда хаёлга чўмганча кезиб юрарди. У маликага пешвоз чиқди, ҳаяжондан қирмизи оқ юzlари қонталашган, бундан боз ҳусни ортган Сароймұлхонимни чап ёқдаги саропардага олиб кириб кетди...

... Ҳумоюн ўрдуда Мир Сайид Барака, Амир Сайфиддин некўз ва Одилшоҳ жалойирлар ўлтиришар эди. Шу палла Аббос баҳодир бошига қоп солинган Амир Мусони етаклаб кирди. Қопни олганларида юзлари шувит Амир Мусо уятдан иргиб чиқдан кўзларини ерга қадади. Яна ҳам дўнграйиб кетган манглайи ўзини яширгани жой тополмасди.

Ҳеч ким сўз қотмас, ҳамма Амир Темур оғзини пойларди. Сукунат бироз чўзилди.

— Бағоят улуғ гуноҳ содир бўлди... Улуғ гуноҳ...

Аммо орамизда қариндошлиқ ришталари бўлғони учун сени авф этдим, соқолингни оқи ҳурмати, мухолифат мақомини тутсанг-да, гуноҳингдан ўтдим... — деди ниҳоят Амир Темур. У, маликанинг хешу акрабоси бўлурсан, демакчи эди, айттиси келмади. — Ҳар бандага Олоҳнинг ўзи инсоф берсун!

Барча Соҳибқирон қарорини олқишиладилар. Амир Мусо қўллари ечилгач, эмаклаб бориб амир Темур чопонининг этакларини ўпид кўзларига сурта бошлади:

— Энди кўзим очилди, Амир соҳибқирон! Тушундик!.. Ортиқ мухолифат отини атамасмен! Бу қовоқ калла энди тушунди! Энди тушунди!..

Амир Сайфиддин некўз бу сўзларни эшитар экан, беихтиёр ўттан йил Амир Темур чорбогида, Шаҳри-сабзда бўлган ҳодисани эслади. Ўшанда ҳам, ажабо, Амир Мусо: «Мендан ўттан бўлса бир қошиқ қонимдан кечасиз деганди». Амир Довуд дуғлат: «Кечадурғон қони қолдиму эркан ўзи?..» деб шивирлаганди унга. Бундан кейин қанча алдоқчи сувлар оқиб ўтиб кетди-ю...

Амир Темур давом этди:

— Худованзода Абул Маолий Термизийнинг мухолифатта қўшилиб қолғони, афсуслар бўлсунким, кундуз кунидай равshan. Кўз юммоқ мушкул. Аммо ҳазрат рисолатпаноҳнинг<sup>1</sup> табаррук зурёдларидан бўлғони сабаб сабру тоқат этагидан тутамен ва унга ёмонлиқни право кўрмаймен. Шайх Абулворис Самарқандий бирлан иккиси муборак Ҳижоз сафарига равона бўлсунлар. Хизрнинг валади... — Соҳибқирон унинг номини атагиси келмади, буни ҳамма сезди. — Амир Сайфиддин некўз шафоатликка ўтғонларидан сўнг унинг қонидан кечдук...

Амирлар енгил сўлиш олдилар ва қўллаб-қуватладилар:

— Адолатли ҳукм бўлди!

— Одил ҳукм! Одил ҳукм!

Ҳамма мухолифат бошлиғи ҳақида қандай фармон бўлар экан, деб интиқ эди.

Амир Темур хаёлидан, агар амирул умаро Амир Жоку барлос ҳозир бўлганда, дарҳол Зиндачашм опардийнинг қонини сўраб олар эди, деган фикр кечди.

<sup>1</sup> Яъни, пайгамбарнинг, мъяносида.

Унинг бебошвок, қилар ишини билмас Шибирғон ҳокими билан оғайничилиги бор... Аммо амирул умаро пойтахт Самарқандга кеттан... Бошқа ҳеч ким юрак ютиб Шибирғон ҳокимининг ёнига туша олмайди.

Амир Темур бу ғал ҳам ўзбошимча амир гуноҳини кечиришни истарди. У кимгадир жазо бериб, ўзи ҳам руҳан жазоланишини, кўнгли эзилишини биларди, аксинча, бирорни сийласа эл олдида, худо олдида ўзи ҳам сийланадир. Бандасига умрни, жонни Оллоҳ берадир, нега энди у олиши керак? Ёш Турон султони бир эътиқодга боғланиб қолган. У, кечира билиш мардликдур, кечира билмаслик номардлик саналур, деб ҳисоблади. Кошки, подшонинг умри сийлаш, ҳадялар айлаш билангина ўтса!.. Кошки эди!.. Аммо, Хорун ар-Рашидга эди шекилли, соҳибқирон яхши эслай олмайди, бир донишманд шундай деган экан: «Қайси фуқароки, подшоҳнинг сийлов-марҳаматини кўрса, раҳм-шафқатидан баҳраманд бўлса, шуни била туриб, душманлик аён этаверса — у чиндан-да шайтоннинг нақ ўзиdir. Қайси подшки, ана шундай шайтоннинг қилмишларини кўриб, қаҳр-ғазаб отига минса, бироқ шижоатсизлик мақомига юз буриб, бепарволик кўргизса — у ростдан ҳам эшак ва ҳўкиз саноғидадир». Табиатан раҳм-шафқатли Хорун ар-Рашид ҳўкиз ва эшак саноғига тушиб қолмаслик чорасини кўришга мажбур бўлган экан. Амир Темур шуни эсларкан, истехゾ аралаш жилмайиб қўйди. «Шайтоннинг жазосини бермаган подшо, шубҳасиз, эшак ва ҳўкиз саноғидадир!» — деди ўзига ўзи қатъий:

— Сўғин... Шибирғон ҳокими Зиндачашм опардийни ортиқ менинг олдимга йўлатмангизлар, қорасини кўзимга кўрсатмангизлар! — Соҳибқироннинг ғазаблангани билинди. — Енг ичида илонни тарбият этиш инсофдан бўлмаганидек, душманни дўст деб билиш — ақл-идроқдан эмас. Ҳа, ҳар ким ўз қилмишига яраша насибасин олур!

Бу палла мухолифатчилар Аббос баҳодирнинг чодирида, уларни қандай қисмат кутаётганини билолмай, бошларида қоп, ич-этини еб ўлтирас эдилар.

Аббос баҳодир мухолифатчиларга фармони олийни етказиш учун шошилди.

## ЎН САККИЗИНЧИ БОБ

### I

Бонуи кубро Кутлуг Туркон оқа, Амир Темурнинг ғачиси Хоразмга кетган элчиларнинг ошиқлари олчи бўлиб қайтишларига асло шубҳа қилмасди. Шу сабабдан элчиларнинг қайтиб келганларини шавҳари Амир Довуд дувлатдан эшигтганида, беларвогина:

— Элчиларнинг зиёратлари қабул бўлибдирми? — деб сўради.

— Иншоолло, шундай бўлса керак... — деди Амир Довуд дувлат кутилмаганда совуққина қилиб, чиндан ҳам у элчиларнинг қандай янгилик билан қайтишганидан бехабар эди. Дарвоза олдида сайис гижинглаган ғарлоғлик отнинг жиловидан ушлаб турарди. — Амир соҳибқирон Жетадан қайтганларида биламиз да янгиликни...

Самарқанд доруғаси бугун шаҳар қурилишлари мутасаддиси Амир Оқбуто найман билан Кўксарой кошонасини кўришлари лозим. Тўртинчи ошёна бўй чўзиб қолган, кошона тез кунларда битмоғи керак. Пойтахтнинг жанубидан шимолга Тошкентта қараб эса катта шоқйўл тушаётир, йўлнинг бўйида икки ошёнали савдо расталари маржондай тизилади. Амир Довуд дувлатнинг умри шу ерда ўтмоқда эди.

— Ие! Нима экан, Сулаймоншоҳ, айтаколсангизчи! — Эр хотин бир-бирларига болаларининг отини айтиб мурожаат қилишарди.

Амир Довуд дувлат ўнг юзида қолган билинрабилинмас қилич изини силаб қўяр экан:

— Чоғимда... Алуфа тавочининг қадам олиши сустлигидан ноумид қайтишган кўринади... — деди-да, дарвозага йўналди.

— Ноумидликдан худо асрасун, илоё!.. — деб қўйди Кутлуг Туркон оқа юраги «булк» эттанча, аммо бошқа сўзга оғиз очмади.

У ҳовуз устидаги салқин сўрига чиқди-да, оҳиста парқувга ёнбошлиди. Кенг ҳовлида жимлик ҳукм сурарди. Мулозим ўз иши билан банд дарвозахонада, ичкаридаги жорияларнинг ҳам овозлари эшигилмайди.

Кутлуг Туркон оқанинг ташвишланадиган жойи бор, элчиларнинг қандай янгилик билан қайтиши жуда ҳам муҳим. Жаҳонгир Мирзо билан Хонзода хоним муам-

моси бир чеккаси шунга боғлиқ. Ахир икки томон бир-бирига кўз олайтиришиб турса, қандай қилиб қуда-андачилиқ, қариндош-уругчиллик ҳақида сўз бўлиши мумкин?..

Шу палла дарвозадан чақ-чақлашганча Сулаймоншоҳ билан Жаҳонгир Мирзолар кириб келишди. Салом бериб сўрига чиқишар экан, хурсандликларини яширишмасди. Амирзодалар ўлтирган жойларида бир-бирларига сирли қараб-қараб қўйишар, ишоралар қилишар, гўё алланарсанидир айтмоққа чоғланишарди. Ҳамиша маъюсланиб юрадиган амирзода Жаҳонгирни шундай ҳолда кўриб ҳайрон бўлди, бир чеккаси қувонди ҳам. «Ҳали булар ёш-да, бола-да, бола... — хаёлидан кечирди Кутлуг Туркон оқа. — Оламнинг қаердан ўтаёттанини билишармиди-я. Амир соҳибқи-роннинг Хоразмдан интиқ хабар кутаётгани эгачига аён. У юртни тикламоқчи, асил ҳолига келтирмоқчи. Иккинчи томондан, Жаҳонгир Мирзо билан Ҳонзода хоним тўйини ҳам шунга боғлаб юбормоқчи, ўртада қариндош-уругчилкни йўлга қўймоқчи... Мана, Жета ёқдан хушхабарлар келиб турибди. Кепак Темур тавбасига таяниб, ўз иddaоларидан воз кечганмиш. Хоразмни ҳам тинчтиб олсайди, бирозгина хотиржам, роҳат-фароғатда умр кечирарди жони ором билмаган укажонгинаси... Аммо болалар буни қаёқдан билсун? Элчиларнинг олиб келган хабарларини билишмайди шекилли...»

Сулаймоншоҳ зимдан Жаҳонгир Мирзога қараб имо қилди-да, мен ҳозир уйга кириб чиқамен, эна, дея ўрнидан турди ва сўридан узоклашди.

— Энажон, эна... — сўзланди оҳиста Жаҳонгир Мирзо гўё истар-истамас... Амирзоданинг ҳаяжонлана ётгани кўриниб турарди.

— Энангиз бўйингиздан, амирзодам... Нима бўлди?.. Сиҳҳатингиз тузукми?..

— Оллоҳга шукр... Хоразмдан элчилар қайтиб келишди, эна...

— Ҳа... Эшитдингизму? Энди, амирзодам...

Кутлуг Туркон оқа ичida Жаҳонгир Мирзони юпатадиган, дилига малҳам бўладиган сўзлар қидира кетди. У оғиз очиб улгурмади. Жаҳонгир Мирзо бирдан, худди эркаланиб онасининг пинжига қисинган қулундай Кутлуг Туркон оқага ёндошиб қулогига нималанидир шивирлай бошлади... Амирзода ҳар доим ҳам

энасига гапни шундок қулоғига айтишни ёқтираради, кўз ҳам кўздан нари, ахир тикилиб туриб, айниқса, Жаҳонгир Мирзонинг гапидай гапни айтиш жуда қийин-да...

Қутлур Туркон оқанинг ўзи ҳам амирзода тутумидан гап нимадалигини фаҳмлаб турганди. Унинг чехрасига табассум ёйилди:

— Вой... Ана, ана... — дер эди у. — Йигитларингиз ҳам боришибди-да...

Қутлур Туркон оқа ҳалигина, бола-да, деб ўйлаган амирзоданинг катталардай иш туттанига, ақлу фаросатига қойил қолди: унинг йигитлари салтанат элчиларига қўриқчилар сафида боришибди, сониян, Хонзода хоним хабарини, ташаккурини олиб келишибди! Сайрга чиқсан Хонзода хоним маофасига «ҳужум» қилганлар ҳам, қутқарганлар ҳам амирзоданинг топқир йигитлари экан, шоввозлар.

— Бас, Хоразм мамлакатини забт этибмиз, амирзадам! Ўзим ўргилай бўйингиздан! — Қутлур Туркон оқа Жаҳонгир Мирзонинг манглайидан суюб ўтиб, елкасига қоқиб-қоқиб қўйди. Эна-бола мамнун эдилар.

## II

Кўп ўтмай соҳибқироннинг Жетадан ғолибона қайтиб келаётгани ҳақида қутлур мужда етди. Бу Амир Темурнинг Турон тахтига минганидан сўнг хорижга биринчи ҳарбий юриши ва биринчи бор музafferият турини баланд кўтариши эди. Аркони давлат, аъёну акобирлар Абулмансур Амир Темур Кўрагон ҳазрати олийларини муносибу мустаҳиқ кутиб олишга шайландилар. Жаҳонгир Мирзо укалари Умаршайх ва Мироншоҳлар билан бирга Амир Муайяд арлот кузатувида йўлга чиқди. Сулаймоншоҳ, Суорғатмишхон ўғли Султон Маҳмуд, Жаҳоншоҳ иби Жокулар изма-из юрдилар. Жаҳонгир Мирзонинг ўнбошиси Ахий Жаббор баҳодир ўз йигитлари билан амирзода муҳофазасини қиласи, у энди Хоразм сафаридан кейин хос қўриқчилар сардори этиб тайинланганди.

Соҳибқирон қизлари Оқа Беги хоним, Султон Баҳт бегимлар Қутлур Туркон оқа билан Ширин бика маофасида эдилар, икки ожизанинг ҳам волидайи мухтрамалари оламдан ўттан, опа-сингиллар уларни жуда авайлардилар. Оқа Беги хоним эндиғина ўн иккига

кирган, ҳалим табиат, юмшоқ күнгил, тортинчоқ, күхликкина бир қыз эди, секин гапирав, баъзан ёнидаги одам ҳам эшитмасди. У ҳам оғаси Жаҳонгир Мирзодек ҳамиша маъюс юрар, қоп-қора чиройли кўзлари подшо қизларига хос бўлмаган ҳолда мунгли боқар, нимага шундок эканлигини Қутлуғ Туркон оқа ҳеч тушуна олмасди. Амир Темур Оқа Беги хонимни жуда суюрди, бирон ёқдан Самарқандга қайтса ёки сафардалик чогида даставвал сўрайдиганлари ичида, албатта, ёқимтой қизининг исми бўлар, «Менинг момо қизим яхши юрибдими?» деб қўярди. Тўққиз ёшта кирган Султон Баҳт бегим эса бус-бутун унинг акси: тиниб-тинчимас, ерга урсанг осмонга сапчийди, бир жойда ўлтириш йўқ, қыз боламан демайдир, ўғлонлардек питрак. Қувонган эгачи унинг тутумини кўриб, инисига: «Амир соҳибқирон, шу қизингиз ўғил бола бўлиб қўя қолмаган экан-да, а!..», деб ҳазиллашгани ҳазиллашган эди. Бирор нарсани сўраб, жавобини кутиб ўткир кўзларини тикиб турган қизалоқда боқар экан, Қутлуғ Туркон оқа кўнгли ийиб, уни бағрига босганини билмай қолар, худойи таоло бизга бир қиз ато этмади-да, дея ўксиниб қўярди... Улар ортидан соҳибқироннинг завжаси Улус оқа ва канизаклар Тўлун оқа, Менгли бика, Тоғай Туркон оқалар маофалари бир-бирларига уланиб кетди.

Карвоннинг олди Суюртғатмишхон бошлиқ аркони давлат қадами эса Конигил ўтлогига етиб қолди.

Турли музофотлару вилоятлардан чақирилган нўёну амирлар, бекларбеги, улусбеги, доруға ва оқсоқоллар, калонтару қадҳудолар, хуллас, салтанат гуллари бу ерда жамулжам эдилар. Аркони давлат Дизакдан беридаги хушманзара дарада, Темир дарвоза деб аталган сўлим масканда Амир Темур Кўрагон ҳазрати олийларига пешвоз чиқмакка, палос ўпиш шарафига муюссар бўлмакка қарор қилди. Бу масканни соҳибқирон азалдан хуш кўрарди, йўл тушганда ҳар сафар бу ерда бир кеча қолиб ҳордик олиб ўтарди.

Самарқандда эканликларидаёқ Хутталон ҳокими Амир Кайхусрав дўсти Маҳмудшоҳ Бухорий билан гаплашиш имконини қидирди, аммо одам кўплигидан қулай фурсат учрамади. У жуда ташвишли кўринарди. Бухоро ҳокими Амир Кайхусравдаги таважжуҳни сезди-ю эҳтиёткорлик қилибми, рағбат кўргизмади. Дарага етиб келганларидан сўнг пайт топилгандай бўлди. Барча,

йўлга интизорликдан бошқа иш йўқ, атрофни томоша қилишга киришди. Суюрғатмишон Амир Довуд дутлат девонбеги иккиси сойнинг бўйига тушив кетдилар. Амирул умаро амир Жоку барлос ва Амир Сорибуто жалойир рўбарўдаги қояни яқинроқдан томоша қилмоқчи бўлиб, ўша ёқса юрдилар. Даромад ва давлат идоралари харажатлари билан шуғулланувчи вазир Амир Улжайту опардий Амир Оқбуто найман билан Кўксарой қасри чиқимлари ҳақида гаплашмоқчи бўлиб юарди, шу фурсатдан фойдаланиб уни ёнига чорлади... Амир Кайхусрав билан Маҳмудшоҳ Бухорийлар ҳам четроққа чиқдилар.

Шибирғонда кўришганларидан бери улар учрашмадилар. Аммо орада чопарлар қатнайвериб беш-олти чориқлари узилди. Амир Кайхусравнинг хоразмшоҳ Ҳусайн Сўфи билан дўстлиги орқасида Маҳмудшоҳ Бухорий, Абу Исҳоқ Ясовурий, Зиндачашм опардийлар ҳам Хоразмга серқатнов бўлиб қолишганди.

Бухоро ҳокими дўстининг бироз тўлишганини пайқади. Маҳмудшоҳ Бухорий, шундай кишиларни кўргандা, ичида: «Тавба, одамлар этни қаердан олишаркин-а?...» деб қўярди. У озиин, новча, эркаксабзига ўхшаган, тепакал бир одам бўлиб, гапни секин гапирав, гапини тугатиб, бир лаҳза сұхбатдошининг кўзига тикилиб туриш унга одат эди. Қисиқ кўзлари доим кулиб турганга ўхшарди.

— Хоразмшоҳ Ҳусайн Сўфига мен сўраган чопарни юборғон эдингизму, ҳоким жаноблари? — шивирлади Амир Кайхусрав, гарчи яқинларида бирон кимса бўлмаса ҳам. — Жанобингиз бундан бехабармен.

Маҳмудшоҳ Бухорий дубулрасини қўлига олиб, дастрўмоли билан терлаган тепакал бошини артди. Салқин тоғ шамоли текканидан миясининг қопқори очилиб қолгандай, роҳат қилди.

— Чопар юборроним йўқ...

— Ие, ие! Нимага энди? Нимага энди?..

— Чопар юборроним йўқ... — такрорлади хотиржам Маҳмудшоҳ Бухорий Хутталон ҳокимининг фижинганини сезмагандек. У сұхбатдошидан қўланса ҳид келиб кетганидан четта ўтрилиб давом этди: — Чопар юборроним йўқ... ўзим бориб зиёрат қилиб кела қолдим...

— Бундоқ демайсизму? Бундоқ демайсизму? Ҳа-ҳа!..

— Алуфа тавочи қандоқ қайтиб келганларидан хабарлари борму? — сўради энди Маҳмудшоҳ Бухорий, бир муддат шеригига тикилиб.

— Йў-ўқ... — ўсмоқчилади Амир Кайхусрав, гарчи ўвли Султон Маҳмуддан элчилар сафари ҳакида боргани сўраб билиб олган бўлса ҳам.

— Билурсиз... тез фурсатда... — Амир Темур келадиган томонга ишора қилди Бухоро ҳокими. Кейин дубулгасини кийди ва мавзуни ўзгартиришга тиришиди: — Омон-эсонликми? Соҳибқирон ҳазрати олийлари музаффарона қайтиб келаётирлар... Хутталон ҳокими хурсанд эмасга ўхшайдиларму...

Шу пайт Тошкент томондан буриу ва нақоранинг олис садолари аниқ эшитила бошлади. Дара оғзида даставвал Турон султонининг хос қўриқчилари кўринди. Амир Кайхусрав соҳибқироннинг хос мулозими Муҳаммад Чуроға доддоҳни таниди. Ҳа, Муҳаммад Чуроға доддоҳ онҳазратни кутиб олиш тайёргарлиги қандай аҳволдалигини билмоқ, лозим бўлса бошқармоқ, ниятида аввалроқ келганди. Бир ой олдин ҳали Тошкентда эканликларида Амир Довуд дурлат унга чопар юбориб, ҳумоюн ўрдунинг бу хусусдаги хоҳиш-иродаси билан қизиқсан, айни пайтда Муҳаммад Чуроға доддоҳ, фикрини сўраганди. Узокдан келар экан, хос мулозимнинг ўткир кўзи қоя тепасида мағрур ҳил-пираб турган салтанатнинг тўқ ҳаворанг байробига тушди. Унда бир-бирига ёндош тасвиrlанган учта халқа яраклаб туради. Байроқ ўтган йили Амир Темурнинг фармонига кўра ўрнатилганди.

— Жуда хурсандмиз, жуда хурсандмиз! — аламли деди Амир Кайхусрав. Унга Маҳмудшоҳ Бухорий жўрттага сўраётгандай туюлиб кетди. — Ҳа, дарвоҷе, Жетада қандай ҳодиса юз берганидан хабарингиз борму?

— Йўқ... — энди ўз навбатида ўсмоқчилади Маҳмудшоҳ Бухорий, аслида Амир Сайфиддин некўз шафоатликка ўтанидан омон қолган Абу Исҳоқ Ясовурӣ Бухорога бориб бутун тафсилотни айтиб берганди.

— Билурсиз сиз ҳам... Тез фурсатда... — Амир Темур келадиган томонга ишора қилди Амир Кайхусрав. Даставвал Зиндачашиб опардийларнинг аччиқ қиссасини айтиб бермоқчи бўлган Хутталон ҳокими, бундан ҳозир нима фойда, дея фикридан воз кечди. Кину

адоват дарёсининг наҳанг балиғи Зиндачашм опардий ўша дарёниг ўзида ғарқ бўлди. У бир лаҳза думи хўржунда қабилида тутаган Шибирғон машваратини эслади...

Аслида Жетадаги савашишга Амир Кайхусравнинг ҳам ўз лашкари билан иштирок этиши белгиланганди. Хутталон ҳокими Шибирғон ҳокими Зиндачашм опардий билан гапни бир жойга қўйиб, ўша ерда кўпдан ўйлаб юрган ниятларини амалга оширишни дилга туғищди. Улар Амир Темур Кўрагонни панҳона тузоқда илинтиришиб саранжом қилишади, дарҳол лашкарбошиларнинг ҳам барчасини тифдан ўтказишади ва Туронзамин тахтини қўлга киритишади. Кейин бир кечада кимдир Зиндачашм опардийнинг чодирига бостириб киради ва у дунёга жўнатади. ....Ва Турун тахтининг янги соҳиби ўша ерда эълон этилади, турли мамлакатларга фатҳномалар юборилади. Турун султони Амир Кайхусрав Кўрагон!.. Бутун хазина, мол-мулк, айниқса, ҳарам унинг қўлига ўтади. Ҳарам! У азалдан душмани Амир Ҳусайнни ўлдириб, унинг ҳарамига эга бўлмоқ, биринчи навбатда Сароймулхоним илгидан тутмоқни ният қилган... Нозик адо малика тўшагига кирмоқ орзусида! У аввалдан Қозон Султонхоннинг гўзал қизини суюб қолган, аммо ичида, буни бирорга айтмайди... Ҳа, душманнинг хотинини ўпмоқ, отини минмоқдан ўзга буюк фароват йўқ бу оламда! Ким айтса ҳам, билиб айтган!.. Мана шундай ширина орзуларга мустағриқ Хутталон ҳокими эртасига тонгда лашкарни бошлаб Жетага отланаман, деб турганда ҳумоюн ўрдудан, Хутталон қўшини Жетага юборилмасун, юрт муҳофазасида бўлсун, деган олий фармон келиб қолса бўладими! Эҳ, афсус! Яна не-не режалар барбод бўлди. Йўқ эса Темир дарвозада бутун Амир Темурни эмас, Амир Кайхусравни кутиб олардилар! Бу қутлуғ издиҳом, аркони давлат Хутталон ҳокими шаънига салламнолар айтаётган бўларди!..

Амир Кайхусрав атрофга назар ташлаб, соҳибқиранни кутиб олиш маросими жуда юксак мақомда ўтишига имон қелтириди. Боқди-ю ҳайратдан бармогини тишлаб қолди! Ростдан ҳам киши кўз ўнгида ажойиб манзара намоён эди. Шарқироқ сойнинг бўйидаги ёниб турган гиламлар тўшалган катта майдон ўртасида, супада, маҳобатли яшил саропарда олдида тўрт зинали олтин тахт соҳибини кутиб турибди. Ўнг томонда ар-

кони давлатга, чап томонда эса аҳли ҳарамга ранго-ранг чодирлар тикилган. Самарқанд тарафдаги сайдонликда томошалар бўлмоқда эди. Бир четда дор тикилган, муаллақчилар, масхарабозлар ҳурматда, вақти-вакти билан одамларнинг гурр этиб кулганлари эшишилади. Кимdir чинни ўйин намойиш қилмоқда, бошқаси илон ўйнатмоқда. Ўзини Рустами достондан кам кўрмайдиган полвонлар күштигирик иддаоси билан майдон кезади. Беданасини енгининг ичида сақлаб, хўроздини қўлтиқлаб, итини етаклаб юрган «бозбоз»лар дунёнинг гашти нимадалигини билмай, шундай роҳатижон ўйинларга бепарво атрофда ивирсиб юрган ана бу одамларга бокиб чин дилдан ачинишади, эсиз, умрлари беҳуда ўтаётир-да, деб қўйишади. Берирокда ўнлаб жаҳонгир қозонлар осилган ўчоқлар худди маъжусийлар маконини эслатади. Атрофни дор қилинган пиёзнинг ачқимтир ёқимли ҳиди тутиб кетган. Қозонлар тагидан қочган тутунлар, гўё бу гўзал манзарани тезроқ тепадан томоша қиласай дея кўкка ўрлаётгандай туюлади. Сув бўйида сўрида жойлашган машшоқлар созидан ёқимли наволар тараалмоқда, аммо улуг зот қадамига интизор одамларнинг эшишишга тоқатлари йўқ, ғало-ғовур ичида ўз-ўзлари билан андармон, оворалар...

— Амир Кайхусрав жаноблари! Амир Кайхусрав жаноблари! — унинг қўлидан ушлаб силкитди секин Маҳмудшоҳ, Бухорий. — Бундоқ хаёлни жамласунлар!

Хутталон ҳокими ҳушёр тортди:

— Ҳа-ҳа, қулогим сизда!.. — деди шоша-пиша дайди хаёллардан ҳамон қутула олмаган Амир Кайхусрав.

— Хабарлари борму?.. Соҳибқирон нури-дийдаси Жаҳонгир Мирзога Хонзода хоним қўлинни сўрамоқчи эмишлар... Қариндош-уруғ бўлмоқчи эмишлар...

Бир пайтлар Мовароуннаҳр ҳукмдори Амир Ҳусайн ҳам Хоразмнинг номдор қизига оғиз очиб овора бўлган эди; ўшанда Амир Кайхусравнинг фаши келган ва бир борганда Ҳусайн Сўфига бунинг учини чиқарган эди ҳам. Иккинчидан, Тошкентда Амир Кайхусравнинг қизи Руқия хоника туғилганда, Амир Темур дастурхон устидага унинг нон-тузини еб туриб, ўз оғзи билан Жаҳонгир Мирзога сўраган эди-ку? Аҳд-паймон қаттиқ эди-ку? Хонзода хоним Ўзбекхон набираси бўлса, Руқия хоника ҳам Чингизхон палаги... Энди Руқия хоника қолиб Хонзодага рағбатму? Бу қадар қарорсиз-

лик! Амир Кайхусравнинг худди эски яраси шилингандай бўлиб кетди, шокоса кўзлари қисилганча ихраб юборди:

— Оҳ-ҳо, ҳо-ҳо-о-о!.. Нотавон кўнгила га қўтири жомашов, денг?

— Секин-секин!.. — тинчлантириди Бухоро ҳокими. У Амир Кайхусрав оғзидан сачраган тупукни бурнининг учидан аста артиб ташлади-да, пичирлаб давом этди: — Буни айтишдан мақсад сизнинг ғашингизга тегиши ёки ғазабингизни қўзғаш эмасдир. Амин бўлингиз! Бошқа таклифим бор. Агар хоҳиш билдирсалар... Пахлавон фарзандингиз Султон Маҳмуд кўрганлар ҳавас қиласурғон бир йигит бўлиб вояга етди. Агар Султон Маҳмудга Хонзоданинг қўлини сўраб совчи юборсангиз, икки қуённи бир кесак билан урган бўламиз. Ҳа! Амир Темур Кўрагоннинг нияти амалга ошмай қоладир, бир. Хоразмшоҳ билан дўстлик ёнига қариндошлиқ шавкати ҳам қўшиладир, икки. Биз хоразмшоҳ Ҳусайн Сўфи билан ялакат магиздай бир бўлмагунимизча, икки жаҳонда ҳам Амир Темурга бас кела олмаймиз, бу кундай равшан! Хоразмшоҳ эса сиз сўрасангиз йўқ демайдур, йўқ дея олмайдур...

Бухоро ҳокими аламдан ўзини қўйгани жой топа олмаётган Амир Кайхусрав қўлтиғига ана шундай сув пуркарди. Хутталон ҳокими жавоб бериб улгурмади:

— Ҳумоюн ўрду жарчилари! Ҳумоюн ўрду жарчилари-и!.. — деган сўзлар эшитилди шу пайт. Уларнинг хаёллари бўлниб, овоз қелган томонга қарадилар.

Дара оғзида учта отлиқ пайдо бўлди. Биттаси қелган жойида тўхтади, қолган иккитаси икки томонга қараб йўналди. Кўп фурсат ўтмади:

— Одамлару одамлар, эшитмадим, деманглар! Абулмузаффар соҳибқирон Амир Темур Кураго-о-о-он Ҳазрати олийлари-и-и-и ...ташриф буюрадила-а-а-ар!

Биринчи жарчининг жарантлаган ёқимли ўткир овози дарани бир айланиб чиқди.

Бироздан кейин ўнг ва чап томонлардан ҳам жарчиларнинг ана шундай ўқтам овозлари эшитилди.

Бургулар чалинди. Карнайлар ўзларининг мардонавор «ғат-ғат»ларини бошлаб юбордилар. Осмонда тўмиқдай ҳам булат йўқ, қуёш чараклаб турса-да, дара ҳавоси мўътадил, фир-тир эслан шабада кишига хуш ёқарди.

Нихоят, йўл бошида Амир Темурнинг ярақлаган

оппоқ, оқ тулпори күриңди. Олтин эгарда савлат түкиб ўлтирган сохибқирон тилло узангиларга оёқ қўйган эди. Бу пайт сайхонликлардаги томошалар ҳам тўхтаган, ҳамманинг дикқати шимол ёқса қадалганди, шимол ёқса... Ўттиз қадамча олдинда, икки ёнда ва орқада ҳам шундай масофада тўрттадан хос ясовул Турон сultonини муҳофаза қилиб келишарди. Амирул умаро Амир Жоку барлос билан мамлакат ва раъият вазири Амир Сайфиддин некўз оқ тулпорнинг тилло юганини икки томондан тутиб етаклаш шарафига мұяссар бўлдилар. Барча дара оғзида отдан тушиб, сохибқирон изидан пиёда йўналди. Ловуллаб турган гиламлар тўшалган майдонга етганда, Аббос баҳодир ўнг узангидан ушлади, Муҳаммад Чуроға доддоҳ чап узангини сохибқирон оёғига тўғрилади... Амир Темур шошилмай оппоқ поёндоз солинган тўрт зинали олтин тахтта қараб юрди. Сохибқирон, одатда, саройда кўпроқ қора ва кўк барқутдан тикилган зар ёқали енги калта тўн кияр, бошига йирик Яман ёқути қадалган оқ салла ўрас, бу унинг салобатига салобат қўшарди. Авра қора барқут тўн кийган, оқ саллали Амир Темур поёндозга қадам босиб, зинадан бир-бир чиқа бошлиганда дара-да қийқириқ, сурон авж олди.

- Амир сохибқирон умрлари узоқ бўлсун!
- Оллоҳ ўз паноҳида асрасун!
- Давлатлари пойидор бўлсу-у-ун!
- Дунё тургунча турсун!
- Амир сохибқирон! Амир сохибқиро-о-он! Амир сохибқиро-о-он!..

Энди авж навбати созларга ўтди. Бурғу тўққиз марта сас берди. Сурнай тўққиз бор нола қилди. Карнай тўққиз карра наъра тортди... Юраклар ларзага келди. Кўзлари ёшланган Муҳаммад Чуроға доддоҳ назарида салтанат байроби ҳиллираб турган ана бу чўнг қоя ҳам суронлардан ларзага тушмоқда эди.

Пири муршид Мир Сайийд Барака катта эҳтиром ила тахтнинг ўнг томонидан муносиб жой олганидан сўнг, сохибқиронни зиёрат қилиш бошланди. Муҳаммад Чуроға доддоҳ овозини баланд қўйиб эълон қилди:

- Туранзамин хони Суторғатмишхон жаноблари!
- Суторғатмишхон тахт пойида тўққиз марта тиз чўкиб Амир Темурга таъзим этди:
- Бебадал зафар муборак бўлсун, Амир сохибқи-

рон! — У шундай дегач, бориб барқут түннинг пешини ўпид кўзларига суртди. Амир Довуд дуғлат шоҳона либосга лаб босиб тавоф қилас экан, меҳри жўшиб кетди. Гарчи сўз айтиш шарт бўлмаса-да, ўзини тиялмади:

— Толеимизга омон бўлингиз, илоё! — деди гулдирраб.

Бухоро ҳокими Маҳмудшоҳ Бухорий соҳибқиронни зиёрат қилаёттанди, Хутталон ҳокими Амир Кайхусрав навбат кутарди. У қандай қилиб тиз чўкишни уddaлаш ҳакида бош қотираради. Гап шундаки, амирнинг оёғида боди бор бўлиб, вақти-вақти билан қўзиб туради. Боя Бухоро ҳокими билан оёқда тик туриб сўзлашиши, шунда даранинг салқин шабадаси таъсир қилдими ёки елвизакданми, билмайди, икки оёғига, сон, тизза ва боддир аралаш қаттиқ оғриқ кириб, азоб бера бошлади. Тиз букиш у ёқда турсин, юриш ҳам мушкуллашиб бораради. Бундай пайтларда у дарров жойга чўзилар, оёғига шўр пахта боғлатиб, иссик тутар, уқалатар, шунда жони бироз ором оларди. Аммо унга ҳозир имкон қаёқда?..

У секин орқасига қаради. Ортида Ҳисори шодмон ҳокими Шайх Муҳаммад Баён сулдуз турибди, ундан кейин Андижон ҳокими, кейин Тошкент ҳокими, улусбегилар, мингбошилар, кадхудолар... Бу бир занжир эди, уни узиш ёки ундан узилиш асло мумкин эмас. Узаман деган ўзи узилиб кетади... Амир Кайхусрав тиз чўкишнинг еттинчисига боргаңда бутун аъзои баданида қалтироқ сезди, афти буришиб кетишига оз қолди! Худо бир саклади, агар шундай бўлганда борми, беш қадам нарида таҳтда ўлтирган соҳибқироннинг назари тушиши турган гап эди! У тишини тишига босди... Саккизинчисида, унда ҳамма нарсани унугиб, ерга чўзилиб ётиб олиш истаги турилди, аммо ён бермади. Охирги марта тиз чўкиб ўриидан турар экан, пешонасидан совуқ тер чиқиб кетди! Амир Темур Амир Кайхусрав чехрасини зўраки табассумга ўралган изтироблар безаганини кўрди ва буни ўзича Хутталон ҳокимининг азалий иддаоларига йўйиб қўяқолди...

Навбат соҳибқироннинг фарзандларига етди.

— Ассалому алайкум, валинеъмат! — деди Жаҳонгир Мирзо ўнг қўлини кўксига қўйиб эгилар экан.

Амир Темур хиёл бош тебратиб алик олди. Дуркун қоматли шаҳзода маросимни ўринлата ётганда, Амир

Темур ўттан уч ой мобайнида ўзлининг яна ҳам бўй тортиб қолганини кўрди, сабза урган мўйлаби тиник юзига жуда ярашган, кўзлари бирам ёрқин... Ҳа, фарзанд жигарпоранг, суюнчинг, қувончинг, умринг, давомчинг! Иншооллоҳ, кўнгилдаги ниятларнинг жилла курса ярмини рўёбга чиқаргач, тахтни Жаҳонгир Мирзога беради, шаҳзода унинг мақсадини байроқ қилиб олиб салтанат шукуҳига шукуҳ қўшади, кейин набираси даврон тахтига минади, кейин чевараси, эвараси... Амир Темур туриб ўзлини бағрига босгиси, ҳаммага кўз-кўз қиласи келди, аммо ўзини тийди. Кутлуг Туркон оқа билан Ширин бикалар Оқа Беги хоним ва Султон Баҳт бегимларни етаклаб келишди. Опасингиллар соҳибқироннинг елкасидан олиб зиёрат қилдилар. Амир Темур қўғирчоқлардай ясанган икки қизини суюб пешоналаридан ўпди, бошларини силаб қўйдиди, ҳар иккисига аталган ҳадясини тутқазди. Сўнг Улус оқа, канизакларга навбат етди...

Зиёрат маросими тамом бўлгач, мулоzимлар тахтнинг рўпарасида қип-қизил гиламлар устида жой ҳозирладилар. Фурсат фароатта мойил эди. Амир Темур, ахли давра ўзларини эркин сезсунлар, деган маънода тахтдан тушиб, юмшоқ заррин тўшакларга ўлтириди-да, чап тирсагини юмшоқ ёстиқларга тиради. Сирқираб турган ўнг оёги бироз роҳатлангандек бўлди. Чап томонда пири муршид Мир Сайид Барака, ўнг томонда Суюрғатмишхон чўк тушмиш эдилар. Салтанат пешволари даврани кенг олдилар. Пири муршид фотиҳага қўл очишдан олдин бир оғиз сўз айтмакни ўзига фарз деб билди:

— Ҳазрат саййиди олам пайгамбари расулиллоҳ дерларки: «Шоҳларнинг умридин бир соатким, ақл ва дод бирлан кечкай, олтмиш йиллик тоат-ибодатдан яхшироқ турур...» Бокингиз, толе ва салтанат чашмаси шамшир сувидан жилолар олар эрмиш. Соодату омонлик бори подшоҳлар қилицидан, шаън-шавкатидан фаровон ва обод эрмиш... Фақат ушбу қиличлар ёлғиз адолат йўлини тутғон подшоҳларгагина тегишлидур. Кучни адолатдан излаган Амир соҳибқирон умрлари пойдор, қиличлари обдор бўлсун! Алҳамду лилаҳи роббил оламин! Омин, Оллоҳу акбар!

— О-о-мин! Оллоҳу акбар! — садолари янграркан шамшир янглиғ кўтарилган қўллар кутлуг фотиҳага тортилди.

Шундан кейин ёзилган шоҳона дастурхон беҳисоб турфа кил таомлар билан безалди. Машшоқлар созларини қайтадан созлашга киришдилар ва «Шодиёна»ни бошлаб юбордилар. Замонанинг машҳури оғоқ ҳофизлари овозларидан хушманзара дара оғули обод бўлди. Сайлу сафо кечгача давом этди.

Алуфа тавочи Амир Довуд дуялат девонбегига, яқинда сафардан қайттанлиги ва хоразмшоҳ Ҳусайн Сўфидан соҳибқиронга мактуб олиб келганлигини билдириди. Бу ҳақда Муҳаммад Чуроға доддоҳга айтиб кўйди. У ҳумоюн ўрдуга чорлашларини интизорлик билан кутар, еган-ичгани ҳам ичига тушмас эди.

Бирдан Муҳаммад Чуроға доддоҳнинг чорлови эши-тилди:

— Алуфа тавочи жаноблари! Ҳумоюн ўрдуга! Ҳумоюн ўрдуга!..

## ЎН ТЎҚҚИЗИНЧИ БОБ

### I

Самарқанд тонги серфайз ва сўлим эди.

Соҳибқирон мамлакат ва раъият вазири Амир Сайфиддин некўз ҳамда амирул умаро Амир Жоку барлосларни зудлик билан ҳумоюн ўрдуга чорлатди.

Амир Темур, доимо бир ишга киришмай туриб, ундан қутилиш йўлларини излаб қўй, деган ақида этағидан тутади. Алуфа тавочини Хоразмга юборар экан, элчи қандай жавоб олиб келишини оддиндан тахмин қиласди. «Наҳотки, ўз юртимда ўзимга ўзим қилич ўқталсам — Хоразмга юриш қилишта мажбур бўлсам?..» деган ўй унга тинчлик бермасди. Жумла жаҳонга аёнки, Хоразм Чиратой улусига киради, Амир Темур салтанати эса ўзини Чиратой улусининг вориси ҳисоблади, инчунин Хоразм салтанатнинг Андижондек, Тошкентдек, Шибирғондек, Термиздек бир вилояти бўлмоғи керак. Наҳотки, кенгаш билан ушбу муаммони ҳал этиш мумкин эмас? Наҳотки, муаммони адолатли, тўғри ечиш учун эгри қиличга суюнмоқ даркор? Ҳарнечук, Хоразмни бир ёқли қилмай, салтанат бутунлиги ва равнақи ҳақида сўз юритиши номуносиб бир юмушдир. Амир Темурнинг бунга имони комил.

У Самарқанд марказидаги тепаликда яқингинада

қад кўтарган ҳашаматли Кўксаройнинг чиройли кўринишхонасида — ичкіхона ҳам дердилар, — тахтда ўлтипар эди. Иккинчи ошёнада ўнг томонни банд этган кўринишхона узунлиги юз қадам, эни эллик қадам келадиган шифти баланд барҳаво бир хона бўлиб, ипак пардалар тутилган ўнта кенг деразаси Чорсу майдонига қаради. Кўксарой майдонга худди узукка кўз кўйгандай ярашиб тушди. Деворларига Фозроннинг кўк мармаридан қолланган, икки ёнида иккита минора бўй чўзган, офтобда шишадай яраклаб турадиган тўрт ошёнали маҳобатли саройнинг биринчи ошёнасида хазинаи омира<sup>1</sup> ва қўрхона қарор топди. Қозиул қуззот, қози аскар, аҳдос<sup>2</sup> қозиси, шунингдек вақф ерлари, вақф мол-мулклар ҳисобини олиб тургувчи садри аъзам, қурчибоши, ясовулбоши, хирож ҳажмини белгиловчи амаддор, уни қалакчи деб аташарди, солиқ ва ўлон йигувчи муҳассил ва бошқа мансабдорлар биринчи ошёнани банд этдилар.

Иккинчи ошёнада кўринишхона, ички хонадан ташқари, чап томонда девонбеги, бош вазир, амирул умаро ва вазирлар хоналари мавжуд. Учинчи ошёнада ҳарам жойлашган. Ҳарам аҳли учун саройнинг ўнг томонидаги хос дарбозадан алоҳида йўл қилинган... Кўксарой атрофига кўп дараҳтлар экилгач, у бамисли ям-яшил бор ичида бино қилинганга ўхшаб қолди. Сўнг бое девор билан ўраб олинди.

Соҳибқирон мулозимга деразалар пардасини кўтариб қўйишни буюрди. Ўлтирган жойидан унга шаҳарнинг шимол тарафидаги улкан қурилишлар манзараси барадла кўриниб турарди. Шу пайт Мухаммад Чурога доддоҳ, кириб, амирлар ҳозир эканликларини маълум қилди.

— Киришсун, айт! — деган ижозат бўлди.

Амир Темур амирларга тахтнинг ўнг томонидан жой кўрсатди ва ўлтиришга таклиф этди.

Ҳар галгидек Амир Темур хотиржам ва босик деди:

— Рақибнинг ҳурмати, унинг олдидан бир ўтиб қўймак жавонмардлик белгисидур, жаноблар!

Амирлар дарров гапнинг нимадалигини фаҳмлашиб бир-бирларига қараб қўйдилар.

<sup>1</sup> Давлат хазинаси.

<sup>2</sup> Урф-одатлар ва кундалик ишлар бажарилишини назорат қилгувчи қози.

— Бешак-шубҳа, Амир соҳибқирон! — тасдиқ этди Амир Сайфиддин некӯз.

— Мусулмончилигу диёнат этагидан тутуб, душманни инсофу адолат йўлига чақирмак ва қилич қайрамакнинг нохуш оқибатларидан асрамак марднинг ишидур, — давом этди Амир Темур. — Борди-ю душман оқил кенгашга кулоқ бермаса ва ўз билганидан қолмаса, барча гуноҳ ўшал қулоқсизнинг йўрон бўйнига тушадур...

— Баюят ҳақ, гапирдилар! Малҳам наф бермаса, ярага тиф урилмай илож йўқ... — Буни Амир Жоку барлос айтди.

— Биз хоразмшоҳ Ҳусайн Сўфида яхши сўзларимизни раво кўрдик. Ажабки, ул қиличини ўртага солибдур, худди эгри қилич биргина унинг илгида бордек... Биз огоҳ этдик, узримиз қабул қилинди!

Кўринишхонага жимлик чўқди.

Амир Темур: «Биз огоҳ этдик, узримиз қабул қилинди...» деди-ю ўзининг тутумини оқлагандек бўлди. У буни сезди. Бу ерда Туркистон султони ҳақми? Унинг даъволари тўғрими, ўринлими?.. Шу палла бир лаҳза ўзини хоразмшоҳ Ҳусайн Сўфи ўрнига қўйиб кўрди. Хўш, қўшни мамлакатдан унга шундай мазмунда мактуб келиб қолди, дейлик. Амир Темур нима деб жавоб берарди экан? Юртни осонгина топширишта рози бўлармиди? Албатта, йўқ! Ҳеч қачон, асло! Шундай қилганда, тавқи лаънатни бўйнига илган бўларди!

Демак, хоразмшоҳни ҳам қайсарликда ёки писандасизликда айблаш ножоиз, у ҳам мамлакатининг посбони, у ҳам элнинг қарғишига қолмоқчи эмас. «Пичоқни ўзинигта ур, оғримаса бировга ур!» дейдилар-ку.

Аммо бу ерда Туркистон султони кўнглига қувват бериб турган бир нарса бор — Амир Темур юрт босиб олмоқчи эмас, юрт тикламоқчи, пора-пора мамлакатни бутунламоқчи! Ҳа-ҳа, бутунламоқчи! Устига устак, у дабдурустдан бостириб бораёттани йўқ, балки одил подшолар йўлидан юриб, кенгаш измини тутиб, келишиб иш қилиш ниятида. Буни Оллоҳнинг ўзи кўриб турибди...

Амир Темур кўринишхонада у ёқдан бу ёққа юрар экан, ана шуларни хаёлидан ўтказар эди.

— Амирул умаро жаноблари! — деди бирдан Амир

Темур. — Ҳозир барча сипоҳлар ўз уйларида, болабақралар олдидаурлар. Қишириб қолди. Лашкар бошлиқларига фармон қилингким, йўллар қуриган пайтга шайланиб турсунлар. Наврўздан кейин қўшинлар йиғилсун, лашкаргоҳга чорлансун! Барчага совутдубулға, аижомлар мўл тарқатилсун!

— Бош устига, Амир соҳибқирон!

Амир Темур тахтта ўлтириди ва дераза томонга бокканча, ўзига ўзи айттандек, деди:

— Наҳотки Хоразмга бориладур? Наҳотки тўғри ишни бажариш учун кунимиз эгри қиличга қолса?..

## II

Ҳамал охирларида Хоразмда катта тўй бошланиб кетди. Хоразмшоҳ Ҳусайн Сўфи қизи Иқбол бикани нуфузли амирлардан Ҳожа Шоҳининг паҳлавон ўғли Жаҳон Маликка узатмоқда эди. Подшо саройидан ҳар кун эрталаб қарнай-сурнай садолари тараплар, пойтахт аҳди, мадрасалар талабалари ва Қайсария карвонсаройи мусофиirlарини тўйхонага чорларди. Дастурхондан меҳмонлар аrimас, ўйин-кулгу тинмасди. Мамлакат ҳаётнинг тўқис тантанаси бўлган тўйнинг беғубор шодиёнасига чулғанган.

Хонзода хоним, Сиймин бика ва Оққизлар дутоналари атрофида парвона... Келинлик либосига бурканган, сулув бўлиб кетган Иқбол бикага ҳавас билан қарашар, куёв ҳақида саволлар отишиб ҳазиллашибар, жиғига тегишар, кайвонилардай кенгаши ҳам бериб қўйишарди. Иқбол бика буларга хафа бўлмас, «Ҳаммангизнинг ҳам бошингизга тушсан, илоё!», «Бу маслаҳатингизни ўзингизга олиб қўйингиз, керак бўладур!» қабилида жавоб қайтарарди. Тўй бошланишидан бир кун аввал маликалар ўzlари севган хушманзара Зангрикўл бўйига отландилар.

Маликалар маофаси муюлишдан ўтганда Иқбол бика хаёлларга кўмилиб келаётган Хонзода хонимга қаради-да, ҳаммага эшилтириб: «Севин, Жаҳонгир Мирзодан хабар борми?..» деб сўраб қолди. Хонзода хоним қизариб кетди: «Вой, бу нима деганинг?.. Нега хабар бўлиши керак экан? Билмасам...» «Бўлиб қолар, бўлиб қолар...» қўшилди сўзга Оққиз. Шундан сўнг маофа то Зангрикўл бўйига келгунча ҳеч ким ломмим демади. Ҳамма ўз ўйи билан банд эди.

Маликалар барра майсалар билан нимтатир қолланган яйловда, күл бўйида кечгача қолиб кетишиди.

\* \* \*

Тўйнинг олтинчи куни аср намози вақтида Гурлан тарафдан бир отлиқ терга пишган тўригини елдирганча шаҳар дарвозасига етиб келди. Узок йўл юриб ҳориган отлиқ шаҳар ёқдаги шодиёна, карнай-сурнай овозларидан ҳайрон бўлди.

— Ҳой, ким бор? — қичқирди у. — Дарвозани очингиз! Тез очингиз!

Иттифоқо, шаҳарнинг кутволи<sup>1</sup> Бекхожа дарвоза тепасида эди, пастта ҳайратланиб қаради:

— Менглихожа? Гурлан амири?..

Шитоб дарвозани очдилар. Менглихожа отдан тушиб, бироз нафас ростлади. У ўттиз бешлардаги ўрта бўйли, япалоқ юзли, биткўз, довюрак бир киши эди.

— Офат келди, ёшули! — Гурлан амири ҳорғин кўзларини каттароқ очиб Бекхожага тикилди. — Офат келди, офат!.. Самарқанд султони Амир Темурнинг лашкари юртимизни талон-торож этди. Улар Жайхун бўйидаги Сепоя мавзесидан ўтиб Кот ҳисорини одиллар... Душман шамолдай тез, бешафқат ва беандиша. Гурланга келишганда, мен дарвозани маҳкам бекиттирдим, аррода ва тири чархларни<sup>2</sup> шай қилдирдим. Ҳисор олдидағи ҳандақ эса чуқур, ундан ўтишлари маҳол деб хотиржам эдим... Аммо Амир Темур хас-хашак тўпланиб ҳандақни тўлдиришларини буюрди. Шунча хас-хашакни қайдин топибдур?... Ураганин тутиб тирадан ўтказдилар... Ҳамма ер ўликка тўлиб кетди, ёшули! Жаҳаннамнинг нақ ўзи! Мен зўрга қочиб қутулдим, заифаларим, қизларим бари ёғий қўлида қолди. Ёғий лашкари ҳар ён тарқалиб форат қилаётir. Хоразмшоҳни огоҳ этай деб шошилдим...

Менглихожа оғир сўлиш одди.

— Аҳволни Ҳусайн Сўфи ҳазрати олийларига тез билдириш лозим! Тез!

— Ҳозир мумкин эмас! — кутвол кескин деди. — Биронта чибин ҳам мени безовта қилмасун, деб буор-

<sup>1</sup> Комендант, мәъносида.

<sup>2</sup> Аррода — гидирлак устига ўрнатилган, катта тошларни отишга мосланган маҳсус курилма. Тири чарх — айланиб ўзи ўқ отувчи ҳарбий курилма.

ғонлар... Шундок ҳурсандчилик пайти қандок қилиб нохуш хабарни айтамиз? Бироз кутайлик...

Қизиқ устида шундай деди-ю Бекхожа сүнгги гапидан ўзи ҳам ҳайрон бўлиб қолди. Тўй қирқ, кечакундуз давом этади, энди олти кун ўтди... «Бироз кутиш» чиндан ҳам қанча бўлиши мумкин?..

У шитоб тўйхонага бориш зарурлигини англади.

Сарой майдонида тумонот одам, игна ташланса ерга тушмайди. Кўчада одамлар оқими тўхтамайди. Мехмонлар дастурхон атрофида ўлтиришиб, майдон ўртасида чарх уриб ракс тушаётган ўйинчиларни томоша қилишади. Хоразмшоҳ Ҳусайн Сўфи саҳнанинг тўр томонида катта сўрида Юсуф Сўфи, Оқ Сўфи, Ҳожа Шайхзода ва бошқа аъёну акобирлар орасида савлат тўкканча, хушчакчақ даврани бошқарди. Яқинлашишнинг иложи бўлмаганидан, Бекхожа амаллаб мулоzимни топиб, унга нималарни дир уқтириди. Мулоzим хоразмшоҳ томон шошилди. Одамлар тўсиб қолиши-ю мулоzимнинг бу гапни хоразмшоҳга қандай айтганини Бекхожа ҳам, Менглихожа ҳам узокдан кўришолмади.

Менглихожа қорни қаттиқ очқаганлигини энди сезди. Улар дастурхонга кўл чўзган эдилар ҳамки, ҳалиги мулоzим қайтиб келиб, ҳозир у билан шитоб ҳумоюннишон саройга боришлари зарурлигини билдириди. Сарой кўринишхонасида хоразмшоҳ Ҳусайн Сўфи билан Юсуф Сўфи асабий у ёқдан бу ёқда бориб келишарди. Юсуф Сўфи нуқул тишлирини фижирлатарди.

Гурлан амири тиз чўкиб таъзим бажо келтиргач, даҳшатли воқеани қўшмай-чатмай баён қилди...

Хоразмшоҳ Ҳусайн Сўфининг бирдан нафаси қиса бошлади ва ранги оқарганча ўлтириб қолди. Сувга югурудилар. Ҳос табиб, хоразмшоҳ ҳазрати олийлари толиқибдилар, ёстиқча бош қўйиб ҳордик олишлари лозим, у кишига осойишталик керак, деди. Уни ҳос хонага олиб кириб ётқиздилар.

Юсуф Сўфи шитоб бекларбети Ҳожа Шайхзодани олдиртириб келди. Бекларбети суяги бузук, барваста, шунга қарамай чаққон ҳаракат қиласиган қирқлардаги одам эди. Улар мавжуд нозик вазиятда қандай йўл тутмоқ кераклиги ҳақида фикрлашдилар. Лашкар ахволи, сипоҳ йиришни тез амалга ошириш, мудофаа чораларини кўриш тўғрисида сўз кетди. Асосан, Юсуф

Сўфи гапирди, бекларбеги тинглади. Тундаёқ барча лашкарбошилар саройда машваратга тўтландилар.

— Зангорикўл атрофидаги яйлов лашкаргоҳ қилиб белгиланур! — эълон қилди Юсуф Сўфи. У юзи япалоқдан келган, тишини тез-тез ғижирлатиб турадиган ўттиз бешлардаги бир одам эди. — Кўшинлар ўша ерда саф тортсунлар! Бош эгиш йўқ, падари бузрукворимиз бизларни бунга ўргатмаганлар. Оқсоқ Темур билан фақат қилич тилида сўйлашамиз! Фақат қилич тилида! Билсунларким, бирон бир кишида бошқача ўй бўлиши мумкин эмас!

— Мумкин эмас! — тасдиқлари кутвол Бекхожа ҳаммадан олдин.

— Мумкин эмас! — Бу Гурлан амири Менглихонжанинг овози эди.

— Бош эгиш йўқ!

— Конга-қон!

— Душманни ер тишлатамиз! — қабилида Юсуф Сўфининг сўзларини қўллаб-қувватлагувчи бошқа овозлар ҳам янгради. Хожа Шайхзода нимадир демокчи бўлди, аммо овоз чиқармади. Чунки рўбарўдан сурон солиб чопиб келаётган оломонга бирон гапни тушунтиришга уриниш фойдасиз эканлигини кўп марта бошидан кечирган...

Машваратдан сўнг Юсуф Сўфи бекларбегини олиб, саройнинг у томонига, хоразмшоҳ Ҳусайн Сўфининг хос хонасига йўналди. Хоразмшоҳ анчагина алаҳсираб ёттач, ниҳоят яқиндагина кўзи илинибди. Унинг ёнидан жилматган хос табиб, шивирлаб, тонг-эртангача безовта қиласликларини ўтиниб сўради...

Ҳусайн Сўфи эрталаб ҳеч нарса бўлмагандай ўйқудан тиникиб уйғонди. Бошининг орқасидаги енгил салқи оғриқни демаса, уни безовта қиладиган сабаб йўқ эди. Хос табибининг тинимсиз муолажалари зое кетмади.

— Баъзан юрагимда қувват бўлмай қоладир... — тушунтириди ўз аҳволи руҳиясини хоразмшоҳ, Юсуф Сўфига.

— Нима сабабдан, оға?

— Сабабини Оллоҳ биладир, Шоҳ Юсуф!

Хоразмшоҳ инисини ҳурматлаб шундай деб атарди.

Юсуф Сўфи нохуш хабардан сўнг тунда машварат чақирилгани, лашкаргоҳ белгиланганини билдириб ўтди.

Хоразмшоҳ хурсанд бўлди, «Шоҳ Юсуф»нинг «Оқсоқ Темур билан фақат қилич тилида сўзлашамиз!» деган сўzlари хуш ёққанлигини айтди.

— Ҳа, биз бу ерларни қилич билан қўлга киритганимиз! — Ҳусайн Сўфи ўзининг яхши кўрган сўзларини такрорлади. — Кимки олмоқчи бўлса, уни қилич билан олишга тўғри келади! Бизга оқсоқ ким бўлибди?..

Тўй кечага тутаган, ҳаммада қандайдир палағда бир кайфият ҳукм сурарди. Қош қорая бошлади.

Худди шу пайт Гурганждан икки фарсах жанубдан оқиб ўтадиган Жўйи Қовун сойи томондан чопар етди:

— Ҳазрати олийлари! Ҳазрати олийлари! — энтиди чопар, бу йигирма-йигирма бешлардаги ўрта бўйли йигит эди. — Қоровуллардан хабар етдиким, сонсаноқсиз қўшин бостириб келмоқда экан! Навкар қумдан ҳам кўп эмиш, қўшин бошида Оқсоқ Темур деган баджаҳл бир саркарда келармиш. Ҳеч нарса унга бас кела олмас экан!

Кутилмаган бу янгиликдан Ҳусайн Сўфи энди ростакамига ташвишга тушди. Хоразмшоҳ ўз қўшинларини яхши билади. Лекин Амир Темурнинг лашкарига тенг келиши маҳол. Кўп — кўп-да. Шуни юрагининг тубида сезиб турибди. Таваккал майдонга от солиб бўлмайди, мавлублик жандасини кийгандан ўлим афзалроқ! Қандай йўл тутиш керак? Нима қилиш керак? Нима?.. Юсуф Сўфи, Хожа Шайхзода ва бошқа салтанат пешволари машваратта келгунларигача, уни шундай саволлар эзиб ташлади.

— Фақат қилич иш берадур! Қилич! Қилич! — овозини кўтариб қатъий деди Юсуф Сўфи.

Хоразмшоҳ, сизнинг фикрингиз қалай дегандай, бекларбеги Хожа Шайхзодага қаради. Бекларбеги бироз ўйланган бўлди:

— Ҳазрати олийлари! Бостириб келғон душманни қилич билан кутиб олмоқ бу фарз ҳам суннатdir, — дея сўз бошлади Хожа Шайхзода. — Мен бутун лашкаргоҳда қўшинимизни тафтиш айладим. Нима десам... Қўшиннинг чўри озроқ... Ақли қосирим дейдирки, бу қўшин билан Амир Темурга бас келиб бўлмас. Қўшинни кўпайтмоққа эса вакт бевафолиқ этиб турибдур...

— Нима демоқчилар бу бирлан, ёшули?.. — бирдан сўзни кесиб унга ўдағайлади Юсуф Сўфи. — Душманнинг олдига, сиз улуғсиз, қўшинингиз лак-лак, дея

бош эгиб бор, демоқчимисиз? Бориб Оқсоқ Темурнинг оёгини ялайликму? Юртимизни бўшатиб берайликму? Ўзимиз қул, хотинларимиз чўри бўлсинларму? А, ёшули? Шундай демоқчимилар?..

— Маъзур тутсунлар... Ҳали гапимнинг «берди»-сини айтғоним йўқ... Нима десам... — деди оғир Ҳожа Шайхзода, у гап топилмай қолган пайтларда «Нима десам...» сўзларини ишлатишни яхши кўрарди. Яна унинг гапи оғзида қолди.

— Йўқ, сиз айтинг-чи! — Юсуф Сўфи қизишиб кетди. — Боболарнинг юзига оёқ қўяйликму? Душман отини етаклаб боевларимизга олиб кирайликму? Ўзимиз пайхон этайликму, а? Бу қўшин билан Амир Темурга бас келиб бўлмас, дейсиз? Кишилар кўнглига гумон тухмини сочасиз? Балки чўгирмани ташлармизда, ёшули, бошларимизга рўмол ўраб олармиз? А?..

— Юсуфбек жаноблари, маъзур тутсунлар...

— Шоҳ Юсуф! — Хоразмшоҳ бироз ранжиганини яширмади. — Жанжал учун йиғинмадик. Буни душманга қўяйлук. Вазият оғир ва мужмал... Вазмин бўлайлук. Кенгашиб олайлук, деб чорладим сизларни... Да-вом этсунлар, муҳтарам бекларбеги!

Юсуф Сўфи тишларини бир гижирлатиб қўйди, лекин гапирмади.

— Юртимизнинг бир гардини ҳам ғанимларга раво кўрмасмен! — деди Ҳожа Шайхзода. — Бу тонг оттандага чиққан қуёшдай равшан. Подшойи олам, баоят тўғри дедилар, вазият оғир ва мужмал... Нима десам... Вазият ойини деган гап борки, уни четлаб ўтиш мушкул. Унга қараб тарозига тош қўймоқ зарур. Ҳозир оқсоқ Темур қўшинига teng кела олмаймиз, афсуски, бу шундоқ. Шу сабабдан элчи юбориб, сулҳ таклиф этморимиз керак, токи у ўша келган жойидан ортига қайтсун... Душман отининг туёри шахримизга етмасун. Биз эса шу аснода нафас ростлаб оламиз, қўшни шахру қасабалардан аскар йиғамиз, машқимизни чиниктирамиз. Нима десам... Қиличимиз қинида турибдур, ана. Уни истаган вақтда қинидан чиқара оламиз, подшоҳ ҳазрати олийлари...

Хоразмшоҳ Ҳусайн Сўфи бекларбегининг куйиниб айтган сўзларида катта ҳақиқат борлигини тан олди. Бугуннинг манзараси тўғри чизилган эди уларда.

— Эй салтанат пешволари! Бостириб келаётган ёгий билан сулҳ тузмоқ — бу ҳали енгилмоқ, деган сўз

эмас! — деди хоразмшоҳ. — Салтанатлар ўртасида кўҳна муомала йўли, муроса-ю мадора йўли.. бу... Кутвол жаноблари! Сиз тонгдаёқ Амир Темур қошига сулҳ тақлиф эттали отланингиз! Турон султонининг қандай талаб-сўрови бўлса, билингиз. Аммо шарт: не бўлса ҳам у ўша жойидан ортига қайтиб кетсун!

— Бош устига, олампаноҳ! — деди Бекхожа, туриб келиб хоразмшоҳнинг қўлини ўпди.

— Бекларбеги жаноблари! Сулҳ ўз йўлига. Ўзингиз айттандек, сулҳ — нафас ростламоқ холос... Сиз қўшинни қурчлашга қандай киришган бўлсангиз, шундок дувом этдирингиз! Не йўсинда кўмак тиласангиз, олингиз! Хазинаи омира эшиги сизга очик!

— Хонумонимни фидо этмакка тайёрмен, подшоҳ ҳазрати олийлари!

Барваста Хожа Шайхзода чаққон юриб келиб хоразмшоҳни тавоғ этди.

Юсуф Сўфи барча гапларга индамай қулоқ солиб турар, аммо тишларини ортиқ ғижирлатмас эди.

Салтанат боргоҳида режалар ана шундай белгиланиб турган бир пайтда кутилмаганда юз берган воқеа ҳамма нарсани остин-устин қилиб юборди!

Машварат туташига сал қолган эди, эшикова кириб бир элчи келганлигини маълум қилди:

— Подшойи олам! Хутталон ҳокими Амир Кайхусравдан шошилинч элчи сарой остонасида турибди!

Шошилинч элчи — гоҳи Амир Мусонинг хизматини қилган, гоҳи Хутталон ҳокимининг ишонган одамига айланган Тармочук эди. Чўтирма кийиб олган элчи шиддат билан юриб келиб, тахтга ўн қадамча қолганда, тиз чўкиб ерни ўпди ва қўйнидан найча қилиб ўралган мактубни икки қўллаб хоразмшоҳга тутди. Унда қуйидаги сўзлар ёзилган эди:

«Мўмин-мусулмонлар кўтби, жаҳон султонларининг аълоси Хоразм мамлакати подшоси хоразмшоҳ Ҳусайн Сўфи ҳазрати олийларига... Аввали мағрур бошимиз ерга етгунча таъзим ва эҳтиром мақомида бўлғон дўстингиздурмиз... Вақт бағояш тифиз ва бешафқатдур. Билдурмагимиз лозимдурки, Туron султони Амир Темур Кўрагони бадқайсар Хоразмга юриш қилиш ишдаосидан кутула олмади. Қайтармакка биз томонимиздан кўп саъи-ҳаракатлар кўргизилди, аммо барчаси тошга ёқкан ёмғирдек нафсиз кетди... Ком, Хевак,

*Гурлан Амир Темур тасарруфига ўтмиш. Яна икки кунлик йўл босилса, Гурганжга етурлар... Алҳосил, кенгаш бермакка ошиқадурмиз. Аввалан, зинҳор унга инонмангиз, дўстлик эшигини оча кўрмангиз. Сўнг сулҳ тузишни асло ўйламангиз. Ҳозир Турон кўшини пароканда, Гурланни олгач, илғорлик кўргизиб, ҳар тарафга тарқалиб кетган, юртни талон-торож этиб ётибди... Кулайликка мойил фурсатда, ҳазрати олийлари, собитқадам ва саркаш Хоразм қўшинини бошлаб Жўйи Коувун бўйига келсалар, жанг қизиган чоғда биз бу ёқдан тўпсингидар навкарларимиз бирлан Турон кўшинидан ажраб чиқиб, иншоомлоҳ, сафингизга кўшилғоймиз. Лашкар узра оқ байроқ ҳилпираб кўринадир, бу бизнинг шижоатимизга ишоратдур... Икки қўшин Амир Темурни ер билан яксон этғоймиз! Даҳшатли душманимиздан бирданига кутулғоймиз!*

*Боқий салом ила атдои дўстингиз ва фидойингиз Амир Кайхусрав Кўрагон Хутталоний. Ҳижрий 773 йил жумодил аввал ойнинг 5 куни. Ком шахри».*

Нома ўқилиши билан саройни қийқириқ босиб кетди. Бирор бирорвоннинг сўзини эшитмас, аммо ҳар ким нимадир дея мактубга муносабат билдиради.

— Кўшинимиз чўги кам, деб тургандик... Худо кўшинни ҳам бут қилди! — қувонганини яширмади Юсуф Сўфи. — Энди оқсоқ Темурнинг додини берамиз! Энди оқсоқ кунини кўрадир, ҳа!

— Кунини кўрадир! — қичқирди гурлан амири.

Хоразмшоҳ Ҳусайн Сўфи ҳам мамнун бўлиб кўнгли ёришди. Амир Кайхусрав, аввало, синашта дўсти, қолаверса Мовароунинаҳрда донғи чиқсан амир, қўшини ҳам шиддатли. Кейин балки Маҳмудшоҳ Бухорий ҳам бизга қўшиладир. Зиндачаш опардий, афсуски, Самарқандда ёсоқда етказилибди. Шибирвон амири бўлганда-ю хоразмшоҳнинг ошири олчи эди-я.

Хоразмшоҳ, бу ёғига нима дейсиз, дегандай Ҳожа Шайхзодага қаради. Барча жим қолди.

— Вазият ойини ўзгарди, подшо ҳазрати олийлари! Нима десам... Энди душманга юзма-юз борсак бўладир! Ёғийнинг ўз ичидан ўт чиқиб, Амир Кайхусрав Хутталоний биз томонга ўтадиган бўлибдир. Бу бешак Оллоҳнинг бизга кўргизган илтифоти, подшойи олам!

Тармочуқ шу пайт кетишга ижозат сўради.

Хоразмшоҳ дарҳол котибни чақиртириб, Амир Кайхусравга жавоб номаси ёзишни буюрди ва «Ёз!» деди. Котиб қўлига қалам олди:

«...Қиёматлик дўстимиз Амир Кайхусрав Кўрагон  
Хутталоний жанобларига. Қаттол душман хурожи ол-  
гуда Сизнинг мактубингиз дилимизга маддаг, белимиз-  
га қувват бўлди. Кутлуғ кенгашингизни қабул айладук.  
Жўйи Қовун бўйига жанобларининг лашкар билан Ту-  
рон сафини тарк этиб, Хоразм қаторига ўтишингиз,  
иншооллоҳ, Амир Темур тақдирини ҳал қилгай! Кўнглин-  
гиз тўқ бўлсун: Сиз айтқондек, биз душманга дўст  
эшигини очмасбиз, сулҳ отини атамасбиз! Жўйи Қо-  
вун узра Сизнинг ҳиллираган оқ санжоғингизни тезроқ  
кўришга орзуманддурмиз.

Дуои салом, баъзаз қалом.

Хоразмшоҳ Ҳусайн Сўфи. Ҳижрий 773 йил  
жумодил аввал ойининг 13-куни. Гурганж  
шахри».

Тармочуқ зар попукли найча номани олиб қўзла-  
рига суртди-да, қўйнига жойлади, таъзим билан тиса-  
рилганча саройдан чиқди. Гурганж кутволи Бекхожа-  
тонг отганда сулҳ тузишга элчиликка борадими, йўқ-  
ми — билолмай қолди...

### III

Душманни Жўйи Қовундан нарига ўтказмасликка  
аҳд қиласан хоразмшоҳ Ҳусайн Сўфи бекларбеги Ҳожа  
Шайхзодага ногора-ю бургулар садоси остида қўшини  
дадил қалъадан ташқарига олиб чиқилсун, деб фар-  
мон берди. Майдонталаб Хоразм қўшини сурон солиб  
Жўйи Қовун бўйига йўл олди.

Амир Темурнинг лашкари чиндан ҳам хотиржам-  
лик этагидан тутиб, ўлжа излаб ҳар томонга тарқалиб  
кетганди. Амир Кайхусрав буни тўғри ёзганди. Соҳиб-  
қирон Хоразм шахрига боришни сал кейинроқقا ре-  
жалашибди, яна бир бор элчи жўнатиб кенгаш билан  
орани очик қиласоқчи бўлди, у қон тўкилишини иста-  
масди. Шундай хаёллар билан банд бўлиб турган вақт-  
да, қўлига Амир Кайхусрав мулозими Тармочуқдан тор-  
тиб олинган номани тутқаздилар...

...Жаҳонгир Мирзо ўнбошиси Ахий Жаббор баҳодир ўз йигитлари билан сарҳадда тунда қоровуллиқда эдилар, Хоразм ёқдан чўтирма кийган бир одам писиб йўлдан ўта бошлади. Бу Учқорага шубҳали кўринди. «Ер тўймайди ёмғирга, хотин эрга... тўймайди...» дея минирилаб хиргойи қилаётган Учқора ашуласини тўхтатди-да, ҳалиги одамни кузата бошлади. Чўтирамали одам ниманидир қидирар, тимирскиланарди. Учқоранинг хаёлига келган биринчи фикр шу бўлдики, бу одам — хоразмшоҳ, жосуси! Ҳумоюн ўрдудан, душман ёқдан бир «тил» олиб келиш ҳақида буйруқ ҳам бўлган эди-я! Парвардигорнинг ўзи етказди-кўйди! Сал нарида чодирда ўлтиришган Ахий Жаббор баҳодир, Йаналтекин, Йўлқутлуғларга билдирмай битиради бу ишни.

Чўтирамали одам гира-шира қоронида, жануб ёқда минг қадамлар нарида ёниб турган гулханлар томонга ўтмоқчи шекилли, беихтиёр Учқоранинг олдига келиб қолди. Ҳалитдан бери Учқоранинг томоги қичир, қаттиқ йўталгиси келарди. У биларди, йўталиб юборса, иш расво бўлади.

Учқора пайт пойлаб бамисли қоплон ҳалиги одам устига ташланди ва бутун залвори билан босиб тушди. Шу билан баробар қаттиқ йўталиб ҳам олди. Чўтирамали одам чайир экан, Учқорани писанд қилас, пишиллаганча унинг тагидан чиқиб олишга тиришарди. Учқора ишни осонликча тинчтиш мушкуллигини пайқади. Қоронида тусмолдан бошланиб кетган олатасир муштлашув кутилгандек натижа бермас, биттага битта жавоб келиб тураг эди. Шу пайт чап биқинида нимадир жизиллади, пичоқ санчилганини у кейин билди. Фазабланган Учқора биқинини пайпаслаб ҳам ўлтирамади, бир кучига икки куч қўшилиб, рақибини шарт ерга юзтубан ағдарди-да, икки қўлинни орқасига қайирди. Чўтирамали инграб юборди, ҳолсизланган қўлидан пичоқ ерга тушди. Учқора тиззасини чўтирамалининг белига қаттиқ тирав экан:

— Чигирткадай бошингни узиб ташлардим, отангни арвойи! — деди пишқириб. Бизга «тил» керак-да! Амир соҳибқироннинг изин ўп, сенинг жонингни тилаб олган экан, худога айттанинг бор экан, валад!..

Қўққис йўтал овозини эшитган Ахий Жаббор баҳодир билан Йаналтекин чодирдан чиқиб келдилар. Улар дарҳол «тил»нинг қўл-оёғини боғладилар. Жа-

нуб ёқдаги уч чақирилар наридаги қишлоқдан хўрз қичқиргани эшитилди. Тонг ёриша бошлаган эди.

Ёруғ тушгач, Ахий Жаббор баҳодир «тил»ни таниб қолди: у аввал Амир Кайхусрав хизматида бўлганда, бир неча марта Хоразмга бирга бориб келган Тармочук мулозим эди! Кўрди-ю ижирғаниб қўйди. Бу қаламуш башара билан борлиқ ҳодисаларни эслагиси ҳам келмади, ахир мунтазам Амир Кайхусравга уни чилпиган, сасиган, ичи қора, сотқин... шу-да! Аммо у кейинги вақтларда Амир Мусо хизматини қиласди.

— Хоразм ёқда нима қилиб юрибсан? Ёки Амир Мусонинг бир чодири ўша ёқдаму?.. — тешиб юборгудек тикилди Ахий Жаббор баҳодир салом йўқ, алик йўқ, Тармочукقا.

«Нега бу ёқка юрдим-а? — деди ичиди Тармочук афсусланиб. — Ўзимдан ўтди.. Яна Ахий Жабборга дуч келиб қолганимни! Аввалги сирдошингдан кўра ёмонроқ душман бўлмаслигини билардим-ку!..»

— Адашиб қолдим... йўл йўқотиб қўйдим, қоронғида... — каловланди Тармочук.

— Хоразмда адашиб қолдингму? Сен-а?..

— Менга қара, Ахий Жаббор! — деди бирдан Тармочук юзини сидириб. — Бир нарса бераман... Гавҳар! Тоза гавҳар! Қўнжимда... Олу мени қўйиб юбор! Сендан нима кетди... Гавҳарни ол-у мени қўйиб юбор!

Қўли борлиқ Тармочук ётган жойида ёнбошламоқчи бўлар, худди қўйнида нимадир бор-у уни авайлаётгандай ҳаракат қиласди. Бу Ахий Жаббор баҳодир назаридан қочмади.

— Йаналтекин! — буюрди у. — Чап қўйинини қара!

— Яқинлашма! Яқинлашма, деяпман сента! — бирдан кўзлари ола-кула бўлиб кетди Тармочукнинг. У бошини сарак-сарак қиласди. — Қоч, ҳозир калла ейсан!

Йаналтекин Тармочукнинг соқол босган юзи аралаш бир мушт туширди. Тармочукнинг лаблари қонаб кетди.

— Бу Учқорага пичноқ урганинг ҳаққи...

— Ёndoшма, деяпман! Яқинлашсанг ўласан!!! Қоч!!! — дерди ҳамон Тармочук, ётган жойида Йаналтекинга дағдара қилиб.

— Жуфт бўлсин, а? Қўймадинг... — Йаналтекин хотиржам яна муштини ишга солди. Иккинчи муштдан кейин Тармочук тақдирига тан берди, оғзида тўпла-

ниб қолган қонни бир четга туфлар экан, лом-мим демай ғазабдан қисилган күзларини Йаналтекинга тикди. Алам қиладиган жойи бор — агар Амир Кайхусрав топшириғини адо этса, Тармочук Хутталонда ўзи ёқтирган бир қишлоқ эгаси бўларди. Гоҳ бир амир хўржуини кўтариш, гоҳ ўзга амирнинг отини етаклаш унинг жонига текканди. Ўз қишлоғига зга бўлиб — ўзича ўша қишлоқни белгилаб ҳам қўйганди — фарватда умргузаронлик қилиш унинг энг ардоқлаган орзуси эди. Афсус, барчаси адои тамом бўлди...

Йаналтекин Тармочуқнинг кўзларини ўйнатиб, унинг қўйнидан зар попукли найча мактубни олди. Ахий Жаббор баҳодир дарров таниди: бу хоразмшоҳ, Ҳусайн Сўфи номаси эди!

Номани соҳибқиронга етказгандарида, у амирзода Жаҳонгир билан бирга қиссанон Мавлоно Убайднинг хоразмшоҳ Жалолиддин Мангуберди ҳақидаги ҳикоясини мароқ билан тинглаб ўлтиради. Амир Темур юртнинг мард ўғиллари тўғрисидаги қиссаларни жуда ёқтиради. Туминхон, Алп Арслон, Султон Санжари Мозий, Жалолиддин Мангуберди...

— Қиссаларни тинглагандан улут зотларнинг ёруғ ва қора кунлари сабабларини англашга уринингиз, амирзодам! Барчаси сизу бизга сабоқdir — уқтириди соҳибқирон...

Жаҳонгир Мирзо: «Маъқул!» дегандай бош тебратди.

Амир Темур Мавлоно Убайдга номани ўқишни буюрди. Ўрта бўйли, чиройли юзли, патак соқол қиссанон «Валлоҳи алам биссавоб!» деб қўйди-да, ингичка овозда дона-дона қилиб ўқишга тутинди... Нома ўқилган сари Амир Темурнинг қуюқ қора қошлиари чимирилди, катта-катта кўзларида ҳайрат учқунлари пайдо бўлди, кейин ғазаб ўти чақнади, беихтиёр икки бармоги билан қоп-қора соқолининг учини эзғилашта турди... Ҳа, бир ҳадисда айтилмишки, қайси одам рўзи азалдан ёмон бўлса асло тузалмагай. У яхшилик қилган одамига ёмонлик билан жавоб бермагунча, кўнгли ўрнига тушмас, бу дунёдан кетмас... Нечоғлиқ улут ҳикмат! Амир Кайхусравнинг қилмишидан соҳибқироннинг қаҳру ғазаб томирлари қўзғолди. Аммо ўзини босди. Амирул умаро Амир Жоку барлосга шундай буйруқ қилди:

— Хутталон ҳокими чодирига бориб, дарҳол уни

хонабанд қилдирингиз! Бир мучасига тегилмасун! Кимса билмасун! Унинг қўшинини еттига бўлингиз ва етти лашкарга қўшиб юборингиз! Хоразмдан сўнг унинг аҳволотин инсоф назаридан ўтказиб, тафтиш айлаб, бир қарорга келурбиз... Хутталон ҳокими Хоразмга отланайлук, деб бир йилдан бери ҳол-жонимизга қўймайдур эрди... Гап бу ёқда экан-да...

Амир Жоку барлос фармон ижросига отланди. Амир Темур хотиржам ўлтиромай саропардадан чиқди. У қўшинларнинг шу ерда ҳозирларини ўз кўзи билан кўрмоқчи эди. Соҳибқиронга Жаҳонгир Мирзо билан Суюрғатмишхон ҳамроҳ бўлдилар. Отларни келтирдилар. Хос ясовуллар кузатувида улар чодирма-чодир айландилар, лашкарга тартиб бериб, шу куннинг ўзидаёқ ёғий томон жўнадилар. Тарқалиб кетган қўшин бошлиқларига, Жўйи Қовун бўйига борилсун, деган яшиндан тез фармонлар юборилди.

... Турон лашкари манзилга етиб келганида, Жўйи Қовуннинг нариги ёғида маҳобатли Хоразм қўшинининг саф тортиб турганини кўрдилар. Амир Темур лашкарнинг маймана ва майсара бўлагини ороста қилди. Ҳеч бир томон жангга биринчи бўлиб киришишга ботинмасди. Лекин икки тарафнинг ногора ва бургулари аллақачон жангни бошлаб юборган эдилар, уларнинг садоларидан қулоқлар қовматта келай дер, қуёш ҳам ҳайратда тепада қаққайиб туриб қолганди...

Амир Темур Суюрғатмишхонга бир қараб қўйди. Подшоҳ Суюрғатмишхон бутун лашкарнинг олдида сув бўйига келди-да, ўз кўли билан ўқ отиб, Хоразм кутвомли Бекхожани изига қайтарди. Бу навкарларни руҳлантириб юборди. Жўйи Қовун эни ўттиз қадамлар келадиган тез оқар ва чукур анҳор эди. Амир Сорибуғо жалойир, Амир Муайяд арлот, Ахий Жаббор баҳодирлар қўрқмай сувга от солдилар. Қирғоқча чиқишарчиқишиш мас хоразмлик мард йигитлар уларга ташландилар. Жант бошланиб кетди. Амир Довуд дуғлат билан Аббос баҳодирлар бир ҳамлада бекларбеги Ҳожа Шайхзодани чекинишга мажбур қилишди. Менглихожа билан Амир Муайяд арлот қаттиқ савшишарди. Бир пайт қалқонини пана қилган Гурлан амири чапдастлик билан Амир Муайяд арлотни айланиб ўтиб қилич солди ва биқинидан айириб қўйди! Амир Муайяд арлот «Қизиғар!..» деди-ю гурс этиб отдан ерга қулади... Буни кўриб турган Амир Темурнинг бағрини қилич ялаб ўтгандай

бўлди, синглисинг тул қолганини тасаввур этиш ба-  
воят оғир эди соҳибқиронга!.. Ҳай, аттанг! Ёш кетди...  
Элчи баҳодирнинг ҳам умри қисқа экан, сувга шўнфи-  
ди-ю сув бетига чиқмади... Турон навкарлари энди ёпри-  
лишиб ўзларини сувга отишар, чиқишибок, душман  
 билан савашишга киришиб кетишарди. «Ур-ҳо, ур!»,  
 «Оҳ!», «Иҳ!» каби овозлар, қиличларнинг кескин қар-  
 силлашлари борлиқни тутган эди.

Амир Темур кичик тепалиқда от устида жангни  
кузатиб турар экан, ортиқ сабри чидамади. Ўзини май-  
донга ургиси, жонфидо навкарлари ёнида бўлгиси кел-  
ди. Муҳаммад Чуроға додхонинг ёлворганига ҳам  
қарамай, отиниб Жўйи Қовуннинг совуқ ва нишаб  
сувига солмоққа шайланди. Шу пайт пайдо бўлган шаҳ-  
зода Жаҳонгир Мирзо соҳибқироннинг оёрини ўпиб,  
гижинглаган тулпорнинг жиловидан тутди:

— Бир қошиқ қонимиздан кечсунлар, валинеъмат  
соҳибқирон! Бизга шафқат қилсунлар! Сувга от сол-  
масунлар! Бироз ўз иззаттоҳларида қарор топиб тур-  
сунлар! Иншооллоҳ, сувдан ўтмоққа ҳам фурсат кел-  
гувсидур!

Амир Темур ўғлиниң ёрқин кўзларига тикилар  
екан, уларда илтижоларга тўла қаътият кўрди ва сўзи-  
ни қайтара олмади. Жаҳонгир Мирзо шу заҳоти ўз  
отини сувга солди ва шиддат билан кечиб ўтиб, пада-  
ри бузрукворининг юрагини увалтириб, савашларга  
қўшилиб кетди... Унинг ўрнига ўзи жангта кирса тинч-  
роқ бўлар эди-я!..

Жанг сурони кучайиб борарди. Хоразмшоҳ Ҳусайн  
Сўфининг қароргоҳи анҳордан нарироқдаги бошқа бир  
тепалиқда жойлашганди. Жанг русумини кузаттани са-  
йин, хоразмшоҳ кўнглида хижиллик булути қуюқлашар-  
ди. Юсуф Сўфи, Ҳожа Шайхзода, Бекхожа, Менглихо-  
жа ва бошқа амирлар майдонда чарх уриб юришибди,  
аммо қўшинда тартиб, қурчлик йўқлиги тоҳ-тоҳда би-  
линиб қолмоқда. Хоразмшоҳ ўз қўшинидан ҳам кўра  
душман лашкари сафларига қарап, уфқда «аддои дўсти  
ва фидойи»си Амир Кайхусрав Хутталонийнинг оқ бай-  
роғи қачон ҳилпирад экан, дея умидвор кўзларини уз-  
масди. Аммо тикилган қозон қайнамас, деганларидаи  
кутилган оқ байроқдан ҳамон дарак йўқ...

Аср палласи ҳансираганча Юсуф Сўфи келиб қол-  
ди. Унинг авзои бузук эди, япалоқ, юзи оқариб кетган,  
манглайи ҳам қашқа бўлибди. У тахтда ёйилиб ўлтир-

ган хоразмшоҳга хижолатдан тикила олмай алам ичида деди:

— Аҳвол оғир, оға! Дарҳол чекинмоқ керак, йўқ эса шу ерда яксон бўламиз! Тезроқ қалъага етиб олайлик ва дарвозани қаттиқ беркитайлик! Оқсоқ Темурнинг қўшини бир балойи азим, ҳеч нарсадан қайтмайдур! Бас келиш қийин... Ҳа!..

— Амир Кайхусравдан хабар бўлиб қолар, Шоҳ Юсуф...

Ҳусайн Сўфининг овози шу қадар синик чиқдики, бу Юсуф Сўфига бадтар таъсир қилди:

— Энди кутищдан наф йўқ, оважон! — кескин деди Юсуф Сўфи тишларини тижирлатиб. — Қўшин хароб бўлди, майдонда ўлганларнинг ўндан саккизи бизнинг навкарлар... Оқсоқ Темурга эса ҳар томондан мадад келиб турибди. Тез фармон қилингиз, қалъага чекинмоқ керак! Қалъа қўлдан жетмасун!

— Бекларбеги... Хожа Шайхзодани чорлангиз... — ҳолсизгина буюрди хос ясовулга хоразмшоҳ...

Унинг овози зўрга эшилганидан Юсуф Сўфи таажжубланди ва «Оға, нима бўлди?» деб сўраш ниятида хоразмшоҳга боқди-ю қўрқиб кетди! Ҳусайн Сўфиги бирдан қалтироқ босди, чиройли юзи, пешонасидан бодраб чиқиб кетган йирик-йирик терлар текис қирқилган қора соқолига тушиб пастга тома бошлади. У нимадир демоқчи бўлар, аммо нафас етишмасди.

— Сув! Сув! — қичқирди Юсуф Сўфи мулоzимга. — Тез табибни чақирингиз!

Шу пайт Хожа Шайхзода, шайхулислом Киромиддин ас-Самарқандий ва хос табиб изма-из кириб келишди. Хос табиб дарҳол хоразмшоҳнинг томирини кўрди. Бемор ипак кўрпачада ўзини билмай ётарди. Бирдан «Ҳиқ!», «Ҳиқ!» деган қандайдир ғайритабиий саслар эшитила бошланди. Юсуф Сўфининг аъзой бадани музлаб кетди: хоразмшоҳ бу дунё эмас, бошқа дунё ташвишларини чекаётган бўлса-я?! Наҳотки?.. Шайхулислом Ҳусайн Сўфи бошида қуръон тиловат қилишга тушди. Хос табибининг шошилинч муолажалари бу сафар ёрдам бермади. Хоразмшоҳ кўп ўтмай бандаликни бажо этди.

Хоразмшоҳ ўрдусида мужмал ва танг вазият юзага келди. Юсуф Сўфининг боши қотди.

— Оллоҳнинг хоҳиши шундай эркан, на чора... Кўнгилни чўктирмангиз! — деди Хожа Шайхзода боши эгик Юсуф Сўфига. — Ёнингиздамиз...

— Хоразмшоҳнинг оламдан ўтгани ҳақидағи хабар қароргоҳдан четга чиқмасун! — қатъий фармон қилди Юсуф Сўфи, у энди хоразмшоҳ рутбасида эди. — Ҳеч кимса билмасун, айниқса, душман қулогига тушмасун! Фақат қалъага боргандан сўнг ошкор қилинур!

Бекларбеги Хожа Шайхзодага туни билан сездирмай чекинилсун, дея фармон берилди. Даставвал хоразмшоҳ Ҳусайн Сўфи жасадини маофага солиб жўнатдилар, кейин қўшиннинг қолган-қутгани йўлга тушди. Қалъа дарвозасидан киришлари билан, шоҳ ўлимидан юракларга тўлиб-тошган кам-ғусса тилларга кўчди, нола бўлиб Хоразм осмонини тутди...

Қалъа деворининг тагигача келган Турон лашкари бир неча кун шу ерда туриб қолди. Ҳисордан ҳеч ким чиқмади. Амир Темурнинг юборган одамлари дарвозадан ўта олмай қайтишарди. Ниҳоят, бир элчи хоразмшоҳ Ҳусайн Сўфи оламдан ўтганлиги, шаҳарда неча кундирки, мотам тутилаётганлиги ҳақида нохуш хабар келтириди.

— Ҳусайн Сўфи ўзи яхши одам эди, аммо маслаҳатчиларни саралай олмасди... — Амир Темур фотиҳага қўл очди. — Жойи жаннатдан бўлсун.

Юсуф Сўфи, хоразмшоҳнинг еттисини ўтказган куни, Амир Темурдан мактуб олди. Одатий даромадлар билан бошланган бу мактубни ўқир экан, Юсуф Сўфи дамба-дам тишларини тижирлатар эди:

«... Жумла мўмин-мусулмонларга ризқу насибасини қисмат қилиб бергувчи вазири йўқ сulton — Оллоҳнанг ўзибур. Ҳусайн Сўфи подшоҳ раҳматлик воқеасидин кўп озурда бўлдук, таассуфимиз шояд сизга етиб боргай. Алқисса. Ародаги ваҳшат ўрнини роҳату фарорат, унсу улфат' олсун, хусумат хешлик бирлан алмашсун... Бас, энди душман эрмас, дўст-қариндош бўлайлук. Мурод — ҳурмати сарбаланд амир Оқ Сўфининг суюкли жигарпораси Ҳонзода хонимни нури дийдамиз улуғ амирзода валиаҳд Жаҳонгир Мирзоға тила-мокдур. Муборак ушбу никоҳни анжомига етикурсалар эрди... Умид улким, арова адоват ҳам йўқолур, икки улуғ хонағон бир-бирларига жон ришиналари ила боғланурлар...»

<sup>1</sup> Унсу улфат — яқинлик, чин дўстлик маъносидаги ибора.

Танг аҳволда қолган Юсуф Сўфиға, бу тақлифни рад қилиш урушни давом этдираман, дейиш билан баробар эди. Хоразмшоҳ рози бўлиб, миннатдорчилик изҳор этди, ушбу акди никоҳга шубҳасиз рафбат кўргизажагини билдириди. Ўргада элчилар қатнови тезлашди...

Кутлуғ хабарни Хонзода хонимга айтганларида, кутилмаганда, хурсанд бўлиш ўрнига, қовоқ уюб волидай мухтарамаси Шакар бикани ҳайратта солди. Шакар бика тўладан келган, чиройли юзли, гавдаликина аёл эди:

— Мен эрга тегмоқчи эмасмен, онажон... Мен...

— Вой! Бу нима деганинг экан, тентагим? Эрга тегмоқчи эмасмен, эмиш... — койинди Шакар бика.

— Тегмаймен, дедим, тегмаймен!

— Маликам! Ундай демангиз! — инсофга чақиради Оққиз...

— Йўқ! Йўқ!..

— Ие, овозингни чиқарма! Дим тур! Айб бўлади! Бошингта баҳт қуши қўниб турибди. Кимсен, Амир Темур Кўрагонга, Турон султонига келин бўласен, боғонг Ўзбекхоннинг ҳам арвоҳи шод бўладур. Ахир қачонгача совчиларга йўқ деймиз? — вазмин сўзлади Шакар бика. — Кейин, хоразмшоҳ Юсуф Сўфи амак келган совчиларга розилик бериб юборибдилар. Унинг юзини ерга қаратиш керак эмас... Ҳай-ҳай, подшо сўзи-я! Юртга ҳам тинчлик инади...

— Ана Сийминни берсунлар... ундай бўлса...

Хонзода хоним шундай деди-ю ўзини онасининг бағрига отиб йиғлаб юборди. У негадир ўқсиб-ўқсиб йиғларди. Унга энди Оққизнинг пиқиллагани ҳам қўшилди.

Шакар бика шунча ёшга кириб ҳалигача қувонгандаги йиги билан қайғудаги йигини ажратта олмайди. Лекин ҳар иккиси ҳам кўнгилнинг туб-тубидан чиқишини аниқ билади...

— Вой тентагим-ей, тентаккинам! — Онаизор бағридаги қизининг соchlарини силаб юпатар экан, ўзи ҳам кўзларига тўлиб келган ёшни тўхтатолмай қолди...

## ЙИГИРМАНЧИ БОБ

### I

Боги Чинордаги маҳобатли тўрт ошёнали қаср битмасдан аввал ҳам Соҳибқирон билан Сароймулхоним бу боғни сайдир этишга тез-тез келиб турадилар. Эни беш юз, узунлиги минг қадамлар чиқадиган боғнинг нақшин нигор дарвозасига етганда султону малика ҳар гал маофадан тушишади. Боғнинг тевараги баланд девор билан ўралган, девордан тўрт қадам ичкаридан айланма ариқ оқиб ўтади. Ариқ лабидаги тўрт йил аввал ўтқазилган тераклар бўй чўзиб, шовуллайдиган ҳам бўлиб қолишиди. Чиройли қилиб экилган гуллар ёни эса — йўл. Тош терилган йўлдан ичкарига юрилса, ўриқ, шафтотли ва узумларнинг яшнаб ётганини кўриш мумкин. Чорчаман жуда ажойиб! Тўрт чаман — анорзор, шафтотлизор, нокзор, беҳизорлар боғнинг чиройини яна ҳам очиб юборган.

Боғ ўртасидаги қаср рўпарасида таги феруза лаппакчалар билан қопланган, ҳамиша зилол сувга лимлим тўлиб турадиган каттагина ҳовуз кўзга ташланади. Ундан наридаги яшнаган гулбогчалар бир-бирига тутишиб ранг-баранг мусамман юлдуз шакли ҳосил қилгани. Бунда ҳамма гуллардан топилади: биринчи гулбогчада тоғ лоласи, гулихайри, нарғис, оқ савсан, чаман акруз, оддий шақойиқ гуллари экилган. Иккинчисида — атиргул, бинафша, лолайи дутабақа, сахройи, хашибошлар бир-бирлари билан кўрк талашади. Учинчисида насрин, оқ ёсуман, гули шашмога, сариқ аргун, бағдодий қазғолар бошқа гулларга ранг улашади. Тўртинчисида — дарди кокилий, намозшомгул, нибуфар, райҳон, сариқ ёсуман, гултоҷихўроз, бешинчисида — гули раъно, сафсар, қаранғангул, сахро лоласи, заъфаронгул, хатми хитойи, садбарг, олтинчисида... етгинчисида... Гуллар худди аҳдлашиб олишгандек биринма-кетин очилишиб кишини танг қолдиришарди.

Сароймулхонимнинг энг суйган дараҳтлари қасрнинг икки ёнида бўй чўзган расида чинорлар эди. Ҳали боғ ўрни тақир ер эканлигига ёқ, соҳибқирон иккиси яхши ниятлар билан экишганиданми, уларга меҳри қандайдир бошқача товланарди. Қасрнинг ўнг томонидаги чинор, ажабо, жуда тез ўсиб кетди, ҳали

ёшлигига қарамай, шох суриб тарвақайлай бошлади, аммо иккинчисининг ривожи суст эди. Бу нарса Сароймулхонимни ҳайрон қолдиради. Жаҳонгир Мирзо бу чинорларни яхши кўрар, ўнг томондагиси валинеъмат соҳибқирон, чапдагиси унинг боласи, деб қўярди, Сароймулхоним бу ўхшатишдан завқданарди. У борбонга чинорлар тагини чопиб, тез-тез сув қўйиб туришни тайинлаган. Бутунлай Бори Чинорга кўчиб ўтгандан кейин маҳди улё чинорлар парваришини ўз зиммасига олди. Баҳор охирларида унинг ташвишига ташвиш қўшилди: бу бокқа яқин кунларда Хоразм маликаси Хонзода хоним келиб қўниши керак...

Бундан бир ой аввал Хоразм мамлакатидан қутлуғ хабар келди. Хоразмшоҳ Юсуф Сўфи малика Хонзода хонимни подшоҳларга муносиб сепу яроғ<sup>1</sup> билан бе заб, тўй тортиб Самарқандга юборибди. Кўпдан кутилган бу мужда ҳаммага қувонч бағишлади.

Сароймулхонимнинг маслаҳати билан Қайдухоннинг келини Қуртуға хотунни Хоразм маликасини кутиб олишга жўнатдилар. Таомили шу-да, Чингизхон авлодини Чингизхон авлоди кутиб олсин. Қуртуға хотун бир неча нуфузли беку амирларнинг заифалари куршовида йўлга чиқди. Изма-из саййидлару қозилар, уламо-ю машойихлар боришаради. Мурод, Хоразм маликасини Кот шаҳрида қаршилаб, олиймақом ҳурмат даражасида тантана-ю дабдаба билан пойтаҳт Самарқандга олиб келишдан иборат...

Аммо бу кунгача Хоразмшоҳ Юсуф Сўфи неча бортурланиб, неча бор ўзгарди. Хонзода хонимни Жаҳонгир Мирзога раво кўришдан воз кечиб, Котга қўшин тортиб, ҳароб қилиб қайтди. Бунинг тарихи Хутталон ҳокими Амир Кайхусравга бориб тақаларди. Соҳибқирон Хоразмдан қайтгач, бекларга Хутталон ҳокимини келтириб, тафтишдан ўтказишларини буюрди. Амир Кайхусравнинг хоразмшоҳ Ҳусайн Сўфига ёзган бузғунчиликка бошлаган мактубининг ўзиёқ тўппа-тўғри ёсоққа олиб борадиган рад қилиб бўлмас далил эди. Шу паллада Амир Ҳусайн давлатида Ҳиндувон қалъаси кутволи мансабида хизмат қиласан Амир Халил ўзини соҳибқирон оёғига ташлади:

— Амир соҳибқирон! Амир Кайхусрав бағоят фитначи, у Амир Ҳусайнни укам хунини оламан, деб қатл

<sup>1</sup> Я р оғ — бу ерда: сеп, маъносида.

этон. Уни шариат ҳукмига кўра жазо олишини талаб қиладурбиз. Амир Кайхусравни бизнинг ихтиёrimизга тобшурсунлар, нима қилишни ўзимиз билурбиз, Амир Ҳусайннинг хуни унинг бўйнида турибди!

Амир Темур, бир пайтлар Амир Кайхусравнинг шокоса кўзларини лўқ қилиб, Амир Ҳусайнга жазо бериши сўраганини эслади. Қасосли дунё бу! Ҳар бир қадамни ўйлаб босмоқ керак...

— Амир Кайхусравнинг аҳволи руҳиясини билингиз, ёрғусини<sup>1</sup> сўрангиз! — буюрди Амир Темур. — Адолат кўзи бирлан қаралсун!

Тафтишда Хутталон ҳокимининг кўз юмиб бўлмас гуноҳлар қилгани қалқиб юзага чикди. Шариат ҳукмига кўра, Амир Ҳусайн навкарлари Амир Кайхусравни Самарқандда ёсоқда етказдилар. Соҳибқирон Хутталон ҳокимлигини Шер Баҳром деган дўстининг ўғли Муҳаммад Миракка топширди. Бир жиҳати Муҳаммад Миракнинг Амир Кайхусравга қариндошлиги ҳам бор бўлиб, улар бўла эдилар.

Ушбу воқеадан сўнг Амир Кайхусравнинг ўғли Султон Маҳмуд, Абу Исҳоқ Ясовурий ҳамда Маҳмудшоҳ Бухорийлар ваҳимага тушишиб Хоразмга қочиб кетдилар ва Юсуф Сўфини фитналарга ундан, эс-хушини олдилар. Юсуф Сўфининг Котга юриши важи ана шундай эди.

Сароймулхоним Хоразм маликасига ажратилган бўлмаларни яна бир бор кўздан кечирмоқ учун иккинчи ошёнага чиқа бошлади. Уч бўлманинг бири — хийлагина каттаси — Хонзода хонимга, иккинчиси — янга-ю дугоналарга, учинчиси эса келиннинг сепу яроғига аталган. Хуллас, бу Хонзода хонимнинг «уй»и. Келин шу ердан чиқарилиши мўлжалланган. Аммо ёз фасли эканлиги ҳисобга олиниб, бор ичида чаманлар орасида гулгун чодирлар тикиш лозим кўрилди. Келин учун эса ясатилган маҳобатли яшил уй бунёд этилди. Тўй Бори Чинорда бошланиб Конигилда давом этади. Бу ерда ҳам ададсиз ранг-бараг чодирлар қад кўтарди. Келин-куёвлар учун бўй чўзган улкан оқ уй бамисоли бутун ўланзорни тўлдириб турар, уй ичини безаган лаълу дур, зару забарждар ловуллаб кўзни оларди.

Соҳибқироннинг Жаҳонгир Мирзо ниҳоятда ардоқлашини кузаттан Сароймулхоним ҳам фарзандга

<sup>1</sup> Ёғу — тафтиш, муҳокама қилиш, ҳукм чиқариш.

ташна эканлигиданми, ҳарамга келган куиданоқ ҳар-қалай амирзодага қайишиб қарайдиган бўлиб қолди. Жаҳонгир Мирзонинг ўзи ҳам яхши бола-да! Баланд бўйли, дуркун, юмшоқ, кўнгил, юзларига боқсанг тиник, мўйлаби эндинга сабза урган, кўзлари ёрқин... Қараган қараб қолади. Маҳди улё унга худди ўз ўғлига талпингандай талпинар, бу билан кимга берилишини билмай ётган оналик меҳри қаноат топгандай бўларди. Онасиз ўсаёттан, она меҳрига зор Жаҳонгир Мирзо ҳам Сароймулхонимга худди онасига боғлангандай боғланиб қолди. Уларни бамисли она-боладай эканликларини кўрган Амир Темур ичида доно ва зукко маҳди улёдан қувониб қўярди.

Самарқандда шов-шув бўлиб кетди: «Эмиш... Ҳазрат соҳибқирон Хоразмдан моҳиталъат келин олибдилар! Келгуси ҳафта тўй эмиш!..» «Келин Чингизхон авлодидан эмиш, Ўзбекхоннинг набираси бўлармиш. Жаҳонгир Мирзо — Кўрагон бўлар эмишлар...» «Хоразм маликасининг сепу яроғи беадад эмиш. Қирқта тевадан ташқари, бир неча оту аробаларда ҳам сеп, гавҳару зумуррад, зару забаржадлар келаётганимиш...»

Ушбу қутлуғ хабар яшин тезлигига уйдан уйга ўтди, ҳовлидан ҳовлига... Самарқанд аҳли тўй қунини интиқдик билан кутар, қариялар бўлса: «Илоё, ҳаммани ҳам шундай тўйларга етказсин!» дея дуо қиласардилар.

## II

Боги Чинорнинг нақшинкор дарвозасидан ичкарига қараб юрган Хоразм маликаси маофаси қаср олдида тўхтади. Хоразм маликаси, Иқбол бика ва Оққизлар кўмагида ерга тўшалган қирмизи гиламга оҳиста қадам қўяркан, ёзниг қайноқ қучоғида ёнаёттан ям-яшил боқقا бир назар ташлаб улгурди. Бир лаҳзага қасрнинг икки тарафида бўй чўзган чинорлар ҳам унинг дикқатини ўзига тортди. Қаср олдида саф тортиб туришган анвойи либосларга бурканишган бири биридан гўзал қизу жувонларнинг барчаси ҳаяжонда... Улар Амир Темурнинг ҳарами — хотинлари ва канизаклари. Энг олдинда оппоқ либосли, истараси иссиқ, хушбичим бир аёл турар, икки чеккасидаги гажак, икки қора зулфи, чап юзидағи кичкина қора холи яққол кўзга ташланарди. Ҳонзода хоним гарчи аввал кўрмаган бўлса-да, рўбарўсидаги хонимнинг со-

ҳибқирон ҳарамида энг суюкли ва эътиборли саналган Сароймулхоним эканлигини дарров фаҳмлади. Эши-тишича, Сароймулхоним Жаҳонгир Мирзога она ўрнида эъзозли эмиш.

Чингизхон наслининг икки зурёди бир-бирлари томон кела бошладилар. Сароймулхоним нур билан чайилгандай оқ-сариқ юзли, шаҳло кўзли, лаблари юпқа, иринининг ўнг томонида мутьжазгина қора холи бор, кулдиргичи ўзига ярашган гулчехра Хонзода хонимга назар ташлаб, қошида табиатнинг дурри яктоларидан бири турганлигига имон келтирди. Хонзода хоним чиройли таъзим бажо қилганча икки қадам нарида тўхтади. Маҳди улё яқинлашди-да, Хонзода хонимнинг манглайидан озор бериб қўймай, дегандай назокат билан оҳиста ўпди ва деди:

— Қадамингиз қутлуғ бўлсун, маликам!

...Конигилда тўй тантаналари охирлаб қолди. Тўйдан сўнг келин-куёвлар Чўпон ота адири этагида шаҳзода Жаҳонгир Мирзога атаб барпо этилган «Бори Нақши Жаҳон» борида, маҳобатли қасрда яшашади.

Еттинчи кун эканлигига қарамай Конигилда одамлар оқими тўхтамайди. Вилоятлар ҳокимлари, турли шаҳру қасабаларнинг қадхудолари тўйхона дарвозаси олдида узоқ-яқиндан келган меҳмонларни қўл қовуштирганча кутиб олишар, уларнинг иззатларини жойига қўйишга тиришар эдилар. Бори Чинорда ҳам, Конигилда ҳам катта зиёфатлар берилди, дош қозонлар осилиб юртта ошлар тортилди. Кўпкарида моҳир улоқчиларнинг куни туғди — улар беҳисоб соврун-саломлар тагида қолиб кетдилар. Машшоқчиларга ўз санъатларини намойиш этишга беадад имконлар яратилган эди. Етти кундан бери Самарқанд осмонини ўз тасарруфига олган савту наво авжидан тушмасди.

Жаҳонгир Мирзо яхши эслай олмайди. У гўё зартакларда юргандай ҳис қиласида ўзини... Ҳа, бари тушдай бўлиб ўтди. Бирдан уйғонади-ю авваллари неча бор юз берганидай, кўриб турганлари кўз олдидан ройиб бўлади... Ҳаяжондан энтикиб турган куёв ойлар, йиллар интизор кутган маъшуқасининг шу ерда, унинг билан бир шаҳарда эканлигидан ва ҳали замон — ҳатто! — бир гўшага киришидан, висол завқи-шавқи хаёлидан сархуш эди. Ё фалак, шу ростмикин?..

Хонзода хонимнинг Самарқандга қараб йўлга чиққани аниқ бўлгач, Жаҳонгир Мирзо ўзини қўярга жой

топа олмай қолди. У Хонзода хоним қарвонининг чўли маликлар оша, қум тепаларни ортда қолдириб машақ-қатлар билан келаётганини тасаввур қилишга уринди. Қайлигининг азиз жони йўл азобида қийналиб азият чекаётганидан юрагининг аллақаериdir беҳол ачишар, Ахий Жаббор баҳодирдан дамба-дам Хоразм йўлларининг текисми — нотекис эканлигини сўраб-суриштирас эди. Дўстлари Сулаймоншоҳ билан Жаҳоншоҳ ибн Жоку элдан бурун «Кутлур бўлсин»га шошилдилар. Улар амирзоданинг шундай бир маликаи даврон висолига етишаётганидан хурсанд эдилар, айни пайтда номдор маликага бир назар ташлаб қўйишга ҳам қизиқардилар.

Дўриллоқ овозли, елкадор Сулаймоншоҳ Жаҳонгир Мирзонинг тиник юзларига, қуюқлашиб қолган сабза мўйлабига, нимагадир интиқ бўлаётган ёрқин кўзларига тикиларкан, уни ҳар хил нарсалар билан ҷалғитиб туриш лозимлигини англади. Нафсилемири ни айттанди, буни унга Кутлур Туркон оқа уқтириди. Шу маънода улар даставвал Конигилга чиқдилар. Етиб боришилари биланоқ эски одатларини қилиб, отларини сайистга топширдилар-да, ҳеч ким йўқ жойга, кўздан четроққа йўл олдилар. Ям-яшил ўланзор, майса-гиёҳлар ранги тип-тиник беғубор эканлигидан улкан гилям ташланган майдонни эслатарди. Тор тарафдан эсан шабада юзларга майин урилади. Амирзодалар сұхбатида тизгин йўқ, гап боши оққан томонга бурилиб кетаверади... Аслида мақсад ҳам шу, ёр ҳажрида ўртана ётган Жаҳонгир Мирзо ҷалғиса, бас. Ургут сафари ҳам мақбул бўлди, бориб келгунча тўрт кун вақт кетди. Уларни Ахий Жаббор баҳодир ўз йигитлари билан кузатиб борди.

Ахий Жаббор баҳодир ниҳоят Жаҳонгир Мирzonинг беғубор орзулари ушала ёттанидан беадад хурсанд эди. Бу дунёда ҳар ким ўз мурод-мақсадига етсин! Амирзоданинг ушбу қувончида озрок ўзининг ҳам ҳиссаси борлигини ўйлаганда, ўнбоши ғуурланиб кетади. Бу ғуур қувонч билан қоришиқ. Сабаби, Хоразм маликасининг ёнида унинг садоқатли канизаги, ажralмас дугонаси, қорачадан келган ўйноқи кўзли Оққиз ҳам бор экан! Ана шуниси Ахий Жаббор баҳодир юрагини ўйнатади...

Еттинчи куни аср намозига яқин пайтда Жаҳонгир Мирзо куёвжўралари билан Боги Чинорга отлан-

ди. Сулаймоншоҳ, Жаҳоншоҳ, ибн Жоку, Умаршайх Мирзо, Султон Маҳмуд ибн Суорғатмишхон, Одилшоҳ, жалойир, Муҳаммад Мирак ва бошқа амирзодалар куёвтўра атрофини ўраб келишар, Ахий Жаббор баҳодир ҳам шу ерда у-бу хизмат қилиб ўралашиб юради.

Йўлга чиқишилари билан уларни кузатиб келаётган машшоқлар ишга тушиб кетдилар. Карнай-сурнай овозлари дамба-дам ўрин алмашар эди. Куёвжўралар ёр-ёри бошлаб юбордилар. Рақсга чорлайдиган куйлар янгради. Бошига зарбофт тўн ташланган куёв олдинда чарх уриб ўйнаб бораётган баҳтиёр жўраларидан кўз узмасди.

Бори Чинорнинг ўртасида, келиннинг сепу яроғи билан чамандай безатилган яшил уйда куёв ва куёвжўралар учун алвон хонтахталар қўйилиб, башанг дастурхон ёзилди. Таомларнинг кети узилмас, куёвжўралар кайфияти баланд, нақ арши аълода эди. Улар ҳатто куёвни бошқа хонага чақирганлари ва у ерда никоҳ ўқитилганини ҳам сезмай қолдилар.

Шаҳар узра оқшом ўзининг ҳарир қора пардасини ёя бошлаганда келин катта машъалалар ёруғида дабдаба-ю асьаса билан Конигил томон йўлга чиқди. Йигирмага яқин безатилган аробалар карвони маржондай тизилган, тўрт томондан машъалалар билан ўралган энг катта аробада Хонзода хоним ўз канизаклари билан борар, қолганларига келиннинг сепу яроғи ортилган эди. Кўнгилни беҳол увалтирадиган ёр-ёр садолари Самарқанд осмонини ажабтовур файэли қилиб юборди.

Конигилдаги оқ, уй олди одам билан тўлиб кетган, ҳамма қадами қутлув келин ташрифига мунтазир. Ўртада катта гулхан гуриллаб ёнади. Ўнг томонда Амир Темур ва бутун аркони давлат жамулжам, бу ерда Суорғатмишхон, Амир Довуд дувлат, Амир Сайфиддин некўз, Амир Жоку барлос, Шайх Муҳаммад Баён суддуз Хонзода хонимни кузатиб келган Хожа Шайхзода, Гурганж кутволи Бекхожа ва бошқа кўп амирларни кўриш мумкин. Ҳамиша бир хил кийим — оқ ридода юрадиган Мир Сайид Барака ҳам Амир Темур ёнида.

Чап томонни қизу аёллар эгаллаган, улар орасида Кутлув Туркон оқа, Сароймулхоним, Куртуға хотун ажralиб туришибди. Ҳарам маликалари минг бир хо-

тира оғушида, қачон келин келаркин, дейишиб тоқат-сизланишади. Ўсмиру болалар эса ҳар ёқни тутиб кетишган... Сайхонлик ўртасида гуриллаб ёнган катта гулхан шуъласи одамлар чехрасида ўйнайди.

— Келинни кўтариб олсун! Куёв келинни кўтариб олсун! — деган овозлар янгради.

Жаҳонгир Мирзо Хонзода хоним ўлтирган аробага яқинлашди ва дўндиқ қайлигини опичди-да, даст кўта-риб ерга қўйди. Бироз ҳаллослаганини ҳам сезди... Юраги гурс-гурс тепар эди. Келинни ороста қилган бўйи муанбарданми, ё неча йиллар орзиқиб кутган ёрининг висолига етишаёттанданми, балки бемисли баҳт ҳиссидан маст бўлиб ўзидан кетишига оз қолди, юраги бўшашгаңдай бўлди. Жаҳонгир Мирзонинг бир теб-раниб кеттанини кўрган сезгир Сулаймоншоҳ дарров куёв қўлтиғига кирди, атрофни тутиб кетган қийқи-риқлар остида қулоғига шивирлаб деди:

— Ўзингизни қўлга олингиз, амирзодам! Муборак бўлсун! Муборак бўлсун!

Амир Темур барини кузатиб турарди, у ҳам ўслида бир лаҳза юз берган тағайюрни сезди. Сулаймоншоҳ Жаҳонгир Мирзо қўлтиғига кириб тўғри қилди. Ҳа, Жаҳонгир Мирзонинг Хонзода хоним ишқида мажнун бўлиб юрганини падари бузруквори кўпдан биларди. Бу ҳақда эгачиси Қутлуғ Туркон оқа билан неча-неча бор сұхбат курганлар. Холисанилло айттанда, у икки навниҳолни бир-бирига қовуштириб қўйиши, тўйларини тантана билан ўтказишни чунон истади, худо шоҳид, саъи ҳаракатлар кўргизди. Аммо хоразмшоҳ Юсуф Сўфининг кажбаҳслиги бунга йўл бермади. Амирзода куёв маст бўлса арзиди, Хонзода хонимни не-не талабгорлар орасидан ажратиб олди. Ўзбекхоннинг набираси энди Амир Темур хонадони аъзосига айланди. Иншоolloҳ, бу акду никоҳдан ажойиб фарзандлар дунёга келади, улар буюк тахт во-рислари бўладилар. Чингизхон хонадонига уланган Амир Темур хонадони ер юзида барқарор бўлиб давру даврон суради ва Жаҳонгир Мирзо билан Хонзода хонимлар, уларнинг оқилу доно фарзандлари узоқ йиллар салтанат шукуҳига шукуҳ қўшадилар...

Атрофидан келган меҳмонлар Амир Темурни муборакбод этишиб, фотиҳа ўқишиб ортга чекинишарди:

— Муборак бўлсун!

— Қутлуғ бўлсун, Амир соҳибқирон!

— Ували-жували бўлсунлар!

— Қуллук! Қуллук! — деб жавоб берар эди барчасига Амир Темур ўнг қўлини кўксига қўйиб.

Келинни ёр-ёр садолари остида гулхан атрофида айлантира бошладилар. Уч марта айланилгач, келин атрофга бамисли нур таратиб турган оқ уй сари йўл олди. Келин уйга қадам қўйиши билан, оstonага тўшалган баҳмал поёндоз қизу жувонлар, янгалар ўртасида талаш бўлиб кетди.

Эни ўн беш, узунлиги йигирма қадам келадиган, шамлар қўйилган оқ уйда бир тўп қизлару янгалар чарх уришиб сепу яроғларни деворга осиш, уйни бе-затиш билан машгул эдилар. Тўрда ўнг томонда барқут парда тутилган бўлиб, бу номининг ўзиёқ кўнгилларни титратиб юборадиган чимилдиқ дегани эди. Икки янга чимилдиқ атрофида куймаланиб юришарди.

— Дунёда бор матоҳ, илоё, чимилдиқ бўлай, деб орзу қилас экан, жоним гиргиттон сизга! — деди биринчи янга ёнидаги шеригига,

— Ҳа-да! Чимилдиқ бўлсан, дейди ҳаммаси, айланай! — тасдиқлади иккинчиси.

Хонзода хоним келинлик либосига бурканганидан бир ҳуснига ўн ҳусн қўшилиб ойдай балқиб кўринар, Иқбол бика, Сиймин бика, Оққизлар унинг атрофида парвона эдилар. Шакар бика ҳам шу ерда, ҳамма нарсани назорат этиб турарди. Ҳали Боги Чинорда имом Чингизхон авлоди билан Амир Темур авлодини бирбирига ақди никоҳ қилаёттанида, Хонзода хоним ёрининг яқингинада, шундок эшикнинг орқасида турганигини илк бор туйган эди. Жаҳонгир Мирзо уни аробадан даст кўтариб олганида эса бутун борлиги титрагандан титраб кетди! У илк бор эркак зотини, вужудини ҳис қилди, бу жуфти ҳалоли Жаҳонгир Мирзонинг вужуди, уни суюб даст кўтариб олган ўзининг қуёви Жаҳонгир Мирзонинг кучли қўллари! Бу баҳт, бундай баҳтни худои таоло суйган бандасига беради!

Амир Темурнинг эгачиси, бодомқовок, хушрўй Кутлуг Туркон оқа келиб чимилдиқни кўтариб, оппоқ либосда фариштадай, ҳур қизлардай бўлиб, хиёл эгилиб турган Хонзода хонимта яқинлашди ва манглайидан оҳиста ўпаркан, деди:

— Бўйингиздан айланай, маликам! Оллоҳ баҳтларингизни берсун! — Кейин буюрди: — Ҳой янгалар! Жойни ҳозирлангиз! Қани, омин! Оллоҳу акбар!

Шакар бика, Сароймулхоним, Қуртуға хотун, жаъми қизу жувонлар барчаси фотиҳага қўл очдилар:  
— Оллоҳу акбар!

Икки янга худди шуни кутиб туришган эканми, чаққон ишга тушиб кетдилар. Бир пасда қатма-қат ипак тўшаклар, шоҳи кўрпалар одам бўйига етди. Кўрпалар устига шоҳи рўйжо ташланди. Ҳамма хона ўртасида савлат тўкиб турган ороста шоҳона ўринга ҳавас билан қарар, ҳамманинг ҳам кўнглида ажабтурвур туйгулар уйғонар, ўрин ҳамманинг ҳам эсига ширин хотираларни солар эди.

— Куёв келди! Куёв келди-и-и!.. — деган сўзлар эшитилди.

Қизу жувонлар қий-чув ичида бир четта тисарилишиб, куёвга йўл бердилар. Энди оҳиста ерга қараб юриб келаётган куёвга назар соламиз. Куёв узун оқ зарбофт авра тўн кийганидан бўйи яна ҳам чўзилгандек, туюлади, бошида заррин куёвлик тожи... Шам ёруғида юзидағи ифодани, ҳолатни илғаш қийин, ҳарқалай юзи ҳаяжондан қизариниб кетгандек...

Шу палла янгалардан бири жойга чиқиб ўраниб ётиб олди:

— Келин қутулиб олди! Ўғил турди, ўғил! Суюнчи беринг, суюнчи, куёвжон, суюнчи! Иrimi-да, иrimi, айланай! — дерди иккинчиси. Жаҳонгир Мирзонинг қулоги яхшигини пишишиб қўйилган эди. У ёнчини олиб янгаларга қараб ирритди:

— Хуш келибсиз, куёвтўражон! Келингиз! — янгалар энди шоша-пиша куёвни чимилдиқ томон бошладилар. Сулаймоншоҳ билан Жаҳоншоҳ ибн Жоку куёвнинг икки ёнида келишарди, аммо янгалар факат Жаҳонгир Мирзони чимилдиқ пардасидан ўтказдилар.

Улуғ амирзода чимилдиқ ичига қадам қўйди-ю, беихтиёр қайлиига қаради... Умрида илк марта мана шундок дилдорига яқин келиб турибди, илк марта ёри жамолини кўриши мумкин! Аммо, бахтга қарши, Хонзода хоним бошини қўйи эккан ҳолда ерга боқиб турар эди, чехрасини кўриш насиб этмади. У юриб келди-да, шарт келинни кўтариб олиб одам бўйи келадиган жойга ўтқазиб қўйди.

Биринчи янга дарҳол шоҳона ўрин устида чўкка тушиб ўлтиришган келин билан куёв олдига чиройли заррин гардишли тош ойна келтириб қўйди. Ойна ке-

лин-куёвни баравар кўрсата олар даражада тиник ва катта эди.

— Ойми, кун, жоним гиргиттон сизга? — сўради янга Жаҳонгир Мирзодан.

Хонзода хоним ҳам, Жаҳонгир Мирзо ҳам ойнага қарадилар... Уларнинг чехралари ёрқин, шамни хира қилар эди. Хонзода хоним ойнага бир қаради-ю дарров бошини ерга эгиб олди. Жаҳонгир Мирзо чукур энтиқди. Ла ҳавла вала қувват! Ана, нур билан чайилгандай оқ-сарик юzlари, шаҳло кўзлари, юпқа лаблари, иринининг ўнг томонида мўжазгина қора холи бор, кулдиргичи ўзига ярашган, тим қора ҳилол қошлари бемисол! Оламнинг дурри яктоси, гўзаллар гўзали, зеболар зебоси! Энди шу санам — уники! Жаҳонгир Мирзоники! Жаҳонгир Мирzonинг хаёли узоқ йилларга, Хонзода хоним таърифини йироқдан эшишиб, ғойибона ошиқ бўлиб юрган паллаларга кетди, воҳ, суйгани у ўйлагандан ҳам ортиқроқ сулув, моҳу маҳлиқо экан!..

— Ойми, кун?..

Жаҳонгир Мирзо ўзига келди ва жавоб бериш лозимлигини англади:

— Ой!..

Янга энди Хонзода хоним томонга ўтди ва саволини такрорлади:

— Ойми, кун, жоним гиргиттон сизга?..

Хонзода хоним хиёл эгилган бошини кўтариб ойнага бир қарашга журъат этди... «Амирзода шу йигит эканлар-да... Жаҳонгир Мирзо!.. Амир Темур Кўрагон ҳазрати олийларининг паҳлавон фарзанди, олам аҳлиниң амирзодаси, салтанат кўз қорачуғининг нури, иқбол чаманининг сурори шаҳзода Жаҳонгир Мирзо... Бағоят хуш сурат эканлар! Ёринг борму, деса дегудек. Энди у — Хонзода хонимнинг амирзодаси. Энди Хонзода хоним ҳам, жаҳоннинг турфа юртларидан келган совчиларни ноумид қолдирган, не-не паҳлавон амирларнинг кўлини қайтарган соҳибжамол Хонзода хоним, мана шу йигитнинг хасми бўлади... Хоразмдан келаёттанида онаси Шакар бика уни ёнига ўтқазиб, айтган сўзларини эслади: «Нуридийдам, бу Оллоҳ таолонинг биз аёлларга ато этган насибаси. Момо Ҳаво онамиздан мерос... Гапимни уқиб ол. Сен нотаниш бир хонадонга келин бўлиб бораётиссан, кўрмаган кишингга йўлдош бўлаётиссан. Йўлдошинг сен учун осмон эрса, сен ер бўлмогинг лозим. Ердай бўл, ардоқли

тўшак бўл! Сўзингни ширин қил, аччиқ сўзларни асло тилингта олма! Очиқ чехрали бўл, қиёфангни марғуб эт! Зинҳор синикқан чехрада-ю уринган либосда унга кўринма!..» Кўрмаган кишингта йўлдош бўлмоқдасан, дедилар онаси. Хонзода амирзодасини кўрмаган бўлса ҳам, юрагининг, қалбининг кўзи билан кўрган, жамолини кўнгил кўзгусига муҳрлаб қўйган!.. Агар Жаҳонгир Мирзо осмон бўлса, Хонзода хоним ўша осмонга интилган, ундан баҳра олган меҳри билан яшнаган ер бўлмакка рози! Ҳали ердай бўлиш экан-ку, ҳатто бутун вужудини борлигини, ёш умрини, жонини, ҳаётини беришга, фидо қилишга тайёр! Ардоқли тўшак бўлибгина қолмай, ёрининг босган изи, гарди пойи бўлишга рози! Аччиқ сўзларни тилингта олма, дедилар... Хонзода хоним аччиқ сўзни тилга олиш эмас, йўқ, асло ундан қилмайди, балки ёрига тилининг учидага новвот беради, жонига жон бўлади!..

Кечакамомга борганларида қизик ходиса юз берди. Жуда ҳам ороста ва покиза подшо ҳаммомида арусхонада Хонзода хоним, Иқбол бика, Сиймин бика, Оққиздан бошқа ҳеч ким йўқ, эди. Ҳаммомчи хотин уларни жомахонага олиб кирди. Қизлар чукурлашиб бир-бир либосларидан қутула бошлидилар... Оқ лунгидан бошқа либоси қолмаган қизлар худди олтиндан ясалган ҳайкаллар каби бир-бирига қарашар, уялишганидан қўллари билан анор сийналарини яширишга уринардилар. Бири биридан гўзал ва бекусур сиймин баданлар ҳаммомни ёритиб юборгандай бўлди. Иқбол бика Хонзода хонимнинг гўзал қадди-қоматига, хушбичим аъзоларига боқиб ҳайратланди, ёнига келди-да, дугонасини аллақандай завқ билан қучоқлади:

— Ох, мен йигит бўлганимдами... Сени ўзим олардим!

— Сенмас, мен олардим! Мен!.. — чопиб келди Сиймин бика.

— Йўқ... Маликамни ўзим олиб қочиб кетардим! Узок-узокларга... Биронтангизга бериб қўймасдим!.. — Оққиз ҳам бир четда қараб турмади.

Уч қиз ҳам Хонзода хонимни ўз бағрига босишни истарди.

— Вой, вой... — Хонзода хоним сўз қотган бўлди. — Ўлақолинглар!

— Ойми, кун? Кун деб айтинг, жоним гиргиттон сизга! А, кун? Кун, а?

Янганинг овози жуда узоклардан эшитилди. Савол тақрорланди. Хонзода хоним ҳаяжон оғушида жавоб бериш ҳолатида эмасди, янганинг «Кун, а, кун?..» деган сўзларига, «ҳа» маъносида беихтиёр бош тебратиб қўйди холос...

Расмана сочқиларга энди навбат етди. Куёвтўранинг чўнтаклари сочқиларга тўла эди. Амирзода бир неча бор сиқимлаб чўнтағидан олтину кумуш, лаълу жавоҳирлар олди ва қизу жувонлар, янгалар устига сочиб-сочиб юборди. Куёвтўра шунчалар сахийлик на-моён этдики, агар уни ўз кўзи билан кўрган одам бўлса, жуда кўп кишилар сочқи остида қолди, дея bemalol айта оларди! Қий-чув ичидаги қизлар, жувонлар, янгалар юмалашиб танга қидиришга тушиб кетдилар. Кўплар қатори Хонзода хонимнинг дугоналари Иқбол бика, Сиймин бика, Оққиз, амирзоданинг сингиллари Оқа Беги хоним ва Султон Баҳт бегимлар ҳам чўқкалашишиб ўз насибаларини излаш билан овора эдилар.

Куёв этигини ечиш янгалар учун жуда қувончли юмушлардан биридир, чунки этик қўнжида жуда кўп олтин тангалар бўлади, улар янгаларнинг лукмаи ҳалоли саналади. Янгалар бу юмушни ҳам уddaладилар-да, келин-куёвни ипак кўрпаларга киритиб қўйдилар... Ҳамма аста-секин ташқарига чиқа бошлади. Янгалар уйга кираверишда ўзларига ажратилган жойда қўним топдилар. Жимлик чўқди. Шохона ўриннинг икки че-тида бегуноҳ қўзичоқлардай омонаттина ётишган Хонзода хоним билан Жаҳонгир Мирзонинг юраклари гурс-гурс тепар, вужудлари ҳаяжон оғушида титради. Гарчи янга келиб куёвнинг қулоғига секингина: «Келинни қучорингизга тортингиз, жоним гиргиттон сизга!» деган бўлса-да, унда сўз айтишга ҳам, бирон ҳаракат қилишга ҳам журъат етишмасди...

Тонг бўзара бошлади. Ҳали ер ёришмай туриб Су-лаймоншоҳ, Султон Маҳмуд, Жаҳоншоҳ ибн Жоку-лар Конигилдаги оқ уй ёнида пайдо бўлдилар. Сулей-моншоҳларникида хилват жой ҳозирланган, куёв истироҳати учун шарт-шароит мухайё эди.

Куёв чиқиб кетиши билан Иқбол бика, Сиймин бика ва Оққизлар Хонзода хоним ёнига қириб ке-лишди. Энди «Юз очди» маросими бўлади.

### III

...Ниҳоят, Жаҳонгир Мирзо билан Хонзода хоним, икки бир-бирига интиқ диллар орзиқиб кутган висол онлари етиб келди. Кечанинг қоронгуси ошиқ аҳволи-нинг пардасидур, деганларидаи, оқшом борлиққа ўз қора тўрини ёя бошлади. Конигилдан одамларнинг оёғи тортилиб қолди. Оқшом бағоят сехрли... Куёв либосида амирзода қасрга кириб келаёттанды эшик олдида уни факат икки янга қаршилади. Ичкарида унга жон оғати дилдори интизор эди. Янгалар шоҳона жойни созлашар экан, «қизим сенга айтаман, келиним, сен эшит!» қабилида ўзаро шундай сұхбат қуардилар:

— Оллоҳнинг бандасига берган улур инояти қовушмокдир! — дерди биринчиси. — Келин-куёв қовушганда фаришталар улар тепасида қувончдан чарх уриб учиб юришар эмиш, жоним гиргиттон сизга!

— Умрнинг лаззати ҳам шунда-да, айланай, қовушмокда...

Янгалар секин гапиришсалар ҳам, уларнинг таплари чимилдиқ ичида ўлтиришган келин-куёв қулокла-рини динг қиласар, усиз ҳам ҳаяжондан титраб турган вужудларига қутқу соларди. Бурчакдаги шам бу гапларни тасдиқлагандай бош тебратиб туради.

Шу пайт биринчи янга хонага ёш болани кўтариб кирди-да, ўрин ўртасига ўтқазиб кўйди.

— Ўғил бўлсин, илоё, ўғил бўлсин, жоним гиргиттон сизга!

— Ўғил бўлсин, айланайлар! — қўшилди иккинчиси.

Келин-куёвларнинг юзларига қон тепди, кўкракла-рида юраклари қафасдаги қущдай потрагар эди.

Биринчи янга болакайни кўтариб олар экан, келин-куёвларга қаратса буюргандай деди:

— Фурсат етди энди... Энди жойга кирингизлар. Оллоҳ ҳоҳиши-иродаси билан бир-бировингизга эш бўлдингиз. Бир-бирингизга ҳалолсизлар. Энди яйрангиз, айшингизни сурингиз, жоним гиргиттон сизларга.

— Жонингизга жон бўлингиз, айланайлар!..

Янгалар келин-куёвларни жойга киритиб қўйишгач, аста чиқиб кетдилар. Ҳаяжонларга чулғанган Жаҳонгир Мирзо «Улар сизларнинг либосингиз, сизлар улар учун либоссиз!» оятини<sup>1</sup> эслади ва энди Хонзода

<sup>1</sup> Куръони карим. «Бақара» сураси. 187-оят.

хоним батамом ўзиники эканлигига ишонди. Жойга киришлари билан, фурсат ўтказмай қайлиги томон сурилди, ўнг кўли билан келин қўлини қидира бошлади. Кейин яна ҳам яқинроқ сурилди, энтикаркан, биргина оппоқ ҳарир кўйлакка чулғанган Хонзода хонимнинг нозик белидан тутиб бамисли жон қучоғига тортди! Шакар дудокларига ютоққанча лаб босиб, қаттиқ бўса олди, бир қўли келиннинг кумушдай сийнасида, бир қўли ипак пойжомасида ўйнар эди. Аввалига бироз саркашлиқ қилган Хонзода хоним энди қаршилик кўрсатмас, у ҳам ишқнинг сехрли ўйинига берилган, оппоқ билаклари Жаҳонгир Мирзо бўйнига чирмашган, ўт олиб ёнаёттан вужудини не қилишни билмай, ёрининг жон-жонига кириб кеттудай, пинжига қисишиб паноҳ тиларди. Жаҳонгир Мирзонинг тоқатлари тоқ, сабри селобу жигари сув бўлди... Рағбати зиёда бўлиб, шавқи ғалаба қилиб ханжари обдорни филофи нигорга олиб борди, улуғ иштиёқда маҳлиқо гавҳари ганжинаси қулфини очмоққа шайланди... Юзидан шарм пардасини олиб ташлаб, дилдор сийнасига сийнасини босди!.. Бамисли аъзои бадани ларзага келгандай бўлди. Тўлғанаётган Хонзода хонимнинг нозик инграницла-ри Жаҳонгир Мирзога ортиқ қувват ва шиддат баҳш этарди. Амирзода кўнглида ғужрон урган туйгулардан маст, қувончдан ўзини кўйгани жой тополмас, қучоғида ётган бемисл баҳтдан боши осмонда... Мана шу паллалар, хушнуд онлар, Оллоҳ берган баҳт-саодат, унинг назарида, мангута шундай бўлиб қолар, бу ҳолат узоқ йиллар айни шу йўсиnda давом этаверадигандай туюларди...

Шам хижолатдан ўзини бурчакка урганини билмай қолди...

Амир Темур кўнглида эъзозлаб юрган эзгу ниятнинг рўёбга чиққанидан мамнун, «Шундай кунларга етдим!», дея Оллоҳ таолога шукроналар келтирди. Энди унинг суюкли дилбанди Жаҳонгир Мирзо қайноқ қонида тепиб турган шиддатни Чингизхон наслининг тули зебоси қадди камолида мужассам шижаатга эш қилиб юборади, сулолани сулолага улайди, аждодлар руҳини шод этади, янги жаҳонгирлар дунёга келади... Бу эса, шубҳасиз, Оллоҳга ҳам, бандасига ҳам хуш ёқадиган қутлуг юмушдир.

Ана шундай хаёлларга фарқ бўлиб турганида, Кут-

луг Туркон оқа Амир Темурнинг ёнига келиб пешона-  
сидан беозоргина ўпид қўйди. Одатда, она ўрнида она-  
дек бўлиб қолган бодомқовоқ эгачи доим шундай қила-  
ди. Амир Темур бирон сафардан қайтганда, узоқ ай-  
рилиқдан сўнг кўришганларида ёки ҳаддан зиёд қуво-  
ниб кетганда, эгачи келиб инисини худди ёш болани  
эркалагандай суюб манглайидан ўпид қўярди.

— Келин муборак бўлсун энди, Амир соҳибқирон!  
Амир Темур «Куллук!» дегандай бош эгиб қўйди.  
Конигил оқшоми файзли эди.

## ЙИГИРМА БИРИНЧИ БОБ

### I

Келин-куёвлар Конигилдаги оқ уйда ўн кун бўлиш-  
гач, ўз уйлари — Боги Нақши жаҳондаги қасрта кўчиб  
ўтдилар.

Ўн бешинчи куни, чоштгоҳ бўлиб-бўлмай устига  
дуру гавҳар, зару забаржад, харвон-харвон<sup>1</sup> ипак ор-  
тилган бир неча хачиру тева Боги Нақши жаҳон дарво-  
заси олдига келиб тўхтади. Бу Амир Темур Кўрагон  
ҳазрати олийларининг суюкли келинига кўрманалари  
эди. Амир Довуд дутлат билан Амир Жоку барлослар-  
нинг ҳаджалари ҳам уч-тўрт тева бўлди. Ахий Жаббор  
баҳодир чаққонлик билан ҳаракат қиласди, Учқора,  
Йаналтекин, Йўлқутлуғларининг қўли-қўлига тегмасди.  
Улар тевалардан кўрманаларни туширишиб ичкарига  
ташир эдилар. Учқора иш орасида эшитилар-эшитил-  
мас ўзининг суйган қўширини минирлаб қўярди:

*Ер тўймайди ёмирга,  
Хотин — эрга... тўймайди...*

Орадан кўп фурсат ўтмади. Чопар келиб, мамлакат  
султони Амир Темур Кўрагон ҳазрати олийлари таш-  
риф буюраёттанларини маълум қилди. Жаҳонгир Мир-  
зо Ахий Жаббор баҳодирлар кузатувида дарвозага чи-  
қиб падари бузруквори истиқболига ошиқди. Узокдан  
Амир Темурнинг оқ оти кўринди, от жиловини Му-  
ҳаммад Чуроға доддоҳ тутиб олган эди. Бироз орқа-

<sup>1</sup> Х а р в о р - х а р в о р — оғирлик ўлчови, тажминан юз кг.  
атрофида.

роқда Амир Жоку барлос, Амир Довуд дүглат ҳамда Сулаймоншоҳ, Жаҳоншоҳ ибн Жокулар кўриниши. Яна ҳам орқароқда Сароймулхоним, канизаклар Улус оқа, Тағай Туркон оқа, Менгли бика, Тўлун оқалар келишарди. Улар ичида Амир Темур синглиси Ширинбика, қизлари Оқа Беги хоним ва Султон Баҳт бегимларни кўрамиз.

Амир Темурнинг Жаҳонгир Мирзо уйига қиласажак ташрифи Қутлуғ Туркон оқага маълум эди, шу сабабдан аввалроқ келиб, амирзодани ёнига олиб меҳмонларни зўр иззат-икром ила қаршилаш тадорикини кўрди. Шакар бика иккиси келин-куёвларга ўзларини қандоқ тутишлари лозимлиги ҳамда олийшон зотлар ҳурматини ўрнига қўйиш борасида жўяли маслаҳатлар берди.

Карнай-сурнай садолари авжга чиқа бошлади. Меҳмонларни яшил уй рўбарўсида кутиб олдилар. Бир томондан Муҳаммад Чуроға додҳоҳ, иккинчи томондан Ахий Жаббор баҳодир олтин узангиларни ушлаб Амир Темурга отдан тушишга кўмаклашдилар. Шу палла Жаҳонгир Мирзо илдам юриб келди-да, ўнг кўлини кўксига қўйиб:

— Хуш келибсиз, валинъмат соҳибқирон! — дея таъзим қилди, тиз чўкиб падари бузрукворининг оппоқ якtagи пешига лаб босди, кейин қайта-қайта кўзларига суртди.

— Балли, амирзодам, балли! — Амир Темур ўғлини эркалаб бағрига босди ва пешонасидан ўпди. — Қайлиингиз қутлуғ бўлғай! Баракалло!

Атрофдан «Қутлуғ бўлғай!», «Баракалло!» деган овозлар эшитилди.

Қутлуғ Туркон оқа бировга сездирмай Хонзода хонимга имо қилди. Оппоқ ипакка чулланган, юзларига оқ ҳарир парда ташланган, келинлик баҳтидан зеболаниб бир чиройига ўн чирой кўшилган гўзал Хонзода хоним фаришталардай хиром айлаб Амир Темур истиқболига қараб юрди. Тўпигигача тушган оппоқ ҳарир кўйлагининг этаклари ерга бош урар, Хонзода хоним худди юзиб бораётгандай таассурот қолдиради. Мана, у Амир Темур рўбарўсида тўхтади ва назоқат билан уч бор таъзим бажо қилди. Сўнг яқинроқ келиб, унга айтилгандек, куёвига ўхшаб тиз чўкди-да, тавоф айлаб Амир Темур якtagи пешини ўпди ва кўзларига уч бор суртди... Хонзода хонимнинг ҳаракатлари

ўзига жуда ярашиб турарди. Ҳамма зебойи моҳиталъат келинчақдан кўз узмасди.

— Қадамингиз қутлуг қелгай, эй меҳрибон падари бузрукворимиз!.. — шикаста овозда деди Хонзода хоним оҳиста бошини экканча. — Сизни Оллоҳнинг ўзи паноҳида асрагай!

— Балли, балли! Бахтингизни Оллоҳнинг ўзи берсин! — Хонзода хонимнинг одобу тутумидан кўнгли сув ичган Амир Темур суюкли келинини тиз чўккан жойидан турғазиб, манглайидан ўпди: — Сиз келиним эмас, қизимсиз! Қизим!..

Амир Темурнинг «Қизим!..» деб суйганлари Хонзода хонимга жуда ёқиб тушди. У бошини кўтармай ўн беш қадамлар нарида туришган Амир Довуд дурлат билан Амир Жоку барлосларга ҳам таъзим бажо келтириди. Амиrlар: «Умрингиздан барака топингиз!», «Кам бўлмангиз!» деган сўзлар билан муносабат билдирилар.

Навбат маҳди улё Сароймулхоним билан кўришишга етди. Хонзода хоним шоҳона кийинган маҳди улё олдида, унинг ипак кўйлаги пешини ўпмоққа эгилди... Аммо Сароймулхоним Хонзода хонимни эгилишга қўймади, «Керакмас! Керакмас!» дея қучоқлаб кўришди ва қўнглида аллақандай жўш урган оналик меҳри билан манглайидан ўпди. Қучоридан қўйгач, бир лаҳза беихтиёр Хонзода хонимга ёрқин қўзларини тикди ва ҳайратдан лол қолди! Хонзода хоним аввалгидан ҳам ортикроқ гўзал, сулув бўлиб кетган эди! Ҳарир парда ичида нур билан чайилгандай оқ-сариқ юзлари бетимсол кўринади, иринининг ўнг томонида жойлашган мўъжазгина қора холи қуйиб қўйгандай ярашибди... Кулдиргичи оғатижон, тим қора ҳилол қошлари тутаб ётибди...

— Оллоҳ сизни ҳеч нарсадан кам қиласун, маликам! — деди Сароймулхоним. — Илоё, ували-жували бўлингиз, ўзингиздан кўпайингиз!

Хонзода хоним сўз қотмоққа журъат этмади, факат: «Қуллуқ!» дегандай хиёл табассум ила бошини эгди.

Амиrlарга боф ўртасидаги зилол сувли ҳовуз бўйида катта сўрига жой қилинганди, Жаҳонгир Мирзо меҳмонларни ўша ерга бошлади. Ҳожа Шайхзода билан Гурганж кутволи Бекхожа меҳмонларни кутиб олишда қатнашдилар. Қутлуг Туркон оқа ва Шакар бикалар

маликаларни безатилган оқ уйга таклиф қилдилар. Бир неча лаҳза оддин гавжум бўлиб турган Боги Нақши жаҳон ҳовлиси бўшаб қолди...

— Юқорига чиқсунлар, Амир соҳибқирон! — илтифот кўргизди Амир Довуд дуғлат. У Амир Темурнинг Сеистонда оёғидан ўқ еганини ҳамиша ёдда тутарди. Бир кун соҳибқироннинг ўзи тан олиб: «Ўша Сеистондаги жароҳатим битиб кеттан бўлса-да, ҳануз сирқираб оғриб турадир...» деганини эшигтганди, аммо кейин бирон ерда Амир Темурнинг шу ҳақда нолиганини билмайди.

— Мана бу ёққа!.. Бемалол оёқ ёзиб ўлтирадилар...  
— Чиқсунлар! Чиқсунлар!

Сўрининг бир ёғини Амир Темур эгаллади, бошқа томонларига амирлар жойлашиди. Чап тарафда баланд чинор тагидаги сўрида Жаҳонгир Мирзо дўстлари давра қурдилар. Ахий Жаббор баҳодир ўз йигитлари билан, қўллари қўлларига тегмас, хизматда чарх уриб юришарди. Даствурхонларга анвойи таомлар тортилди. Бое ҳовлисига кираверишда ўлтиришган машшоқлар аллақачон савту навони бошлаб юборишган, ёқимли мусиқа-ю жонон ашуалар бир-бирлари билан навбат талашишарди. Соҳир наволардан безанганд бое бағоят сўлим эди.

— Халлоқи безаволга салламно! — деб қўйди шу пайтгача хәёлларга чўмиб ўлтирган Амир Темур. Мұҳаммад Чуроға додҳоҳ машшоқларга: «Астароқ чалингизлар!» ишорасини қилди. — ... Бизлар салтанатда подшоҳона хайлу ҳашам чекмоқни хуш кўурмиз, мурод улким, парвардигорнинг ўз бандасига нимани бујргани-ю нимани маън этгани элга ошкор бўлсун... Баски, пайғамбаримиз раббоний илҳомдан қувват олиб, умматларига бўлинмакни маън қилдилар, билъакс, бирлашмак тугини баланд тутмакни уқтиридилар. Хоразм ўз юртимиздур. Мўғул қадамидан юрт пароканда бўлиб, ҳар бир пучмог ёлғизлик азобини тортди. Бас, юрт ўз бўй-бастини тиклади. Жаҳонгир Мирзо билан Хонзода хонимлар тўйи қутлуғ тўйдир. Ватан, улус бирлигига асос бўлгувчи, муҳрловчи ақди никоҳдур, салтанат ҳужжатидур...

— Рост сўзладингиз, Амир соҳибқирон!.. — қўллаб-қувватлади амир Жоқу барлос. У ҳам набира келин кўриш насиб этганидан жуда хурсанд эди. — Юрт бирлигини қойим эттувчи олийшон ҳужжатдур!

Атрофдан маъқулловчи овозлар эшитилди. Жаҳонгир Мирзо падари бузруквори сўзларидан нақ боши осмонга етди. Ҳайҳот! Амирзоданинг Хоразм маликасига муҳаббати юрт бирлигини мустаҳкам этишга хизмат қилғувсидир! Агар буни қайлиғи Хонзода хонимга айтса, малика қандай ахволга тушар экан? Бу икки ёш кўнгилга, қолаверса, улар ўртасидаги ўтлиғ муҳаббатта берилган юксак баҳо эди.

Амир Темур дастурхонга қўйилган минг бир хил таомлардан чимхўрлик билан тановул қиласарди. Қўлини гоҳ-гоҳ таомга чўзар эди-ю, хаёли бошқа ёқларда юрасарди. Ҳа, Хоразм муаммосини ҳал этди, Оллоҳга шукур, кўп қон тўкилмади. Амир Темурнинг нияти ҳам қон тўқмаслик эди, у ҳамиша шунга интилади — давлат юмушларининг тўққизини кенгашга қўяди, биринигина қиличга қолдиради... Энди юрт тинчлиги учун зарур бўлган яна бир юмуш бор. Бу, шимолдаги қўшни Жета мамлакати билан муносабат... Жета ҳукмдори қайсар Қамариддин билан орани очиқ қилиб олиш... Юртни Жета қароқчиларидан муҳофаза айлаш, уларни босқинчлик қилиш имконидан маҳрум этиш... Бир сўз билан айтганда, шимол ёқдаги душман қанотини қайириш, токи ул ортиқ парвоз эта олмасун! Бу юриш Жета мамлакатига учинчи юриш бўлади!

Амир Темур олисларга тикиларкан, беихтиёр икки бармоги иягига чўзилди.

## II

Жаҳонгир Мирзо ўз қайлигини ёрурликка олиб чиқмоққа бел борлаганда орадан бир ой вақт ўтган эди. Хонзода хоним шу кунгача Боги Нақши жаҳондаги уйларидан ташқарига чиқмади. Дугоналари Иқбол бика, Сиймин бика, Оққизлар унинг ёнидан бир қадам ҳам нари жилишмас, парвоналардай ўраб олган эдилар. Оқа Беги хоним билан Султон Баҳт бегимлар ҳар куни хонойимларини йўқлашар, зериктирмасликка ҳаракат қилишарди. Хонзода хонимнинг баҳти онаизори Шакар биканинг шу ерда, унинг ёнида эканлигига эди. Хурсандлигидан ичига сиғмас, кенгликларга чиқишини яхши кўрганидан, Жаҳонгир Мирзо таклифи айни муддоа бўлди. Эсида, Хоразмда ҳам дугоналари билан Зангорикўл бўйига бориб туришарди. Шу палла лимиллаб турган зилол сувли Зангорикўл, кўл бўйида тикилган

гулгун чодирлар... уфққача ястанган майсазор, чексиз борлық, нафис күйлакларни нозик баданларга чиппа ёшишириб гир-гир эсаёттан қир шамоли, күмкүк майсаларни босиб кезиб юришлар, бошлар узра вижир-вижир қилиб учайттан турфа қушлар... бари-бари бирма-бир күз олдидан үтди. Айниңса, билимда ким үзарга уюштириладиган баҳс-мунозара, савол-жавоблар, үйин-кулги, күнгиллар черини ёзадиган беармон рақс тушишлар, ҳаммага хуш ёқарди. «Лазги»га үйнаш Хоразм маликасининг жони-дили эди... Хонзода хонимнинг юраги орзиққандан алланечук бўлиб кетди. Энди улар Конигилга боришади. Конигил ҳақида эса ҳали Хоразмда эканлигидәёқ. Оққиздан кўп ҳикоялар тинглаган...

Бундан саккиз йил аввал Амир Ҳусайн сарбадорларни дорга остиргандан кейин, эл суюб ҳордиқ олиш учун сайрга чиқиб турадиган сўлим Конигил ўланзори, файзи кетиб, қандайдир маъшум довруқча эга бўлиб қолди. Бир пайтлар Самарқанд ҳокими Садр Сулаймоннинг дарё бўйида қурилган ҳашаматли чорбоги ҳеч ким яшамаганидан ташландиқ жойга айланганди.

Амир Темур Конигилни азалдан яхши кўради. У ўсмилик чоғлари Самарқандга йўли тушиб қолса, албатта, тенгқурларини йигиб яйловни бир айланиб келарди. Мамлакат маснадига ўлтиргач, Амир Темур пойтахт ободончилиги билан жиiddий шуғулланиши асносида Конигилни ҳам эсдан чиқармади. Хушманзара ўланзор томон йўллар солинди, чодирлар учун муносиб доимий жойлар белгиланди. Энди бу ерда катта тўй, маъракалар ўтказиш мумкин эди. Ўланзорнинг ўнг томони, дарё соҳили подшо хонадони суюб чиқиб турадиган макон бўлиб қолди.

Худди шу ерда бир кун олдин икки шоҳона саропарда қад кўтарди. Пуштиранг саропарда келин-куёвлар учун тайёрланди, оқи бошқаларга мўлжалланди. Атроф зангори парда билан ўралди. Юқоридан қаралса, ям-яшил Конигил ўланзори ясан-тусан қилиб, кўксига икки — пуштириш ва оқ мунчоқ тақиб олгандай чиройли кўринарди. Ҳаво очик, осмонда бир парча ҳам булат йўқ. Кунчиқиши томондаги товлар бутун бўйбастини намоён қилгандай кўзга ташланади. Шоҳона пуштиранг саропарда олдида туриб, ўланзорга, ҳово олисдаги товларга, мовий осмонга, порлоқ қуёш-

га ҳавас билан боқаркан, Хоразм маликаси завқини яширолмади:

— Ох, жуда ҳам яхши экан бу ерда, амирзодам! — деди кенглиқдан қамашган шахло кўзларини Жаҳонгир Мирзога тикиб. — Осмоннинг кенглигини кўрингиз! Вой-вуй! Ҳамма нарса гўзал, ям-яшил майсазор ҳам, ана бу торлар, ҳам, осмон ҳам!

Жаҳонгир Мирзо маликага сук билан боқди. Боқди-ю унинг кундан кунга очилиб бораёттанига, ҳуснига ҳусн қўшилаёттанига ишонч ҳосил қилди. Бундан ортиқ латофат, кўрку ҳусну малоҳат бўлмас! Эсида бор, бир куни ҳазиллашмоқчи бўлди-ю маликага сухбат орасида жиддий тарзда бундай деди:

— Ўнта фарзандимиз бўлсун, шундан еттитаси...

— Вой-вуй... — беихтиёр қовоқлари уюлди Хонзода хонимнинг...

— Еттитаси ўғил, учтаси ожиза бўлсун... — сезмагандай давом этди амирзода. — Ўнта...

— Вой-вуй!.. Уялиб кетяпман... — деди Хонзода хоним бошқа ҳеч нарса деялмай ерга қараб.

Амирзода маҳбубасининг соддадил эканлигидан, гапни тўри тушунишидан завқланиб кетди-да, қаҳ-қаҳ отиб кулиб юборди! Ўшанда унинг маликасига нисбатан бир меҳрига ўн меҳр қўшилган эди. Ҳозир ҳам шундай бўлди — амирзода қайлигини яна ҳам яхши кўриб кетди. Иложи бўлганда Хонзода хонимни бир бағрига босиб оларди! Аммо атрофда одамлар бор-да...

— Ҳа, маликам, барчаси гўзал! — эҳтирос ила шивирлади амирзода... — Барчаси гўзал! Аммо барчасидан ҳам ўзингиз гўзалсиз, эй дилижоним!

Хонзода хоним «Шу гапингиз ростми?..» дегандай мийигида жилмайиб қаради-да, уялганидан кўзларини ерга олди. Амирзода кўрмаса ҳам, маҳбубасининг кўзлари миннатдорлик ва баҳтиёрик туйгуларидан чақнаб ёнаётганини ҳис қилди. Хонзода хоним ўзини саропарда ичига урди. Кирди-ю саропарданинг келинлар уйидай безатилганини кўриб хурсандлигидан чапак чалиб юборди. Ерда чўғдай ёниб турган зроний гилам, ипак тўшаклар, оқ парқув ёстиқлар жуда жозибали кўринарди. Саропарда чанғаровидан тушиб турган ёруғлик ичкарини вира-шира ёритар, айни шу вираширалик кўнгилни сирлиликка чорларди.

Иқбол бикалар ҳам Оқа Беги хоним ва Султон Баҳт бегимлар билан бирга қий-чув қилишганча ўз саропар-

даларини томоша қилар эдилар. Икки саропарда ўртасидаги катта супага тўшаклар ташланган, дастурхон ёзилган. Зангори пардадан ташқарида, ўнг томонда пастроқда ўчоқларда бир неча қозон осилган, Ахий Жаббор баҳодир ўз йигитлари билан баковулларга кўмаклашиб куймаланиб юришибди. Сулаймоншоҳ эса ишнинг боришини назорат қилар, дамба-дам унинг дўриллоқ овозда: «Тезроқ бўлингиз!», «Оловни пасайтирингиз!» қабилидаги сўzlари қулоққа чалиниб қоларди.

Ахий Жаббор фурсатини топиб Оққиздан кўмак ўтинди:

— Узрим бор, Оққиз бегим... Дастурхонни ясатишида қарашиб юборсалар, девдим... Мумкин бўлурму?..

Қиз йигитнинг «Оққиз бегим» деб мурожаат қилишини жуда ёқтиради. Дунёда фақат Ахий Жабборгина уни шундай ном билан атайди... Оққиз Ахий Жабборнинг охирги сўzlарида очиқдан-очиқ ялиниш оҳангани сезди. Бу шунчаки бир одамнинг эмас, балки нимадандир илинжи бор одамнинг ялиниши эди. Оққиз ширингина жилмайди:

— Кўлимдан келармикин?.. Майлингиз...

Ахий Жабборнинг оёри олти бўлиб кетди, таомларни тез-тез ташиб турди, Оққиз дастурхонга чиройли қилиб жойлаштира бошлади. Йигит иш асносида чаққон ҳаракат қилаётган толма бўйин қизнинг хуббичим қоматига ўзринча назар ташлаб қўяр, қиз буни сезса-да, ўзини билмаганга олар эди.

Таомлар еб бўлингач, маликалар севган хурсандчилик, ўйин-кулги бошланиб кетди. Иқбол бика энди сиз билан биз билган Иқбол бика эмас, куёвга теккандан кейин ўзгариб, шўхи чиқиб шаддод бир жувонга айланган... У бор жойда давралар ҳамиша хушчақчақлик билан ўтар, ашула айтиш, ўйин тушиш, баҳсмунозара унинг жони дили эди.

Хозир ҳам Иқбол бика қараб турмади. Жаҳонгир Мирзога мурожаат қилиб, тавозе билан бундай деди:

— Агар улур амирзода ижозат берсалар, мунозара бошлар эдик...

Жаҳонгир Мирзо Хоразм маликалари севган мунозара, баҳс ҳақида аввал эшилттан, аммо бирон марта ҳам шоҳид бўлмаган эди. Унинг эшилтиси келди, қараса, Хонзода хоним ҳам «Розилик берақолингиз! Бир ўйнаб-кулишсин!» дегандай кўз тикиб турибди.

— Албатта, ижозат бўлур!

Сиймин бика билан Оққиз «Мунозара! Мунозара!» деде чапак чалиб юбордилар.

Одат тусига кирган бундай мунозаралар хоразмшоҳ саройида тез-тез бўлиб тураг, маликалар уни жуда ардоқлардилар. Кутимаган саволлар, антиқа жавоблар ҳамма учун ҳам қизиқ эди. Тўй билан бўлишиб, мунозарага фурсат топмадилар, шу важдан соғиниб қолганликлари билинди. Ҳамма мунозара тезроқ бошланишини истарди.

Бир лаҳза жимлик чўқди. Маликалар қўллари кўксисда, тавозе билан: «Сиз бошлангиз!», «Сиз бошлангиз!» дегандай бир-бирларига имо қилдилар. Ҳамма Иқбол бика билан Хонзода хонимнинг мунозаралар устаси эканликларини яхши биларди.

— Иқбол бика хоним! — мурожаат қилди Хонзода хоним...

— Қулоғим сизда, маликам! — қўли кўксисда таъзим бажо келтириди Иқбол бика. — Фармонингизга мунтазирмен!..

— Бисмилоҳир раҳмонир раҳим... Айтингиз-чи, Қуръони каримда неча сура бордур ва нечаси Маккаи Мукаррамада нозил бўлди, нечаси Мадина Мунавварада? — мунозарани бошлаб юборди Хонзода хоним.

— Дийдам устига... — қўли кўксисда жавоб қилди Иқбол бика. — Қуръони каримда бир юз ўн тўрт сура бордур, Маккада нозил бўлғони етмишта, Мадинадагиси қирқ тўрттадур...

— Салламно! Осмоннинг нечта эшиги бор экан?

— Жоним омода... Пайғамбаримиз саллаллоҳи алайҳи васаллам, осмон эшиклари ҳисобини сўраганларида, уларнинг нечалигини худодан ўзга кимса на билсун, деб буюрубдурлар. Ул зот дебдурларки, осмоннинг икки эшиги бордур, биринчисидан банданинг ризқи келадур, иккинчисидан амали юқори чиқадур...

— Сайёра юлдузлардан сўз юритингиз... — сўрашда давом этди Хонзода хоним. — Саноғи нечта эркан?

— Маликам, сайёра юлдузлар адади еттигадур. Ой, Қамар деб ҳам шарафлайдилар; Аторуд сўнг Зухро сайёраси; Қуёш, Шамс деб ҳам улутлайдилар; андин сўнг Мирриҳ, Муштарий ва Зуҳал...

— Сайёralарнинг маконлари қаерларда жойлашибдур?

— Зуҳал сайёрасининг макони еттинчи фалақадур. Муштарий мақони олтинчи фалақда, Мирриҳ бе-

шинчи фалакда жобажодурлар. Куёш тўртинчи фалакдан, Ой эса биринчи фалакдан жамол кўргизурлар. Зуҳро учинчи фалакни батамом ўзига мафтуну маҳлиё этмиш, Аторуд иккинчи фалакни мусаххар айламиш...

— Салламно! — қойил қолди Хонзода хоним.

— Салламно!

— Офарин! — дейишди маликалар.

— Энди, — давом эттириди баҳсни Хонзода хоним. — Бир зот бордурки, аниг намоз ўқиши на ерда содир бўлур, на кўқда... Демак, ерда ҳам, кўқда ҳам намоз ўқимайдур... Ул зот кимдиру намозини қаерда ўқийдур?

Иқбол бика бироз сукутга чўмди, хаёлидан Одамдан Хотамгача не-не азиз авлиёлар бирма-бир ўтди, аммо намозини ерда ҳам, осмонда ҳам ўқимайдиган варойиб зот кимлигини эслай олмади. Дунё еру осмондан иборатдур, ул зот намозини бу оламдан ташқарида ўқиганмикин?..

Маликалар жон қулоқ бўлиб Иқбол бика оғзини пойлар эдилар.

Хонзода хонимнинг ўзи ёрдамга келди:

— Бу варойиб зотнинг исми Сулаймон алайҳиссаломдур. Ул зот намозларини ердамас, осмондамас, балки шамол қанотида ўқир эдилар.

Бу гал Хонзода хоним шаънига салламнолар янгради.

— Закотнинг маъноси нимадур? — савол берди яна Хонзода хоним.

— Закотнинг маъноси молнинг ошиқчаси, деганидур...

— Қай йўсинда закот берилур?

— Агар киши тиллоси йигирма мисқолга етса, унинг ярим мисқоли закот бўлур, — жавоб қилди Иқбол бика. — Яна десам, кишининг теваси йигирма бешга етса, бир тева, қўйи қирқта бўлса — бир қўй закот ҳақидур.

— Салламно, Иқбол бика хоним! — тан берди Хонзода хоним.

Атрофдан ҳам «Салламно!», «Таҳсин!» деган сўзлар эшитилди. Жаҳонтир Мирзо мунозарага қулоқ соларкан, маликаларнинг билгичликларидан лол қолар, ҳайратланар эди.

Энди синаш навбати Иқбол бикага ўтди.

— Маликам! Парвардигор эгамнинг қўли билан яра-

тилган нарсалар бор, амри билан яратилғон нарсалар бор... — сўз бошлади Иқбол бика. — Ўша қўли билан яратилғон нарсалардан айтингиз.

— Дийдамиз устига... — қўли кўксида таъзим қилди Хонзода хоним. — Парвардигор эгамнинг ўз қўли билан яратилғон нарсалар учтадир: арши аъло, жаннат, жаннатдаги тубо дарахти. Дунёдаги қолғон нарсалар бари унинг амри билан бунёд бўлғондур...

— Оллоҳ таоло ҳалқни яратмасдан бурун бунёд этғон нарсалардан сўйлангиз... — сўради Иқбол бика.

— Оллоҳ таолонинг бундай бунёд этғон нарсалари бештадур: тупрок, сув, шамол ва оташ, тағин зулумот...

— Салламно!

Иқбол бика навбатдаги саводдан аввал ўйланиб қолди, сўнг деди:

— Аён бўлсунким, борлик бани башар, одамизод, эрдур, хотиндур — заифалардан таваллуд топғай, барининг онаси аёлдур. Аммо бир аёл борки, ул эркакдан туғилғондур, отини билармусиз?

Ҳамма қизиқиб қолди. Хонзода хоним буни биларди, сарой кутубхонасидан «Қиссас-ул анбиё» китобини мутолаа қилганди. Шунинг учун дадил жавоб берди:

— Чиндан ҳам бир хотун эркак зотидан туғулғон. Бу хотиннинг оти Момо Ҳаводур, ул зот Одам Атонинг чап қобиррасидан яратилғондур...

— Салламно! — деб юборди Иқбол бика...

Баҳс қизигандан қизиб бораради. Хоразм маликаларининг донищмандаларга хос сұхбатлари, билимдоңликлари Жаҳонгир Мирзони ҳам, Сулаймоншоҳни ҳам ҳайратга соларди.

— Коинотнинг тожи бўлган одам вужудидан хабар берингиз-чи?

— Бош устига... Парвардигор одамни яратқонда унга уч минг олтмиш томир, икки юз қирқ устихон ато қилди, уч рух бирлан сийлади. Булар — руҳи ҳайвоний, руҳи нафсоний, руҳи табиийлардур. Унда тағин беш сезги бор — эшитиш, кўриш, ҳидлаш, там билиш, сезиш...

— Салламно!

— Таҳсинлар бўлсун! — қабилида овозлар янгради.

— Чаманда бир гала қуш бор эди, — масалага ўтди энди Иқбол бика. — Шамол тургач, аларнинг бир қисми учиб дарахт бошига қўнди, бир қисми

ерда қолди. Агар ердаги құшлардан бири дараҳтдаги-  
ларга құшилса икки томонда ҳам құшлар сони тенг-  
лашади. Агар дараҳтдан бир қүш ерга учиб тушса  
дараҳтда ердаги құшларнинг ярмита тенги қолади.  
Жаъми неча қүш бор экан?

Хонзода хоним масалани ҳеч қийналмай ҳал қил-  
ди:

— Жаъми қүш ўн иқкита. Еттитаси ерда, бештаси  
дараҳт тепасида бўлган...

— Тасанно! — мақтади Иқбол бика. — Сўнги са-  
волим қолди...

— Буюрингиз!

— Сўнги саволим қизиқ... Етти жонивордан яратил-  
ғон маҳлук бор, оти нимадур?

Хонзода хоним жилмайғанча хаёлга берилди. Ма-  
ликалар мутолаани күш кўрадилар. Тариху фалсафа,  
мантиқу одоб-ахлоқ, риёзиёту тиббиёт, назму наво-  
ларга оид китобларни излаб топиб ўқишар, сўнг му-  
нозара қуришиб билимларини теранлаштирас эдилар.  
Иқбол бика сўраган маҳлук ҳақида у қайсиdir китобда  
ўқиган эди, «Минг бир кеча»дамиди, ёдида йўқ:

— Етти жонивордан яратилғон маҳлук... Етти жо-  
нивордан... — Хонзода хоним энди эслаб олди. — Ҳа,  
бўлди! Унинг оти... чигиртка!..

— Чигиртка? — гапга қўшилди сабри чидамай  
Оққиз. — Кичкина нарса-я? Етти жонивордан яратил-  
ғон бўлса, фильмикин, деб турувдим...

— Йўқ, фил эмас, чигиртка! — деди Хонзода хо-  
ним. — Унинг боши отта ўхшайди, гардани ҳўқизнинг  
гарданидек бўлса, қаноти калхатникининг ўзи. Оёғи  
тева оёғи кабидур, думи илоннинг думидек, қурсоғи  
чаён қурсорини эслатади. Шохи оҳуники сингари чи-  
ройли...

— Ўҳ-ҳў!.. — ҳайратларини яшириб ўлтиришмади  
атрофдагилар. — Салламно!.. Тасанно!.. Таҳсин!..

Хонзода хоним «Қуллук!» дея барчага таъзим қилас-  
ди...

Шу палла Иқбол бика ёнидаги чилдирмани қўлига  
олди-да, қўшиқ бошлаб юборди:

*Олам тушган гарёга  
Сой бўлайин, ёр-ёр.  
Езнам чеккан чилимга  
Най бўлайин, ёр-ёр.*

*Езнам мени таниса,  
Болдизиман, ёр-ёр.  
Попохина қистирган  
Кундузиман, ёр-ёр.*

*Шод бўлсин, шодмон бўлсин,  
Сизни кўриб, ёр-ёр.  
Реймингиз кемийдими,  
Бизни кўриб, ёр-ёр...*

Ёр-ёр кўнгилларни қитиқлаб, аллақандай мажхул туйгулар уйғотарди кишида... Сиймин бика шартта Оққизни ўйинга тортди. Ийманибина ўрнидан турган Оққиз аста-аста ўйинга берилиб кетганини билмай қолди. Чилдирманинг гижбанг-гижбанги шўрлик қизни ҳар турли кўйларга солар, шоҳ ташлаб ўйнар экан, туқдан юртига қайтиб келганидан боши осмонда қиз, шу палла зангори парданинг нариги томонида бир кишининг бутун вужуди кўзга айланиб унга қараб турганини ҳис этарди... Ҳис этарди-ю юзига қон тепарди. Нега Оққиз Ахий Жаббор баҳодирни кўп ўйлайдиган бўлиб қолди? Ўзи ҳам бунга ҳайрон...

Оққиз Сиймин бикани рақсга чорлади, у бироз даврани айланиб чиқди-да, тўғри келиб Хонзода хонимни ўйинга тортди.

— Улақолинг, мени ўйинга тортмай! — деди астагина Хонзода хоним ва куёвидан тортиндими, қўли билан «йўқ» ишорасини қилди. Сиймин бика шартакилиги тутиб бирдан хушнуд кайфиятда қарсак чалиб ўлтирган Жаҳонгир Мирзота юзланди:

— Келин бика билан бир «Лазги»га тушиб берсунлар, езнаточча!

— Ие! — самимий қаҳ-қаҳ отиб кулди амирзода, унга бу таклиф ёқсанлиги кўриниб турарди. — Ўйин тушишни билмайман-ку!

— Келин бикамиз яхши билурлар!

Қистовлардан кейин Жаҳонгир Мирзо билан Хонзода хоним ўртага чиқишиди. Конигил узра чилдирма садолари янгради. Амирзода ўйинга яхшигина уқуви борлигини кўрсатди. Чиройли рақс тушаётган қайлиғига маҳлиё бўлиб, гўзал чехрасидан кўз узмай унинг атрофида айланар, куйнинг сеҳрига берилиб гоҳ йироқлашар, гоҳ яқинлашар эди. Хонзода хоним ҳам оламнинг беадад қувончларига ғарқ, ҳаётнинг асиља маъноси, инсоннинг баҳти шу — севганинг билан яша-

моқ севмоқ, севилмоқ, ҳамқадаму ҳамхона кун кечирмоқ, эканлигини чуқурроқ англаб етаёттандай бўларди...

Кейинги ҳафтада хоразмлик меҳмонлар юртга қайтиш ҳаракатига тушдилар. Хонзода хоним волидаи мухтарамаси Шакар бика, Иқбол бика, Сиймин бикалар билан йиғлай-йиғлай хайрлашдилар.

Карвон сокчилар кузатувида тонгсаҳарда Хоразмга равона бўлди.

## ЙИГИРМА ИККИНЧИ БОБ

### I

Дувлат ўмогидан бўлган қайсар амир Қамариiddинни тезроқ бартараф этиш иштиёғи шу қадар кучли эдики, Амир Темур қишининг қоқ ўртаси эканлигига қарамай Жета томон отланишга қарор қилди. Жета ёқдаги вазият, неча йилдирки салтанатта тинчлик бермайди. Ҳумоюн ўрдунинг олий қарори ҳакида Жаҳонгир Мирзо Бони Нақши жаҳондалигида Муҳаммад Чуроға доддоҳдан эшитди.

Зафарқарин лашкар Дизақдан беридаги Қатвон мавзейига етиб боргандга жуда қаттиқ совуқ тушди. Совукнинг қаттиқлигидан ҳеч ким қўлини чиқариб юра олмай қолди, соқол-мўйлаблар қалин шовуш боғлади, тупук ерга муз бўлиб тушарди. От-уловларга ем бериш ҳам мушкуллик туғдираварди. Булар етмагандек, замҳарир совуқдан айрим навкарларнинг нобуд бўлаёттандари ҳакида ҳам ноҳуш хабарлар кела бошлиди.

Ҳумоюн ўрдуда ўлтирас экан, Амир Темур хаёлга чўмди. У ҳеч қачон умрида бирон-бир сафарга отланниб, ярим йўлдан ортга қайттан эмас. Ҳар қадамини босишда етти ўлчаб бир кесадиган Амир Темур бу галги сафарга чиқишида шошилиброқ қарор қилганлигини англади. Ажабки, бир кам қирққа кириб, ҳали шундай ҳолга дуч келгани йўқ.

Амир Темур қўшин бошликларини йириб деди:

— Қайтиб Самарқанд бориб, у ерда икки ой турайлик, совуқ бир сори бўлгунча...

Бу Жаҳонгир Мирзонинг Хонзода хонимга уйланганидан кейин қилган биринчи сафари эди. Самар-

қанддан чиққанларига ҳали бир ой бўлгани йўқ, унга бир йилдай туюлиб кетди. Айрилиқни камида ярим йил, бўлмаса бир йилга мўлжаллаб бораёттан амирзода Самарқандга қайтиш ҳақида фармонни эшишиб, ичидаги қувониб қўйди. Яқиндагина бўлажак суюкли завжасининг ойдай жамолига тўймай боқишилар, хилватда сирлашишилар, иссиқ оғушлар йигит қалбини орзиқтириб юборди. Ёз, куз келин-куёвлар кундузларни роҳатда, кечаларни фароғатда ўтказдилар. Иккиси ҳам монанди гул тоза эдилар, кўп ҳолларда бўладигандек, Оллоҳнинг хоҳиши албатта, гулни тиконга раво кўрмадилар, гулни гулга қўшдилар. Хонзода хоним куёвини сафарга кузатаркан, шахло кўзлари шаффоф ёшлардан тийилмади. Жаҳонгир Мирзо борганда у суюкли кўзлардан ёшларни ўзи артиб қўяди...

Шавҳарининг қайтиши Хонзода хоним учун байрам бўлиб кетди. Кутиб олар экан, таъзим бажо келтирганча Жаҳонгир Мирзо чакмонининг пешини ўпди ва қўли кўксидаги:

— Хонамизни тўлдириб омон-эсон қайтиб келдингизму, шаҳзодам? — дея сўради шикаста овозда. — Соғиндингизму?..

— Оллоҳнинг кўмагида соғ-саломат қайтиб келдим, маликам! — жавоб қилди амирзода. — Соғиндим, ҳа, соғиндим сизни!

Хонзода хоним ёқими жилмайди. Маликанинг шаҳзодасига айтадиган муҳим гапи бор. Куни бўйи бунга фурсат кутди. Ниҳоят, оқшом хонада ёлғиз қолганларида Жаҳонгир Мирзота эркаланиб суянар экан, кўзларига қарай олмай оҳиста деди:

— Суюнчи берингиз, шаҳзодам!..

— Жоним сизга суюнчи, маликам! — ҳаприқди амирзода. — Нимага суюнчи берай? Нимага?..

Хонзода хоним жилмайганча яна ерга тикилди:

— Бир неча кундан бери, оғзимда там йўқ шаҳзодам, кўнглим шўр нарсаларни тилайдур...

— Кўнглим шўр нарсаларни тилайдур? Нечун?.. Наҳотки?..

— Билмасам... Бонуйи кубро Қутлуғ Туркон оқа онамиз эшишиб, қувониб: «Юкли бўлибдурсиз. Илоҳо, паҳловон ўғил кўрингиз!» деб дуо қилдилар, манглайимдан ўпиб қўйдилар...

Жаҳонгир Мирзо ийманиб ёрига қандай ёндошишга баҳона тополмай турган эди, маликасини даст кўта-

риб олди-да, бир-икки айлантириди, сўнг ерга қўйиб, ўтинди:

— Қани, маликам, шу сўзларни айтган ширин тилингизни бир чиқаринг. Яхшироқ кўрайин-чи, ростмикин...

Хонзода хоним ҳеч нарсани хаёлига келтирмай нозик тилини чиқарган эди. Жаҳонгир Мирзо маликасини ингратганча ўзиб олди ва деди:

— Рост экан, тилингиз айтди... Муборак бўлсун, маликам! Иншооллоҳ, ўзимиз бўлур! Ўзимиз бўлур!

— Вой, анови шумни кўрингиз!..

Хонзода хоним, сизга жазо дегандай, амирзоданинг чап юзига майингина уриб қўйди. Жаҳонгир Мирзо, жони оғриган каби, юзларини ушлаганча «вой-вой»лашга турди:

— Вой, нима қилиб қўйдим?.. Оғрияптими? Қаттиқ тегдими? Секин урдим-ку... — узрсингандай деди Хонзода хоним. Унинг шаҳло кўзларида ташвиш кўринди.

— Жуда қаттиқ тегди! Бошим ҳам оғриб қолди... — деди қовоғини солиб Жаҳонгир Мирзо. — Силаб кўйсангиз, оғриқ кетар...

— Хўп, жоним шаҳзодам! — Хонзода хоним нозик қўлласи билан Жаҳонгир Мирзонинг чап юзини, бошини астойдил силашга турди. — Оғриқ бўлсанг, кет! Эски чалдиворларга бор! Тоғу тошларга бор! Дашту сахроларга бор! Кет!.. Кет!..

Ўзини кулворишдан зўрга тийиб турган Жаҳонгир Мирзо пайтдан фойдаланиб маликанинг нозик белидан қучди-да, бағрига тортди! Шундагина Хонзода хоним куёвнинг қувлик қилганини англади. У муносабат билдириб улугтурмади. Шаҳзода маликани опичганча шоҳона ўринга қараб юрди. Иккиси бир-бирларини қучоқларидан қўймай, шўхликлари ортиб жойга юмаладилар, юмаладилар... Сал ўтмай улар тепасида фаришталар қувончдан чарх уриб уча бошлиди...

Шаҳзода билан малика бу ёшда ҳар қандай шўхликлар қилишса ярашади. Жаҳонгир Мирзо ўн тўққиз, Хонзода хоним ўн олти ёшда эдилар...

## II

Самарқандда икки ой тургач, Амир Темур тағин Жета устига қўшин тортди. Йилғора қўйилган Жаҳонгир Мирзо, Шайх Муҳаммад Баён сулдуз ва Одилшоҳ жалойир кузатувида анча илгарилаб кетди. Унга Қамариiddинни таъқиб этиши топширилганди. Жетадан тутиб келтирилган бир одам сўзларидан маълум бўлдики, Қамариiddиннинг Амир Темур қўшини келаётганидан мутлақо хабари йўқ экан. Қўшин шу палла Бойтор<sup>1</sup> мавзеида қўним топганди.

Амир Темур шаҳзода Жаҳонгир Мирзога қутлуғ фармон юборди:

«Жаҳд қилингизким, Қамариiddинни қўлга олурсиз!»

Жаҳонгир Мирзога Қамариiddиннинг тоғ ичига чекинганини айтдилар. Изма-из қувиб борганларида, қаттол ёвнинг Баракаи Фуриён<sup>2</sup> мавзеида қарор топганлиги аён бўлди. Амирзоданинг ёсомиший<sup>3</sup> қилиб сафланган шавкатли ва беадад лашкари Қамариiddин юрагига қўркув солди, тонг отгунча бўлмай тоғ ортига қочишига юз тутди. Қувиб борган баҳодирлар душманнинг кўп аскарини отиб, чопиб ўлдирдилар. Айниқса, Ахий Жаббор баҳодир йигитлари ўзини кўрсатди. Мавzedаги тош қасрни қамал қиласар эканлар, кўп мол-дунёни қўлга киритдилар. Шошиб қочиб қолган Қамариiddин кичик хотини Буён оқа ва гулчехра қизи Дилшод оқалар ҳамда бир неча канизаклар ўлжаларни безаб турарди. Фақат бир жангчиси — дўстидан айрилиб қолгани Ахий Жабборнинг бағрини ўйиб кетди.

Гап шундаки, қасрни олишда жон олиб жон берган Йўлқутлуғ балога балогардон бўлди. Эҳ, бу мард йигит душман ўқидан ўлса ҳам майлийди, Ахий Жабборга алам қилмасди, маъракаи майдон-да, қурбонсиз бўлмайди, деб қўя қоларди. Аммо Йўлқутлуғ қисмати ўзгача кечди. Ҳалиги тош қасрнинг дарвозасини очиш иложи ҳа деганда бўлавермади. Йўлқутлуғ сабри чидамай, чангакли арқон ташлаб, ўн газ бараварли тик деворга чиқа бошлиди. Учқора уни пастда кузатиб тураркан, «Ҳазир бўл, дастингдан кетай!» дер эди-да, минфирилаб ўзининг суюмли қўшигини хиргойи қиласарди:

<sup>1</sup>Бойтор — аниқ жойи маълум эмас. Иссиккўл атрофида бўлса керак.

<sup>2</sup>Баракаи Фуриён — ҳозирги Алматига яқин бир мавзе номи.

<sup>3</sup>Ёсомиший — лашкарни тартиблаш усувларидан бири.

*Ер тўймайди ёмирга,  
Хотин — эрга... тўймайди...*

Йўлқутлуғ девор тепасига чиқишига бир баҳя қолганда, деворга ташланган чангак нечундир панд берди, маҳкамланган жойидан сирғалиб чиқиб кетди! Кимdir кейин, чангакни душман аскарларидан бири жойидан силжитиб юборибди, деган гапни ҳам тарқатди. Йўлқутлуғ тепадан ерга тушиб кетиб нобуд бўлди... Ёқимсиз, пўк овозда пингиллаб гапирса-да, Йўлқутлуғ раҳматли бир сўзли садоқатли дўст эди.

Жаҳонгир Мирзо шу палла Қора Қасмоқ мавзеида турган ҳумоюн ўрдуга вазиятни арзадошт қилди. Таклиф олингач, саодат билан Амир Темур қошига ташриф буюрди ва сонсиз мол-дунё тухфа этди. Тансуқот ичидаги Қамариддиннинг хотини Буён оқа ва моҳичеҳра қизи сахрои оташафзо Дилшод оқа ҳам бор эди.

— Кам бўлмангиз, амирзодам! — Амир Темур суюкли ўғлиниң қаттол ғаним билан олишувдан ғолибона қайттанидан мамнун деди: — Беадад ўлжа-юғаниматлар олиб келибсиз...

— Ҳоли қудрат, валинеъмат соҳибқирон! — қўли кўксида таъзим этди Жаҳонгир Мирзо. — Жоним ҳам, даркор бўлса, сизга пешкашдур...

Амир Темурнинг кўнгли алланечук бўлиб кетди:

— Ундоқ демангиз, ўғлим, зинҳор ундоқ демангиз! Жонингиз ўзингизга бўлсун, илоҳим! Жонингиз ўзингизга бўлса, пешкашнинг бизга аълоси, шу бўлур, иншооллоҳ!

— Афв этингиз, валинеъмат соҳибқирон, — бош эгди Жаҳонгир Мирзо...

... Самарқандга қайтар экан, Амир Темур Отбоши<sup>1</sup> мавзеидан ўтиб хушманзара Арпа Ёзи водийсида бир муддат лашкарга ҳордиқ беришни кўнтилга тугди. Бунга ҳазора амири Муборакшоҳ Макритнинг Одилшоҳ жалойирни ўртага қўйиб қилган илтимоси сабаб бўлди. У шойиста хизматлар кўргизиб, Амир Темурга яқинлашиш ниятида эди. Баҳром жалойир вафотидан сўнг Одилшоҳ тажир жалойир қавмининг сардори бўлиб қолди. Одилшоҳ жалойир гирдиғумдан келган, пакана бўйли, чиройли юзли, аммо пешонаси энсиз, тор бир йигит эди. Чап қулоғи оғирроқ эканлигидан, гапни

<sup>1</sup> О т б о ш и — Иссиққўлдан жануби-шарқдаги шу номли дарё бўйидаги шаҳар.

бир парда кўтариброк ғапиравди. Қамариiddин билан бўлган жангларда Жаҳонгир Мирзо ёнида Шайх Мұхаммад Баён сулдуз иккови жон олиб, жон бериб саваш қурдилар. Барини Жаҳонгир Мирзо ўз кўзи билан кўриб турди.

Арпа Ёзи водийси ўртасидан кесиб ўттан дарё бутун атроф иқлимига сезиларли таъсир кўргизарди. Амир Темурнинг Қора Қасмоқ мавзеидаёқ балойи оғат Дилшод оқага майли тушиб қолган эди. Кўнглида ул бонунинг шарафли ҳарамни ўз истикболи билан зийнатлашини истаёттанини туди, шу ерда Дилшод оқани ўз ақди никоҳига олишга аҳд қилди. Ноз-неъматларга тўлиб-тоштан дастурхонлар ёзилди, хушбичим соқийлар заррин пиёлаларни аргувондай қизил шаробга тўлдириб меҳмонларга узатишдан толмадилар. Шодлигу фарах авжга чиқди, мусиқа наволари оламни тутиб, мумтоз ашуалар дилларни фароғатларга чулғади. Барча жувонбаҳт соҳибқирон ва сахроий оғатижонларнинг юлдузлари бир-бирларига тўяри келганидан баҳтиёр бўлиб, дуои жонларини қилар эдилар.

Орадан беш кун ўтганда, Ўзганданда хабар етди. Ўзганда Амир Темурни муборакбод этгани Кутлуг Туркон оқа, бекларнинг хотинлари жамулжам Самарқанддан келиб кутиб туришган экан. Уларни Амир Довуд дуғлат бир неча навкарлар билан иҳота айлаб келишибди. Жаҳонгир Мирзонинг қувонган жойи шуки, бекларнинг хотинлари ичидаги малика Хонзода хоним ҳам бор экан!

Амир Темурни эгачиси Кутлуг Туркон оқа ташрифи бағоят мамнун этди. Давлат ишлари билан банд бўлиб соҳибқирон баъзан суюкли эгачисини ҳам зиёрат қилмакка вақт тополмай қоларди. Бу, албатта, кеширали ҳол эмас...

Арпа Ёзи билан Ўзганда ораси унча узоқ эмасди. Ўзганда келишлари билан, Амир Темур яқинларини ҳумоюн ўрдуга таклиф этди. Даставвал Амир Довуд дуғлат саломга келди. Эгачи одатдагидек унинг елкасидан олиб кўришди, пешонасидан меҳр билан ўпдида, кифтига уриб-уриб қўйди. Навбат оstonада одоб сақлаб турган Хонзода хонимга етди. У оҳиста юриб келиб соҳибқироннинг заррин чопони пешини ўпив кўзларига суртди, кейин туриб таъзим қилгач:

— Валинеъмат соҳибқирон, баҳтимизга узоқ йиллар омон бўлсунлар! — деди.

Амир Темур Хонзода хонимнинг чехрасига назар ташлашга улгурди. Нур билан чайилгандаи оқ-сариқ юзли, шаҳло кўзли, юзининг ўнг томонида мўъжазги на холи бор, кулдиргичи ўзига ярашган... Гарчи пардоз берилган эса-да, кулдиргич атрофларида билинар-билинмас дор излари кўринади. Ҳа, оналар ҳамиша орзу қиласиган табаррук додлар... Амир Темур яхши билади. Жаҳонгир Мирзо, Оқа Беги хонимлар туғилганда мулоим, ҳалим Турмиш оқанинг, Умаршайх таваллуд топганда канизаги Тўлун оқанинг, Султон Баҳт бегим дунёга келганда Улжой Туркон оқанинг, Мироншоҳ туғилганда канизаги Менгли биканинг — барібарининг чехраларида ҳам мана шундай додларни кўрган, ўз вақтида қувонган...

Амир Темур таҳтдан тушиб келиб Хонзода хонимнинг манглайидан ўпди:

— Баҳтингиз тўқис-тугал бўлсин, илоё, жон қизим!  
— Қуллуқ...

Хонзода хоним таъзим билан ортга чекинди. Унга боқиб, ҳали фарзандга юкли эканлигини пайқаш қийин эди. Амир Темур ниманидир билиш илинжида. Кутлугъ Туркон оқага қаради. Эгачи бу қарашни тушунди, соҳибқирон: «Келинимизда... бирон янгилик борми?...» демоқчи. Кутлугъ Туркон оқа: «Ҳа!..» дегандек, кўзларини бир юмид жилмайганча оҳиста бош тебратди. Амир Темур вужудини қувонч чуллади! «Энди унинг набираси бўлади, биринчи набираси! Кутлугъ наслини давом этдиргувчи набираси, иншооллоҳ, ўтил бўлади!..»

### III

Қўшинга уч кун дам берилди. Ўзган катта шаҳар эди. Сипоҳлар қумга сепилган сувдек шаҳарга сочилиб кетдилар. Одилшоҳ жалойир Шайх Муҳаммад Баён судуз билан Сотуқ Бурахон мақбарасини зиёрат қилишга йўл олди, Жаҳонгир Мирзо уларнинг турфа ҳаракатларидан шубҳаланиб юради, аммо сўнгги савашишларда фидойиликларини кўриб, фикридан қайтгандек бўлди. Барибир Ахий Жаббор баҳодирга уларни кўздан қочирмасликни уқтириди.

Одилшоҳ жалойирлар мақбарага киришиб, соғона бошида тиз чўкишди. Қуръон ўқилди. Шундан кейин ҳам улар ўринларидан турмадилар, балки бошларини

бириктириб, худди тиловатни давом этдиришаёттандек алпозда қолдилар.

— Жалойир жаноблари! — деди овозини пасайтириб Шайх Мұхаммад Баён сұлдуз атрофга бир аланглаб олар экан. Унинг шошилиб гапирадиган одати бор эди. — Күрдингизким, жон олиб жон беронимиз билан биримиз икки бўлмайдурмиз... Мана Қамариддинни биз қочурдик, аммо бутун шон-шараф кимга бўлди? Жаҳонгир Мирзога бўлди... Ҳамма жойни барлос эгаллаб олди. Ой тусса ҳам барлосга, кун тусса ҳам — барлосга... Жалойирга ҳам, сұлдузга ҳам кун йўқ... Кун йў-ў-ўқ! Бу ҳолда урунимиз қуриб битадур... Қуриб битадур!

— Нима демакчисиз, сұлдуз жаноблари? — ошиқиброк сўради Одилшоҳ жалойир. — Очикроқ баён айлангиз, бу ерда ҳеч ким йўқ Сотук, Бутрахондан бошқа... Ул зот ҳеч кимга сирни бориб айтмайдурлар... Ишонингиз!

Одилшоҳ жалойир «Бу ерда ҳеч ким йўқ» деди-ю, аммо деворнинг ҳам қулоги бор, қабилидаги машҳур иборани унуди. Шу палла соронанинг оёғи томонидаги каттагина дарча ортида кимдир бу гапларни эшитиб туради. Бу Ахий Жаббор баҳодир эди.

— Қора Қасмоқда бу ҳақда сўзланган эдик-ку! — Шайх Мұхаммад Баён сұлдуз сирли деди: — Ёдингиздаму?..

Одилшоҳ жалойир дабдурустдан аввал нима ҳақда сўзлашганларини эслай олмади. Жуда кўп нарсалар атрофида гап айланганди. Шайх Мұхаммад Баён сұлдуз қайси бирини назарда тутмоқда экан? Хўжандни чегириб олишми? Самарқандга чопқун уюштиришми?.. Ёки...

Шайх Мұхаммад Баён сұлдуз шундай муҳим гапни эслай олмаганидан ичида жалойирдан ранжиди. Бу унинг тилига ҳам кўчиб ўтди, қизиқ устида овози бир баҳя кўтарилиб кеттанини ҳам сезмай қолди:

— Э... ҳалиги бор-ку... Амир соҳибқирон... — Шайх Мұхаммад Баён сұлдуз ўнг қўлини томоғига кўйиб кесиш ишорасини қилди. Қулоги динг Ахий Жаббор баҳодир кўролмаганидан гап нимадалигини тушунолмай қолди, аммо Одилшоҳ жалойир жонига оро кирди:

— Амир соҳибқиронга суиқасдми?..

— Ие! — деди ўз-ўзига Ахий Жаббор баҳодир муштлари қисилар экан.

— Ҳа-ҳа... Ўша... Энди фурсат етди... — Шайх Мұхаммад Баён суддуз жиддий деди. — Чүзиш мумкин эмас! Бизлар анови пандавақи Зиндачааш опардийга ўхшаб иш юритмаймиз, ҳа! Күрдингиз, охири нима бўлди? Сассиқ Амир Кайхусравта ўхшаб бирорларга суюнмаймиз! Биз ўзимизга суюнамиз! Ўзимизга!

— Ҳа-ҳа, ўзимизга суюнамиз! — тасдиқлади Одилшоҳ жалойир...

— Жалойир жаноблари! Гап бундай... Хўжандга боргандা, менинг уйимда бир кун меҳмон бўласиз, деб Амир соҳибқирон этагидан маҳкам тутасиз! У ерда фақат соҳибқирон ўзлари бўладилар. Жаҳонгир Мирзо одоб юзасидан, табиийки, ота олдида бир дастурхон атрофида ўлтирумайди. Зиёфат қизиқ ерига еттана... У ёрини менга қўйиб берасиз...

— Энди тушундим... Эсимга тушди. Хўп бўлади! — маъқуллади Одилшоҳ жалойир. — Ҳурматларини ўрнита қўйиб меҳмон қиласайлик Амир соҳибқиронни... Ҳеҳе-ҳе...

— Фитна уюштирумокчи, ножинслар! — тишларини гижирлатди Ахий Жаббор баҳодир... — Фитначилар қисматини кўриб ҳам мулло бўлишмабдур!..

\* \* \*

Ҳумоюн ўрду Хўжандга етиб келди. Одилшоҳ жалойир ҳурмат бажо айлаб Амир Темур пойига йиқилди ва оёқларини ўпиб: «Кулбамизга қадам ранжида этсунлар!» деб қаттиқ туриб олди:

— Раҳматли падари бузрукворимизнинг руҳлари шод бўлур эрди...

Амир Темур Жаҳонгир Мирзога йўлга чиқишига шай бўлиб туришларини тайинлади. Хўжандлик ишукр бандалар инсофга келдиларми, йўқми, шуни билиш ниятида Турон султони Одилшоҳ жалойир уйига қадам қўйди. У бу ерда авваллари ҳам кўп бор бўлган. Биринчи марта ўн беш йил олдин Амир Боязид жалойир Амир Баён суддуз қизига уйланганда тўйда иштирок эттанди. Кейин бу уй Баҳром жалойирга қолди. Ҳовли ўшандок, ҳайҳотдай катта, бир айвонли бино ёнига янги бирон нарса қурилмаган...

Олийшон меҳмон шарафига чалинган карнайлар овози осмони фалакни тутди, ҳовлига кириши билан, қадамига жонлиқ сўйилди. Дастурхонга ноз-неъматлар тўкиб ташланди. Амир Темур фақат мевалардан

тановул айлар, ўзини бепарво кўрсатса-да, зимдан атрофдагиларни кузатиб ўлтиради. Чиндан ҳам Одилшоҳ жалойирда қандайдир ички саросима сезилиб қолди — у-бу нарсани олганда қўллари билинар-билинмас титраб кетарди. Амир Темур мулозаматнинг қуюқлашиб кеттанига ҳам эътибор қилди:

— Олсунлар, соҳибқирон... Олсунлар... Кўпдан бери хонадонимизга қадам ранжида этмадилар... Хурсандмиз... Бошимиз осмонда... Олсунлар... Эл олдида қаддимизни кўтариб кўйдингиз... Умрбод қарздормиз... Ҳе-ҳе...

Шайх Муҳаммад Баён судуз ҳам ёзилиб ўтира олмас, егани ичига тушмасди. Шошилиб гапирадиган одати бор эди, ҳаяжоннинг кучлилигидан бидирлашга тушиб кеттанини билмай қолди:

— Падари бузрукворимизнинг биродарисиз... Улар сизни кўп ҳурмат этардилар... Олсунлар... Зўр инсон, дердилар... Темурбекдан йироқ бўлма, дердилар...

— Ҳа, Бахром жалойир билан ҳам, Амир Баён судуз билан ҳам узоқ йиллар ҳамсухбату ҳамқадам эдик... — хотиржам деди Амир Темур, унинг бир қўли қиличга таянган эди.

У дарҳақиқат мезбонларнинг нияти маъшум эканлигига имон келтирди. Бундай ишлар зиёфат қизиб турганда амалга оширилади кўпинча... Шу палла ғойибдан қандайдир овоз келиб: «Бунда турмагил!» дегандай туюлди. Соҳибқирон, Оллоҳ, таоло уни раббоний илҳом билан балолардан сақлашини яна бир бор ўз кўзи-ла кўрди... Фурсат еттанини англади...

У ҳеч кимга сездирмай бурнига қаттиқ тегиб, чимчилаб олди, кўзларига чирт этиб ёш қалқиб чиқди, бурнидан қон оқа бошлади.

— Нима бўлди, соҳибқирон ҳазратлари?.. — сўради Одилшоҳ жалойир ташвишланиб...

— Бир иллат бордир, вақти-вақти билан шундок қонаб турадир... — тушунтирди Амир Темур бурнини ушлаганча. — Ташқарига чиқмасам бўлмас... Холи жойда тиндиурмен... Йўқ, йўқ, сизлар жойингиздан жилмангиз! Мен тез фурсатда қайтурмен...

Амир Темур ташқарига чиқди-ю тайёр турган отига минди. Жаҳонгир Мирзонинг «Бу ножинсларнинг адабини бермоқ даркор! Ижозат этингиз, қиличим билан алар бошини сапчадай узиб ташлай!» — деганига:

— Муборак қиличингизни уцмундоқ нопоклар қони билан булғайсизму, амирзодам? Қилични асрангиз! — деб жавоб берди хотиржам. — Ҳали ўzlари бош эгиб келадурлар...

Жаҳонгир Мирзо падари бузрукворининг жуда ҳам кечиримли эканлигига тағин бир бор шоҳид бўлди, ортиқ сўзга оғиз очмади.

Амир Темур ҳеч қаерда тўхтамади. У Қаршидан икки манзил йироқда жойлашган Занжирсарой шаҳрига қараб юрди, насиб этса, қишини ўша ерда ўтказишини, шикорлар қилишни кўнгилга тутди...

Қишининг ўрталари эди, Амир Темур шикордан эндини келиб турганди. Одилшоҳ жалойирнинг ҳумоюн ўрду остонасини ўпишга ҳозир бўлганлиги хабарини етказдилар. Жаҳонгир Мирзо ичида, шум ниятли маълун энди албатта жазосини олади, деган ўйда эди, бунга заррача шубҳа қилмасди. Чунки унинг душманлиги аниқ, Амир соҳибқирон жонига қасд қилмоқчи бўлгани осмондаги кундай равшан...

Одилшоҳ жалойир Амир Темурга кўриниш берганда, хижолатдан бошини ердан кўтара олмас эди. У тез юриб келиб, Амир Темур оёғига йикилди ва ўкраб йирлаб юборди:

— Қонимдан ўтинги-и-из Амир соҳибқиро-о-он! Мени адаштирдилар! Адаштирдила-а-ар!.. Бош эмас, қовоқни кўтариб юрган эканмен! Валинетьматнинг жонларига қасд қилмоқчи бўлибмен, мен лақма-ю пандаваки, мен ношукур! Туз-намак кўр қилгур!..

Одилшоҳ жалойир сўзларида ясамалик сезилмасди. У, соҳибқирон Хўжанддан жўнаб кетганиларидан бери қилган хатосини ўйлайвериб кўп азоб чекканлиги, туриш-турмушида ҳаловат бўлмаганлиги ҳакида куяниб гапирди.

Жаҳонгир Мирзо ерда юмалаб ётган Одилшоҳ жалойирга нафрат билан қараб тураг экан, ҳозир Амир соҳибқирон, сендек бевафо иблиснинг жазоси факат ўлим, бунинг боши танидан жудо қилинсун, дейди ва елкасидан қаттиқ тепиб юборади, дея ишончи комил эди. Аммо Амир Темур тутумидан амирзода ҳайратга тушди, ичида падари бузрукворидан бироз ранжишга ҳам журъат этди... Кечиримлилик ҳам меёрида бўлиши керак шекилли... Наҳотки, бу одамларга шунчалик ишонмоқ мумкин бўлса?..

— Адашмоқ бандасига хос нарса... — босик деди

Амир Темур. — Адашғонингни англагон бўлсанг, катта давлатга эришғонинг шуддир. Ўттан ишга саловот, деганлар. Мамат! Одилшоҳга тўққизу тўққиз инъому эҳсонлар марҳамат қилинсун! Пойи қадами шарафига базми жамшид жобажо этилсун!

— Бош устига, олампаноҳ! — жавоб қилди Муҳаммад Чуроға доддоҳ ва фармонни ижро этмоққа йўналди.

Жаҳонгир Мирзо Амир Темурнинг шунчалар саҳоватли эканликларини авваллари ҳам кўп бор кўрган, ҳа... Амир Ҳусайн, Амир Мусолар... Зиндачашм опардий бўлса алоҳида қисса! Беш марта гуноҳ қиласа ҳам Амир соҳибқирон, унинг бошини олинг, дорга тортинг, қатла қилинг, демадилар, балки ёнимга йўлатмангиз, ортиқ қорасини кўзимга кўрсатмангиз, дейиш билан чекландилар холос. Яхшики, бу ножинсни зинданда бошини танидан жудо қилдилар. Амир Кайхусрав-чи? Баҳром жалойир-чи?.. Барини кечираверишдан не наф? Улар яна гуноҳга юз тутаверадилар. Барибири эл бўлишмайди. Эшакнинг боласи эшак бўлади, итнинг боласи ит...

— Валинеъмат соҳибқирон! — таъзим бажо келтириб деди амирзода босиқ бўлишга ҳаракат қилиб, у ортиқ чидаб туролмаслигини сезди. — Сиздан яхшилик кўриб, дилга ёмонликни тутиб кетаберсалар... Ундоқ бадҳоҳлар, салтанат ғанимлари жазосини қачон олурлар?..

Амир Темур бир муддат ерга тикилиб хаёлга чўмди. У амирзодага қандай жавоб беришни ўйларди. Соҳибқирон ниҳоят оҳиста сўзга оғиз очди:

— Амирзодам! Қиссаҳон Мавлоно Убайддан бир нақл тинглағон эрдим. Нўширвони Одил ҳақинда... Кунлардан бир кун Нўширвони Одилга вазири Бузуржмехр, Форс вилоят амири Митор хиёнат йўлига кирганини айтиб, уни тезда банди қилиш зарурлигини маслаҳат берибди... Подшоҳ рози бўлибди. Эртаси куни таҳт пойига олтин курси келтириб қўйибдилар, Миторни унга ўтқазибдилар. Амирга кўп олтину зар, дуру забарждадлар инъом этишибди. Тухфа қилинган ерлар қаторида қўшимча иктоъ майдонлари берилибди... Бузуржмехр барини кўриб ҳайратга тушибди ва подшоҳни холи топиб, хиёнатчига бунчалар меҳрибончилик кўргизилишининг сабаби нима, деб сўрабди. Нўширвони Одил бундай жавоб қилибди: «Нечорлик

ўйламайин, дунёда лутфу эҳсон бандидан мустаҳкам-роқ бир бандни тополмадим, кўнгилдан бошқа нозик-роқ аъзони кўрмадим... — Амир Темур бироз тин олди. — Шу сабабдан унинг вужудидаги энг нозик аъзосига энг қаттиқ бандни солдим...» дебди...

— Жуда ажойиб нақл экан... Бароят ибратли... — самимий тан олди Жаҳонгир Мирзо.

— Амирзодам! Сизни тушунамен... Аммо... Ёвузга ёвуз бўлмоқ оқилнинг иши эрмас. Оқил ва донишманд киши бадният ва ёвуздил душманини ҳам лутфу эҳсон билан ўзига қаратла олиши керак. Яхшиликка яхшилик қилмоқ мумкин, аммо ёмонликка яхшилик или жавоб бериш фақат мардлар қўлидангина кела-дур...

— Барчаси сизнинг олий ҳимматингиздан бир нишонадур, валинеъмат соҳибқирон!.. — Жаҳонгир Мирзо шоша-пиша деди. — Гуноҳкор ўғлингизни афв этингиз... Густоҳлик қилиб сизга шундай савонни бермакка журъат айладим. Афв этрайсиз!..

Амир Темур ҳеч нарса демади, тахтдан тушиб келди-да, суюкли Жаҳонгир Мирзонинг тиниқ юзларига, сабза урган мўйлабига, бироз ҳоргин кўзларига тўймай тикилди, кейин оҳиста бағрига босди...

## ЙИГИРМА УЧИНЧИ БОБ

### I

Хонзода хонимнинг қувончли кунлари яқин. Икки ойдирки, подшонинг келини Боги Чинорда Сароймулхоним ҳузурида яшайди. Ҳазрат соҳибқироннинг хоҳишлиари шундок бўлди: «Келинимиз ёш, иккиқатликни қандай кечиришни билмайди, оқ-қорани таниган кўзи пишган энагалардан тайин қилингиз, огоҳ бўлсунлар!» — деди, кейин уқтириди:

— Барини ўзлари назорат этсунлар, Бибим!

— Бош устига, Амир соҳибқирон! — эгилиб таъзим қилди Сароймулхоним. Улар тўртинчи ошёнадаги хобхонада ёлғиз эдилар.

Нафсила мирини айтганда, Хонзода хонимнинг гунаси борлигини билгандан кейин, Сароймулхонимда, келиним эсон-омон юкидан бўшаб олса, чақалоқни ўзим тарбия қилсан, деган ният ҳам пайдо бўлган.

Ҳамма гал, буни Амир Темурга қандок қилиб айтишда қолган, буига фурсат керак.

Амир Гемур одат бўйича ҳафтанинг ҳар пайшанбасини Боғи Чинорда ўтказади. Пайшанба ҳар иккови учун ҳам қувончли айём ҳисобланади Бутун ҳам шундай кунлардан бири...

Шавҳарининг бошидан олтин дубулғасини олар экан, — Амир Темур тожни фақат байрам айёмларида, элчилар келганда бўладиган қабул маросимларида киярди, — кўнглидаги ниятини айтиш вақти етганини фаҳмлаган Сароймулхоним ўгинч билан бундай деди:

— Амир соҳибқирон ҳазратлари... Ижозат берсалар, жаҳон аҳдининг амирзодаси, нури дийдамиз ширин донасини ўзимиз тарбият этсак, катта қилсак, девдим... Ўз қўлимида... Кўз олдимида...

Амир Темур елкасидан заррин чопонини ечиб олаётган маҳди улёга меҳр билан тикилди. Унинг ҳам кўнглида шунга ўхшаш фикр йўқ эмасди. Қолаверса, сарой расми-русми ҳам шуни тақозо этади. Олти йил бўлди, улар, мана, эр-хотин мақомидадурлар. Амир Темур шу пайтгача Сароймулхонимда бирор марта ҳам гумона борлигини сезмади... Эҳ, дунёда хокисор қалбининг тубида фарзанд юкини тўққиз ойу тўққиз кун кўтариб юришни орзу қилмайдурғон аёл бормикин? Бешик кучоқлашдан иборат уйқусиз тунларни тиламайдурғон заифа топилармикин? Сароймулхоним ҳам ана шундай муштипарлардан бири-да... Амир Темур шуларни ўйларкан, маҳди улёning илинж тўла кўзларига қаради, юраги нечуңдир алланимадандир орзиқиб кетди.

— Иншооллоҳ, Бибим! Набирамизни ўзингиз тарбия этурсиз!

— Оллоҳ мартабангизни бундан ҳам сарбаланд қилсун, Амир соҳибқирон! — Сароймулхонимнинг миннатдорчилиги чексиз эди.

У ёш қизлардай узун кўйлаги этакларини ҳилпиратиб, чўк тушғанча, шоҳона жойга ёнбошлигар соҳибқироннинг ўнг оёғини оҳиста уқалай бошлади. Подшо ва малика жангу жадаллар, сафарлар, давлат ишлари, кенгашу машваратлар орасида шундай хушнуд лаҳзалар инъом эттани учун Оллоҳга шукроналар келтирадар эдилар. Бундай паллаларда улар ўзларини озоду баҳтиёр сезишар, подшо хонадони, фарзандлар камоли, аҳли ҳарам ва ҳоказолар ҳақида мароқ билан сўз юритардилар.

Сароймулхоним оппоқ майин қўллари билан уқалағанда Амир Темурнинг жони ором оларди, буни ҳар иккиси ҳам билишарди. Фурсатдан фойдаланиб маҳди улё кўнглидаги гапларини айтиб олар эди.

— Оқа Беги хоним бўй етиб қолди... Ўн еттига киради... — Сароймулхоним Амир Темурга қаради. — Тенгини топиб тўйини қилишимиз лозим. Аввал ҳам бу ҳақда айтғон эрдим, ҳазратим...

Амир Темур катта қизининг номини эшишиб қувониб кетди. Дарров кўз олдида кўҳликкина, ҳалим табиат, юмшоқ кўнгил, тортинчоқ Оқа Беги хоним намоён бўлди. Жаҳонгир Мирзонинг нақ ўзи, бир қориндан талашиб тушган-да. Албатта, қизининг тўйини қилиш даркор. Султон Бахт бегим ҳам ўн иккига кирди...

— Амир Мусо бўламизният Муҳаммадбек исмли бомаъни ўғли бор, — Соҳибқирон хаёлини бўлди ма-лика. — Орзумулк оқа Оқа Беги хонимга оғиз очувди. Ўзимизники... Бегонамас...

— Биламен, биламен, Муҳаммадбек яхши йигит. Бўлангизнинг ўғли, Биби... — Амир Темур ушбу қуда-андачилик Амир Мусодай нуфузли бекарор амирни турфа хиёнатлардан тияди, деган умида эди. — Мак-бул ишдир...

Амир Темур бошини кўтариб хобхонанинг рўба-рўдаги деворига чизилган ўзининг кулиб турган суратига қаради. Бу Сароймулхонимнинг хоҳиши билан қилинган эди. «Жуда ҳам кулиб турадурғон замон эрмас... — хаёлидан кечирди у. — Жета жеталигини<sup>1</sup> қилур, ҳамон тинчлик бермас. Хоразм ёқдан ҳам тўнгмўйин Юсуф Сўфининг қайсарлик бобида кўргизаёттан кароматларидан нотинч хабарлар келиб турибдир. Султон Маҳмуд ибн Кайхусрав билан Маҳмудшоҳ Бухорийлар бориб уни фитналарга ундалани ундалан. Фаросат бўлса, қариндошга кўл кўтариб келадурму? Ахир не ниятларда қуда-андачилик измини тутдик?.. Шу икки музофотдан кўнглимиз тўқ бўлмас экан, чунки бу нарса мамлакат яхлитлигини таъмин этади, улур ниятимиз — жаҳоншумул салтанат бунёд этмак адосига кириша олмаймиз. Энг аввал — мамлакат бирлиги, яхлитлиги, кейин ниятларга йўл очилур, лекин йўл тезроқ очилмоғи керак! Ният чиндан ҳам улур — жаҳон

<sup>1</sup> Жета — қароқчи, дегани.

аҳлини бахтиёр қилмак, бунинг учун Амир Темур Кўрагон улуг мақомига эришмоги керак! Шундагина ҳалқлар, улусу авом тинч ва бахтли яшай олурлар!..»

Соҳибқирон Сароймулхонимни, ёнимга қелингиз, дегандай сирли имлади. Кўнглидаги бир ниятнинг ризолигига эришган маҳди улё, ишини битириб олгач, энди ноз қилишга ўтди:

— Йўқ... ёнингизга Дилшод оқа борсун... Кейинги вакълар Боги Зогондан бери келмай қўйдингиз... Кун туғдими, дейман...

— Бу кун кўнглим Боги Чинор малагини тилайдур...

— Давлат юмушлари деб малагингизни фаромуш айладингиз...

Амир Темур маҳди улёning тезроқ ёнига келишини истарди. Сароймулхоним буни сезиб турарди. Ёна бошлаган ўтни ўчирмоққа пуфлаганларида бадтар оловлангандек, Сароймулхоним нози ҳам Турон султонининг эҳтиросини сўндирамади, балки ортиқ жўш урдириб юборди... Маҳди улё баоят фаросатли аёл эди, нознинг ҳам ози ширин ақидасини маҳкам тутарди.

— Сиз монанди йўқ фариштамсиз, ҳарамимнинг безаги, гули!

Сароймулхоним эриди... Ўзи ҳам аллақачон Амир Темур қучогига отилишга тайёр эди-ю, аммо сир бой бергиси келмасди.

— Шундоқми, ҳазратим?..

Сароймулхоним липиллаб турган шамни ўчирди. Интиққан Амир Темур ипак кўйлакдаги маликани қучогига олар экан, эҳтиросли шивирлади:

— Бибижоним...

## II

Саройнинг знага эгачиси тўрт канизак билан Хонзода хонимнинг атрофида парвоналардай чарх уришади. Сароймулхоним ҳар гал келинининг биринчи ошёнадаги хонасига кирганда, знагалар ё эртак сўзлашашётган, ёки ашула айтиб маликани хушнуд этишаётган бўлардилар. Одатда иккиқат аёлларда бўлиб турадигандек, Хонзода хоним кундузлари ётиб ухлашга майл кўргизса, холи қўйишмас, ҳар хил баҳоналар билан жойидан туризишар, бор сайрига олиб чиқишарди.

Бошқоронғиликни оғир кечираётган малика кейинги пайтларда тез-тез инжиқлик қиласа, үша нарса муҳайё эди, аммо бир луқма олғач, ажабо, ҳалиги таомга бошқа назар солмасди. У турли нарсаларга бошқаронғи бўларди, каклик гўшти, кийик сути, қовун хамаги, анор шарбати, деймизми... Мезон ўтиб бормоқда, маликанинг кўнгли бўлса баҳорда бўладиган довуччани тусаб қолибди... Қатвон мавзейдаги ўрикзорлардан қидириб юришиб зўрга дуварак довуччадан топиб келдилар.

Сароймулхоним энага эгачини бир четта тортиб сўради:

— Ҳаракати қандоқ, эгачи? Юриш-туриши оғирми, енгил?..

Хушбичим энага эгачи маҳди улёни тушунди. Хонзода хонимнинг хатти-ҳаракатига боқиб, подшолик гулшанининг бўлажак гули ўғилми, қиз эканлигини билмоқчи Сароймулхоним...

— Оллоҳга шукр, хонимойим, енгил, енгил! — жилмайганча жавоб берди энага эгачи. — Маликамнинг хатти-ҳаракатлари енгил, денг... Иншоolloҳ, ўғил бўлур, ўғил! Ҳа...

— Тилингизга асал! — Сароймулхоним энагага ақчали ёнчиқ узатди.

— Қуллук, хонимойим, қуллук! Умрингизни Оллоҳ зиёда қилсун!

Энагалардан ҳам кўра Оққизнинг ташвиши кўп. Ўйноқи кўзли, тиқмоchoққина Оққиз маликасидан бир қадам ҳам нари жилмас, кеча-ю кундузни бўлмада бирга ўтказишади.

— Бир чиройингизга ўн чирой қўшилиб кетяпти, маликам! — деди Оққиз Хонзода хонимнинг доғлардан тозариб, тиникалашиб бораётган чехрасига боқаркан.

— Вуй, Оқ... Ҳазиллашасен... Тоза хунутим чиқиб кетяпти-ку? Одамга менгзамай қолдим. Юрсан, лапанглаймен... Қорнимни қара... — астойдил ўз аҳволидан ёзгирап эди Хонзода хоним. — Бир бадбашара махлуқнинг нақ ўзимен. Ҳеч бундай бўлмаганмен... Ҳали амирзодам Хоразм сафаридан келсалар, маликасини танимай қолсалар ҳам мумкин...

Оққиз оптоқ тицларини кўрсатиб роҳат қилиб кулади:

— Қўрқмангиз, маликам! Амирзодам сизни мингтасининг ичидан ҳам таниб ажратиб оладилар...

Оққизнинг қизиқчилigi тутиб кетди: Хонзода хонимнинг дўйпайган қорнига қулогини қўйди-да, шивирлади:

— Хозир... бир сўзлашиб олай полвон йигит билан... Омонмисиз, эсонмисиз? Ана, ана, мурғак юракчиси уриб турибди... Эшитяпман... Ҳа... Ана... Вой! — қичқириб юборди бирдан Оққиз. — Қулогимга оёқчаси билан бир тепди-ку! Қулогимга бир тепди! Вой, қулогим!.. — ҳавосат қила бошлади Оққиз ерда юмаганча...

Мароқ билан кулиш навбати энди Хонзода хонимга етди:

— Ана, жазонгни олдингму? Ажаб қилдими! Хо-хо-хо!.. Кимсанинг сўзига не қулоқ соласен?..

Оққиз ўрнидан туриб Хонзода хонимга қувонч билан деди:

— Маликам, жуда шўхи чиқиб кетялти полвон йигитни!..

— Полвон йигитмикин-а, Оқ...

— Бўлмасам-чи! Вой, бирам питир-питир қиладики!.. Тагин бир ой бор-да... Ишқилиб, Оллоҳнинг ўзи ёруғлик берсин!

Хонзода хонимни негадир маъюслик чулғаб олди:

— Айтганинг келсин-да, Оқ... Ҳар хил тушлар кўрамен...

### III

Амир Темур қўшини Хоразм сари илгарилаб бораркан, Кот шаҳридан ўтиб Хос мавзеига етганда нафас ростлади. Хоразмшоҳ Юсуф Сўфининг Кот, Хевак, Бухоро шаҳарларига такрор босқинлар уюштиргани сабр косаси тўлган Амир Темурни яна сафарга чиқишига мажбур қилди...

Самарқанддан энди жўнай деб турганларида Амир Темур ҳузурига Хўжандда хиёнат қилмоқчи бўлган Шайх Муҳаммад Баён судузни тутиб келдилар. Амир Темур унинг отаси Амир Баён судуз билан яхши муомалада бўлган, неча бор Ҳисори шодмонга меҳмонга борган. Қолаверса, Шайх Муҳаммад Баён судуз ишонимли, босик, садоқатли бир йигит эди, аммо сўнги пайтларда шайтон йўлдан оздириб бадниятларга қўшилиб қолди.

— Валенеъмат соҳибқирон! Шу ондаёқ қатл этмак

лозим бу сотқинни! Шүнга лойиқдир бу күрнамак! — алам билан деди Жаҳонгир Мирзо. Унинг назарида, бу гал энди у рад қилиб бўлмайдиган далилларга эга эди. Амир Темурнинг босиклиги уни, нечанчи бор билмайди, ҳайратта солди:

— Амирзодам! — жавоб қилди Амир Темур. — Аввал унинг гуноҳлари бўйнита қўйилсун! Билмасдан, бир begunoҳга жазо бериб қўймайлик. Худо кечирмайди. Тафтиш қилинсун!

Воажаб! Бу бадбахтнинг айби шундок бўйнида-ку! Кўриниб турибди-ку! Ўзганда ҳам Амир Темурни ўлдрийлик, деб Одилшоҳ жалойирга қутку соглан шуку! Хўжанддаги кирдикори бунинг исботи-ку! Тафтишнинг ҳожати йўқ эди зинҳор!..

Кўнглида шундай фикрлар ғужрон урса-да, амирзода ташига чиқармади.

Тафтиш ғаройиб натижалар берди. Шайх Муҳаммад Баён судузнинг нафақат Хўжандда Одилшоҳ жалойир уйида, балки аввалроқ Қаршида, Ҳисори шодмонда, Тошкентда ҳам салтанатта хиёнат қилишга урганлари очилиб қолди. Ҳумоюн ўрдудан келган фармони олийга кўра, гуноҳкор Шодравон найман қўлига топширилди. Гап шундаки, бир пайтлар Шайх Муҳаммад Баён суддуз мазкур амирнинг оғасини қатл этдирганди. Шодравон найман гуноҳкор қонидан ўтиши, эвазига зару марварид, дуру забаржад олиши ҳам мумкин эди, бироқ қасоскор амир фақат Шайх Муҳаммад Баён судузнинг ширин жонини тилади — хун талаб қилди ва ёсоққа етказди...

Хос<sup>1</sup> мавзеида шиддатли қўшинга дам берилди. Отларни эгар-жабдуқдан бўшатишиб салт қилиб қўйиб юбордилар. Сипоҳлар «Оллоҳга шукр!» дея ҳордик олишга шайландилар. Ҳамма фарогатта мойил эди. Амир Темур Жаҳонгир Мирзо, амирул умаро Амир Жоку барлослар билан тепаликдаги саропарда ичиди суҳбатлашиб ўлтиришарди. Кутимагандада Муҳаммад Чуроға додгоҳ кириб, Самарқанддан чопар мақомида Жаҳонгир ибн Жоку келганлиги хабарини етказди.

— Самарқанд ҳокими Амир Оқбуғо найман жаноблари йўллабдилар.

— Айт, кирсун!

Амир Темур кўнглига сал хижиллик соя ташлади.

<sup>1</sup> Х о с — Кот (ҳозирги Беруний)дан ўттиз км. масофадаги кент.

«Нечун чопар юборадур? Ишқилиб, юрт тинч бўлсин-да...» — деган сўзлар кечди унинг хаёлидан.

Жаҳоншоҳ ибн Жоку соҳибқиронни тавоф қилиб ортига чекингач, бундай арзадошт қилди:

— Амир соҳибқирон! Жета сори Қамариддинни қамал қилишга юборилғон амирлар Сори Буғо билан Одилшоҳ жалойирлар шайтони лаъиннинг сўзига киришиб йўлдан тойдилар, салтанатга қарши исёнга бел боғладилар. Кўрдиларки, мамлакат ҳоли Андижон вилояти доруғасини чалғитишиб, жалойиру қипчоқ бир бўлишиб пойтахт устига юрдилар, қўргонни муҳосара<sup>1</sup> қилдилар. Шаҳар аҳли ўқ-ёй ва новак бирла ғаддор душманни яқинлашишга қўймади...

— Ҳозир туз кўр қилгурлар қаерда?.. — соқол учини эзрилашга турди Амир Темур. Хиёнатчи жалойир амирлари уни Жаҳонгир Мирзо олдида яна хижолатда қолдирибдилар-да...

— Самарқандга кира олишмагач, Бухоро томон йўналдилар.

«Ҳа, фитначилар бошни бир жойга бирлаштирамакчилар... Маҳмудшоҳ Бухорий бор-ку... — деб ўйлади Амир Жоку барлос, у ҳали ўғли билан сўраша олмади ҳам. — Бир пайт уни қилмиши учун отнинг думига боғлаб сазойи қилдиргандим. Ўша пайт бу нокасни қатл этдирмоқчи бўлдим, vale Амир соҳибқирон розилик бермадилар...»

Жаҳонгир Мирзо бу хабарни эшишиб лол бўлиб қолди. Оҳ, жалойир, жалойир! Ўтган қищда Одилшоҳ жалойирнинг Занжирсаройга келиб, Хўжандда қилган хиёнати учун ер ўпиди йиглаб афв сўрашлари, надомат чекишлари... ҳаммаси унутилиб кетибди-да! Ҳали ярим йил бўлмади-я! Ҳа, эшакнинг боласи эшак бўлади, итнинг боласи ит... Амирзоданинг, соқол учини рижимлаб хаёлга чўмиб ўтирган падари бузрукворига жуда ҳам раҳми келиб кетди. Афсус, ҳай афсус! Мана шу ел ҳам суяна олмайдиган ножинсу нокасларга ишониб келдилар-а Амир соҳибқирон! Куруқ, оғочни экиб япроқ ёздирмоқчилар, тош устида гул ўстирмоқчилар-а валинеъмат соҳибқирон! Энди ҳозир, мана кўрдингизми, эй падари бузруквор, мен ҳақ бўлиб чиқдим, ўша Хўжанддаёқ Одилшоҳнинг жазосини бериш лозим эди, деса бўлаверади!

<sup>1</sup> Мұхосара — қамал.

Жаҳонгир Мирзо ўрнидан турди да, қўлини кўксига қўйиб Амир Темурга сўз қотмоқقا чоғланди, ажабо, ичида қайнаб турган гашлардан эмас, мутлақо бошқа нарсадан тап очди:

— Валинеъмат соҳибқирон!.. Агар ҳумоюн ўрдудан изн берилса, мен қўшиним билан манглай бўлиб аввалроқ йўлга чиқсан, Одилшоҳнинг қўшини Бухорога қадам қўйиб улгурмай йўлда рўбарў келсан... Бадният ножинсларнинг бир-бирига қўшилиб кучайиб олишларига йўл қўйиб бўлмас, деган фикрдамен...

Амир Темур ялт этиб Жаҳонгир Мирзога, худди уни илк бор кўриб тураётгандай алфозда қаради. Ўслининг ранги-рўйини бироз оқаргандай кўрган соҳибқирон буни душманлар кирдикоридан ғазабланишга йўйди... Нечолик оқил фарзанд бўлиб вояга етди Жаҳонгир Мирзо! Ўттан гацларни ҳеч оғизга олмай туриб, — шадари бузрукворини хижолат қилиб қўядида! — вазиятдан чиқиш йўлини излаш билан банд! Амир Темурнинг ўзи ҳам худди шу чорани қўлламоқчи — яъни Жаҳонгир Мирзони манглай юбориб, мухолифатни тўхтатиб турмоқчи, сўнг ортидан ўзи этиб бормоқчи бўлиб турувди. Ўслининг тутумидан кўнглидаги қашлик йўқолгандай бўлди, ғазаб томирлари бўшашди...

Амир Жоку барлос амирзода сўзларини маъқуллади:

— Жаҳонгир Мирзо бағоят адолатли йўлни танладилар, Амир соҳибқирон!

— Ҳумоюн ўрдудан изн берилур! Борингиз, ул ғажирчи бадбаҳт қулоқсизлар таъзирини берингиз! — қатъий деди Амир Темур. — Инояти раббонийнинг ўзи сакласун, амирзодам!

Жаҳонгир Мирзонинг қўшини Кармана мавзеида мухолифат йўлини тўсиб чиқди. Бу пайт ҳумоюн ўрду ҳам Работи Малик мавзеига этиб келди. Одилшоҳ билан Сори Буво чекинишиб, Дасти Кипчоқ томон қочишига юз тутдилар...

\* \* \*

Амир Темур қўшини Самарқандга келиб тушганидан сўнг, ҳумоюн ўрдудан чиқсан биринчи фармон олий атьёnlару раиятни ҳайрон қолдирмади. Фармонга кўра, бир неча бор салтанатга хиёнат кўргизганлиги

боис жалойир улуси тарқатиб юборилди ва нуфузли беку амирларга тақсимлаб берилди. Орадан кўп вақт ўтмай, Андижондан ташвишли хабар келди. Одилшоҳ жалойир билан Сори Буғо жалойир васвасасига учиб қайсар Қамариiddин Андижонга юриш қилиб, хароб этибдир... Шу кунларда Андижонда кайфу сафо гаштини суриб ётганмиш... Дарҳол шошилинч машварат чакирилди. Мұхаммад Чурога доддоҳ ҳам шу ерда эди.

— Жанобингизнинг хиёнаткор жалойир улуси-ю маккор Қамариiddиндан бошқа юмуши йўқму эркан? — сўради оҳиста соҳибқирон машварат аҳлидан. — Шундок бадкорлар билан ўралашганимиз ўралашган... Юртимизнинг гўзал бир пучмоғидағаним эмин-эркин юрган бўлса, биз пойтахтда қандоқ хотиржам ўлтирадурбиз? Душман Андижонда, Андижон ҳокими Умаршайх Мирзо бўлса Ўш тогларида сарсон-саргардон...

Амир Темур оҳиста тапирса ҳам, унинг овозида бўлажак қалдироқлар садоси яширин эди. Бир лаҳза жимлик чўқди. Машваратнинг бундоқ бошланишидан ҳамма ўзини алланечук сезар, бўлиб ўтган ишда ҳар ким ўзини айбдордек ҳис этарди.

Амир Сайфиддин некўз Суюрғатмишхоннинг унга тикилиб турганини кўрди, илтижо тўла кўзлар, бирон нарса деб юборинг, деяёттандек бўларди.

— Салтанат бир заррин либосдирки, Оллоҳ уни суйган бандасига раво кўрадир... — Амир Сайфиддин некўз сўзға оғиз очди. — Хўш... ул беоқибат беандишалар бадбахтлик оёғини гирромлик майдонига қўйибдур. Англаш мушкулки, қандоқ қилиб қатра уммонга тенглашгай? Синчалак қарчиғайға чанг солғай? Бас, подшо сиёsat қилмагунча мамлакат тузалмас! Сиёsatнингиз зарурдир, Амир соҳибқирон!

— Бу қари қулунни афи этсунлар, Ҳазрат соҳибқирон! Баронғорни ўзим бошқарсан, Одилшоҳ жалойир кирдикорини жанобингизга тобшурғайсиз... — қатъий деди Амир Жоку барлос, унинг жалойирлар тутумидан қаттиқ ғазаблангани бурнини иккига ажратиб қўйган қилич изининг оқариб кетганидан билиниб турарди.

Сўзга гулдираб Амир Довуд дуғлат қўшилди:

— Амир соҳибқирон, мен жавонғорни олсан, қўшиним билан бориб, ўша ўзини хўroz фаҳмлаётган Қамариiddинни бир патини юлиб қайтсан...

— Сори Буро жалойир жанобингизга тан, Амир соҳибқирон! — Суюрғатмишхон ҳам бир четда қараб турмади...

Амирлар ҳар бир сўзловчини маъқуллаб муносабат билдирап эдилар.

— Ташаккуримни қабул этингиз, жаноблар! — Амир Темур бироз ўйланиб тургач, давом этди: — Жетага юришлар борасида кўп хатоликлар бўлди, барчаси жанобингиз айбидур! Биламен...

Амирлар ялт этиб бир-бирларига қарадилар.

— Зинҳор, Амир соҳибқирон, зинҳор! — эътиroz билдири Амир Довуд дуғлат гулдираб, босиқ оҳангда. — Барчасига ўша макиён мизож Қамарииддиннинг иғвоси сабабдур. Афсуслар бўлсинким, ул бадбаҳт дуғлат умоқидан эмиш... Сизнинг асло айбингиз йўқ!

— Йўқ, айбингиз йўқ! Тушундик!.. — маъқуллади шу пайттacha жим ўтирган Амир Мусо.

«Ҳа, сизнинг айбингиз бор, Амир соҳибқирон! — деди ичида ўзига ўзи Муҳаммад Чурова дадҳоҳ. — Сизнинг айбингиз ҳар гуноҳкор бандага ишониб кетаверишда...». Аммо у сўзга қўшилмади.

— Жетага юришлар борасида кўп хатоликлар бўлди, барчаси жанобингизнинг айбидур... — деди яна босиқ Амир Темур. — Ўзингни эр билсанг ўзгани шер бил, лейдилар. Бир марта бориладурғон юмушга, мана бешинчи марта уриниб турибмиз. Туron салтанати учун бу кечиравли ҳол эрмас... Сўзлаймен десанг сўз кўп, фурсат эса зик. Зудлик билан Андижонга отланмак зарурдир! Амир Сайфиддин некўз жаноблари, қачон йўлга чиқишимизга маслаҳат берадилар?

Нужум ва рамал илмларидан хабари бор Амир Сайфиддин некўз одатдагидек бир томоқ қириб қўйдида, деди:

— Хўш, чаҳоршанба куни йўлга чиқилса мақбулдир. Чаҳоршанба куни чошгоҳ бағоят кутлуғ соатдур, Амир соҳибқирон!

— Кутлуғ соатдур!

— Кутлуғ соатдур! — деган овозлар янгради.

— Амир Жоку жаноблари! Чаҳоршанба кунига сафар жабдуқлари шай қилинсун! Черик жам бўлсун!

Амир Темур қайсар Қамарииддинни бир ёқли қилишга астойдил бел боевлаш заруратини англади. Буни адо этмай туриб жаҳонгирилик ниятини амалга ошириш мумкин эмас! Қаътият зарур, қаътият, қатъият!

Соҳибқироннинг шундок боши қотиб турганда, мулоzим Бори Нақши жаҳондан шошилинч чопар келганини хабар қилди. Ҳумоюн ўрдуга Жаҳонгир Мирзонинг ўнбошиси Ахий Жаббор баҳодир кириб келди ва юкуниб бориб Амир Темур пойини ўпди. Амир Темур ҳаллослаб келган чопарга назар ташлади, чопар чеҳраси фавқулодда ташвишли эди. «Не ҳол юз бердийкин? Келини Хонзода хонимнинг кўзи ёридимикин? Оллоҳ таоло қандай ҳиммат кўргизди эркан? Жаҳон устуни бўлажак ўғил ато этдими? Олам маликаси деса арзирлик ожиза ҳадя қилдими? Суюнчисини Амир соҳибқирондан тезроқ олайин, деб ҳаприқиб келган кўринадир бу чопар...» — деб ўйлади Амир Темур, қўли эса беихтиёр ёнчиғига чўзилди...

— Бир қошиқ қонимдан кечсунлар, Амир соҳибқирон... — деди Ахий Жаббор баҳодир.

— Кечдум...

— Олам аҳдининг амирзодаси валиаҳд шаҳзода Жаҳонгир Мирзо жаноблари ногаҳонда ҳасталаниб қолдилар... Азиз бошларини ёстиқдан ололмайдилар...

Ҳамма бу янгиликдан ҳайратланиб бир-бирларига қаради.

Амир Темур қотиб қолди, аммо ҳаяжонини ташига чиқармади. Кўзининг нури, қалбининг сурори, салтант борининг гули, суюкли фарзанди Жаҳонгир Мирзо ҳасталикка чалинибди... Неча кундирки, Амир Темурнинг юраги ғаш эди, шунинг аломати экан-да. Ҳали Хос мавзеида турганларидаёқ, ўғли мухолифат қўшинини қарши олмоқ учун Бухоро томонга отланганида амирзода рангининг оқариб кеттанига диққат қилганди. На чора, аяган кўзга чўп тушар, деганларидай амирзоданинг тез-тез тоби қочиб туради. Амир Темур сезади, ҳасталаниб турганига қарамай, амирзода сафлардан қолишни ўзига эп кўрмайди. Ҳамиша падари бузруквори ёнида бўлишга интилади. Жетага қилинган тўрт юришнинг барида иштирок этган.

Амир Темур аъёнлар кузатувида Бори Нақши жаҳонга борар экан, ана шуларни хаёлидан ўтказар эди. Беғда Қутлур Туркон оқа, Ширин бикалар билан ҳарам канизаклари жам эдилар. Амир Темурнинг кўзлари Сароймулхонимни қидирди, шу ондаёқ улар Хонзода хоним Бори Чинорда эканликлари ёдига тушди. Ҳа, Жаҳонгир Мирзонинг ҳасталигини Бори Чинордагиларга билдиримаслик керак, бугун-эрта кўзи ёрийдиган

келинини шавҳари ҳақидаги нохуш хабарлардан асраб туриш мақбулдир. Буни Амир Довуд дулатта тайинламак даркор...

Жаҳонгир Мирзо бўлмасига кирганда Амир Темур амирзоданинг бир маромда нафас олиб ухлаёттанини кўрди. Рангти ўшандоқ оппоқ... Ёнида Мир Саййид Барака ўлтирас, Қутлуғ Туркон оқа пири муршиддан амирзодани бир ўқиб қўйишни ўтинганди. Хос табиб Намозхўжа Шоший ҳар хил дори-дармон тайёрлаш билан банд. Бир кўп салтанат табиблари ҳам шу ерда хос табибга кўмак бериш билан овора эдилар.

Ҳамма Амир Темурга йўл берди. У эгилиб Жаҳонгир Мирзо манглайига лаб қўйди, манглай илиқ тердан нам эди. Қўлларини ушлар экан, ногаҳон кўзлари илтижога тўла Намозхўжа Шощийга назари тушиб қолди. Хос табиб қандоқ қилиб Амир соҳибқиронни огохлантиришни билмай турган экан.

— Афв этсунлар, Ҳазрат соҳибқирон... — қарийбничирлаб сўз бошлиди Намозхўжа Шоший. — Амирзодам безовта бўлмасликлари, жойларидан қимирамасликлари шарт, тун бўйи мижжа қоқмадилар, хайрият, бухрон ўтди... Яқиндагина уйкуга кетдилар...

— Нима бўлибдир ўзи?.. — сўради юраги беҳол увалган падари бузруквор...

— Амирзодамнинг аъзои баданларидан бирдан бодроқ-бодроқ тер чиқиб кетди... Томир уришлари тезлашди, нафас олишлари ҳам. Кучли ташналик пайдо бўлди, салқин ҳаво унга хуш ёқаяпти. Фикри ожизимча, муборак юракларида бироз қувватсизлик бор... Тагин билгувчи Оллоҳнинг ўзиdir. Иншооллоҳ, шифо топгувсидур!..

Холсиз ётган Жаҳонгир Мирзога тикиларкан, Амир Темурнинг юраклари эзилди, кўзларига ёш қўйилиб кела бошлиди, аммо фавқулодда бир шижоат билан кўз ёшини тийиб қолди.

— Ҳақ субҳонаҳу таоло парвардигор дорухонасидан бир шифойи каромат еткузсун, илоҳо! — қўлини дуога очди Мир Саййид Барака. — Омин!

— Шифо берсун, илоҳо! Омин! — дуо қилди ҳамма.

Ҳа, дорилғанодаги ҳар бир қадам бандаси учун улкан синов... Оқил банда синовлардан моҳирона тадбир билан ўта олмоғи шарт. Амир Темур ҳам не-не синовлардан ўтмади, бари учун парвардигор эгамга шукрлар қилади. Мана, Турон султони ҳозир ҳам уч

ўт — уч синов! — ўртасида... Суюкли фарзанди Жаҳонгир Мирзо ногаёнда бетобланиб қолди, юраги қувватсизроқ эмиш. Воажаб... Йигирма ёшга тўлган навқирон йигитнинг ҳам юраги қувватсиз бўладими?.. Амир Темур бу ёшда икки тоғни бир-бирига уриштиришга қодир, шижаоти жаҳонга сифас йигит эди... Ҳай, афсус! Шундай бир ҳолатда, суюкли келини, келиним эмас қизимсан, деган Хонзода хонимнинг ойкуни етиб турибди, ё бугун кўзи ёрийди, ё эрта... Келиним жумла мўминлар қаторида соғ-саломат қутублиб олсин, деб кеча-ю кундуз парвардигорга илтижо қиласди. Чунки бу биринчи набира бўлади, биринчи набира! Қарангки, иккинчи келини Жаҳонгир Мирзонинг яна бир завжаси Бахт Мулк оқа ҳам оғирбўй! Бас, Амир Темур Кўрагон Самарқанддан бир қадам ҳам нарига жилмасликлари шарт! Аммо шу палла Ватанга душман бостириб кирган, ёт оёқлар она тупроқни топтаб юрибди, буни кўриб қайси мард тинч қараб туар экан? Ким-ким, аммо Амир Темур Кўрагон бунга чидай олмайди! Зинҳор! Хўш, қандай йўлни тутмок лозим? Самарқандда қолсинми, душман ёқقا отлансинми?.. Қандай қарорга тўхталсин?.. У Жаҳонгир Мирзога қаради — амирзода ўшаңдай бир маромда нафас олганча ухлар эди. Кейин келинларини ўйлади... Лекин шу палла бирдан кўз олдида Қамариiddin одамларининг Андижонда кайфу сафо қилиб юрганлари жонланди... Фавқулодда келган газабдан кўзларига қон қуола бошлади! Ёт оёқлар она тупроқни топтаб юрибди... Ватан баридан муқаддас! Ундан ёғий изини қириб ташлаш керак. Ҳа, душман изини қириб ташлаш керак! Жетага юриш қилиш зарур! Жетага! Жетага!..

Чоршанба куни Турон султони Амир Темур Кўрагон ҳазрати олийлари бетоб Жаҳонгир, Мирзони табибларга, табибларни эса Оллоҳга топшириб, катта қўшин бошида Самарқанддан жўнаб кетди.

#### IV

Боги Нақши жаҳондаги сўнгти воқеаларни Боги Чинордагиларга, табиийки, билдиримадилар.

Амир Темур сафардан олдин Боги Чинорга бориб Сароймулхоним билан кўришди, вазият танглигини, тез фурсатларда қайтиб келажагини айттиб, уларга тинч-

лик-омонлик тилади. Хонзода хоним ақволи руҳияси-ни сўраб-сурештириди ва ҳушёр туришни уқтириди. Аммо хижолатга қўймаслик учун келини билан кўришишдан ўзини тийди. Фақат: «Оллоҳ, ўз паноҳида арасун!» — дер экан, юраги бир қалқиб қўйди...

Хонзода хонимнинг ҳаракатлари тобора мушкуллашиб борарди. Ўлтирса туриши қийин, турса ўлтириши... Энага эгачи билан тўрт канизак маликани бир нафас кўздан қочиришмайди. Кечадан бошлаб саройнинг доя хотини ҳам бир неча кайвонилар билан етиб келишди.

Маликалар боф сайрини яхши кўришарди. Хонзода хоним Оққиз кўмагида Сароймулхоним етагида канизаклар қуршовида ҳар куни борни бир айланиб чиқади. Ҳозир ҳам тош терилган йўлакдан оҳиста юриб борар экан, ой-куни яқин қолганини сезарди. Юкли бўлганидан бери неча ой ўтди ўзи?.. Малика қачондан бошқоронги бўла бошлаганини эслашга уринди. Тўйларидан кейин бир йилга яқин бўйида бўлган-бўлмаганини билмади. Мезон ойимиidi, акрабмиди, ишқилиб куз ойлари эди, оғзи bemаза бўлиб, кўнгли нордон нарсаларни тусаб қолди. Агар мезон бўлса, шунга тўққиз ой бўлди, акраб бўлса — саккиз ой...

Саратон офтобидан баҳра олиб, шигил-шиғил мева қилган ўриқ, шафтоли ва узумлар бокқа ажабтовур кўрку чирой баҳшида эттан. Хонзода хонимга, айниқса, чорчаман жуда ёқади. Анорзорни оралаб шафтолизорга ўтилади, ундан нокзорга, беҳизорга... Кейин бофнинг ўртасида, қасрнинг шундок рўбарўсида таги феруза лаппакчалар билан қопланган, ҳамиша зилол сувга лим-лим тўлиб турадиган каттагина ҳовуз бўйида бирлаҳза ўлтириб ҳордиқ олишарди. Зилол сувга термилib ўлтириш — маликага дунё фарогатларидан бири бўлиб туюлади. Наридаги яшнаб ётган гулбоғчалар ҳам кўзни қувнатади. Гулбоғчалар орасидаги қирмизи қум ташланган йўлдан қаралса, заррин пештоқи офтоб нурида ярак-ярак қилган гўзал қаср бутун салобати билан намоён бўлади. Қаср ёнидаги икки чинор эса, бофнинг номи биздан олинган, бизнинг шарафимизга кўйилган, дегандай кўкка бўй чўзган...

Хонзода хоним ҳар сафар сайрга чиққанда ҳовуз бўйида туриб, қасрга, чинорларга ҳавас билан боқади. Ўнг томондаги чинор адл қомат, осмонни қамраб олмоқчи бўлгандай бир алфозда тарвақайлаб ўсаётir,

ана чап томондаги шохи қаср деворига етиб ҳам қолибди. Аммо чапдаги чинорнинг ўсиши суст. Жаҳонгир Мирзо, ўнг тарафдаги чинор — валинеъмат соҳибқирон, чапдагиси боласи, деб ўхшатган экан бир марта нечундир. Буни Хонзода хоним Сароймулхонимдан эшигтанди. Чапдаги чинор қайси боласи экан, деб ўйлаганди ўшанда Хонзода хоним, Жаҳонгир Мирзоми?..

— Ота-бала чинорлар! — деганди Сароймулхоним.

— Ота-бала чинорлар... — такрорлаганди Хонзода хоним гуур билан.

\* \* \*

Амир Темурнинг лак-лак қўшини келаётганини эшигтгач, «макиён мизож» Қамариiddин Андижонни ташлаб қочди, Отбоши мавзеида турган эл ва уйини шитоб кўчиришга буюрди. Амир Темур Умаршайх Мирзони Андижонга келтириб қўйди, ўзи от бошини Отбоши томон бурди.

Арпа Ёзи водийсига келишган куни машварат чақирилди. Амир Темур нуфузли амирлар Амир Улжайту, Амир Мусо, Аббос баҳодир, Жаҳоншоҳ ибн Жоку, Ҳиндु Қарқара қипчоқ ва Амир Ҳалиллар билан бирга қандай йўл тутиш, қандай қилиб Қамарииддинни мағлуб этиш, қўлга киритиш чоралари ҳақида кенгашди.

— Ул бадҳоҳнинг жони танида экан, жонбозлик қилмоқ ҳавасидан тийила олмайдур. Амир соҳибқирон... — деди Амир Улжайту. — Ҳавас экан-да... Ул маккор ҳали кўп овора қилур, ҳа...

— Пир урганини қувиб тутиб кейин қайтиш керак! У ҳамиша шундай қочиб кетаверади! — деди қатъий паканадан келган, миқти, юзлари мўндидаи қора Ҳинду Қарқара қипчоқ.

— Қувиб тутиш керак, кейин қайтиш керак! — қўллаб-қувватлади Ҳинду Қарқара қипчоқни Жаҳоншоҳ ибн Жоку, ияги учли бурни суйридан келган амир, Амир Жоку барлоснинг ўғли.

Аббос баҳодирнинг фикри эса бошқача эди:

— Маккор Қамарииддинни қувиб бормак яхши... Аммо, Амир соҳибқирон, шу ердан ортга қайтганимиз маъқулроқ... Бунга икки сабаб бор. Биринчидан, босқинчини юртдан қувиб чиқардик, сичқоннинг ини минг танга бўлиб қочиб қолди, иккинчидан, душман айёр

ва қув, тоғларнинг ҳар кавак-кандиклари-ю чўлнинг ҳар пучмоини яхши билади, уни узок излашга тўгри келади, фурсат кетади...

Амир Темур катта-катта кўзларини сўзлагувчига тикаркан, узун қўли билан янги қиртишланган қопқора бежирим соқолини силай бошлади. У Аббос баҳодир ниятини тушунди. Баҳодир Амир соҳибқиронни аяётир, Самарқандда валиаҳд Жаҳонгир Мирзо бетоб ҳолда қолган, шундан кўнгиллар алағда, унинг устига Хонзода хоним оғирбўй эди... Шукрким, юрганланди, ғаним изи қирилди, қайтсак бўлар, демоқчи...

Шу палла Муҳаммад Чуроға доддоҳ машварат давом этаётганига қарамай, ҳумоюн ўрдуга кириб келди:

— Суюнчи берсинлар, Амир соҳибқирон! Самарқанддан чопар келди!

— Суюнчи? Нимага суюнчи?.. — деган овозлар янгради атрофда.

Остонада чопар Шодравон найман кўринди, у Амир Темурни тавоғ айлагач, ортга чекинди-да, деди:

— Самарқандан кутлуғ хушхабар олиб келдим! Пойтахтда шодиёна авжида. Подшолик бўстонида бир гул юз очибдур! Хурматлари сарбаланд шаҳзода Жаҳонгир Мирзонинг завжалари Хонзода хоним Оллоҳнинг чексиз инояти ила подшо хонадонита сухсурдай бир ўтил ҳадя этибдурлар! Муборак бўлсун, Амир соҳибқирон!

Ҳамма хурсанд бўлиб кетди. Амир Улжайтудан тортиб барча амиrlар Амир Темурни кутлашга тушдилар:

— Муборак бўлсун!

— Валиаҳднинг қадами кутлуғ келсун, илоё!

— Умри билан берган бўлсун!

Муҳаммад Чуроға доддоҳ деди:

— Валиаҳдга кутлуғ исм қўйиб берар эмишсиз...

Маҳли улё илтимослари шундок бўлибдир.

Амир Темур ҳаммага мамнуният билан боқар, томогига тиқилиб келган бир нарса сўз дейишга қўймас, «Қуллук!», «Қуллук!..» дегандай бош ирғаб қўяр эди холос...

— Валиаҳд... ҳа-ҳа... валиаҳд туғилибди, валиаҳд! — дея олди ниҳоят Амир Темур ва кўнглидан: «Келажакда у Амир Темурнинг не мاشаққатлар билан бунёд этган салтанатини бошқаради, Турон султони бўла-

ди, бас, унинг исми ҳам Мұхаммад Султон, деб аталсун!» деган сүзлар кечди. Агар ўғыл туғилса, шундай исм қўйишини кўпдан ўйлаб юрарди, шукрким, ниятига етди. У жамоага мурожаат қилиб деди:

— Валиаҳд исмини... Мұхаммад Султон деб қўйдук!..

Ҳар томондан шодлик овозлари, «Мұхаммад Султон!», «Мұхаммад Султон!», «Қутлуг бўлсун!» деган садолар эшитилди.

Амир Темур суюнчига ёнчиқни Шодравон найманга узатар экан, Жаҳонгир Мирзо сиҳҳати ҳақида сўради.

— Оллоҳга шукур, сиҳҳатлари тузук... Маҳди улё, шаҳзодамиз Боги Нақши жаҳонда кўзи ўткир табиблар меҳри парваришида шифо топаётирлар, Амир соҳибқирон кўнгилларини тўқ қилсунлар, деб тайинладилар... — таъзим бажо келтирди Шодравон найман.

Кўнгиллар ёришди. Мұхаммад Султон шарафига ҳумоюн ўрдудан базми Жамшид қилинсун, деган фармон бўлди...

Арпа Ёзи водийси хосиятли файзиёб жойлар эди, Соҳибқиронга азалдан хуш ёқарди. Икки йил аввал худди шу ерда у саҳройи оташафзо Дилшод оқани ўз ақди никоҳига олди, шу ерда Мұхаммад Султоннинг дунёга келгани ҳақида қутлуг мужданি эшитди...

Амир Темурнинг ҳозироқ қанот боғлаб Самарқандга учгиси келиб кетди, бироқ Қамариiddинни бир ёқли қилиш яна кейинга қоладими, деган ўй уни қийнарди. Узоқ мулоҳазалардан сўнг: «Қамариiddин билан орани очик қилмасдан Самарқандга қайтмаймен!» — деган қатъий қарорга келди.

Икки кундан кейин тингчилар, Қамариiddин Отбоши мавзеидан қочиб кетибди, мазмунида хабар етказдилар. Амир Темур зудлик билан Аббос баҳодир, Ҳинду Қарқара қипчоқ ва Амир Халилларни қаттол душман изидан жўнатди, ўзи ёнида қолган икки юз йигити билан хотиржам Отбошига келиб тушди. Атрофда душман борлигини хаёлига ҳам келтирмаган Амир Темур қўшини тўсатдан ҳужум остида қолди. Катта қўшин улар устига бостириб келмоқда эди!

— Бу қандай қўшин бўлди? — сўради у ҳайратда Жаҳоншоҳ ибн Жокудан.

— Қандай қўшинлигини билдим, Амир соҳибқирон! Бу Қамариiddин қўшини экан...

— Нима-нима? Қамариддин қўшини?!

— Ҳа! У, қочиб кетди, деб ёлғон овоза тарқатибди, аслида кетмай тўрт минг аскар билан қаминда<sup>1</sup> пусиб ётган экан...

— Маълун!..

Амир Темурнинг катта-катта кўзлари қисилиб, ғазабдан чақнади, маккор душманга алданиб қолганига чидолмай ўрнидан туриб кетди. Кучларнинг тенг эмаслигини биларди, вазият эса ноқулай, унинг тўпсиндирап қўшини Қамариддинни тутаман, деб беҳуда ҳавога ўқ отиб олисларда овораи сарсон бўлиб юрибди...

Амир Темур дарҳол сипоҳларни йифиб, ҳайқирди:

— Жангда ғолиб келмак лашкарнинг кўплигидан эмас, балки Оллоҳнинг мададидандур! Асло сустликка берилмангиз! Чора, юракка қуввватни жойлаб, Оллоҳга таваккал қилиб, буюк тарафдуд ила беддан шартта қиличини суғуриб душман узра отилмақда!

— Душман узра!

— Душман узра! — ҳайқирди сипоҳлар...

Амир Темур шартга зулфиқор қиличини суғурди ва ҳавода ўйнатиб, «Ур-ҳо ур!» дей душманга ташланди. Амир Улжайту билан Амир Мусолар ҳам ўзларини майдонга отдилар.

— Ур-ҳо, ур! — қичқирди Жаҳоншоҳ иби Жоку... Сипоҳлар номдор амирлар ортидан гуррас-гуррас жангта кирдилар. Сурон борлиқни тутди.

Ҳазрат Ҳаққ Амир Темурнинг қалбига фавқулодда бир шижоат жойлади, у ақлу идрок ҳайрон қолар даражада беомон савашишга киришиб кетди! Амир Улжайту билан Амир Мусолар шиддати ҳам шунга мос эди. Буни кўрган сипоҳларнинг бир кучига ўн куч қўшилди. Ҳеч кимнинг жони кўзига кўринмас, сипоҳлар гоҳ ўнгдан, гоҳ чапдан найза сўқишар, қилич солишар, ўлар-тириларига қарамай жанг қиласардилар. Кўшин ичида ғаним аскарига кўркув солиб ҳайқириб, ўнгга, сўлга қилич сермаётган Амир Темур яққол кўзга ташланарди. У маккор Қамариддинни қидирар, аммо дуғлат амири майдонда йўқ эди.

Шахту шижоатлар ўз самарини берди. Салтанат қўшини душман сафини мардонавор ёриб иккига ажратиб ташлади. Бу катта ғалаба эди. Уч юз қадам на-

<sup>1</sup> Пистирма, маъносида.

рида жангни каминдан кузатиб турган Қамариддин юрагига қўрқув тушди. Чунки унинг лашкари бирбиридан узиб қўйилган, парокандалик вужудга келди, айримлар тўхтамай қочишга турдилар.

— Бу сафар ҳам омад юз ўтириб бўлмади! Қандай лашкарки, тўрт минг сипоҳ икки юз кишилик тўдани енга олмаса! — ғазабдан муштлари тутилди Қамариддининг. — Қаттол ёв ёнгинамиизда турганди, тутиб олиш осон эди. Энди бундай қулай фурсат бошқа бўлмас... Пандавакилар! Лакаловлар! Барингни гўштингни канорага иламен, галварслар!

Сипоҳларга шундай зуғум қиласа-да, Қамариддининг ўзи ҳам майдонни ташлаб қочишдан ўзга чора топа олмади.

Кечга бормай, жант суронлари тиниб қолди.

«Тағин қочириб юбордим бу пакана фитначини! Ёнгинамиизда турганди, тутиб олиш осон эди. Энди бундай қулай фурсат бошқа бўлмас...» — нижинди Амир Темур. Курбонлар саноғи элликни қоралаб қолганини айтдилар.

Амир Темур голиб сипоҳлардан илиқ сўзларини аямади:

— Файрат қадамингизга тасанно, эй Туронзамин шерлари! Адоват камаридан бели маҳкам тўрт минг қаттолни қочирган сиз икки юз баҳодирга ҳамду санолар бўлсун! Бари Оллоҳнинг лутфу карамидандур. «Бақара» сурасида шундай оят бордур: «Қанчадан қанча кичкина гуруҳлар Оллоҳнинг изни билан катта гуруҳлар устидан ғалаба қилган. Оллоҳ сабр қилгувчилар билан биргадур!» Оллоҳга шукрлар бўлсун!

— Оллоҳга шукрлар бўлсун! — Сипоҳлар овози фалакни тутди.

Амир Темур қаҳрамонлик кўргизган ўнбошиларни баҳодирлик унвони билан сийлади. Лашкар сендан жонини аямаганда, сен ундан олтину дуру забарждадингни аяб ўлтиришинг азим гуноҳdir, дер эди доим Турон султони. Сипоҳлар устидан беҳисоб кумушу зар сочилиди, тулпору камон, қалқону ўқ берилиди. Амирларга хильъату қиличу камар ҳадя этилди. Ҳумоюн ўрдудан лашкарга уч кун ҳордик берилиши ҳақида фармони олий овоза қилинди. Айни пайтда душманни қувиб шимол томонга кетган Аббос баҳодир ва унинг шерикларини ҳам кутиш лозим эди. Шодиёна бошланиб кетди.

Мұхаммад Чурға доддохдан, Самарқанддан бирон хабар борми, деб сұраган Амир Темур, йўқ жавобини олгач, саропардада ўлтиrolмади, туриб ташқарига йўналди. У атрофга назар солди. Саропарда тепалиқда, бамисли оромбахш шабадалар беленчагида жойлашгандай ҳавойи кўринарди. Ҳаво очик. Осмон баҳмалига моҳирона қадаб чиқилган порлоқ юлдузлар ялт-ялт ёнади. Кунчиқиши томонда қуйида оқшомнинг ҳарир пардасига ўралиб сокин оқаётган Отбоши дарёси яшиноқ ойни қучовига олганидан яраклаб дунёга мактанаради. Оқшом файзли бўлишига қарамай, Амир Темурнинг ичига чироқ ёқса ёришмас эди. «Фарзанди дилбандим ҳоли не кечдийкин? Оёққа туриб кетдимикин? Мұхаммад Султоннинг дунёга келиши ҳам унга зўр шифодир, жигарпорасига бир назар солдимикин? Бугун-эрта Шодравон найман етиб борса, ўғлиниг исмини ҳам билиб олади... Хонзода хонимга ҳам қийин бўлди... Иккинчи келинидан ҳали хабар йўқ шекилли...»

Амир Темур ҳарами хоси сахроий оташафзо Дилшод оқа бўлмасига қадам қўяр экан, хаёллари ана шундай паришон эди. Кўзга уйку илингунча вақт алламаҳал бўлди. Ажабо, шу кеча туш кўрибди. ... Улуғ водий эмиш, боши ҳам йўқ, охири ҳам. Амир Темур кимсасиз водийда ёлғиз борар эмиш. Олисларда тоғлар кўринармиш, юриб борган сари тоғлар йўқ, бўлиб кетармиш. Йўлда машҳури оғоқ Шайх Бурҳониддин Қиличга дуч келибди. Қизиги шундаки, оппоқ ридога ўралиб олган, бундан уч юз йиллар аввал яшаб ўтган Шайх билан Амир Темур таниш эмиш! Соҳибқирон камоли одоб билан унга шундай мурожаат қилибди: «Эй саромади замона, зоти бобаракот! Ўғлим, жигарбандим, валиаҳд Жаҳонгир Мирзо Самарқанд ичида хаста эрди. Яратгандан унга саломатлик тилангиз, азиз жонига дуо қилингиз!» Шайх Амир Темурга: «Худо бирла бўлғил!» дебди холос, бироқ Жаҳонгир Мирзо ҳақида ҳеч бир сўз қотмабди...

Уйғониб кеттан Амир Темурнинг бу тушдан кўнгли бадтар паришон бўлди. Ярим кеча эканлигига қарамай Мұхаммад Чурға доддохни ёнига чорлатди-да, буюрди:

— Мамат, жигарим! Шитоб Самарқанд борғил! Жаҳонгир Мирзога дегилки, ўзини асррасун! Насиҳат қилғил! Огоҳ бўлғил!

Мұхаммад Чурова доддоқ ерга тикилғанча индамай қолди.

— Нечун жимсен, Мамат?

— Ёнингизда бўлсам, дегандим... Ташлаб кетгим келмай турибди...

— Мендан хавотир олмағил! Шитоб Самарқанд борғил! Уқдингму?

— Уқдим. Бош устига, Амир соҳибқирон!

Мұхаммад Чурова доддоқ бир неча сипоҳлар кузатувида тонг ёришмай пойтахтта жўнаб кетди.

Орадан икки кун ўттач, ҳар хил хаёллардан буткул оромини йўқотган Амир Темурнинг ўзи ҳам, қайдасан Самарқанд, деб йўлга равона бўлди.

## V

Дарғом ариғи бўйида жойлашган Боги Чинордан Кўҳак этагидаги Боги Нақши жаҳонга боргунча йўл бутун шаҳарни кесиб ўтади.

Подшо келини Хонзода хонимнинг ҳаворанг маофаси Боги Нақши жаҳон дарвозасидан аста кириб келди...

То чилласи чиққунча Хонзода хонимга Жаҳонгир Мирзонинг бетоблиги ва Самарқандда эканлиги ҳақида бир нима демадилар. Амирзода Жета сафарига кетганлар, ҳозир душманларни қийратиб юрибдилар, дея жавоб беришарди Хоразм маликасига куёви ҳақида сўраб қолганларида. Мұхаммад Султоннинг дунёга келгани тўғрисида Амир соҳибқиронга чопар юборилганлигини эшитганида, Хонзода хоним вужудини ширин бир ҳаяжон чулғади. Қутлуғ мужда Жаҳонгир Мирзони беҳад қувонтириб юбориши шубҳасиз! Мұхаммад Султон ахир уларнинг биринчи фарзандлари, унинг устига, орзиқиб куттан фарзандлари! Оллоҳдан ўғил тилаган эдилар-да! Ўғлимни тезроқ кўрай деб Самарқандга отлансалар ҳам керак. Отланиш ҳам гапми, қанот борлаб учсалар керак!..

Хонзода хоним амирзода билан учрашув онларини кўз олдига келтирас, Жаҳонгир Мирзонинг чақалоқни қўлига олиб авайлаб кўтариб юришларини ўзича тасаввур қилас, бундан дили яйради. Атрофда кайвони знагалар мурракни парвариш этиш, ювиб-тараш, турпоклаш билан банд эдилар. Маҳди улё Сароймулкхоним Хонзода хонимни чиллали, деб бир лаҳза ҳам ҳоли қолдирмасди.

Чилласининг охирги куни Хонзода хоним Оққиз билан бор айланишга чиқдилар. Кўпдан бери сайрга чиқишолгани йўқ. Улар кайфиятлари чор, чорчаманларни оралаб, бор ўртасидаги зилол сувли ҳовузга яқинлашдилар. Бу ердан туриб қаралса, гўзал қаср, унинг ёнидаги азамат чинорлар бутун кўрки билан намоён бўлади. Маликага шу жуда ёқади.

Хонзода хоним гулбоғчаларга меҳр билан тикилди. Гулбоғчалар орасидаги қирмизи қум ташланган йўл бошига келганда қаср ва унинг ёнидаги чинорларга қаради. Қаради-ю... юраги орқасига тортиб кетгандай бўлди! Не кўз билан кўрсинки, қаср ёнида ҳамиша савлат тўкиб турадиган икки чинорнинг бири — чапдагиси, ўша Жаҳонгир Мирзо, боласи, деб таърифлаган чинор... жойида йўқ эди!

— Маликам! Сизга нима бўлди?.. — жон ҳолатда сўради Оққиз, кўз ёригандан сўнг ниҳоддай бўлиб қолган Хонзода хонимнинг қўлларидан тутар экан. — Нечун безовталандингиз?

— Оқ!... Чинор... Чинор қани? Анови чинорларнинг бири?..

— Ҳа... Қуриб қолибди... — жавоб қилди Оққиз. — Кеча кўчириб ташладилар. Муҳаммад Султон туғилмасдан олдин қурий бошлаган экан-да...

Хонзода хонимнинг аъзои бадани жимиirlагандан жимиirlаб кетди.

...Шўрлик малика ҳамма тапни қейин эшилди, эшилди-ю ўзидан кетишига оз қолди! Сароймулхоним келинини бағрига босиб, пешонасидан ўтиб, бошини меҳр билан силаркан, юпатиб деди:

— Ўксинмангиз, маликам! Ўксинмангиз! Оллоҳдан шифо тилайлик, шифо тилайлик! Оёқча туриб кетадилар, амирзодам, иншооллоҳ! Ноумид шайтон, деганлар. Дардни берган худо шифосини ҳам ўзи беради, ҳа...

Сароймулхоним шундай дерди-ю ўзи чиройли кўзларидан оққан ёшларини тия олмасди.

— Наҳотки, мен билмадим, ғофил қолдим, ахир ёнида бўлсам, жонига дармон бўлардим-ку... — афсусланарди Хонзода хоним. — Нега билдиримдингизлар, бибижон, нега? Нега-а-а-а?.. Ахир...

— Ўзим ўргилай, маликам!.. Ўксинмангиз... — бошқа сўз тополмасди Сароймулхоним. — Кўрасиз, амирзодам совайиб кетадилар!..

Икки муштипар аёл ҳамма нарсани англааб турар-

дилар, аммо бир-бирларига қандай тушунтиришни билмасдилар.

Жаҳонгир Мирзо Хонзода хоним иккиси сүядиган шинам хобхоналарида ётарди. Хонада бонуий кубро Кутлуғ Туркон оқа билан хос табиб Намозхўжа Шоший, пири муршид Мир Сайид Баракадан бошқа ҳеч ким йўқ. Очик деразадан эсиб турган эпкин ҳаворанг парданни хиёл тебратиб ўйнайди. Хона мўътадил даражада салқин...

Маҳди улё ва Хоразм маликаси келаётганларини эшишишган пири муршид билан хос табиб олдинроқ ташқарига чиқдилар. Маликаларни бонуий кубро Кутлуғ Туркон оқа кутиб олди. Соҳибқирон згачиси, мана, беш ёки олти ҳафта бўлдимикин, амирзоданинг қошида, унинг ҳолида огоҳ бўлиб ўлтирибди.

Даставвал бетоблик унча чўзилмайдигандек бўлиб туолган эди. Кун ўтган сари амирзода ўзининг қувватсизланиб бораёттанини ҳис қила бошлади... Вакти вақти билан тоҳ, худ, тоҳ, бехуд бўлар, кечалар алаҳсираб чиқарди. Бир куни тушига Турўлон кирибди. Онабўри эса негадир йўқ эмиш. Даҳшатли жанг борармиш. Турғўлон душман билан қаттиқ саваш қуармиш, остидаги оти, ажабо, Жаҳонгир Мирзонинг са-мани эмиш!.. Тоғ тепасида душман Турўлонни қисиб жар ёқасига келтириб қўйибди! Бирдан саман жарликка — қоронгуликка мункиб кетибди! Қараса, са-манда ўлтирган Турўлон эмас... Жаҳонгир Мирзо-нинг ўзи эмиш!..

Амирзода чўпдай бўлиб озиб кетганди. Аввали шукуҳидан асар ҳам йўқ, юмшоқ ўринда ётар экан, бир қараганда, жойда ёттани ҳам билинмасди. Ҳалигина чексиз қайфуга ботган Хонзода хонимни юпатиб турган Сароймулхоним энди ўзи кимнингдир тасаллисига муҳтоҷ эди. Ўкраб юборишдан ўзини базўр ти-йиб, кўзларида тўла ёш эгилди-да, амирзоданинг озиб кичкина бўлиб қолган пешонасидан ўлди, бир томчи кўз ёши амирзоданинг юзига тушди...

Хонзода хоним хонага кирибоқ амирзодасига назар солди-ю «Воҳ!» дея ўзидан кетганини билмай қолди! Кутлуғ Туркон оқа билан Сароймулхоним ҳамма нарсани қўйиб маликага чопдилар. Юзларига сув сепишар экан, бир-бирига гал бермай: «Вой, шўрим!» «Маликам! Маликам!», «Кўзингизни очингиз!», «Энди сиз ҳам қўрқитмангиз!» дея саннашар-

ди чорасиз хонимлар... Бироз ҳушига кела бошлаган малика амирзодани дабдурустдан танимади, наҳотки шу ётган унинг жони-дили, паҳлавони, қўргони, жуфти ҳалоли Жаҳонгир Мирзо бўлса?.. Афсус, алам, армон аралаш бир нарса ичидан гуркираб келди. У чўкка тушди-да, амирзоданинг оёқларига ҳаяжондан қизарган юзларини босди ва ипак кўрпага унсиз-унсиз нолалар қилди...

— Шаҳзодам!.. Амирзодам!.. — ингранарди малика эшитилар-эшитилмас...

Жаҳонгир Мирзо юзига тушган кўз ёшидан сеска-ниб, кўзларини ҳолсизгина очди, атрофга қарашга уринди.

— Хайрият!.. — деб юборди Қутлуғ Туркон оқа... Маликалар ҳам умид тўла кўзларини амирзодага тикдилар. Хос табиб билан пири муршид дарров хонага кириб келдилар.

— Хайрият!.. — деди яна Қутлуғ Туркон оқа. — Кечадан бери кўзларини ҳам очмаётган эди... Энди кўзини очди! Мана... Биз шу ердамиз, амирзодам! Махди улё онагиз келдилар. Хоси ҳарамингиз Хонзода хоним келдилар...

Жаҳонгир Мирзо, қани улар, дегандай Қутлуғ Туркон оқага қаради. Хонзода хоним ўрнидан туриб Сароймулхоним ёнига борди ва шавҳарининг кўзларига тикилди. Малика амирзоданинг кўз қарашида ифода қилиб бўлмайдиган жуда кўп нарсаларни уқди, Жаҳонгир Мирзо нималарнидир демоқчи эди-ю гапиромасди, киртайиб қолган ёрқин кўзлари жавдираб боқарди. Эй фалак, дастингдан дод! Дод!

— Мана, ўзлингиз, фарзанди дилбандингиз Мухаммад Султон! — Қутлуғ Туркон оқа ипакларга ўралган чақалоқни қўлида кўтариб Жаҳонгир Мирзога кўрсатди. — Падари бузрукворини кўрмакка келибдур...

Амирзода жилмайишга уринди, аммо кучи етмади... Бирдан чап бурнидан қон отилиб чиқди, хос табиб чаққонлик билан артиб олди. Сароймулхоним Жаҳонгир Мирзонинг бошини ушлади, Хонзода хоним оёқларини уқалай бошлади, аммо оёқлар совук эди... Юзлари кўкариб кетган Жаҳонгир Мирзони жон талвасасида кўриб, Мир Сайид Барака қуръон тиловат қилишга турди. Сураи Ихлос иккинчи марта ўқилаётганида, бемор бирдан бошини кўтармоқчи бўлди ва шу ондаёқ жон таслим қилди...

Хонзода хоним ўқраганча ўзини Жаҳонгир Мирзо устига ташлади, ташлади-ю яна ўзидан кетди. Сароймулхоним ўн етти ёшга тўлмай туриб тул қолган Хонзода хонимни бағрига олиб йиғлар экан, йири орасида саннар эди:

— Амирзодам!.. Маликам!.. Амирзодам!.. Маликам!..

## VI

Амир Темур қўшини Самарқандга яқинлашиб келарди. Конигил ўланзорига еттанларида икки ўқ отим нарида шаҳар ёқдан келаётган бир кўп одамларнинг қораси кўринди. Соҳибқирон улар нима сабабдан қора кийиб олганларини даставвал тушунмади. Кейин англаб етди-ю... юрагига муз югуради! «Наҳотки, ўғлим, жигарпорамдан айрилиб қолган бўлсам?..» Чиндан ҳам бутун халойик, шаҳар аҳли, сарой атьёnlари, беклару амирлар қорага бурканиб, бошяланг, устиларига палослар ташлаб мамлакат султони истиқболига чиқсан эдилар.

Борлиқни жиловсиз фифону фарёд тутди.

Амир Темур яқин келганда кўрди: ана эгачиси Кутлуг Туркон оқа, Сароймулхоним, Улус оқа, бошқалар... Ҳаммаси бошяланг, ёқалари чок, бошлари ҳам... Амир Довуд дувлат, Амир Сайфиддин некўз, Суюрғатмишхон, Амир Жоку барлос, Мир Сайид Барака... Барчасининг дилларида алам, кўзларида ёш... Ҳеч қачон оқ ридони ташламаган пири муршид ҳам қорага бурканиб олиди. Жаҳонгир Мирзонинг тенгқур дўстлари Сулаймоншоҳ, Султон Махмуд ибн Суюрғатмишхон, уларнинг ёнида Умаршайх Мирзо, ўн ёшли Мироншоҳ ҳам шу ерда... Барчасининг майдонларда мағрут юрадиган бошлари бугун эгик... Ортда ҳадсиз оломон уларга эргашиб келар эди.

— Хонавайрон бўлдук, Амир соҳибқирон, хонавайрон бўлдук! — деди Кутлуг Туркон оқа инисиға ҳолсиз ўзини отиб... Аёллар бонуйи куброга қўшилишиб фарёд чекар эдилар. — Бандачилик экан, қандоқ, қиласлик. Жаҳонгир Мирзо бизни ташлаб кетди... Ташлаб кетди...

Меҳрибон эгачисини бағрига босар экан Амир Темурнинг кўзларидан ёшлар тўкиларди холос. Ёшу қари келиб Амир Темурни тавоғ қилас, сўнг ортга чекинар эди... Унинг бирдан Сароймулхонимнинг орқа-

сида мунгайиб турган Хонзода хонимга кўзи тушиб қолди! Гулдай чекраси сўлғин, кўзлари йиглайвериб нурсизланган, ёқалари чок, телба ҳолга келган Хонзода хоним... У ўзини бир чеккага тортиб тургандаи туяларди. Кўриб соҳибқироннинг қўнгли тўлиб кетди! Амир Темурнинг назари тушганини сезган Хоразм маликаси келиб қайинотаси пойини ўтмакка интилди, аммо соҳибқирон бунга йўл қўймади: ўксисб йиглаётган суюкли келинини бағрига босди-да, манглайидан ўпди ва деди:

— Сизни келиним эмас, қизим, дегандим... Энди... қизим эмас, ўғлим, деймен! Ўғлим ўрнида ўғлим!..

Буни эшиттан Хонзода хоним ўқраб йиглаб юборди!  
Эл мунгсираб қолган эди.

\* \* \*

Жаҳонгир Мирзони Шаҳрисабзга элтиб дафи қилдилар. Амир Темур дилбандининг қабри устида маҳобатли мақбара бунёд этдирди.

Хонзода хоним тез-тез Шаҳрисабзга ташриф буюриб шавҳари мақбарасини зиёрат айлайди. Бу гал ҳам шундай бўлди. Бир ёшли ўғли Мухаммад Султонни олиб Шаҳрисабзга келди. Келаркан, отасининг доимо юрак устида тақиб юрадиган уч бурчак қора баҳмал туморини йиглай-йиглай ўрлиниңг бўйнига осиб қўйди. Тетапоя юриб қолган ўғилласининг қўлидан етаклаб — одат бўйича, кузатувчилар ташқарида қолдилар, — ёлриз ўзи соғонага яқинлашди. Қуръон туширгач, қабрнинг совуқ тошларига ғунчадек лабларини босди, ноzik қўллари билан соғонани силаб чиқди, у-бу губорлардан тозалади...

Шу ерда ҳали ҳануз учрамаган бир ҳол юз берди. Ҳар гал тиловат тушириб, қабрни тавоф қилиб, йиглаб-йиглаб чиқиб кетаверар эди. Бу сафар нечундир биринчи марта бошини кўтариб тепага қаради... Шифтда пайғамбаримиз ҳадисларидан бири ёзиб қўйилган экан: «Ал-оқилу яътамиду ала аъмалиҳи, Вал-жоҳилу яътамиду ала амалиҳи». Хонзода хоним унинг маъносини тушунди: «Ақлли одам ўзининг куч-куватига ишониб яшайди, нодон — ҳою-ҳавасларга суюниб яшайди...»

Хоразм маликасининг юраги орзикқандан орзиқиб кетди!.. Мухаммад Султон эса мақбара ичида тетапоя ўйнаб юрарди.

1996—1999. Сизта, АҚШ — Тошкент.

## ЁЗУВЧИ КАМОЛОТИДАН ДАЛОЛАТ

Ёзувчи Мұхаммад Алиниң Амир Темурға багишлиңган каттагина романи газета ва журнал сақифаларыда эълон қилинди. Бундай қараганда мавзуу янги эмас. Жаңон миқёсида Амир Темурнинг ҳаёти ва даври ҳақида ҳар хил жанрларда юзлаб асарлар битилган. Уларнинг кам қисмигина ўзбек китобхонларига маълум. Кейинги пайтларда истиқлол туфайли ўзбек ёзувчилари ҳам бу мавзуга қўл урдилар. Мазмун жиҳатдан Темур ҳақидағи асарлар ҳар хил йўналишда ёзилган. Шўролар даврида Амир Темур ҳақидағи асарларда бу улур саркарданинг шахсияти ва фаолияти тегишли салбий тафсиллар ҳаддан ташқари бўрттириб, қабартириб кўрсатиларди. Унинг тарихда туттан ўрни ва салоҳияти эса иложи борича камситиларди. Ҳатто баъзи ўринларда кераксиз уйдирмаларга ҳам ўрин берилаверарди. Аксарият ҳолларда бундай тасвиirlар улур сиймо образини салбий персонаж даражасига тушириб қўйган эди.

Мустақиллик қадриятларни қайта тиклаш даврини бошлаб берди. Шу маънода Амир Темур шахсияти ва унинг тарихда тутган ўрнини ҳам қайта кўриб чиқиш масаласи илм-фан ва маданият олдидағи мұҳим вазифалардан бири бўлди. Бу хусусда ўтказилган йирик илмий анжуманлар ва тантаналар мазкур мавзунинг ишланишига асос бўлди. Бадиий тафаккурдан кўра илмий тафсилотларга бой бўлган Бўрибой Аҳмедовнинг «Амир Темур» номли асари Темур ва темурийлар даврини қайта кашф этиш нуктаи назаридан жиддий тадқиқот сифатида яратилди. Бундан ташқари Абдулла Орипов, Одил Ёқубов, Тўра Мирзоларнинг драмалари, Пиримқул Қодировнинг, Хайдардин Султонов, Хуршид Давронларнинг насрый асарлари бу мавзуни ёритишга катта ҳисса бўлди. Бора-бора Амир Темур шахсиятининг қай даражада улуғвор эканлиги яққол кўрина бошлади. У ҳақда кўп қунт ва меҳнат сарф қилиб

эпопея шаклидаги йирик асарнинг яратилиши ҳаёт талаби бўлиб қолди. Бу вазифани бажариш ёзувчи Мұхаммад Алиниңг зиммасига тушди. Шуниси эътиборга сазоворки, Мухаммад Али бунгача «Сарбадорлар» романини ёзиб, тарихий асарни қандай ёзиш кераклигини ҳис қилган эди. Бундан ташқари «Сарбадорлар»-нинг бир неча боблари бевосита Амир Темурга бағишиланган бўлиб, бу образни яратиш юзасидан илк чизгилар сифатида ўртага ташланган эди.

Мұхаммад Али бу улуғ жаҳонгир ҳақидаги асарини «Улугъ салтанат» деб атади. Адаб қарийб ўн йил, балки ундан ҳам кўпроқ йиллар давомида бу миссализ саркарда ҳақидаги илмий ва адабий маълумотларни қунт билан ўрганди. Уларни ўзича қайта баҳолади. Аниқ хуласаларга келди. Шундан кейингина қўлига қалам олди. Шу йўсинда «Улугъ салтанат» романни майдонга келди. Мана энди асар китобхон қўлига бориб тегди.

Амир Темур сингари улуғ саркарда ҳақида ҳар хил йўсинда асалар битавериш мумкин. Қаҳрамоннинг ҳаёти кўпроқ жантлар билан боғлиқ. Шу маънода у ҳақидаги асарни жангнома тизмаси сифатида битиб қўяқолиш мумкин эди. Мұхаммад Али бошқача йўл танлади. Улуғ саркардани у кўпроқ кундалик маиший ҳаёт, оила, қариндош-уруг ва дўст-ёрлар муҳитида кўрсатади. Фарзандларининг тарбияси, каттароқ бўлганда уларнинг қисмати, ҳар хил йўсинда рўй берган ташвишлари, уларни уйли-жойли қилиш, ўзига мунносиб келин топиб уйлантириш, фарзандларининг бошига бирор иш тушса уларга ҳамнафас бўлиб, уларнинг дардига шерик бўлиш, ҳакозо ва ҳакозолар. Қисқаси, адаб бу улуғ саркардани оддий одам қаторида кўради. Оддий одамнинг бошига қандай қувончли, мароқли кунлар ёхуд қайғу, аламли ташвишлар тушса, унинг бошига ҳам шу хилдаги ҳодисалар тушади. Оддий одам сингари у ўзида йўқ даражада қувона олади. Бошига ташвишлар тушганда ғам-ғуссалар аламида ёниб куяди. Сўзсиз катта умидлар бағишиланган балки валиаҳдликка мўлжалланган ўғил Жаҳонгир Мирзонинг йигитлик чоғидаги ўлими унинг белини букади. Бу улуғ зотнинг романда тасвирланган алам ва изтиробларини китобхон худди ўзиникидек ҳис қиласиди. Не-не умидлар билан турмуш қурган ақли расо келин — Хонзоданинг бева қолиши, саркарданинг алам

ва ташвишларини бир неча бор оширади. Романда шундай бир чизги борки, бу улуг зотнинг одамийлик хислатларини алоҳида таъкидлайди. Тўйдан кейинги кунлар Хонзода хонимни келиним эмас, қизим, деб атади... Бу сўзларда катта маъно бор эди. Жаҳонгир Мирзо вафот этганда бағри увалган Амир Темур Хонзода хонимга шундай дейди:

«— Сизни келиним эмас, қизим, дегандим... Энди... қизим эмас, ўғлим деймен. Ўғлим ўрнига ўғлим!..»

Умуман, у аёл зотини камситишни ўзига эп кўрмайди. Аёлларнинг ўрни эркакларга нисбатан маълум даражада паст бўлиши керак деган фикр хаёлига ҳам келмайди. Аксинча, аёл хусусан унинг орқа томонини мустаҳкам сақлаб, қўриқлаб турган оқила, Сароймулхонимни у ўта қадрлайди. Бугина эмас, Сароймулхоним унинг учун биринчи ва доно маслаҳатчи. Умуман роман саҳифаларида бу улуг саркарданинг бирор аёл зотини камситганини, унга қўпол муносбатда бўлганини кўрмаймиз. Бу жиҳатдан Амир Темур фақат ўз замондошлирагигина эмас, балки бугун учраб турадиган аёлга нисбатан паст назар билан қаровчиларга ҳам ибратдир. Бу хислатлар Амирга тегишли юқори маданият белгисидир. Бироқ у доим меъёрни сақлаган ҳолда иш тутарди. Назаримизда ҳар қандай душман ҳам унинг учун инсон фарзанди эди.

Муҳаммад Али романида тасвирланишича, Амир Темур шўролар давридаги асарларда кўрсатилганидек, доим қиличидан қон томиб турадиган золим саркарда эмас, унинг фаолиятида бошқа амирлар, мулоғимлар, ҳар хил даражадаги хизматчиларга ҳам инсонлик шаънига ярашмайдиган бешафқатсизликни кўрмаймиз. Адид бунга алоҳида ургу қиласи. Бироқ у душманга нисбатан қатъиятсиз эмас эди. Тарқоқ Туркистон элини бирлаштириш осон бўлмаган, албатта. Бу ишни амалга ошириш учун қатъият зарур эди. Шундай экан, бирлаштиришда рақибларига қарши курашда бегуноҳ одамларнинг ҳам жабрланиш ҳодисалари бўлгани табиий. Бошқача қилиб айтганда, қуруғига қўшилиб ҳўли ҳам ёнган пайтлари оз бўлмаган. Оилада, жамоат орасида қатъиятликдан кўра раҳмдилликни касб қилган саркарда гуноҳкорлар билан бир қаторда гуноҳсизларнинг ҳам азият чекишига ачингани табиийдир. Саркардага хос бу

хислат Абдулла Ориповнинг «Соҳибқирон» драмасида ҳам таъкидланади.

Мұхаммад Алиниңг романида шу мантиқни тасдиқлайдиган қатор эпизодлар бор. Ишончли маңбардан күчирилган бу эпизодлар шуни күрсатадики, керак пайтда қаҳру ғазабни ишга солған амир күп ҳолларда ўзининг раҳмдиллигини күрсата олған. Романда тасвиrlанганидек, Шибирғон ҳокими Зиндачашм опардий Амир Темурга нисбатан сотқинлик йўлига кириб бир неча бор фитна тузади. Амир Темур эса уни бир неча бор кечиради, айрим ҳолларда жазо беради. Яна ўз ўрнига тиклаб қўяди. Романда күрсатилишича, бу ҳол тўрт-беш марта такрорланган. Охирида риёкор амир эпақага келавермаганидан кейин, уни оғир жазога муносиб кўради. Шунда ҳам уни қандай жазолаш ҳақида ўз мулоzимларига бирор йўл-йўриқ, күрсатмайди.

— Уни менинг кўзимга кўрсатманлар, — дейди холос.

Романда тасвиrlанган бошқа бир ҳолни эслайлик. Бу Темурнинг яқинларидан бири амир Мусо билан боғлиқ. Амир Мусо анча вақтлар давомида Амир Темурнинг хизматида юрган, содик мулоzимларидан бири ҳисобланарди. Амир Ҳусайнга қарши жанг бораёттан вақтда амир Мусо Темур қўшинидан ажралиб чиқиб кетади. Кейинчалик фитначи Зиндачашм опардий гурухига бориб қўшилади. Шунга қарамасдан Амир Темур уни сўроқлаб, топиб, гуноҳларидан кечади ва яна унга ишонч билдириб сарой хизматига жалб қиласди. Романда тасвиrlанишича шундай ҳоллар ҳам бўладики, ўлимга ҳукм қилинган баъзи бир амир, мулоzимлар жазодан тўхтатилиб яна ўз хизматларига тикланадилар.

Амирнинг бу хилдаги хислатлари унинг зифлигидан эмас, балки унинг қудрати ва улуғворлигидан да-лолатdir. У одам зотига ишонади. Маълум бир пайтларда қинғир йўлга кирган кимсаларнинг кейинчалик садоқат билан хизмат қилишини сезиш қобилияти ҳам бор унда.

Романда кўп мاشаққатлар билан бўлса ҳам Амир Темур ғалабадан ғалабага ўтиб камол топаётган саркарда сифатида кўрсатилади. Романин ўқиб, бу камолотнинг иккита асоси бор эканини англаймиз. Биринчиси шуки, қарийб икки аср давомида Туркистон хал-

ки Чингизхон босқинчилари оёклари остида қолиб, уларнинг зулм ва заҳматларидан етарли даражада бе-зиб улгурган эди. Эндиликда ундан кутилишининг йўли топилгандек кўринди халқقا. Шу боисдан халқ Амир Темурни қўллаб-қувватлади. Масаланинг иккинчи томони яна ҳам мұхимрок, яъни чингизийлар сиёсатининг негизи адолатсизлик, диёнатсизлик эди. Амир Темур ўзининг биринчи юришидан бошлаб адолат ва диёнат байроини юқори кўтарди. Шу боисдан халқ бу байроқ сари интилди. Натижада Амир Темурнинг қўшинига қўшин қўшилиб қудратли кучга айланди.

Улур жангларда қуруғи билан ҳўлнинг баравар ёниши ҳақида фикр билдирган эдик. Баъзан жаҳонгир Амир Темурнинг юришларидан кўп қирғинлар бўлганилиги хусусида эшитиб қоламиз. Зотан, шўролар даврида яратилган асарларда асосан шу масалага ургу қилинار эди. Эндиликда бир тасаввур қилиб қўрайлик. Жаҳонда бу дунёни забт эттан саркардалар кўп ўтган. Уларнинг қай бировидир, мана бу «қуруқ», яъни душман, мана бу «хўл», яъни бегуноҳлар, деб саф қилиб ажратиб ўлтирган, дейсизми? Амир Темурнинг юришларига келганда ҳам бу хилдаги ажратишлар қилишининг иложи йўқлиги ўз-ўзидан маълум эмасми? Бироқ бошқалардан унинг фарқи шундаки, у инсоф ва адолатни, таъкидлаганимиздек, ўзига байроқ қилиб олган.

Бундан ташқари, бадиий ижодда ёзувчи идеали деган қонуният ҳам бор. Бу жиҳатдан мен бир нарсага эътиборни тортмоқчи эдим. Шўролар даврида Алексей Толстой «Пётр I» романини эълон қилди ва катта мукофотга сазовор бўлди. «Пётр I» ибрат бўларли тарихий роман сифатида тан олини ва бугун ҳам ўз қимматини йўқотган эмас. Бугун Россия матбуот саҳифаларида Пётрнинг камчиликлари ҳақида фикрлар эълон қилиняпти. Уларнинг ичида ҳайратдан ёқани туладиган гаплар ҳам бор. Савол туғилади: А. Толстой Пётрнинг шу томонларини билганми, йўқми? Албатта, билган. Бироқ уларни алоҳида ургу билан романда тасвиrlашни лозим кўрмаган. Унинг учун Пётр Биринчини қолоқ Россияни бирлаштириб, кенгайтириб тараққиётнинг янги босқичига кўтара олгани мұхим бўлган. Шу боисдан А. Толстойни кўпроқ император Пётрнинг ўзининг — яъни адабнинг мақсадларига, идеалига тўғри келадиган томонлари қизиқтирган. Демак, бу ерда объектив ҳақиқатдан келиб чиқадиган ёзувчи истаги, нияти ва идеалини ҳам ҳисобга олмаслик мум-

кин эмас экан. Шу маънода, бугун хусусан мустақиллик даврида Амир Темур сиймосини ярата туриб, шўролар давридагидек, саркарда образини бир томонлама ёритиш китобхон учун ҳам, жамият учун ҳам наф келтирмаслиги аниқ.

Шундай қилиб, Мухаммад Алиниг янги романи кўп жиҳатдан улут саркарда Амир Темурнинг ҳали китобхонга кўп ҳам маълум бўлмаган, барчага ибратли бўларлик янги-янги хислатларини очиб берди. Бошқа асарларда кўрсатилган ижобий хислатларни яна бир гал уруулади. Шу маънода адабнинг бу романи ўзбек адабиётида пайдо бўлган янги реалистик тарихий романнадир.

«Улут салтанат»нинг бадиий қимматини белгилайдиган бир хислатини алоҳида қайд қилишни истар эдик. Ёзувчи тарихий вазиятни аниқ ифодалайдиган, харакатерининг ички оламини тўла ва теран очиб берадиган воқеаларни излайди, аксарият ҳолатларда уларни топа билади ҳам. Бунинг ўзигина етарли эмас албатта, ёзувчи ўша топилмаларни зарур тафсилотда, аниқ ва жонли тасвирлаб берадики, улар худди моҳир рассом чизган манзаралар сингари китобхон кўзи олдида бор жозибаси билан очиқ, тўла намоён бўлади. Зотан ёзувчилик санъатининг сири ҳам шунда бўлса керак. Бошқачароқ қилиб айтганда, воқеаларни тарихими, ё тўқимами улардан қатъи назар саржин сингари қалаб ташлайвермайди. Яна аникроқ қилиб айтганда, у тасвирда меъёрга, мувофиқлик талабига етарли даражада риоя қиласди. Шу боисдан қайсиdir манбалардан бизга маълум бўлган воқеалар ҳам янгича жилоланади, уларни биз худди янги воқеалар сифатида қабул қиласми. Натижада роман зўр қизиқиш билан ўқилади ва енгил қабул қилинади. Бу хислатлар ёзувчи қаламининг камолотидан далолатдир.

Мухаммад Али бу романида услуб жиҳатидан янги босқичга кўтарилиди. У илгариги асарларидагидек, сюжетни, образлар бойлигини мураккаблаштириш билан банд бўлмади. Воқеаларни дангал олиб, кўпроқ танланган қаҳрамонларнинг ички оламига назар ташлади. Бошқача қилиб айтганда, ўзини кўп сўзлилик ва кераксиз тўқимачилиқдан холи тутди. Бу жиҳатдан унинг жумлалари насрдан кўра кўпроқ назмни эслатади.

Матёқуб Қўшжонов,  
академик.

## **МУНДАРИЖА**

Биринчи боб .....
Иккинчи боб .....
Учинчи боб .....
Тўртинчи боб .....
Бешинчи боб .....
Олтинчи боб .....
Еттинчи боб .....
Сакқизинчи боб .....
Тўққизинчи боб .....
Ўниинчи боб .....
Ўн биринчи боб .....
Ўн иккинчи боб .....
Ўн учинчи боб .....
Ўн тўртинчи боб .....
Ўн бешинчи боб .....
Ўн олтинчи боб .....
Ўн еттинчи боб .....
Ўн сакқизинчи боб .....
Ўн тўққизинчи боб .....
Йигирманчи боб .....
Йигирма биринчи боб .....
Йигирма иккинчи боб .....
Йигирма учинчи боб .....
<i>М. Кўшжонов. Ёзувчи камолотидан далолат.....</i>

**МУҲАММАД АЛИ  
УЛУФ САЛТАНАТ**

*Тарихий роман*

**Биринчи китоб  
ЖАҲОНГИР МИРЗО**

«Шарқ» нашриёт-матбаа  
акциядорлик компанияси  
Бош таҳририяти  
Тошкент — 2002

Муҳаррир *M. Mansurov*  
Бадиий муҳаррир *M. Самойлов*  
Техник муҳаррир *P. Бобохонова*  
Мусаҳдиқ *H. Мухамедиева*  
Саҳифаловчи *L. A. Цой*

Терілігі берілді, 14.05.2002. Босиңға рұхсат этилди 24.10.2002.  
Бічими 84x108 1/<sub>2</sub>. Балтика гарнитурасы. Офсет босма. Шартлы  
босма тобоги 17,6. Нашриёт ҳисоб тобоги 18,0. Адади 5000 нұсха.  
Буюртма № 3490. Бағоси көлишилган нархда.

**«Шарқ» нашриёт-матбаа акциядорлик компанияси**  
**босмахонаси**  
**700083, Ташкент шаҳри, Буюқ Турон кўчаси, 41**



